

# BAPTIST CHURCH OF MIZORAM

R.No. S.R.1 of 1980-81

(Registered under the Societies Act XXI of 1860)

**Serkawn, Lunglei District, Mizoram, India -796 691.**

Website: [www.mizobaptist.org](http://www.mizobaptist.org)E-

mail: [generalsecretary@mizobaptist.org](mailto:generalsecretary@mizobaptist.org)

**Rev. F.Ramdinmawia**

**General Secretary**

9436779743 (M)

*Motto: Gospel For All*



## FORWARD

Ka Hringnun leh Miria-te Khawvel tih lehkhahu ziaktu Rosanglura Fanai chanchinah hian Mizo mipuiten zirtur tam tak kan neiin ka hria a, a thu ziahte hi a challenging ka ti hle mai. Missionary-te tan phei chuan chhiar ngei ngei chi tak a niin ka hria.

Tin, he lehkhahu hi Mire hnam tana hlu lehzual turah ka ngai a, a chhan chu; Mire History leh an hnam dan leh hrai, thangtharten an hriat tawh lohte leh Mire rama North East India General (NEIG) Mission hunlaia Missionary hmasate chanchin leh an hnam zinga Kristian hmasate chanchinte rawn tarlan a ni. He lehkhahu hi Mire hnam tan chuan a la hlu tulh tulh dawn a, nakinah chuan an hnam, Mire tawnga lehlin hial pawh an la duh ngeiin ka ring tlat a ni.

Lehkhabu ziaak hi thil awlai lo tak mai a ni a. Mire hnam tana thilhlu tamtak tihsaka, chung a thiltihte ziaak ngeia dahtheitu BCM in Missionary Rosanglura Fanai kan nei hi a ropui ka tiin, a mimal tak pawhin ka chhuang takzet a ni. He lehkhabu hi Pathian rawngbawlina kawnga chotu atan hmanga, hlawkpui ngei tur in chhiartu zawng zawngte duhsakna ka hlan e.

  
**F. Raminawia**

## ZIAKTU THUHMA

Mizo ṭawngin lehkhabu ka la ziaak ve a nga, a bu in ka la chhuah ve ang tih pawh ka la suangtuah ngai miah loh lai in BCM a kan hotu te leh Pu M.C. Awia, Mualchin Printing Press neitu te ṭhahnem ngaihna in **‘Ka Hringnun leh Miriate Khawvel’** tih chu ka lo chhuah ve der mai a, Lalpa remruat dan hi hriat phak a va ni lo em! A bu ka chhuah hmasak zawk kha Pu M.C. Awia’n (Pu Awitea) cheng khat pawh ka sen ngai lovin a bu min chhuah sak a, a man pawh chengkhat pawh a la bawh hek lo. Pu M.C. Awia (Pu Awitea) chungah ka lawm takmeuh a ni.

He lehkhabu kan chhuah hmasak chu rin loh tak maiin reilote chhungin a zo ta mai a, mipui lam a ṭanga chhuah leh tur leh Lalpa kut chak thiltithe i ka tawnhriatte ziaak lang tawh turte, ka chhuah hmasak leh tun inkâr a kan rawngbawlina Lalpa’n mal a sawmnate dah tel tur a thurawn min pek ṭhin a vangin hei; ka han chhuah leh chu a ni a.

Mite min beisei angin Lalpa kut chak thiltithe i ka tawnhriatte, ka chhuah hmasak 2007 leh tun inkâr a Lalpa’n kan rawngbawlina mal a sawm dante, North Esath India General (NEIG) Missionary-te chanchin leh an hnathawh rahte ka ziaak belh nual bawh a. Thlalak pawh ka dah tam deuh bawh.

Abu kawm a thlalak ka dah hi ngaih loh lam a min ngaihsak lo tur in chhiartute ka ngen che u a, Mire ram a ka kal tirh a ṭanga Lalpa hruaina leh kan rawngbawlina Lalpa’n mal a sawm zia leh kan lo changkân tak zia tihlan ka tumna a vang a hetiang a kawm hi siam ka ni tih chhiartu ten min hriat sak ka duh a ni.

BCM General Secretary Rev F.Ramdinmawia’n Forword min ziaak sak a vangin a chungah ka lawm takmeuh bawh a ni. Ka nau Lalramliana Fanai in hun chep tak kârah min lo endik sak bawh a, keini ang lehkh a thiam lo lehkh a ziaak chu a endik pawh ahautak hle dawn a ni tih pawh ka hria a, zaidam tak leh dawhthe i tak a abul a

ṭanga a tawp thlenga min endik sak a vangin ka nau Lalramliana Fanai (Arama) chungah pawh ka lawm takzet a ni.

He leh khabu chhiartute'n Lalpa ropuina leh a thiltihtheih zia hria a Lalpa rinna kawngah leh aram tan a inpekna kawngah engemaw ti zawng tal a hlawkna in chharchhuah hi ka duh ber leh ka tawngtaina a ni.

Mb No: +91-7085258864

Durtlang Kawnzawl  
Aizawl Mizoram



(REV, DR. ROSANGLURA FÂNAI)

### **He lehkhabu in târlan atumte:**

1. Mizo te'n kan unau Miriate chanchin kan hriat theih nan.
2. Mizo leh Miria te'n unau kan nih tih kan inhriat theih nan.
3. He lehkhabu a Miria te History leh an hnam dan leh hrai, achhiartu Mizo-te tan a tangkai lem lo tur chipchiar angreng taka ka ziaak nachhan chu kan unau Miria-te hian nakinah an la mamawh dawn a ka hriat a vang leh midang chipchiar deuh a ziaktu an la awm loh a vanga ziaak chipchiar ka ni.
4. Lalpa venna leh hruaina a ka tu leh fate an la awm zel a nih chuan; chung ka tu leh fate chuan min thlahtu te leh kan chhungkaw chanchin an lo hriat ve theih nan. (Lalpa'n ram dang, hnam dang zingah min dah daih si a)
5. Nupa inthen pawl thui zia leh fahrah nun hreawm zia mite'n ka nun a tang an lo hriat theih nan.
6. Pathian in hmeichhia leh mipa inhip tawna leh inhmangaihna min pek hi Pathian tih mite tan chuan zahawm leh thianghlim tak a hman theih a ni tih mite'n ka nun a tang a tlemte tal an hriat ve theih nan.
7. Pathian in a mite tan chuan thlemna rual a tlanhhuahna 'chance' a siam sak chian zia, ka nun a tang a tlemte tal mi te'n an lo hriat ve theih nan.
8. Pathian in a rawng bawl tur mi a thlanah a uluk zia leh a thlan ate pawh afiah fo thin a ni tih mite'n ka nun atanga an hriat ve theih nan.
9. Nupui pasal turah Pathian remruat ngei hriat thiam a tul zia leh Pathian in min pek kan nupui, pasal a lungawi leh ka nupui/pasal hi ka phu tawh leh ka tana thaber tura Lalpa min pek a ni tih dam tak a pawm hi nupa hlimna thuruk a nih zia mite'n kan nupa nun a tanga tlem tal an lo hriat theih nan.
10. Nupui pasal neih chung changah kum tling ngei a inneih a tul zia leh chhungkaw din tura inpeih fel vek hnu a chhungkaw din a pawimawh zia mite'n an hriat theih nan.


11. Nupui pasal nei a chhungkaw din kan tum a nih chuan mahni hmasial tak pawh a nulat tlamngval lai a hmeichhiat mipatna hman loh a that zia mite'n an lo hriat theih nan.
12. Lalpa min kohna hi hnial theih leh hnial ngam chi a ni lo a ni tih mite'n an hriat theih nan.
13. Lalpa'n a rawngbawl tur a min koh hnu pawhin a hmun leh hma a zirin kan thawhna tura a ruatna hmun min hruai thleng nghal mai lovin zirtirna tam tak min la pe thin a ni tih mite'n ka nun atanga tlem tal an lo hriat ve theih nan.
14. Lalpa aw hre turin a chang chuan tihtakzet a Lalpa kan pawl a kan kar a ngaih chang a awm a ni tih ka nun atang a mite'n tlemte pawh an lo hriat ve theih nan.
15. Lalpa rawngbawltu te hi chhel leh Lalpa zai ngaih hle angai a ni tih mite'n an lo hriat theih nan.
16. Lalpa chu a thutiamah a lo dingnghet takzet a ni tih ka nun atang a mite'n an lo hriat theih nan.
17. Lalpa'n a rawngbawltu te hi kan tuar a phal lai in atul hunah chuan min chhanchhuak turin atlai ngai lo a ni tih ka nun leh ka thil tawng atanga mite'n tlemte tal an lo hriat theih nan.
18. Missionary te'n kan thawhna hnamte kan hriat chian a ngai a, a tul ang zela kan thawhna ram mite awmdan anga kan awm theih a ngaih hun pawh a awm thin a ni tih ka Missionary pui te'n an hriat lehzual theih nan.
19. A tul ang zela Missionary te'n kan thawhna ram mite dan leh hrai kan zah sak thiam a ngaih hun a awm a ni tih Missionary te'n kan hriat thar leh thin theih nan.
20. Missionary te'n kan thawhna ram mite tawng thiam a pawimawh zia kan hriat lehzual a kan thawhna hnamte tawng kan zir taimak lehzual theih nan.
21. Kan unau Miria te hi taksa leh thlarau a chhanchhuah an ngaih zia Mizo Kristian te'n kan hriat theih nan.

22. Kum tam tak liamta a tanga Mizo Krista pasaltha te'n Mire hnam zinga rawng an lo bawl tawh dan leh chungte chu tute nge an nih Mizo mipui te'n kan hriat theih nan.
23. Pathian hian a rawngbawl tur hian mithiam chauh a thlang lova, mi mawl leh lehkha thiam lo zawkte pawh a lo thlang ngei a, a tul angin finna, thiamna leh hmanruate pawh a pe ngei a ni tih keimah a tanga mite'n tlemte tal pawh an lo hriat theih nan.

## BUNG 1

### KA PIAN LEH MURNA

Min hmangaihtu, ka Nu leh ka Pa leh ka pi leh ka pute vangkhua, an lo Lalna ram leh khua leh tui chu Mizoram chhim chhak lam, Tuichang ral, Thingsai khua aṭanga Km 7 a hla, Bualpui 'H' a ni a. Kan khua Bualpui 'H' chu kum 1968 khan Mizoram buai, sawihkhawm zingah khan tel vein Grouping Center hnai ber Thingsai khaw lam panin lungchhe tak leh an hmalamah hun thim tak an hmachhawn dawn ani tih hre reng chungin Lota nupui anga hnung lam hawi kir pah reng chungin; mangang leh thlaphang em em in, alian ate, mahni zawhtawk ṭeuh phurin Thingsai khaw lam panin an kal nguah nguah a.



Tudang ngâi bik lova an tuallenna, Bual khawpui ngâi leh thlahlel ngawih ngawih leh mahni intodelh a hlim taka an lo lèn ve ṭhinna chu chhuahsanin Thingsai khua chu an han thleng ta a. An khaw ṭhenawm Thingsaiah chuan; khaw ṭhenawm mah nise; an kal dan in azir loh em vangin nidanga an kal ṭhin nen chuan aboruak adang hle ang tih arin mai theih awm e.

Thingsai khua a an awm lai hian eiin achhiat êm vang leh aboruak an ngeih loh vangte pawh a ni ang, an inhloh nasa hle nghe nghe a ni. An tan thlawhhma lâk pawh ahautak em em mai a, an khaw ram; Thingsai khua a ṭanga mel tam takah lo an va nei ṭhin a, vai sipai ho lah chuan lo a riah an phal bawk silova, lova riah an phal lo mai nilovin an fehte chuan chawfun ken takngial pawh an phal lo lehzel si a, chuvangin chhungkaw tam takin thlawhhma an lâk theih loh a vangin nasa takin ṭam a tlak phah nghe nghe a ni.

Mite chu an rethei em avang leh an ei achhiat em avangin hrisel lohna in a tlakbuak a, tam takin an thih phah a ni. Kuli atam em em reng mai bâkah, damlo leh thei lote pawh vai sipai ho chuan kuli



turin an phut lui zel bawk si a; vai camp sak leh camp kulh sak hnattlang an ko reng mai bawk a, rinhlelh thu mai maiah vai sipaite chuan mitam tak an vua in an hrem vak vak mai bawka, mipa puiling vuak tuar lo leh hrem tuar lo an awmlo hial awm e.

Rambuai avanga Bualpui 'H' khua in an tawrh dan sawi vek seng lo mah ila a tlangpui chu hetiang hi a ni:

1. Bualpui khua, Thingsai khua a sawikhawm hun 4<sup>th</sup> April 1968.
2. Khaw hal hun 15<sup>th</sup> April 1968.
3. Khaw haltu : Assam Rifle Capt Negi leh ahote.
4. In kâng zawng zawng zât : In 102.
5. Khaw hàla thil kângte ahunlai pawisa hlutna a chhutin Rs 3,00,000/-(Nuai thum) hu vel niin an ngâi.
6. Bualpui khawmi ram tana nun hlante.
  - 6.1. Pu Hranglinga. Silchar jail-ah vuakhlum a ni.
  - 6.2. Rualthanga.
  - 6.3. Thanghrima
  - 6.4. Thangruaia.
  - 6.5. Hmingthanzuala te an ni.
7. Bualpui khaw hlui a let leh hun: Kum 1973. Vai sipaiin an awp zui leh nghal.

Bualpui khua hian rambuai avangin an tuar nasa em em a, chuvangin zirna lamah pawh nasa takin an tlakchhiat phah a, lekhathiam pawh an chhuah tlem phah niin a lang,


Mizoram buai chu a zual tulh tulh a vangin Mizoram pum mai chu hun thimin a tuam chhah tulh tulh mai a, Mizoram hmun hrang hrangah tàm, hri leh harsatna chi hrang hrang a vangin mite chu an rum tlawk tlawk mai a, Cerfew rei deuh deuh puan a ni reng mai bawka, puitling chin tan kuli, achhun azanin a awm reng bawksi nen.

Chutia Mizoram thim chhah takin atuam lai mek chuan Thingsai khaw veng pakhat 'Pemveng' an tih a ka Pu Tintlunga te inah chuan tukhaw hriat lovin April 18, 1968 chawhnu lam chuan mimang piangin he ka khualzin kawng bumboh leh chhuk cho deuh mai zawh tan turin khawvel êng ka lo hmu ve ta a ni.

## LAL HEMPHUNGA BUALPUI

Bualpui ‘H’ khua

Ka Nu leh Pa leh ka pi leh pute vangkhua hian chhiatna rapthlak tak lo tawh tawh mahse anmahni veng a tuallai lènna a tana vangkhua lo duan sak a, a thilsiam mawi leh duhawm, nungchate tualchaina leh làm an lo



thaina hnum, vau, ùah, fâr leh tlaizawng thing mawi tinreng vulna hmun, an khaw hming a tana hming ropui tak leh an LAL zaidam leh Pathian Hmangaihna tuipui burtu Hemphunga hming chawi a ‘LAL HEMPHUNGA BUALPUI’ ti a, Ahming Maka, Remruttua’n a lo ruat sak tawh chu tuma tih bo rual lohvin tun thleng hian òhan chhoh lam a la pan zel a ni. He khaw hming awmze thuk tak nei a lo phuah saktu leh tun thlenga veng enkawl tlattu LALPA chu fakin awm mawlh rawh se.

He khua **BUALPUI** hian a hming alo put dan leh a khaw thleng a rem em em dan hi tlemin han sawi hlek ila: He khua aṭanga chhim lam hla vaklovah hian ‘Sabualkàwn’ a awm a, chu sabualkàwnah chuan sa chitin reng mai hian inbual nan an hmanga, zawng leh ngau leh sava chitin reng mai an awm bawka, chung nungcha chitin reng maite chuan chung lai a ramngaw dur khung maiahte chuan nunchan zirin làm an lo thai tawh òhin a.

Tin, a khua hi chhim leh hmar zawnga khaw dung awm a ni a, khaw lu lamah leh khaw mawng lamah hian mual pawng rem ṭha êm êm mai a awma, a chhim lama tlang awm chu a hniam deuh zawka; mahse, amual alian in rem êm êm mai a, ram buai lai hun engemaw chen phei kha chuan vai sipai hovin an luah nghe nghe a ni. Tunah chuan in a awm vek tawh. Kan naupan lai chuan chu tlang velah chuan pa chitin reng mai, Papâr, pasawntlung, palengsen, palengvâr leh pauithinte kan veh ṭhin a, iptepui âng hmawh hmawkin pa chitin reng mai chu kan hawn ṭhin a, pauithin phei chu kan beng thawh thawka, “A hmin tawh” kan ti a, kan bâr tawn tawn a, tui kan ti thei

thin khawp mai. Hemi tlang chhuah lampangah hian ‘Fâr tlang’ a awm leh a, chu tlangah chuan fâr thing a tam êm êm mai a, thli in a tih tiahte chu kan phura, kan khua chuan zanah far thing fîm chu khawnvarah kan hmang thin, mahse akhu a ung duh khawp mai.

Hmar lam tlang chu a sang zawka, a lei chu a tha em em mai a, hmanlai chuan chu tlang ami chu belvawtu te’n bel vuakna a tan lei an lâk thin a vangin ‘Bellei tlang’ an ti a, kan khaw dâi velah hian thei chi hrang hrang a tam êm êm mai a, khawchhung lam a tlang rawn pharh thla, hmun zawl thlen hma chuan in lên thumin akal thla a. Hmar thlang lam Thingsai lam kawtchhuahah kawtthler pheï nuam takin a awm leh bawk a. Tunah chuan Bellei tlangah pawh in tam tak a awm tawh.

Chhim lam tlang leh hmar lam tlang inkâr chu awih zâl, (awih tlan) in sak rem êm êm si hian a awm a, lo fîng hnih awm vel hian zawl duai mai a, chûan chung leh chûan hnuai hian a awm a, chûan chung zawkah chuan in lên hnih in a kala, mual zau tak a awm bawk a, chumi mualah chuan kan naupan laichuan Maruati pa te bawng pasen leh bawng pavar an insi thin a, akhua in kan en luih luih thin a, a ennaum thei thin khawp mai. Chung kawtthler nuam leh mual zau takah chuan tlai atanga zan thim; pafa hmei hai thleng hian naupang kan pawnto luai luai thin a, nuam tak a ni.

Chhuah lam chûan hnuaiah chuan Primary School a awm a, kàwn zawl zau tak, chhim lam tlang leh hmar lam tlang a tanga bawlhhlawh hnawm tinreng arawn len tlak tlin khawmna a nih a vangin lei a tha em em renga, kum tin akhua in kàwnah chuan anţam hmun kan siam thin a, anţam a tha duh em em a, anţam rêm lamah chuan naupang ho chuan anţam kung bul kawm tha tak takte chu khelkawm lemah kan la a, chu chuan hawki te pawh kan khel lem thin a, anţam huan hungna palte chuan bûkte kan sa a, a chhun a zanin chu kan bûkteah chuan hlim takin hun kan hmang thin a.

Thlasik alo nih tawh chuan chu kàwn zawlah leh kan in chungahte hian vur hi a khawn iaih uaih thin a, kàwn chûan hnuai zawk zawlah chuan vûr a tlak chhah deuh thin a vangin naupangte chuan raw phel in vûr kan dawh thin a, zing khuante vaivikah kan vûr dawh chu la in

kan inah kan ʈhian zaho chuan zing khaw vawt em emah vûr chu kan thial ri ràwp rawp ʈhin a, a chang leh kan in zakzeh siak bawk ʈhin. Khang hun lai khan pheikhawb bun tur pawh kan la nei silova, zing khuante vaivikah, vûr zingah kan pên thawih thawih a, vawt kha kan hre lo nge, vawt kha engahmah kan ngailo zawk tih pawh ka hre thiam tawh love. Chu mi kàwnah chuan sephungte kan lai ʈhin a, kan inthlang kawngah sephung chu kan insiktir ʈhin a, “Ui êk leh mihring êk ami sephung chu a huai duh,” te kan la ti tak deuh deuh a.

Ka Pu (ka Nu pa) min hrih dan chuan, “Hmanlai chuan chu kàwnah chuan chhim lam tlang leh hmar lam tlang aṭanga fur laia tuihawk rawn luang chu rei tak thlengin atling pung ʈhin a, chutah chuan ramsa chitin rengte hi an rawn inbual ʈhin a ni,” a ti.

Christmas rim alo nam tawh chuan Bualpui khaw dâiah chuan tlangsam pâr leh tlaizawng pâr a vul chek chuk ʈhin a, tlaizawng pâr tlan savate chu sairawkherh hmang thiam deuh te chuan chăngin ipte âng hmawb hmawkin sava chi hrang hrang an rawn àk haw lawih ʈhin a ni. Chung tlaizawng pâr te chuan Biakin kan chei chuai ʈhin.

### **BUALPUI ‘H’ KHUA A LO INDIN ʈAN DAN**

Tun a an khaw luah lai, an la luah hma chuan tuna an khaw luah lai aṭanga chhim lam km 3 vel a hla Bunghmun (Chhanrawla bungpui) piaha (chhim lam) velah sawn khaw sa in an lo awm tawh a, mahse chu khua chu thli a nat em a vangin chhuhsan a khaw thar kâi zâi an rêl a. An khaw thar kâina tur hmun en tur chuan an Lal khawnbawl ka Pu Ngunlinga (*Ka Nu pa*) ho chuan mi engemaw zat; an khaw luah lai a ṭanga hmar lam panin Arpa hluisen pawm chungin an inzui chhuak dam dam a, an khua aṭanga hmar lam Km 3 vel an kal hnu chuan hmun pakhat; khua atana rem êm êm mai, hmar lam tlang lian tak, inphah chho duai mai leh chhim lam tlang lian lutuk lo rawn thluang thla ve duai bawb, chu tlang pahnih rawn inpharh thla duai kâra lo fing nih zet tur zawl duai mai; chu hmun zawl pawh chu chûan chung leh chûan hnuai ala awm lehngal a, achûan hnuai zawk pheî chu ramsa leh nungcha tinrengte’n lamtual an lo thâina leh nunchan an lo zirna hmun a ni a.

Lal khawnbawl leh a ʈhuihhruate chuan chu hmun an va thlen chuan atlang leh amualin an lung adum tlang bawb a ni ang; an Arpa

hluisen pawm chu beiseina sang tak nen kàwn zawl chùan chung zawk, tlak lam sira khiang thingbul lianpui maiah chuan an thlung ta ràn mai a. An Arpa hluisen thlun pawh chuan apute lungrualpui-in, “Khaw thar, kan khaw luah lai aia hmun rem, boruak ṭha leh nuam zawk kan thleng ta e, hetah hian khawthar chu kan kâi ngei tur a ni,” ti niawm hrimin tui har leh har loh pawh ngaihtuah lêk lo chuan akhuang ta malh malh mai a. Mizo pi pute chuan, “Ar khuan tamna chu hmun ṭha a ni ngai e, hmun ṭha loah chuan ar pawh akhuang duh lo,” an lo ti reng a.

An Arpa hluisen pawhin alo lungrualpui takah chuan an tui tlan tur hla deuh pawh pawisa lo chuan chulai hmun chu an Lalpa Hemphunga hova an tual lènna atan an Ordain nghal hmiah mai a. Phur leh hlim tlang tak chuan an Lalpa hnena report pek hlan nghakhlel tak chuan an haw leh ta a.

An Lalpa leh an khualehtuite chuan khawthar kàina tur zawng tura Lal khawnbawl leh aṭhuihruai kalte chu nghakhlel takin an lo thlir ve reng bawka. Hmun thar ena kal te’n khua an lo thlen chuan khua a lo awm, an Lalpa leh a upate hnenah chuan thil awmdan chu kimchang tak a an han sawi chuan an Lal leh khaw mipuite chu an phur tlang hle mai a. Kum 1940 – 1942 chuan khawthar chu an kâi ta muah muah mai a. (*Ka Pu Ngunlinga, ‘ka Nu Pa’ min hrilh a ni*)

Atir chuan hmar lam tlang, khua a tâna rem em em maiah chuan an awm a, chuta ṭang chuan an in zâr pharh thla zel a, chhim lam tlang thleng chuan an inzâr pharh chho ta zela, tunah phei chuan hmar lam tlangah chuan Middle School leh High School-te a awm tawh a, mimal in pawh tam tak a awm tawh bawk. Kawn chùan hnuaì zawk chu anṭam hmun mai nitawh lovin Primary School te awmin Field (Khel mual) zau tak leh Community Hall lian tak nen, mimal in pawh a awm nual tawh bawk.

He khua hi mikual hian nuam an ti thei êm em a, “An duh airei an cham ziah ṭhin e,” an tia lawm. Akhaw thleng anawm mai bâkah ami chengte an hawihhawmin chhungkhat vek an ni emaw tih maitur an ni. Chuvang tepawh chu a ni mahna, mikhualin nuam an tih em em ṭhin ni. Tunah phei chuan khuamite leh sorkar ṭanrualna avangin

khaw chhungah tui an la ve tawh a, khua ati nuam lehzual khawp mai.

Aram chin chu; chhak lamah Mianmar, Mianmar leh Mizoram inrina-ah chuan Mizoram a sangha tui berte rûn nuam Tiau lui chak takin a luang vut vut renga, Bualpui khua aţang chuan Mianmar a Thau tlang, tlang lianpui a lang lurh mai bawk a, Mianmar a Bualpui khaw hnaih lam a khaw awmte chu Tiauchhun (Ruahbuk anti bawk) te, Bungtlang leh Bungkhua te, Thau khua pawh ahan hla vak lo. Heng khuate nen pawh hian an intlawhpawh êm êm reng a ni. Bualpui ram chhung Tiau kamah hian chinai lung pawh tam tham tak a awm nghe nghe a ni. Tiau kamah chuan nul pawh an siam thin.

Tuipui leh Tiau infinna

Chhim lamah khawchhak Tuipui (Kolodyne) aluang dam duai mai bawk a, Tiau lui chak taka chhim zawnga luang leh khawchhak tuipui (Kolodyne) dam duai-a hmar zawnga rawn



luang nen chuan Saisih chhuah bul, Bualpui ‘H’ khaw ramah chuan an intawh a, tunhma chuan fur tui len lai a luipui leh luipui an han insu chu ahmutu te’n a ropui zia leh a hmuhnawm zia hahîpin an sawi thin. Thenkhat sawi dan phei chuan, “Fur tui len lai a luipui pahnih an han insu thin mai chuh!! Sang tak tak thlengin an inbuan kang úr úr thin a. Chumi en chuan mitam tak an kal thin a, chumi en tute chu nupa tuak sarìh an inthen phah a, nupa tuak sarìh an inneih phah a ni,” an ti. Chhim lam tuipui ràl a an khaw thenawmte chu Muallianpui, Lungpuitlangte leh Lungleng khua te an ni. Heng khuate nen pawh hian an inpawh in nupui pasal hialte pawh an innei tawn thin a ni. Tlem a hla deuhah ‘S’ Vanlaiphai, Darzo, Sangau, Archhuang leh khaw tam tak a awm bawk.

Hmar thlang lam a an khaw thenawm Thingsai khua hi Rorehlova fapa naupang ber Khawtindâla’n kum 1860 vel khan a lo din tawh a. Chutih lai chuan Thingsai kuaah hian in zathum (300) an awm tawh laiin Bualpui ‘H’ khua hi chu tlai khawhnu daih a din a ni a. A chhan chu; Fânai Lal ropui ber Rorehlova fate pathum zing a a upa pahnihte, Aithangvunga leh Khawtinkuala an thih hnuin

Khawtindâla hian a unau fate zawng zawng a kawî khawmin hmun hrang hrangah a pêm kualpui reng hnuin Thingsaiah hian khaw nghet siam in an awm ta a. Thingsai a ƣang chuan kum 1871-1872 khan Muallianpuiah an chhuk leh a.

Khawtinkuala fate, Hnochhuma, Pahnuna leh Lalthawma te'n Darzo tlang, Muallianpui leh Lungleng tlangte an awp a vangin Khawtindâla leh a hote in zathum vel chu Thingsai a lêt leh in kum 1884 khan Thingsai khua hi an luah leh a. Chutih lai chuan Pahnuna fapa Dokâpa chu Bualpuiah khua siamin a han kâi zawk a, mahse kum khat emaw lek chauh a han awm a, Lunglengah khua a siam leh a, a Pa Pahnuna'n Muallianpui khua chu a ƣhut a. Hnochhuma'n Darzo tlang a awp a. Lungleng Lal Dokâpa chuan kum 1897 khan Muallianpui a awm ho in sawmthum vel chu Lungphun a Darbilhi hnen a khaw thar kâi tur a awmte zingah dawî thiam awm nia an hriat a vangin, (Chutih lai chuan a Pa Pahnuna a thi tawh a, Muallianpui chu Hnochhuma nupui Pi Darbilhi hovin an luah a.

Muallianpui a ƣang hian Darbilhi hote chu Darzo ram Lungphunah an kâi leh a, kâi bâng in sawmthum vel Muallianpui a la awmte zingah dawithiam rawt a ni. Kum 1897-ah Dokâpa chuan Muallianpui chu a awp ve leh thung ani) dawithiam a an ngaihte chu Dokâpa hian a rawt ta a. Dawithiam a an ngaihte chu zânah an hnukchhuak a, tualah an vawhlum ta hlawm a. Chutia Dokapa'n mi a thah a vang chuan Lunglei Bawrhsap in Dokâpa chu a man a, Thingsai Lal Hleibawrha pawh dawithiam that zinga inhnammhawnawihna awm a hriat anih a vangin an man ve a, an pahnih chuan Chittagong Jail-ah an tan tir ta a, Chittagong Jail chhungah Dokâpa chu a thi ta a ni.

Chutia Dokâpa Jail a thih tâkah chuan Lunglei Bawrhsap chuan, “Dokâpa hian fapa a nei em?” tiin a zawt a. A nupui Pi Lawngcheri chuan fapa Sangburha a nei reng chungin an man ve mai ang tih a hlauh a vangin, “Nei lo,” ti in a chhang a. Chutia Dokâpa'n ro khawmtu tur fapa a nei lo ti a Bawrhsap in a hriat tak a vang chuan Dokâpa nau Hemphunga chu Dokâpa khua Bualpui chu a pe ta a. Hemphunga chuan a u Dokâpa nupui thihsan Pi Lawngcheri chu nupui a nei in a rochun a. Kum 1898 chuan Bualpui tlangah an kâi ta

a. Sangburha lo puitlin hnu chuan a nu in a pa ang in an man ve palh a nga, a thi ve palh ang tih hlauh a vang a afapa neih a zep chu hre thiam lovin; a nu hnenah chuan, “Ka Pate Hemphunga neih i tum vangin, ‘Dokâpa’n fapa a nei lo,’ i ti mai mai a ni,” ti in a thinrim a, a nu nen chuan an intithiam lo nghe nghe a ni.

Dokâpa hian fapa 1 leh fanu 2 a nei a, chungte chu : 1. Sangburha. 2. Aimawii. 3. Bualtawni te an ni. Sangburha hian fa 2 a nei hman a. Chungte chu : Thanzauva leh Lalhlei te an ni. Dokâpa fapa a ro khawmtu dik tak leh Bualpui tlang changtu turin a chan tak si lovah chuan Dokâpa fapa Sangburha chu a lungawi thei lova, Bualpui khaw tlang sang lai takah chuan veng hran siamin a kâi ta a. In sawmthum dawn thelh a kâipui a. A Pate Hemphunga nen chuan Lal an inchuh ta a, mahse, a tirah a nu in fapa nei lo ang a a lo sawi tawh a vangin Hemphunga chu Dokâpa khua thut tur a Bawrsap in a lo tih ngheh tawh a vangin Sangburha chuan thiam a chang ta lova, Sangburha chuan a veng chu thla thum chhung a chhuahsan a Lal Hemphunga khua a fin lo a nih chuan a khua chu hâl vek turin Bawrsap chuan thu a pe ta a. Sangburha chuan thinrim theuh chungin Lal Hemphunga khua chu a fin thla ta a ni. Sangburha chu kum 1927 khan pavalai chauhin a thi ta a ni.

Lal Hemphunga khua Bualpui chu hmar lamah chuan Thingsai khua nen an inri ve thung a, Thingsai khua bâkah Cherhlun, Ngharchhip, Tarpho leh Khawhri-te nen pawh an intlawhpawh tha khawp mai.

Thingsai khua nen a an inrina lai chu tunhma chuan Khawte kawn hi a ni a, Bualpui ‘H’ Lal Hemphunga’n Thingsai khaw Lal ram a phel lai a Thingsai khaw Lal chu Hleibawrha a nih a rinawm. Thingsai khua pawh hi an Lal chu Lal Hemphunga-te unau Fânai ve tho a ni a, Thingsai khua hi chu hetih hun lai hian in 300 lai an ni a, Bualpui ‘H’ khua chu a tir chuan in sawmsarih vel an ni a, mahse Bungtlang, Tiauchhun, Sailam Zophai leh Muallianpui lamahte a hlawm hlawm a an pêm a vangin in hetia thingsai Lal nen a an inbiak lai hichuan in sawmthum emaw vel chauh an awm tawh a.

Thingsai khua hi an khaw ram chhim lam leh tlâk lam ram chu khâm chhengchhia a tam em a vang leh hmar lam ram chu Thaitui a tanga



hmar lam zawng chu Cherhlun ram deuh vek a nih baw k a vangin lo a neih tlak a awm meuh lova, chhuah lam deuh chauh lo a neih tlak ram tha a ni a. An khaah chuan mihring pawh Bualpui ‘H’ ai chuan a let engemawzatin an tam zawk a. An ram chu lo neihna an indaih loh em a vangin kum 1970, 1982 khan Khawhri ram Paawh ram chu lo-a tân an lo hawh tawh a, kum 1974 khan Bualpui ‘H’ ram Kawnpui ram pawh lo a tân an lo hawh tawh baw k a ni. (*Hetia Khawhri ram Paawh ram leh Bualpui ‘H’ ram Kawnpui ram lo a an neih/hawh hi Bualpui Lal Hemphunga’n a ram a sahthlak/a pek then tawh hnu a ni*) Thingsai khaw Lal chuan an khaw ram an indaih loh em a vangin Bualpui khaw Lal Hemphunga hnenah a ram phel then tur a dil turin a khawnbawl leh a upa mi sawm lai hruai in Thingsai leh Bualpui ‘H’ khaw ramri Khawtekawn, tun a Upa tui an tihah hian an kal a, Bualpui ‘H’ Lal Pu Hemphunga pawhin a khawnbawl Upa min mi pathum : Pu Tumkhenga, Pu Hranglinga leh Pu Tialkunga te hruai in an kal ve baw k a, ram riah chuan an inbe ta a.

Thingsai Lal chuan Bualpui Lal chu u leh naute an nih a vanga khawngiahna dil in, Bualpui ram phel then turin a dil a. Atir chuan an inbe rem mai thei lo a ni maithei, an inbiak lai in, Thingsai Lal Upa pakhat Pu Vanzinga chuan tawng a lo thlahdah deuh va, “Thu a kan inberem thei lo a nih chuan tharum pawh kan thawh a ni mai ang chu,” a ti a, Bualpui ‘H’ khaw Lal Upa Pu Tialkunga chuan, “Chutia tharum kan thawh dawn chuan a tha alawm, kha ka chempui hi là la, ka hngawng hi an sat bung rawh le, i ngam lo a nih chuan keiman i nghawng ka sat ang,” a ti a, a iptepui a a chempui chu phawrh in Thingsai khaw Lal Upa Vanzinga chu a pe a, a nghawng chu a dawh ta mai a, mahse Pu Vanzinga chuan Pu Tialkunga nghawng chu a sat ngam lova, chumi hnu chuan Pu Tialkunga chuan, a chempui chu a kut a chil chhak pharh pharh in nghet tak a hum in, “Anih leh ka nghawng i sat ngam lo a nih chuan i nghawng han dawh rawh leh kei chuan i nghawng chu ka chhawk ngam khawp mai, ka’n chhawk hmaw k ange,” a ti a. Mahse, Pu Vanzinga chuan a nghawng chu a dawh ngam ta lova.

Chu tia Pu Tialkunga’n Thingsai khaw pa a tih chuan Thingsai khaw Lal in a rawn hruaite chu an relh ru zauh zauh a, a mi leh sate chu an

relh bo zo dawna a hriat a vangin, Thingsai Lal chuan, “E... ti chuan a tha dawn love, kan tin phawt a nga, ni dangah kan la sawi tha leh dawn nia,” a ti a, an inthen ta rih a. Ni dangah chuan an inbe leh a, Lal Hemphunga chuan, “E... a ni alawm, u leh nau inkârah nangin chaw i nghei a kei in chaw ka bâr bik chu rem ka ti love,” ti in, a tir chuan Sechhun kawn thlengin Lal Hemphunga chuan a phel a, chuti chung pawhin Thingsai chuan an la indaih loh em a vangin Thingsai Lal chuan a dil belh leh a, tun a kan ramriah hian kan Lal leh a Upate chuan Thingsai Lal chu an pe leh ta a ni. Kan sawi tawh ang khan Thingsai chuan an ram an indaih loh em a vangin kan khaw ram Kawnpui ram leh Khawhri ram an hawh leh a la ngai fo a ni.

Lal Hemphunga chu Pathian hmangaihna âtchilh bur mi a ni a, a khua leh tuite pawh a hmangaih em em a, Lunglei a Mizoram Lal ho an Committee tum pawhin Lal ho chuan Lal lehzualna an rel a, chuta an thu rel thenkhat chu, “Mi in nupui a neih in a pasalin a mutpui hma in a nupui chu Lal in a mutpui hmasa tur a ni, Lal fathang leh Lal sachhiahte a ai tam in an khua leh tui te’n Lal an pe tur a ni,” (*Hei hi upa engemaw zat hnen aţang a ka hriat a ni*) tihte an rel avangin kan Lal Hemphunga chuan a duh loh em a vangin Lal ban hun hma in Lal a ţangin a ban hial a duh nghe nghe a ni. Hmanlai Lal-te an LAL tehlul nen, a Lalna bansan duh hial khawp a Mizoram Lalte rorelna chu a khua leh tuite phur rit belhchhah lehzual zawng a an rel avangin a khua leh tuite phur rit belhchhah lehzual a duh lo hle a ni tih a hriat theih in kan Lalpa rilru ţat zia leh hmangaihna a ngah zia a hriat theih mai awm e.

Heti khawp a kan Lal hi Lal tha leh zaidam, hmangaihna ngah bawksi ani chungin Thangthar engmah hre lo te’n, “Lal â leh Lal mawl” ti in kei, Lal fapa upaber Thanlinga tupa hmuh hmasak ber beng hriatah ngei pawh kan Lal Hemphunga hi an sawi chhe bawrh bawrh thin a, a hunlai thil thleng an thlirpui thiam loh vang leh kan Lalpa hmangaihna ngahzia an hriat loh vang mai ni in a lang. Hetianga an Lal zahna nei lo leh ngâinep taka ţawngtute hian anmahni mawl zia ti langin mahni mawng hlim nen an lem chuang lo a ni.

Kan Lal Hemphunga hi mi harsatna hrethiam tak leh mahni t̃anghma sial lo tak mi a nih a vangin tuna an inrina ramrikawn thleng hian a pe mai a ni. Thingsai khua pawhin Bualpui khaw Lal Hemphunga'n u nau an nih a vanga a hmangaihna a tih lanna leh a t̃hatna zarah ram an lo neih zau phah duai a ni tih hi t̃hangtharte hian an hriat a ngai a ni. Hmanlai a t̃ang tawhin ram zimte inchuh a vanga ram leh ram indona hial a chhuah t̃hin lai a hetiang a Bualpui khaw Lalpa in Thingsai khaw tan a Bualpui khaw ram, ram zau tak mai a pek a vang hian Thingsai khua chu Bualpui khaw chung a t̃hat chhuah leh lawmthu sawi chu an tihm̃âkmawh a ni. A ram pek lah hi ram tlemte a ni lova, ram zau tak a ni lehnghal a.

Bualpui khaw Lal Hemphunga tihloh chuan eng khaw Lal leh ram lal mahin an ram phèl t̃hen turin mittui nen dil pawh ni se kh̃âp khat pawh an pek a rinawm loh. T̃henkhat phei chuan Lal Hemphunga hi an dem in “Lal â tak a ni, mahni ramte kaw dang pek t̃hen t̃euhte chu,” an ti a. Mahse Lal Hemphunga chuan a chipui, a unaute, a khaw t̃henawmte mangan-na leh harsatna a en liam mai theih loh vangin an ram chu a sah thlak t̃hen sak a ni zawk. Kan Lal Upa leh Lal khawnbawlte chuan kan Lal Hemphunga hi Lal â an ti ngai lova, “Lal f̃ing leh hmangaihna ngah tak a ni, Lunglei a t̃anga Bawrsap a rawn kal pawhin Thingsai Lalin a tihlawm loh lain kan Lal Hemphunga chuan a lo ti lawm thiam em em a, chuvangin Sap chuan, “I duh chin ram ka pe ang che, khawi chin nge ka pek ang che sawi rawh,” a tih lai pawh in, Lal Hemphunga chuan, “Thingsai Lal ram ka pek chin hi chu ka la lêt tawh lovang, ka u naute chaw nghei a an awm lai a kei in chaw lo bâr bik hi ka duh lo,” a ti a ni.

Thingsai khaw mi, tunlai t̃hangthar t̃henkhat-te chuan an chung a Bualpui khaw Lal t̃hatnate hi an theihnghilh zo ta ni in a lang. Mahse, khawvel awm chung chuan Thingsai khua hian anmahni khawngaih leh unau an nih a vangte leh anmahni hmangaihna a vang a ram zau tak petu hi t̃hangthar lo la awm lehzel tur thleng pawhin an theihnghilh ngai tur a ni lo mai nilovin Bualpui Lal t̃hatna chu t̃hatna ṽekin an rul leh tur ani tih an hriat hi ka duh takmeuh a ni. Lalhemphunga hian a ât vanga a ram hi zau tak pe phal a ni lova, a

chipui, a unau, a khaw ðhenawmte a khawngaih leh a hmangaih vang zawk a pe a ni tih an hriat reng a ðul takmeuh a ni.

Bualpui khua an Lal Hemphunga hova an rawn luah leh hian a tir chuan hmar lam tlang, khua a tâna rem em em maiah chuan an awm a, chuta an awm lai chuan an Lal Hemphunga in chu tun a Pu Muanchhunga in leh Pu Kiaubila in inkârah hian a awm a. chuta ðang chuan an in zâr pharh thla zel a, chhim lam tlang thleng chuan an inzâr pharh chho ta zel a. Chhim lam tlang “Sangburha veng” an tih chu Lal Hemphunga chuan a fapa upa ber Thanlinga chu a pe a. Ram buai hma kha chuan Veng chhak atangin tuna veng thlang a Pu Sawiðhuama in awmna thleng hian an inzâr thla a.

Ka Pa Hminga (*F.Lalhmingthanga*) sawi dan chuan, “Ram buai hma khan; “Sangburha vêng, tun a High School tlang hi Bualpui Lal Hemphunga fapa, ka Pa Thanlingate ram a ni a, ka u F.Lalhluna leh Tiniângite inneih kum 1954 khan Sangburha vêng a kan hmunah chuan lo kan nei a, buh pawh kawt 80 lai kan nei nghe nghe a ni. (*buh kawt 80 ‘kawt khat hi tel ðin, ðin 4 a ni’ tharna hmun chu a zim chhe lo ang tih a rin theih awm e*) ka Pa Thanlinga’n Pu Zawnggruma chu kan khaw thir deng a nih a vingin a duhsak a, sipai awm lai a Helipet chhim thlang lam, tun a tawngtaina tlang hmar thlang lamah khian thingpui chin nân ram a phel ve hlek a, Pu Zawnggruma te chuan chu Lal Hemphunga fapa ka Pa Thanlinga ram phelah chuan thingpui bul tam vak lo a ching ve a. Chu mi kan ramah chuan Theihai pawhte pawh kan phun a ni,” a ti.

Tun thlengin chu an theihai phun chu hmuh tur a la awm a ni. Mahse, Lunglei D.C a ðangin Pu Zawnggruma tu leh fate leh Pu Thanlinga tu leh fate chuan Land Rance (Componsation) an la tawh nge nghe a ni. Pu Thanlinga fapa F.Lalhmingthanga (Ka Pa Hminga) chuan, “Land Rance (Componsation) kan la tawh a, kan hmun chu khaw mi te’n in duh ang angin in lo hmang dawn nia,” ti in khua a mite hnenah a hlan fel tawh a ni.

Pu F.Lalhmingthanga hi Bualpui Lal tupa a ni bawk a, a ti ðha tak meuh a ni. Chu lai hmun chu ram buai hnu lawk a ðang chuan Sipai

in an rawn luah zui a. Mahse, Mizoram State kan nih hnu khan Sipai chu an chhuak a, tunah chuan Middle School leh High School te a awm tawh a, mimal in pawh tam tak a awm tawh bawk.

Rambuai hma pheih kha chuan Bualpui khua hi khaw nuam tak ni a sawi a ni thin a, (tunah pawh khaw nuam tak chu a la ni reng thova) an Lalpa Hemphunga hi a History tam tak sawi tur a awm em em lo na in a Lal chhungin a khua leh tuite chung a lalhrawt mi a ni lovin akhwa leh tuite hmangaih tak mi a ni a, Mizo Lal; Lal dang hovin an Lal lehzualna dan tur an rel lai pawh khan arilrem zawng a ni riau lova, chuvangin Mizoram a politic arawn luh tantirh khan Mizo Union leh Zalen pawlte a awma, Lal hote an lal dan a dik tawh loh a vangin mipui tam takin Lal neih an duh tawh lova, chuvangin an lal reng thei tawh dawn lo a ni tih Lal Hemphunga chuan a hriat avang leh Mizo lalte lal dan dik tawh lova a hriat a vangin Lal bàn duh pawl; Mizo Union-ah alut ta daih mai a. Chuvang chuan mitam tak chuan, Lal nisi Lal bàn duh pawla a awm chu hrethiam lovin, “Lal â” an ti hial reng a ni.

Mahse alo rin lawk ang ngeiin kum 1954 August thla chuan Mizorama Lalte chu bàn an lo ni ta ngei reng a ni. Tunhnuah chuan mite’n, “Lal Hemphunga kha a lo â lo tawp mai, politic kal vel dan a hre thiam in a lo fîng zawk a ni,” an ti tawh zawk a ni. A diktak chuan Politic kal vel a hriatthiam vang pawh nichiah lovin Lunglei a Lal hoin ro an rel laiin an rorel danah khua lehtuite phurrit lâk kian sak lam aia an phurrit belhchhah lehzuall tura Lal ho rorelna chu a pawmpui loh vang zawk a Lal bàn duh lama tang a ni zawkmah.

Lal Hemphunga hi Lal ngilnei leh zaidam tak mai a ni a, a khua lehtuite chawhhlam a thiam thin zia sawi tur an hre tam hle a ni. Pathian hmangaihna thu hi a âtchilh bur maia, a sawi reng thin bawk a, “Inkhawm laite pawh hian mi thusawi lai pawh ni se, ‘Ngawi teh u, thu ka sawi ve lawk dawn e, Pathian hian min hmangaih em em a, keini pawh inhmangaih dial dial tur kan ni,’ tiin tap zawih zawihin a sawi thin a ni,” an ti.

“Vawikhat chu Thingsai bungmun a inkhawmpui kan neih laiin inkhawmpui tiak tukah, khawfing chah dawnin Pathian in Pathian fa

ka nih min hriat tira, ka lawm lutuk chu ka mittui atla nasa hle mai a, ka lukham pawh a huh vek a ni,” tiin a fapa Sangduna hnenah a sawi. Lal Hemphunga farnu Vanhnuaichhingi chuan Pathian thu a han awi ve chuan an thul mawnga a dahṭhat Ṭing (laduang chum dumna) chu la chhuakin, “Hei hi diklo taka ka neih a ni a,” tiin an kawt laiah ahal hluah hluah e,” an ti.

Kristian an nih hnu in he khuaah hian vawi tam tak Pathian thlarau thianghlim pawlna changin harhna in vawi tam tak alo nuai tawh ṭhin a. An khaw chhehvel Mizoram leh Burma-ahte Kohhran engemaw zat an lo phun tawh nghe nghe a ni. Ṭum khat pheih chu hlo thlawh hun laiin hlo thlo thei lo lêkin Pathian fak leh chawimawi-in hun an hmanga, an han feh dawn ṭhina, lo thleng loin kawtchhuah aṭangin Pathian fak leh chawimawiin inlamah an haw leh ṭhin a, nileng leh zankhua in Pathian hming fak leh chawimawiin an zaikhawm ṭhin a ni. Chumi kum chuan an khaw ṭhenawm Thingsai leh Cherhlun in an hlo chu an lo thlawh sak a ni. Pastor M.Vailingan’n Bualpui ‘H’ in an Kohhran chanchin ziaḱ tura an ngenna anga Bualpui ‘H’ Kohhran chanchin a ziaḱnaah hetiang hian a sawi :

“Kum 1935 Zoram hlim (harhna tiin an vuah talo) vawi 4-na a ṭang erawh kha chuan kan Kohhran-ah hlimna nasa tak alo thleng ve ta in Thingsai leh Cherhlun lamte nen a ‘Inchin harhna’ ti in an inkalpawh hlawm ṭhin a, lo lam pawhchhiat thlengin hlimna chu a chawl hleithei lova, mite chu zaikhawm leh lam chu an hnapi ber a ni ta mai a. Chung an hlimna rawn chhim chuan Thingsai khua aṭang leh Cherhlun khua aṭang chuan mi engemawzat an lo kal a, Bualpui lo pawh chu ahohovin pawhchhiat runpui an nei nghe nghe a ni.

Hemi ṭum hlimnaah hian nula ṭhenkhat chu an khurin an khawng bawḱ. Hemi hlimna rawn inṭanna chu Biate aṭanga rawn inṭan niin an sawi,” (Pastor M.Vailingan thu ziaḱ hi a ziaḱ angchiaḱ a ka lâk chhawn a ni, aziak hun leh tarik chu ziaḱ a awm lo tlat)

He khua aṭang hian mithiam leh sorkar milian sawi tur tam lo mahse anmahni veng a enkawltu chung Pathian zarah Pathian Thlarau rawngbawlna lama Mizoram Baptist Kohhran hruaitu ṭha tak tak leh Mizoram Baptist Kohhran pawhin kan chhuan êm êm Rev, B. Thangchina, Rev, H. Lengluta leh Pastor M. Vailingan te, BCM

Pasator thusawi thiam tak Rev H.Lalfakzuala (ka ni fapa) te kan nei a, a vanglai a Mizorama Bible chang vawng thui thei ber Evan, Dohleia te an ni.

Anni bâkah pawh Sorkar lamah M.A.P. Inspector Aichhung Miril Lalhluna leh Suply Officer K.Lawmvela te, Evangelist Upa K. Dengdailova Thutak puangtu Tream Speaker, Pathian thu sawiah nà nà nà chuan ahmingthang em em lo nain Mizoramah hian chhingtu an awm lo hial awm e. Pathian a vangin kan chhuang takmeuh che u a, Missionary pawh 4/5 chu he khaw chhul chhuak hi kan nei tawh bawk a. Hengmite hi kan khua Bualpui ‘H’ ah awm tawh lo mahse Bualpui ‘H’ khaw chhulchhuakte an ni. Bualpui khua ațang ngei a BCM Missonary chhuakte chu Lalchhanhima, Lalrinfel, J.Vanlalsanga leh Thazuala te an ni a, kei hi Hnahthial Bazar Kohhran a țanga Missionary a chhuak ka ni a, mahse Bualpui ‘H’ khaw chhulchhuak dik tak ka ni bawk. Heng Lalpa ngaih a miliante a vang hian Bualpui ‘H’ khua hian Lalpa malsawmna nasa takin an dawn phah ka ring tlat a ni.

Ka Pi Leh Pu Thanlinga leh Zadengi

He khua a Kristian an lo awm tih phat ațangin Kristian-te chuan ka pi leh pu Zadengi leh Thanlinga (Lal Hemphunga fapa upa ber ka Pa pa) te chu Kohhran ban a ngai in an inte pawh chu Kohhran in ang hial in an ngai a, Biakin a inkhawm tur leh an inkhawm bângte chu ka pi leh pu te in-ah chuan an luh loh chuan kokim lovin an inhria nge ni dawn? Ka pi leh ka pute inah chuan Kohhran mite chu an lut deuh zel țin a, zaikhawm leh kût nikhuaah ka pi leh pu te inah chuan, “Zai atui bik,” ti in zaikhawmna in atan an ngat reng țin bawk a. Chutia ka pi leh pu te’n an țin lai hun zawng zawng an theih tawk leh an phak tawka ținahnemngai taka Lalpa rawng an lo bawl vena leh Lalpa a rinna an lo nghahna rah Pathian malsawmna chu keini an tu leh fate hian kan chan nasat zia ka Pa in min hrilh fo țin.



He khua a Kristian an lo awm tih phat ațangin Kristian-te chuan ka pi leh pu Zadengi leh Thanlinga (Lal Hemphunga fapa upa ber ka Pa pa) te chu Kohhran ban a ngai in an inte pawh chu Kohhran in ang hial in an ngai a, Biakin a inkhawm tur leh an inkhawm bângte chu ka pi leh pu te in-ah chuan an luh loh chuan kokim lovin an inhria nge ni dawn? Ka pi leh ka pute inah chuan Kohhran mite chu an lut deuh zel țin a, zaikhawm leh kût nikhuaah ka pi leh pu te inah chuan, “Zai atui bik,” ti in zaikhawmna in atan an ngat reng țin bawk a. Chutia ka pi leh pu te’n an țin lai hun zawng zawng an theih tawk leh an phak tawka ținahnemngai taka Lalpa rawng an lo bawl vena leh Lalpa a rinna an lo nghahna rah Pathian malsawmna chu keini an tu leh fate hian kan chan nasat zia ka Pa in min hrilh fo țin.

Fânai Lal kan lo inthlah chhawn zel dan hi ka hring nunah pawimawhna tak a nei a, hmanlai angin Lal nei tawh lovin tun hunah

Lal chhungkua inti tawh kher lo mah ila, Hamleta tawngkam takin **Lal thisen kai** kan nihna hian ka nunah awmzia thui tak keimah mai nilovin ka fate thleng hian an nunah awmzia nei ve ngei se ka duh avangin min thlahtute ka chhui theih; Lal hmasaber a t̄angin ka t̄ar lang duh a. Hei hi Director (Rtd) Lallura Mamte Lal fapa ziaak ka Pu Sangduna, Lal Hemphunga fapa hnen ātanga ka lak leh Upa S.Thangbila ziaak ātante a ka l̄ak chhuah a ni a, 43-na leh 59-na Thanlinga thlahte hi keima'n ka ziaak belh a ni.

Ka Pu Sangduna hi Bualpui 'H' ah a Penson thleng Primary zirtirtu hna a thawk a ni a, amah hi mi fimkhur leh chimlim tak mai, taima leh hnathawh lam a mihratkhawkheng an tih ang chi hi a ni a, atu leh fate ngaihsak leh chhawncchaih peih tak a ni. Upa S.Thangbila pawh hi pa f̄ing leh thil chikmi, khaw khat parawn a ni.

### **BUALPUI 'H' KHAUWI SORKAR LEH KOHHRAN HNUAI A THAWKTE**

Bualpui 'H' khuah chuan Kohhran t̄ang chho zel a Kohhran Upa pawh thlan belh a ngai zel a, Mizoram buai hma a Kohhran Upa inthlan hun hrang hrang a thlan tl̄inte chu hengmite hi an ni.

1. Thanlinga. 2. Zokima. 3. Lalsanga. 4. Chhantlunga.
5. Hrangiang. 6. Lianianga. 7. Zt. Khawmdawla.
8. Nguntura. 9. Lalhluti te a ni.

**Bualpui 'H' khuah in a khaw  
chhehvel a Kohhran a d̄inte :**

1. Bungtlang (Burma)
2. T̄iauchhun/Ruahbuk (Burma)
3. Sialam (Burma)
4. Zophai (Burma)
5. Mualianpui (P) te a ni.

Hengahte hian Kohhran nghet takin a la ding a, heng b̄akah hian P̄ang khuah leh Sangau-ahte khian Kohhran dintute zingah Bualpui 'H' pa Pu Lalkhama P̄ang khuah. Sangauah Pu Deusakeia te'n an dinpui bawk a ni.



Bualpui 'H' Kohhran hruaitu hmasate



**Kum 1917 – 1918 khawvel indopui a Mizo tlangval mi 2500 lai France ram a Labor Party-a kalte zing a Bualpui ‘H’ khaw tlangval kal vete :**

1. Kamduna.
2. Hrangtawna.
3. Lianiânga.
4. Huatbila.
5. Thanghleia.
6. Sangbuhra.
7. Lianerha.
8. Khuaitura.

**Mizoram buai hma a Bualpui ‘H’ Sipai a tãnge :**

1. Zataia S/o Kimluaia. Burma Rifle.
2. Sanghleia S/o Khuaitura. Burma Rifle.
3. Lalkhuma S/o Sawihdawka. Burma Rifle.
4. Lalhluna S/o Thanlinga. Assam Police, tun hnuah MAP.
5. Thangzauva S/o Sangburha. Assam Regt.
6. Lianchina S/o Pabuta. Assam Regt.
7. Thankhuaia S/o Pabuta. Assam Regt.
8. Bualkama S/o Pachiauva. Assam Regt.
9. Hramlinga pa chak. Assam Regt.
10. Hranghawla S/o Tlirmanga. Burma Regt.
11. Lalawia S/o Thawngduna. Burma Regt.
12. Ngurchhawna S/o Thanseia, Burma Regt.
13. Hramchema S/o Lenglinga. Chaina Sipai.
14. Thialhaia. Burma Regt.
15. Duhhnawka S/o Zatlrha .Burma Regt.
16. Tlirchina Holder S/o Ralhnawka. Burma Regt.
17. Zolêta S/o Khuaitura. India Army.
18. Hramchina S/o Zawngruma. Assam Regt.
19. Thangkunga S/o Hrekhmunga. Burma Regt.
20. Tialkunga S/o Thanseia. Burma Regt.
21. Biakchina. Burma Regt.
22. Chhansanga. Burma Regt.

**Mizoram buai hma a Bualpui ‘H’ khua a tãng a Matric pass te :**

1. B.Thangchina S/o Thawngduna.B.A; B.D; M.Th (Missiology)
2. K.Lawmvela S/o Sawihdawka. (HSLC)
4. H.Dengthanga S/o Ralhnawka. (HSLC)
5. Zasiami D/o Chuamsaia B.A.
6. Sangduna S/o Hemphunga (HSLC).

**Mizoram buai lai a hnam sipai (MNF) a lo ɰang tawhte :**

1. F.Lalhmingthanga. 2. MC.Vânghâka. 3. Lalduha.
4. Ralzathanga. 5. MC.Thantawna. 6. K.Thanglura.
7. K.Hmunlala. 8. Hmingthanzuala. 9. Thangrula.
10. Zarema. 11. Phirlinga. 12. Sanghupa. 13. Rualhaia.
14. Thanghrima. 15. Hramlinga.

**Mizoram buai lai a hnam sipai (MNF) a lo ɰang a  
thi (Hnam martar) te:**

1. Phirlinga. 2. Hmingthanzuala. 3. Thangruaia. 4. Hranglinga.

**Sa kâp tam zualte chu hengte hi an ni.**

1. Tlirmanga. 2. Kamduna. 3. Hrangkhara. 4. Thanseia.
5. Kimluaia. 6. Kâpchhunga. 7. Lengvunga pa te an ni.

**BUALPUI ‘H’ KHUA A BER KÂITE**

**Bualpui ‘H’ khua a a ber kâi, ka hriat theih chinte chu  
hengte hi an ni.**

1. **Sa kâp tam berte** : Pu Tlirmanga leh Hrangkhara te an ni.
2. **Huaisenah leh ramvachalah** : Ramkiauva leh Huatbila te an ni.
3. **Hausa berah, Pawisa ngah-ah**: Rochhunga leh Khuaitura te an ni.
4. **Fing berah** : Suakhânga leh Sawivela te an ni.
5. **Nula ngâi tam berah** : Sangburha, nula 27 a ngai ti in a thlan lungah an ziaak a ni.
6. **Dam rei ber** : Pu Laliânga: A damlai lung phunah kum 130 ni in an ziaak a, a damlai lung an phun hnuah kum 10 a la dam.
7. **Kohhran Upa hmasa ber** : Pu Thangzika.
8. **Zirtirtu hmasa ber**:Thangnghilhlova. Kum 1933.  
Pu Lêna. 1935 – 1936
9. **Class III Pass hmasa berte** : M.Vailinga. S.Thangbilha
10. **Class VI (Middle) Pass hmasa ber** : M.Vailinga.
11. **Matric Pass hmasa berte**:  
B.Thangchina, Lawmvela. F.Lalhmingthang,  
Dengthanga, Sangduna.
12. **Puanthui khawl nei hmasa ber** : Pu Khuaitura.

13. **Silai nei hmasa berte** : Sawivela, Taiêka. Lenghnina, Zalawma.
14. **B.A. Pass hmasa ber** : B.Thangchina.
15. **B.D. M.th pass hmasa ber** : B.Thangchina.
16. **Thing Mistiri hmasa ber** : Ngunlinga. Jinhlawng
17. **Puanthui thiam hmasa ber** : Ngunlinga Jinhlawng.
18. **YMA President hmasa ber** : Pu Lianhrûla.
19. **VCP hmasa ber** : Pu Lianhrûla.
20. **USA Aṭanga Doctorate Degree (Honorin Causa) hmasa ber** :  
Rev. Dr. Rosanglura Fanai.

**Bualpui ‘H’ khua a hmingthanna bik neite leh an hmingthannate**

1. **Thankhuaha** : Buan chak leh rinawmah.
2. **Hramlinga** : Buan chakah.
3. **Zoramthanga** : Buan chakah.
4. **Uihnawna leh Khawsâta te unau** : Huaisen leh chakah. An hunlaiah an kalna apiangah zawlbuk a inbuanah tuman an hneh loh a vangin, “Chhim dai lo, hmar dai lo,” tih hial an ni.
5. **Evan Dohleia** : Ahun lai a Mizoram a Bible chang vawng sei thei ber a lâ a ni.
6. **Rev. B.Thangchina** : Ahun lai a Baptist Church Of Mizoram (BCM) ban pawimawh leh hruaitu ropui leh lâ tak a ni.
7. **Rev. Lênglûta** : Hla phuah thiam leh Pathian thu sawi nung em em a lâ a ni.
8. **Pu Kâpchhunga** : Pasaltha, sa kâp thei a lâ a ni.
9. **Zazingi (Zingkawii)** : A hun lai a zaithiam a lâ a ni.
10. **Rosangzuala Fânai**, Remlalliana fapa : Football thiam tak a ni a, Mizoram a Local level leh Dietrict level hrang hrangah leh India Clup hrang hranga a khel lai in a hmingṭha em em a, tunah chuan Spain-ah te pawh Foot Ball khelin a han kal tawh a ni.

**Tun dinhmun (2025) an Bualpui ‘H’ khua** : Bualpui ‘H’ khuaah hian in luah lai in 196 a awm a, mihring 1004 an cheng. Kohhran Denomination pa nga : 1. BCM. 2. Presbyterian. 3. Rinna Kohhran. 4. Zoram UPC. 5. North East UPC

**Sorkhar Department pahnih** : 1. Education Department. 2. Haelth Department. Sup-Center 1-a awm.

## FÂNAI HO LEH LAL HEMPHUNGA THLAHTUTE

Fânai ho hi Mizo hnam dang ang bawkin Burma Chin Hill a an awm lai a ñang tawh a Lal nei hrang a khuate pawh lo siam tawh ñhin an ni a. An thlahtu an hriat hlat ber chu Thátinkuala a ni a. Burma ram Halkha khaw bul Daidim khua-ah an awm a ni. Daidim khua a an awm lai hian Lal a nih leh nih loh hriat a ni lova, a mârawh chu ho tam tak nei in Daidim khua a ñang hian tun a Halkha khaw chhung Rung tlang an tihah hian a lo chhova, chutah chuan Lal niin khaw neiin a lo awm tawh niin hriat a ni. Chuta ñang chuan Fânai Lal ho inthlah chhawn dan chu hetiang hi chhui dan tlangpui a ni :-

### 1. Thátinkuala fate :-

1. Hniarthula (Hniarthul zawng zang thlahtu).
2. Hniarchenga (Hniacheng zawng zawng thlahtu).
3. Bawitlunga (Bawihtlung zawng zawng thlahtu).
4. Khenzahnawka.

### 2. Khenzahnawka fate :-

1. Chenhranga.
2. Zachhuma.
3. Hlawndawhthanga (Keimi a changta).
4. Nihliapa. (Nihliap zawng zawng thlahtu).

### 3. Zachhuma fate :

1. Tluangzachhawna.
2. Fânaia. (Fânai zawng zawng thlahtu).

### 4. Fânaia fate :

1. Hrangtintlinga.
2. Zarêpa (Zarêp zawng zawng thlahtu).
3. Torela (Torel zawng zawng thlahtu).
4. Thlahaia.
5. Pakhupa (Pakhup zawng zawng thlahtu).
6. Khintina (Khintin zawng zawng thlahtu).

7. Chhuanchira. Fânaia hian nupui pahnih a nei a, a nupui hnuhnung zawkah chuan Riliana a hring a, Riliana chuan Renthleia a hring a Renthleia chu Renthlei zawng zawng thlahtu a ni. Renthlei hi Fânai hnam peng zing a chhiar tel a ni. Sakhuana leh vawkpa sutnghak talh pawhin an ei za zel a ni. Sakhaw zu in tlang, a thlum a al ei za an ni.

5. **Pakhupa fate** : 1. Thathranga. 2. Ralzatluanga. 3. Khawtinnawla.
6. **Khawtinnawla fate** : 1. Chhanruanga.
7. **Chhanruanga fate** : 1. Chhuhhleia. 2. Rorehlova. 3. Zahluani.

Rorehlova hma lam zawng hi Burma ram Chin Hill a an awm lai a Lal-te an ni. Rorehlova chin hi tun a Mizoram luah chin Lalte an ni.

8. **Rorehlova fate** : 1. Aithangvunga (Samtawia).  
2. Khawtinkuala. (Kualsawia) 3. Khawtindala (Pawta)
9. **Aithangvunga fate** : 1. Dokhama.
10. **Dokhama fate** : 1. Zaduna. 2. Lianchema. 3. Zakâpa. 4. Pazika.
11. **Zaduna fate** : 1. Kâphleia.
12. **Kâphleia fate** : 1. Sangluaia. 2. Rokhuma.
13. **Sangluaia fate** : 1. Lalhleia. 2. Lalduna. 3. Lallianchhunga.  
4. Lalthawmvunga. 5. Dr. Lalzabiaka.
14. **Lianchema fate** : 1. Kâpchhunga. 2. Suakhnuna.
15. **Kâpchhunga fate** : 1. Lalkânglova. 2. Zatawna. 3. Zâma.
16. **Zatawna fate** : 1. Biaktluanga. 2. Biakliana.
17. **Zâma fate** : 1. Lalpianga. 2. Lalkhuma.
18. **Suakhnuna fate** : 1. Rokhuma. 2. Chinsanga. 3. Lianchina.
19. **Zakâpa fate** : 1. Thanchhuma. 2. Thangsira.
20. **Thanchhuma fate** : 1. Lalhulha. 2. Lalhranga. 3. Tinkhuma. 4. Thansiamia. 5. Lalrova.
21. **Pazika fate** : 1. Saihnuna. 2. Lallura.
22. **Saihnuna fate** : 1. Lalchuanga. 2. Lalthanga.  
3. Lalsavunga. 4. Ngursailova. Heng zawng hi Rorehlova fapa upa ber Aithangvunga (Samtawia) thlahte Mizoram a Lalte ân an nih thleng a kan hriatte an ni. Ziak hmaih palh an awm maithei. Ziak hmaih a awm chuan min hriat tir thei ula, alawmawm hle ang.

---

**Rorehlova fapa upa ber Aithangvunga thlahte:**

23. **Khawtinkuala fate** : 1. Hnochhuma. 2. Pahnuna.  
3. Lalthawma.
24. **Hnochhuma fate** : 1. Lianbuka. 2. Hrangkulha.
25. **Lianbuka fate** : 1. Lalngengi. 2. Lalsailova. 3. Lalkhama.  
4. Lalbuli. 5. Lalziki. 6. Lalmawii. 7. Lalhnuni.
26. **Lalsailova fate** : 1. Lalhmingliana. 2. Saihnawli.
27. **Lalkhama fate** : 1. Lalzami. 2. Rohnuna. 3. Lalluaia.  
4. Khawvelthangi. 5. Lalropuii. 6. Lalzidinga. 7. Lalsanglura.  
8. Rochhumi. 9. Hmelmawii. 10. Biakthuami. 11. Lalnguri.  
12. Lalrawngbawli.
28. **Pahnuna fate** : 1. Dokapa. 2. Sabuta. 3. Hemphunga.
29. **Dokapa fate** : 1. Sangburha. 2. Aimawii. 3. Bualtawni.  
4. Lalzawni.
30. **Sangburha fate** : 1. Thanzauva. 2. Lalhlei.
31. **Sabuta fate** : 1. Sapsiami. 2. Tinthangi. 3. Chhanreia.  
4. Lalhnuni. 5. Thakunga. 6. Lalhrima.
32. **Hemphunga fate** : 1. Thanlinga. 2. Bualtawni. 3. Lalziki.  
4. Lalsanga. 5. Lalliani. 6. Lalchhingi. 7. Sangduna.  
8. Ngurkhumi. 9. Sangluaia. 10. Saikhumi.

Heng hi Rorehlova fapa Khawtinkuala (Kualsawia) thlahte Mizoram  
Lal bân thleng a piangte an ni.

#### **Rorehlova fapa naupang ber Khawtindala thlahte :**

33. **Khawtindala fate** : 1. Rothawmliana (Patlaia)
34. **Rothawmliana fate** : 1. Lalchhuma. 2. Lallianhleia.  
3. Dophunga. 4. Aiburha. 5. Aitlawma.  
6. Sawithanga. 7. Rothanga.
35. **Lalchhuma fate** : 1. Liannawla. 2. Rokhuma.
36. **Dophunga fate** : 1. Lalthangdula. 2. Lalhrima.
37. **Lallianhleia fate** : 1. Lalthanghrima. 2. Lalbuana
38. **Aiburha fate** : 1. Lalhleia. 2. Taichhuma. 3. Sanghleia.  
4. Vankhuma. 5. Thanghulha. 6. Vanthlira.
39. **Aitlawma fate** : 1. Thangluaia. 2. Vankunga.  
3. Vanthuama. 4. Laibuanga.
40. **Sawithanga fate** : 1. Hrangluaia. 2. Bawihchhunga.

3. Thanhranga.

41. **Rothanga fate** : 1. Rengchhawna. 2. Thanzawna. 3. Sanglura.  
42. **Lalbuana fate**: 1. Lalneithangi. 2. Lalluaia. 3. Lalchungnunga.  
4. Lalhmingliana. 5. Lallura. 6. Lalthagliana. 7. Lalthawngliani.

Hengte hi Lal bân thlenga Khawtindala thlahte an ni a, hmeichhe lam chu ka ziaak lang vek lo.

43. **Thanlinga fate** : 1. Lalthuami. 2. Aichhung miril Lalhluna.  
3. Lalhmingthanga. 4. Biakhnuna.  
44. **Lalhluna fate** : 1. Laldingliani. 2. Imanuel Zarzokima.  
3. Lily Lalremruati.  
45. **Lalhmingthangafate** : 1. Rochampuii. 2. Laldinthara.  
4. Lalawmpuii. 5. Lallawmzuala. 6. Lallawmkima.  
56. **Biakhnuna fate** : 1. Rosanglura. 2. Lalramliana.  
4. Lalzirliana. 5. Lalmuansanga.  
57. **Laldinthara fate** : 1. Malsawmtluangpuii. 2. Ruthi Lalremruati.  
3. Bishop Laldusaka. 4. Rebec Lalengmawii. 5. Lalremruatfela.  
58. **Lallawmzuala fate** : 1. Lalrinnunga. 2. Vanlaltleipuii.  
3. Lalramchhana.  
59. **Lallawmkima fate** : 1. Vanlaldinpuii.  
57. **Rosanglura fate** : 1. Lalhmangaihzuazeli.  
2. Mika Lalmuanawma. 3. Lalrinawma. 4. Lalrinngama.  
58. **Lalramliana fate** : 1. Lalbiaktluangi. 2. Remruatfeli  
59. **Lalzirliana fate** : 1. Laltlanmawia. 2. Liansangpuii.  
3. Rochungluri.  
60. **Lalmuansanga fate** : Lalroluanga.

Thlahtute chhuan chhui dan tlangpuiah chuan kum 25 zel chhuan khat a chhiar a ni a. Thatinkuala a tanga Pu Hemphunga thleng hian chhuan 11 a ni a. Kum 275 chhung Fânai ho hi an Lal tihna a ni. Thatinkuala a tanga Chhunruanga thleng hi Burma Chin Hill a an awm lai in an Lal a. Chhuan 7 a ni. Burma Chin Hill-ah kum 165 an Lal tihna a nih chu. Rorehlova chin hi Mizoram a an awm hnu a Lalte an ni a, Mizoramah hian chhuan 4 an Lal a ni. Kum 100 chhung Mizoramah hian an Lal hman tihna a nih chu. Kum 1900 hma lam kha chuan Mizoram-ah hian mihring an la tlem in an la thawl hle a,

khua pawh a la tlem hle a ni. Chi leh chi, khua leh khua inrun an chin a vangin khaw khat a in tlem te te in an awm ngam lo a ni.

Hetiang hi kan inthlah chhawn dan chu a ni a, A hming Maka, Remruattua remruat dan hi a mak khawp mai. Min thlahtute zingah pawh thenkhat chu an hming kha hnam hmingin a kal nghal a, thenkhat-te erawh chu hnam hmingin a kal ve chuang lem lo. Ka fate hian hmanlai Mizo Lal te, an lal lai atang a Lal thlah kal zel kan ni tih an lo hriat a, midangte a inngat lova Lalpa rin chhan chung leh Lal thlah kan ni tih inhria a midangte tana chhenfak awma an awm zawk beisei in heng min thlahtute hi ka han ziaak lang a



Rosanglura Fanai



Kan fate



Zokungi



## BUNG 2

### PAN LAI HRING NUN

Lalpa remruat dan hi engemaw chang chuan hringmite tana han hriatthiam chi rual a ni òin lo, a remruatna a òinga, a thukin asang êm a tinni. Chuvang tak chuan kei ngei pawh hi Lalpa remruatna hrethiam lovin ka òhatna tura remruattu chungah ka vui chang a awm fo òin.

Ka Nu leh ka Pa te hi engmah, achhia aòha ka la hriat hma leh nikhua pawh ka la hriat hmam an inòhen a, an inòhen chhan ka Nu in min hrih dan chuan; An inhmangaih loh vang leh an tualthuchhiat vang pawh nilovin, ka pi leh pu, (ka Pa nu leh Pa) te hi Pathian-ah chauh a rinna nghat burmi an ni a. Chutih lai chu ram buai lai a nih a vangin mite chu an òam in ei bàr zawn pawh a harsa em em mai a, ka pa Hminga, (ka Pa u chiah) chu hnam sipai (MNF)-ah a òanga, ka pa Hluna (ka pa Hminga u leh chiah) chu ram sipai (M.A.P) ah òangin phai lamah a awm daih bawh sia a, Ka ni (ka Pa te farnu neihchhun) lah chu pasal a neihna arei tawh bawh si a, ka pi leh ka pute pawh tar chak lo lam a lo ni ve tawh bawh si nen; ka Nu leh ka Pa te chu ei zawnin an hah em em reng a, ka Nu pheih chu kei, a fa sen-òe pawh min awplum hman lovin khaw dangah pûr phurin akal angai deuh reng mai bawh si a.

Chutia nu awplum loh fa nà ná na chu ei in òha hmuh zawh loh nen; ka hriselna a òha lo em em rênga, tunlai ang a dawmdawi a inenkawlina òha a awm lo bawh nen. Chutianga ka hrisel lo chung pawh chuan kan chhungkua kan dam khawchhuah theih nan ka Nu chu khaw dangah; khaw hla tak takahte pawh min ngaihtuah tak chungin pûr phura a kal a ngai tho òin si a, chuvangin ka tan chuan dam khawchhuah a beisei awm loh em a, nikhua pawh ka hriat ve hma a thlafam run lawi mai chu awlsam tak mai tur a ni. Chu vangin ka Pu (ka Nu pa) chuan ka Nu chu ka damdawi tur a lo pe òin a, ka Nu in damdawi min pek chuan ka dam òha ve leh mai òin a.

Chutia ka Nu in damdawi min pe òin tih ka pi leh ka pu (ka Pa nu leh pa) in an hriat chuan, ka Nu chu an hauva, “Damdawi ei angai lo, Pathian kan ring alawm, kan òawngòai anga a dam ve mai ang,” an ti

thin a. Ka Pa nau Tawntea pawh akhua asik a, mahse ka pi leh pu te chuan damdawi ei tir an phal tlat si lova. Chuvang chu nge a thih a hun ve reng chu ka sawi thei lo. Ka Patea (Tawntea) chu thlafam run alawi tawh baw k a. Chuvang chuan ka Pu, (ka Nu pa) chuan, “Patea hi ahriselna a tha silova, a pi leh pu te’n damdawi pek an phal tlat baw k si lova, kan inhloh mai palh ang tih a hlauhawm emai, Patea hloh ai chuan in nufa in ka rawn hruai chhuak mai ang che u,” ti in; ka Nu nen chuan ka Pa-te in atang chuan min rawn hruai chhuak ta a ni.

Chutia ka Pu in min rawn hruai chhuah hnu chuan ka Pu chuan ei in tha leh damdawi nen min enkawl ta a, ka tha chak em em mai a, ka hrisel loh lai a min hmutu te’n min han hmuh leh chuan keimah ka nih an ring thei lo hial a ni, ti in ka Nu’n min hrilh.

Ka Pu Ngunlinga leh kei

Ka Pu (ka Nu pa) hi Furniture mistiri a ni in puan thuite pawh a thiam em em a, kut themthiam tak a ni. An hun lai chuan pa fng tak a ni. Apumrua ahleitling in Mizo pa-ah chuan pa lian leh sang pawl tak a nih ka ring, a hmel a tha em em baw k. Midang an tam a bahra an laih lai pawhin ei leh in-ah chuan intodelh pawl kan ni zel thin a. Bahra laih ngai khawpin vawi khatmah chhuan chhamin kan awm ngai lo.



Ka Nu’n pasal dang a neih leh hnu pawh in ka Pu hnenah chuan ka awm zel a, ka Pi leh ka Pu (ka Nu nu leh Pa) leh ka Nu unaute chuan fahrah ka nih hre lo khawpin hmangaih leh duat takin min enkawl a, thil tam tak min zirtir baw k a, an hmangaihna zawng zawnga min enkawl thintu ka Pi leh Pu leh ka Nu unaute ka va han ngai thin tak em. An mi enkawl na leh an mi hmangaihna zozaita kha engtikah mah rul thei dawn lo mah ila an chungah engtiklai pawhin ka lawm em em rengin ka damchhung zawng hian ka theihnghilh leh ngai tawh lovang. Tun thleng hian ka Pu leh ka Nu unaute hmangaihna angchhung a ka awm lai kha ka la ngai ber fo thin in ka hrechhuak fo thin. He **‘Ka hringnun leh Miriate Khawvel’** bu ka buatsaih pawh hi duat tak leh hmangaih taka min enkawltu ka **Pu NGUNLINGA** hriat reng nan ka hlan e.

Ka Nu leh Pa inthen hnu hian ka Pu chuan Hnahthial lamah inbengbel ve turin, “Hmunpui lamte a ni bawka,” tiin ka Nu-te nen chuan min chhuk pui a, Hnahthial Lungleng veng; tun a Biakin bul Pu Sapbuanga te in hmunah in neiin kan awm ve rênráwn tawh a, ka Pa te Hnahthial-ah an rawn pem thlak ve leh tak avangin ka Pu chuan ka Nu leh Pa chu khaw khat a an awm chuan engtin tin emaw an innei leh palh mai ang tih ahlah a vangin Thingsai-ah bawk chuan min chhohpui leh ta a.

Rambuai a vanga mahni khua a lêt leh an la phal hma chu Thingsai khuaah hian kan awm rih a. Thingsai atang chuan kan khaw ramah chuan lo an va nei thin a, nikhua ka hriat ve chinah chuan loahte pawh a riah theih tawh a, ka Pi leh ka Pu te chuan an lo riahnahte min hruai ve thin a, a chang chuan ka Nu te chu fehin ka Pi leh ka Pu te nen inah kan lo awm thin a. Chutih lai chuan duh angin ka tawng a la fiah rih lova, kan in, kawtchhuah lam lan theihna tukverhah chuan losul haw hun tawh hi chuan thutthleng hniam ka dawh a, chuta chuang chuan dingdihlip ák àk chung hian ka Nu chu mi koh dan angin Chiang vak lo hian, “Itawi” (ka Nu chu ‘Zingkawi’ tiin an ko thin a) tia ka koh thin laite kha ka la hre reng thin.

Thingsai a kan awm lai hian ka Nu chuan pasal dang Thingsai khua ami anei a, kum 5 ka nih in 1973 kum bul lamah kan khaw ram tawh va luah leh turin Bualpui ‘H’ ah chuan mi engmaw zat chu kan phei leh ta a, thenkhat chu Thingsai-ah an inbengbel nghal a, thenkhat chu Hnahthial, Lawngtlai, Aizawl leh hmun dang dangahte an pem bawk a.

Bualpui a kan phei leh hnu rei vak lovah chuan ka Pa pawhin nupui dang a nei a ni tih ka hre leh ta a, ka Nu leh Pa in nupui pasal dang an nei ve ve tih ka han hriat chuan sawifiah thiam siloh hian ka chhungrilah engtin emaw tak min nghawr dawttu awm ang mai hian ka inhria a. Ruak tahuai maite hian ka inhria a. Ka la naupan rih em a vangin ka awm dan chu han sawifiah dan pawh ka thiam lo na a, tukhaw hriatpui loh hian ka thinlung hi arum niberin ka hria.

Thing delh loh, lung delh loh nà ná na chu Pathian hruaina in ka lo thanglian ve zela, ka ngaihtuahnate pawhin puitlin lam a pan chho ve zel bawk a. Ka Nu’n pasal dang a nei tawhin ka Pa pawh in nupui

dang anei tawh si a, kei chuan ka thiante angin he khawvel a ka awm chhung zawng chu Nu leh Pa thlazar hnuaiah; ka Nu leh ka Pa te la dam ve ve reng si in hlim tak leh thlamuang takin hun ka hmang ve ngai dawn lo a ni tih tuma min hrilh ngai lovin ka chiang em em mai a, ka tan chuan nu leh pa-ah beiseina a bo hial hian ka hria a, ka inngaihtuah hian khawngaihthlak ngawih ngawih hian ka inhre tlat mai a, Ka Nu leh Pa ka ngaihna alo thar leh a, ka lung a leng em em mai a. Vanduai bik ta riaute hian ka inhre thar leh ta a.

Ka Pi (ka Nu nu) chu Thingsai a kan awm lai in athi a, ka Pu, ka Pu Mama leh ka Numawii te nen kan awm a, ka Pu Lalduha chu hnam sipaiah a tan avangin kan hnenah a awm ve lova. Ram chu ala buai tho na in azualpui a lo reh deuh a ni ang, mahni khaw lamah a duhte chu an kir leh theih tawh a vangin keini pawh chu ka Nu tel ve lovin kan khaw ram tawh a va inbengbel leh turin kum 1973 kum tir lam chuan mi engemawzat chu kan kir leh a. Hetih lai hian kum 5 ka tling ve chiah a ni.

Ka Pu te chuan lungsi taka an Lalpa Hemphunga hova khua an lo din; vai sipai hovin an hal chhiat vek, khaw ram lo chang tawh leh zuvate tuallenna lo chang ta chu tunhma angin an khualehtuite kim tawh lo mahse a awm ang angte chuan an insak chhunga an lo awmchhunna tur Bawkte khawh in mitin mai chu an buai em em mai a, Bawk an khawh zawh chuan in sa turin an inpuahchah leh a, ei zawn ngai bawk nen. An chhung lehkhat leh thenrual tha thenkhat te chu Thingsai-ah engemawzat inbengbel leh hmun danga pem tate an lo awm bawk nen, Puitlingte chu lungleng tak tak an awm ngei ang. Mahse rambuai a vanga Burma a raltlan ta te chuan an khuaah kir leh theih a ni tih an hriat chuan an awmna Burma ram atang chuan chhungkaw engemawzat chu an rawn kir ve leh bawk a. Kawng lehlamah chuan anmahni vangkhaw chul hnu din thar leh thei a an awm chu thil lawmawm tak a ni bawk a.

Puitlingte chu an in hmun ramhnuai lo chang tawh leh ramsate tuallenna lo chang tawh chu thianfai a in sak leh thlawhhma lak nen, ei zawn ngai bawk, mitin mai chuan mahni buai buai in an buai em em vek mai a. Khaw danga an chhungkhat leh thenrual tha te'n an pem san a vanga an lunglen leh khawharna pawh chuan an buai

hlawm em avang chuan an thinlungah hmun a chang reng tawh bik lova.

Chutih lai chuan keini naupang ho chu kan lo khauphar thawven a, engmah lungkham nei lovin kan lo hlim em em mai a. Chutih lai chuan sorkar a t̃angin t̃anpuina vaibuh kan dawng t̃hin a, mahse chu kan vaibuh dawn chu han chhum hian taivang tui angmai hian ãthil̃t̃huau mai a, a rim a che em em mai bawka, “**Vaibuh uih**” kan ti mai t̃hin. Mahse ei tur dang a awm loh mai bâkah ka Pu te rilru ka ti nuam lovang tih ka hlauh a vangin, “Ka Pu, kei chu vaibuh uih hi tui ka tih zawng tak a ni,” ka ti t̃hin a. Ka Nu Mawii’n vaibuh uih tui ka ti mak a tih zia ala sawi fo t̃hin. Kumte a lo vei meuh chuan kan khua chuan Pathian malsawmnate dawngin mahni kham khawp an thlo chhuak hlawm bawka, vaibuh uih chu kan ei reng ta bik lo.

Kan khua a kan kir leh lai a kan inbâwkte pawh chu mahni tawkah in t̃ha tak tak kan nei ve tawh a, Bâwkah chuan kan awm reng ta bik lova, ei barah pawh kan lo intodelh chho leh ta a. Mahse, khaw t̃henawm t̃awngkam thlahdah zual deuh te’n, min hmusit tih hriat tak mai a, “Bâwk ho” min han ti t̃hin chu keini naupang ho chuan; kan khaw hluiah kan awm a, bâwk a awm lovin mahni tawkah in t̃ha ve tak takah kan awm tawh in anmahni ban buai lovin ei leh bârah pawh kan intodelh tawh hnu a hetiang a “Bâwk ho,” min la ti reng mai chu kan thinrim tawk atling em em t̃hin a ni.

Kan lo buh leh thlai a thar hma, vaibuh uih kan ei t̃hin lai chuan chung vaibuh uih takngial pawh chu kan khawp kham eitur kan hmuh loh chang a awm t̃hin a, chuvangin t̃henkhatte chuan bahra te an lai a. Kan khua a kan pheih leh hnu rei vak lovah kan khuaah chuan vai sipai ho an lo awm a, keini chu chhim lam tlang leh hmar lam tlang inkar zawl ch̃uanchung zawkah chuan kan inzar pharh a. Vai sipai ho chu chhim lam tlangah camp siamin an awm ve bawka. Ei bâr lamah kan dinhmun ala chhiat rih em a vangin ka Pu chu vai sipai ho hnenah a inhlawhfa t̃hin a, vai sipai ho chuan ka pu chu an lo duat em em t̃hin a, a hlauh bâkah ei tur tui tak takte an lo hawn tir t̃euh t̃hin a. Ka Pu hahna leh a thawhrimna a vangin keini chu chhungkaw dang ai chuan ei leh inah kan hnianghnar in vaibuh uih pawh chu kan ei rei ta lova.

Chutih lai chuan keini naupangte chuan kan thil ei; Chawtlang, bal, pangbal leh bahra tlangte pawh khawlaiah thiante zinga tawng tuam tuam pahin kan keih lawl lawl thin a, kan thil ei lai han indil lah chu kan hrât em em mai bawk a. Kan thil ei lai thian te'n min dil kan phalloh chhuanlamah, “***Ka chawrin a nih hi***,” kan ti zaih zel bawk a, chutia kan tih tawh chuan indil nawn leh chiah tuman kan ngai tawh ngai lo a ni. Naupang thenkhat. tawng thlahdah deuhthe pheii chuan a diltu in a dil hma ngâi rawk tur khawpin, “Ka chawrin a nih hi min dil suh, i virt emai,” tih zek chingte pawh an awm.

Puitlingho chuan in leh lo an din a, ei an zawng bawka, an hah em em mai a, chutih lain keini naupanghote chu thian inkawmngelh bikte neiin kawn zawl chuan hnuai zawkah leh dai velahte bukte sain lotê te kan siam thin a, tlai alo nih in zan thim thleng kan pawnto leh a, kan chung te'n luhkapui ler a tangin ring tawkin chaw ei turin min rawn ko luah luah thin a, keini lah chuan “Ka ril a la tam loooooo,” ti in kan lo chhang a, pawnto zawwah zanriah chu kan ei chhang a awm fo thin.

Mipa naupang chuan pawnhche bawlte siamin chengkhat inchuhin kan inkhel thin a, a chhang chuan Sheeld-te pawh kan siam chawpa kan inchuh bawk thin. Achang leh ramhnuai a thingthuaite kurin hrui zamahte kan uai a, thing ler sang tak takahte kan lawn a, kan hla thiam thiam kan zawmkhawma, thawveng leh enghelh nei lo tihhriat fahranin enge hlathu awmzia pawh ngaihtuah miah lovin, ring tak takin “Lentupui kai vel leh romei chhumin arbawm khai zoram mawi leh duhawm,” ti te in kan sa a, “Murvate thlawkin leng la,” tihte leh hla dang pawh ala tam mai, athiam deuhthe pheii chuan mak tak takin an la phuah belh (kaihlek) lehngal, kan hla hriat dan lah amak thei thin khawp mai.

Achang leh chakai meichher kan chhit a, inlemkhual kan hrât em em bawk. Mipa naupang leh hmeichhe naupang tumah inthliar lovin kan inkawm ho vek thin. Achang leh vai sipaiho puja dante kan zira, pawl alo tlakin zupawl kan tuam in vaithang kan kama, sa kâp leh âwk an awm reng bawk a, ramhnuai thei atam bawk nen, naupang mahni inchhunga awm cheuh cheuh hi kan awm àwm love. Aaaa, ka

sawi senglo sawi tur atam mai. Tunlai finna lam a inelna leh zirna chi hrang hrang a vanga buaina chim phak lovin Bualpui khua-ah chuan hlim em em in damlai pialral kan chen a ni ber mai e.

Tun hnua lunglen leh thil ngaih han sawi hian khang lai hun kha ka lung tileng bertu leh ka ngaih ber a ni lothei lo a ni. Mahse tunah chuan hmanlai an chang zota. Ka tan chuan thawnthu ngaihnawm tak kan sawi a, angaihnawm lai taka a tawp ta daih ang mai hian khang lai hun a thiante nen a hlim tak leh inlunglual taka lungkham nei lo leh thawveng em em a kan hlim lai nite chu thal romei ang mai in a zâm ral ta. Khawvel hmun dang reng ngai lova damlai pialral kan chen laite kha ngai hle thin mah ila thawnthu anga kan sawi nawn lehte a nih ngawt loh chuan koh kir leh theih a ni tawh silo.

Khatia ka Nu leh Pa in nupui pasal an nei ve ve tawh tih ka hriat hnu ațang kha chuan ka Pu leh ka Nu unaute'n hmangaih tak leh duat taka min enkawlina hnuaiah leh ka thiante nen a tual chai a hlim taka kan awm laite chuan ka thiante chuan “Ka Nu, ka Pa,” tih tur an nei bik a, kei chuan ka Nu leh ka Pa-te dam reng chung si in, “Ka Nu, ka Pa,” ti a koh tur ka nei ve lote chuan ka rilru a ti hreawm thei em em mai a. Ka Pu hmangaihna ângchhungah pawh chuan ka tlei zo lo a ni ber mai e. Nu leh Pa te hi fate tan chuan an lova hlu tehlul em.

Ka Nu chu ka ngai thei em em thin a, naupang a thuchangin ka Pu pawh hrih lovin Thingsai a ka Nu hnenah mi kal remchangte zuiin ka kal daih thin a. Ka Nu hnen ka han thlen chuan ka Nu chuan, “I rawn kal dawnin i Pu i hrilh em?” min ti a, ka hrilh chuan ka kal a phal loh ka hlauh a vanga hrilh lo ka nih thute ka Nu ka hrilh chuan, “I rawn kal dawn chuan i Pu hrilh thin rawh, chuti lo chu i bo emaw ati a nga a lo mangang viau ang,” min ti thin a. Ka nu hnenah chuan ka awmreng thei si lova ka haw dawnte chuan ka Nu in thing phur pahin kawtchhuah thleng min thlah thin a, ka Nu nen kan han inthen tur chu kan nufa chuan kan tap tuau a, hnukulh teuhin kan inthen thin a. Kan khuaah chuan lung leng reng rengin hun ka hmang thin a ni.

Engemaw chang chuan, “Engahnge maw ka Nu leh Pa te hi an inthen kher kher chu aw,” te ka ti vawng vawng thin a ni. Thiante zingah

pawh Nu leh Pa nei lo ang mai a ka inhriat avangin ka inthlahrung deuh dui renga, fahrah ka ni tih ka inhriatna chuan ka nun khua ati har em em thin a, thiante zingah inthlahrunna leh mite tluk lo bik riau leh tluk thei loa ka inhriatna chuan ka nun chu ati hreawm em em mai a, ka ti dui mai hian ka inhria a. Hmangaihna khawp kham lo riauva inhriatnate ka nei a. Ka Nu ka ngaih azual thar leh thin a, thiante zinga tualchai pawh nuam ka tih loh chang atam thin reng a ni.

Ka Pa hi engang hmelpu nge a nih a, engang mizia nge a nih ka la hre lovin ka la hmu ngai reng reng lova, ka Pa chuan kum tin ka Kristmas thawmhnaw, Pheikhaw, kekawr, kawr leh thil dang, ka zirlai a tana ka mamawhte nen min rawn thawn ziah thin a, a ni pawh in naute ka nih lai a min hmuh bak kha chu min la hmu ngai bik miah lo na in wawi khatmah ka thawmhnaw chu a rawn thawn sual ngai mih lova, ka tawk chiah chiah zel a ni. Ka Pa pawh chu ka hmu chak thei em em a, “Amah arawn kal lo a nih pawhin engtikah emaw chuan Hnahthial ka kal thlen theih hun ala awm ngei a nga, chutih hunah chuan ka Pa hmu turin ka la kal ngei ngei ang,” tiin ka ngaihtuah thin. Ka Pa thil rawn thawn ka hmuh chuan Pa ka nei ve a ni tih ka hriat a vanga ka lawm theih thin ziate kha. Tin, ka Pu Mama hi khualzin mi a ni a, akhual zin apiangin thawmhnaw thar min rawn hawn ziah bawh thin.

Tumkhat chu (eng kum chiah nge ka hre lo) min rawn hruai turin ka Pa chu Hnahthial atangin a rawn kal a, chumi tum chu ka hriat theih chin a ka Pa ka hmuh hmasak ber tum a ni. Ka Pa rawn kal lai hian keini chu kan khaw chhim lam kawtchhuahah ka thiante nen kan awm lai a ni a, miin, “Malur, i pa a rawn kal,” tiin ka Pa rawn kal thu min lo hrilh a. Chutia ka Pa rawn kal thu min rawn hrilh chuan kei chu ka Pa hmuh chak si, huphurh deuh bawksi chuan ka Pa awmna lamah chuan ka va kal a, ka unaupa Denga’n min rawn zui a, ka Pa hnen ka va thlen chuan ka Pa chuan, “Nangmah hruai tur chein ka rawn kal a ni,” a tia. Jeep in min rawn hruai turin a lo kal hi alo ni a. Kan khuah chuan Jeep chu a rawn kal ve zauh zauh na in ka la chuang ngai lova, thiante hmuh lai a Jeep Frone seat a han thut vang mai chu inchhuan thlak riau dawna ka hriat a vangin thil dang



engmah ngaihtuah lemlo chuan ka Pa bulah chuan Jeep Frone Seat-ah chuan ka chuang ve ta rawk mai a.

Jeep Driver seat bul kawngkhar ipte-ah chuan zu bawtol hi a lo inzep tun mai hi ka hmu a, ka Pu in ka Pa hnena kal tura Jeep a ka chuan pawh chu a hre der si lova, thiante hmuh lai a Jeep Frone seat a han thut vâng mai chu nuam dawn riauva ka hriat chu a lo nuam awzawng lo mai a, Thingsai lam kawtchhuahah Jeep chu a ding lo palh anga ka chhuk thei lovang tih mawlh chu ka hlau a, vanneih asiam in Jeep chu Thingsai lam kawtchhuah-ah chuan a ding a, ka Pa chu U Dova nu te inah ahan chhoh lawk hlan chuan ka chhuk a, kan in lam pan chuan ka tlan thla ta nal nal a.

Denga chuan ka Pa in minrawn hruai dawn a, Jeep-ah ka chuang a ni tih a hriat chuan ka Pu hnenah a va tlan vang vanga ka Pu hnenah chuan hah leh hlauthawng thaw hlawp hlawp chung chuan, “Malura a pa in arawn hruai a, Jeep in akalpu daih,” ava ti a. Ka Pu chu thinrim em em in a in sak lai kalsan chuan arawn tlan chhova, ka pi Buangpuui (Chutih lai chuan ka Pu Lalduha nen an la in nei lo) pa te in bulah ka Purawn chho leh kei ka tlan thla nen chuan kan intawka, ka Pu chuan, “Engahnge ka hriat loh a i pa zui i tum,” ati a, hlauthawng thaw hlawp hlawp pah chuan min hau bawrh bawrh a, kei chuan ka ti dik lo a ni tih ka inhriat avangin tawngkam khat pawh a chhang lo chuan ka Pu chu ka zui thla hnak hnak a.

Ka Pa u Doa nu te in a han kal, a lo kir leh chuan ka lo awm tawh silova, kan in relah chuan arawn kal a, ka Pu chu keimah a hnen a hruai tur chuan arawn dil a, mahse ka Pu chuan, “Engahnge kei minrawn hmasa lova Patea hi hruai i tum, i fa mah nise ka enkawl a ni a, ka thu lo chuan i hruai tur a ni lo hrim hrim. Areng reng thua Patea ka hnena a awm loh chuan ka awm thei lo hrim hrim, a ni tel lo chuan lunglengin ka thih phah mai ang, lehkha azir theih pawhin a zir theih loh pawhin ka hnenah a awm tur a ni, i hruai thei lovang,” ati bur mai a. Ka Pa pawh chu beidawng takin a kir ve leh ta a. Aruk tak chuan ka Pa chu ka khawngaih hle a. Chumi hnuah pawh chuan kum dang ang thovin ka Kristmas thawmhaw leh ka lehkha zirna atana ka mamawh chu minrawn thawn reng tho a ni.

Ka Pu chuan hmangaihna tawp lovin min hmangaih a, ka nunna leh ka Pu nunna chu ainthlunzawm tlat emaw tih mai tur hi a ni a, mahse ka Nu leh Pa ka ngaih na chu a reh thei chuang reng reng lo mai a, thiante nen tualchai in han inkawm hlim bawk thin mah ila thiante hriat loh hian ka lung a leng em em thin a, ka nu ka ngaih thin em avang chuan Thingsai-ah ka Nu hnenah chuan ka awm ta nge nge a. Ka Pu chu ka tel lo chuan atlei zawh bik si loh a vangin a ni pawh chu hun reitak chhung chu kan hnenah chuan a lo awm ve a.

Bualpui a ka Pu hnen a ka awm lai a engmah ti ngai lova thiante nen tualchai a ramhnuai hrui zam leh thing kungahte nunchan zira hun kan hman thin a zalen em em thin kha Thingsaia ka Nu hnena ka han awm vethung chuan nitin ka Nu leh pa chu an feh thin a, kan lo lah chu a hla thei bawk si a, School kal pahin nau ka awm a, tuite ka chawi bawk a, ka buai in ka hah em em thin a. Achang chuan ka Nu-te feh chu an haw tlai thei hle thin a, an thim thuak changte pawh awm thin, ka thiam ang angin eirawng ka bawlin ar ka lawi a, vawkwaw ka pe bawk a, duh angin thian pawh ka kawm ve thei lova, sikul pawh ka kal hleithei thin lo. Tlai lamah chuan ka nau awm an lo tlei lo bawk si nen; kei pawh chu ka tap tep thin a. Bualpuia ka awm lahin ka Nu ngai in ka lung aleng thei bawk si a.

Ka Nu leh ka Pa an inthen kher kher chu ka tan chuan kua avar lo em em reng mai a, thiante zingah leh puipun nikhua pawhin hniam bik riauva inhria in inthlahrung reng rengin hun ka hmang thina, mi in min han tirhte hian akawi angilin ka zawm zel a, aia upa thu phei chu hnial chiah ka ngai lo hrim hrim a, chu chuan 'naupang thuawi' angin min lan tir reng a. Vawikhat phei chu kan veng Muallungthu a dawr kai Pi Sangdingi chuan an in a thil ka va lei in, "Kan veng naupangah chuan thu i awih ber," tiin an huan a thei rah tam tak min pe teuh nghe nghe a ni.

Ka Pu chu Thingsaiah kan hnenah arawn awm reng thei si lova Bualpui-ah a haw leh thin a, kei pawh chuan Thingsai leh Bualpui chu ka kartawn chhen mai a, Bualpui a ka awm leh ka Nu ka ngai si, Thingsai a ka awm leh ka Pu ka ngai in a ni pawh in min ngai bawk si, chutiang reng renga hun ka hman avang chuan zirna lam pawh ka hawi hleithei lova.

Kum 1980 khan ka Nu hnena ka awm lai in ka Pu chu a lo damlova, a natna chuan zual lam apan zel a, ka Pu chuan min ngaih em a vangin minrawn hruai turin mi arawn tir a, hmanhmawh takin ka Pu hnenah chuan ka kal thuai a, Bualpui a kan in ka va thlen chuan ka Pu chuan min lo nghak zo ta lo. Min lam lawm lawm chungin min lo peih loh san ta. A ni chu he khawvel; fahrah a vanga lung lenna leh tawrhna zawng zawngte, nupa inthen a vanga an fate tawrhna rapthlak takte, rambuai a vanga tawrhna leh thlaphang tak a rumna leh chhungkua inthena zawng zawngte, tam mangan buai hahthlak zawng zawngte awm thawh lohna ram, hmangaihtu leh hmangaihte inthen tawh lohna ram a intawng leh turin min lo kalsan in he lei a khualzin kawng chu September ni 10, 1980 chuan kum 70 mi chauh ni in alo zawh tawp ta a ni.

Ka Pu hi pa fng leh Talant ngah tak, pumraw lian leh hmeltha bawksi a ni a, pangpar angaina em em bawka, Lunglei a a kalte hian pangpar mawi tak tak a khawina chawpin arawn hawn thin a, kan varanda-ah kan dah a, keiin chung pangpar; ka Pu in hmun hla tak a tanga arawn hawnte chu hlim takin tui in ka lo chawm thin a, kan putu hian kan hlim thei em em thin a, a mit, a beng leh a hate pawh a la tha em em a, a hrisel tha em em reng bawka, insawiselna a neih ka hre ngai lo. Ka Pa in minrawn hruai a tum tum a ka Pa hnen a, “Patea tel lo chuan ka thi mai ang,” a tih ang khan a bul a ka awm loh a vanga lungleng a thi ni te in ka ngai hial a ni.

Hmangaih em em a min enkawl a min thlahlel ngawih ngawihtu, keipawhin ka hmangaih em em leh ka thlakhlelh em em ka Pu chu aruang mai ka han hmu ta mai chu hriat thiam har ka ti em em mai, kum 12 chauh ka la ni a. Ka Pu in ahnukchah dawn tep thlenga min lam lawm lawm thute ka han hriat phei chuan Thingsai a ka Nu hnen a ka lo awm san daihte chu ka inchhir em em mai a; ka Pu hnenah khan lo awm hle hle ni ila chuan ka Pu chu a la thi awm si lova, keima vangin lunglengin ka Pu hi a thi nite hian ka hria a, mahse a sawt tawh silo, upa in “Phengphehlepa khua a tlai zota,” an tih ang mai achang zo ta si.

Ka Pu in min boralsan hnu chuan ka nun chu beidawnna in akhat zova, beiseina thar nei leh turin ka taksa, ka thlarauin chakna chhete pawh anei zota lo. Khawvel hi ngui zo tavek leh ruak ta hui ang mai hian ka hria a, awmgaihna pawh ka hre lova, ka sahal hulh hulh hian ka inhria a. Ka Pu in a hnukchah dawn thep a, “***Patea kha ka hnenahrawn hruai rawh u,***” ti a achelh tak loh thute midangin an sawite ka han hriat pheichuan, “Engah nge Thingsaiah ka Nu hnenah ka lo awm kher kher aw, khawvelah hian ka Pu anga min hmangaihtu an awm leh thei tawh dawn silova, ka Nu pawhin ka Pu ai chuan min hmangaih bik lovang, ka Pu hi a thih hma in reilote tal a bula han awm leh ka va han chak em,” ti tein ka inngaihtuah a, puitling anga ka rilrua thil awm han sawi chhuah bawrh bawrh nachang ka hriat loh a vangin ka sepui ruah tawrh tlawk tlawk mai a, ka mittui chu dan rual lohvin asur hian a sur zung zung mai a.

Ka ngaihtuahna a kal thui poh leh chu ka ngaihtuahna chuan beidawnna ruamah min hnuk lut thukin ka mittui asur tam tir ting hi a ni mai si a. Ka hmalam chu thim mup mai hian ka hria a, ka thlirna lam apiang mai chu thim chhah tak hian a tuam mup zel mai hian ka hre bawka, keimah chauhva thim zinga panna lam tur bik pawh hre lova ding reng mai nite hian ka inhria a. Hmangaihna khawp kham dawng lo riaute hian ka inhre bawka. Achang leh, “Ka nu leh pa inthen kher kher hi chu aw,” ti in ka Nu leh Pa chungahte ka rilru a na thar leh thin a. “Pathian venna leh hruaina a ka lo puitling ve theite a nih chuan kei chuan ka nupui chu thihna in min then a nih ngawt loh chuan engti kawng mahin ka then dawn lo reng reng, keimah angin ka fate fahrah riangvai a an awm ve hi ka phal lo,” tite in ka ngaihtuak a.

Ka Pu dam lai a a hnena ka awm lai chuan a kalna apiangah min hruai thin a, kawnga kan kal laite, ina kan awm laite, zana kan mut laite hian ka hriatthiam phak tawka lek lekin Pathian thu min hrilh thin a, achang chuan Awithangpa zaite, Darthlalang zaite, Vaizawi zaite, saum dil hlate min hrilh thin a. Tun hnua ka Pu thil min hrilh mak ka tih em em amai chu; hmanlai thingtlang putar in kan awmna lei amum a nih thu leh kan awmna lei leh thlate hian ni khi an hel

thute min hrilh kha mak ka ti ðhin khawp mai. School a kal leh lehkha azir pawh ka hre miah silova.

Tin, awmdan mawi leh nundan ðha tam tak min hrilh bawk a, “Khawilo vahchhuahna-ah i inthiar in kawng chhak lamah zung ngai lo la, kawng thlang lamah daikal ngai suh, mipa rama kan kal chuan chem leh ipte àh zel tur, naupangin lukham kham ve loh tur, dar akum duh a, pian a nalh lo thei, bâkah mipa chu khawilo vahchhuahna-ah lukham lova mut a ngaih hunte a awm ðhin a chutih hunah chuan tette aṭanga lukham kham ðhangte chuan lukham lova mut chu hreawm anti a, an muhil thei ðhin lo. Mipa chuan miin an ei theih chu ei theih ve zel tum a ðha, khawilo vahchhuahna-ah ei aṭul hun a awm ðhin a, ei thei lo bik nih chu a ðha ngai lo, (Hei hi chawhmeh lam a sawina a ni) tihte leh thil dang tam tak min hrilh ðhin a, thawnthu satliah min hrialh ngai meuh lo.

Ka Pu thil min hrilh tun thlenga ka la chhawr em em pakhat chu: “Kawng laitū in lung halna tur thirtiāngin lung chang tak an verh a, lung chu a chan em a vangin an verh sawt lo êm êm a, mahse alung verh chu a khuk chhung chu alung verh chu sawt lo viau pawh ni se beidawng lova a verh zel chuan lung halna jeletin bawm dah theih tawkin a verh hlawhtling ngei thin, nang pawh i thil tih reng reng sawt in lang lo mahse beidawng lova i beih zel chuan i hlawhtling ngei ngei ang,” ti a min hrilh kha ka thil tihna kawng tinrenga ka hlawhtlinna chhan ni pakhat in ka hria. Ka thil tih a beidawng lova ka tih zela ka hlawhtlin dan tur kha ka hriatthiam turin min hrilhfiah thiam khawp mai. Khang ka Pu min hrilh leh min zirtirte kha tun a hnam hnufual leh hnam changkanglo tak zinga Missionary hna ka thawhna hmun atan Lalpa’n min lo buatsaih lawkna a ni tih tunah hian ka hrethiam chiah a ni.

Ka Pu nen hian sahdal leh beai (sava thang) te kan kam ðhin a kan thang kam kan en changte hian sava chi hrang hrang, varung, vahrit, ramar, varihaw leh buarchawmte iptepui âng hmawh hmawkin kan àk haw hnawh ðhin a, nuam ve thei ðhin tak a ni. Kan ðhianza hova chakai meichher kan chhit changte hian kan haw hma chu tapchhak a ðhuin min lo nghak ðhin a, a hunlai chuan zing ka thawh veleh a ka ei tur vaimim/kawlbahra min lo rawh hmin sak diam ðhin. Ka Pu khan

min lova han hmangaih tak em. Ka Pu bula awm a nuam ka tih thin zia leh min enkawl dan zawng zawng hi sawi tur tam tak a awma, midang tan chuan eng nimah suhse; kei a tan chuan sawi ngawt pawh a nuam a, mahse nuam katih avangin ka sawi vek seng chuang bawh lovang.

Ka Nu pum chhung a tanga min din a ka thatna tura kawng engkima min thawh saktu Lalpa'n ka nunna tling lo tak a rawngbawl ve thei tura min lo buatsaih a vangin Lalpa chungah ka lawm êm êm bawh a. Tunah chuan khawvel a hna ropui ber, lei leh achhung a thil awm zawng zawng siam a hmangaih taka veng a enkawltu, lal-te LAL rawngbawl tura Missionary hna thawh thei a ka awm hi ka lawmin ka inchhuang takmeuh a ni. Ka têt lai a hmangaih taka min lo enkawl seiliantu-te pawhin min lawmpui vek ka ring. Anni pawh engkim chungah thuneitu ka Pathian chuan malsawmna tam tak vur mawlh rawh se.

## BUNG 3

### KA PA HNENAH

Ka Pu awm tawh loh hnu chuan ka nun khua hi a har thei êm êm mai a, thiante han kàwmin ka Nu hnenah pawh awm mah ila ka tan khawvelah hian nawmna reng reng hi a awm tawh lova, thih a ka Pu hnen a kal ve daih maite chu ka châk em em thin a. Chutia ka nun khawro leh beidawng taka ka awm lai chuan Hnahthial a t̃angin ka Pa in a hnen a awm turin min rawn chah a.

Ka Nu chuan, “I duh chuan Hnahthial a i Pa hnenah awm la, hmunpui lamte a ni bawka, i zirna lamah pawh hma i sawn phah zawk ang,” min ti a. Kei pawh chuan Thingsai leh Bualpui chu ka Pu a awm tawh loh a vangin nuam tihna reng reng ka nei tawh bawk si lova, ka thil hmuh apiang chuan ka lung an ti leng zel mai hian ka hre bawk si a, chubâkah; heta ka awm reng chuan ka Nu sawi angin zirna lamah ka hnufual phah lehzuall dawn bawka ka hriat avangin Hnahthial a ka Pa hnen a kal chu ka tan tha dawn zawkin ka hria a. Kum 1981, ka Pu thih hnu kum, kum tir lamah ka Pu Lalduha (ka Nu chhang chia) Hnahthial kal chu ka zui thla ve ta a.

Hnahthiala ka naute nen

Ke a nileng a kan kal hnuin tlai lam khaw thim dawnah Hnahthial a ka Pa te in chu kan thleng a. Lamhla ka la kal ngai loh a vangin ka taksate a rawlin ka ke te chu a na hle mai a, ka kaiza thate a na hle mai a. Ka ke ka thluan chuan ka tawm leh thei lawk lova, ka ke



ka tawm chuan ka thluang leh lawk thei lova, a hreawm khawp mai. Ka Pa te chhung chu an lo rual khawp mai a, kan chhungkaw member chu mi sawmhnih leh pakhat (21) lai kan ni a. Thingtlang lam ãtang leh hmunpui lam a t̃angin mikhual panga (5) ai tlem lo kan nei reng bawk a, tute hi nge kan chhungkua ni a tute hi nge mikhual tih pawh hun rei tak thleng chu ka hre hrang thei lova.

Ka Pa bula ka han awm chu a tir lam chuan awmdan ka thian lovin ka zakzum hle mai a, mahse rei vak lo hnuah chuan chutiang nuai nuai karah chuan inthlahrun leh zahin awmzia a nei lo tih leh min hringtu ka Pa awmna in a ni tih ka hriat avangin zakzum leh inthlahrung dāi a awm chu ka tum bik ta lova, ka zia ka chhuah ve tan ta a.

Tlai khat pheī chu ka nautē tha leh a, “Nautē ka nih laiin ka Pa hnenah ka awm lova, ka’n nautē tha leh lawk teh ang,” ti niawm hrim in, ka Pa te khumpuiāh chuan ka naute nen ka Pa chuan min phekphehlen dawrh dawrh mai a, kan Pa fa za chuan kan hlim em em mai a. Chutih lai chuan ka nau Arama leh Azira an lo awm tawh a, tun a kan tlum ber Sangtea erawh chu a la piang lova. Mahse, phekphehlen rual ka nih tawh loh a vangin ka rualpui ka unau dang te’n min nuih a ni tih ka hriat chuan ka zak ve deuhva anmahni nen chuan kan infiam ta zawk a.

Hnahthial ah chuan sikul kalin pawl khatah ka tan tha leh a. Sikul a ka pawlpuite zingah chuan a lian pawl ka ni nghe nghe a. Kan pian kum, ni leh thla thleng a inangchiah, ka Pa Hminga fanu Champuii chuan thingtlang ramhnuai a nunchan kan zir chhungin Middle sikul alo kai thleng der tawh bik a. Chutih lai chuan Hnahthial a kan sikul naupangte chu an sual êm êm mai a, Thingsai leh kan khua Bualpui a ka awm lai a insual ngai reng reng lo leh mi huatthu sawi hlau reng reng awm thin kha; hreh teh mah ila ka sikul kalpuite chuan insualah min cho reng si a vangin min chotute lak a atlawm zawk a tan ka duh bik si lova, insual angai fo ta mai a.

Chutia nitin deuhthaw insual a ngaih deuh reng a vang chuan sikul pawh chu hreawm ka ti em em mai a, Thingsai leh Bualpui a thian in kawmngelh leh inlungual a hlim taka kan inkawm dial dial laite kha ka ngai thei em em thin a, mahse, han haw chho leh pawh ni ila ka Pu a awm tawh loh a vangin tunhma ang khan hlim takin hun ka hmang thei dawn chuang lova, lungleng leh khawhar takin hun ka hmang leh dawn thova, chuvang chuan ka Nu min beiseina tihhlawhtlin ka tum hram zawk a ni. Ka theih tawkin ka zirlaiah chuan tan ka la a, Lalpa tanpuina in kan pawlah chuan a ti tha pawl ka ni ve thin.



Kan inpuiah chuan kum khat emaw chauh ka awm ve hman tihin keini chhungkua bik chu Melveng tlangah ka Pa hna avangin kan indan a lo tūl ta a. Hnahthian I.T.C. Treining-na tur Hostel leh Class room sak chu ka Pa Hminga'n a Constrict a, a sak zawh chuan keini chhung chu chu Hostel leh Class room enkawl leh anām hmunte siam pahin Melveng tlangah chuan kan indang ta a.

Melveng tlang aṭang chuan bazar ni apiang hian anām dawrawn khat a phurin zing varṭianah anām chu ka zuar ṭhin a, Bazar venga kan awm lai a kan ṭhenawm nu Pi Tluangbawihi'n, (Pu Sangchungnunga nupui) “Lura anām hi lei rawh u, Melveng anām a ni a, atui bik a nia,” tia ka anām zawrh min fak sak ṭhin a vangin mi tam takin min rawn lei sak ṭhin lai a Pi Tluangbawihi chungka ka lawm ṭhin ziate kha, (ama hnenah lawm thu han sawi dan pawh ka thiam lovin sawi nachang pawh ka hre bawh lova) ka theihngihl thei tawh ngai lovang. Melveng tlangah chuan kan chhungkua chauhvin kum engemaw ti chhung kan awm a, khua a har duh ṭhin khawp mai.

*Hnahthial a ka nu leh Pa, ka Pi, ka naute leh ka fa upa lam pahnihte nen*

Melveng tlang aṭanga kan awmna hnai ber Chawngtui Primary Sikulah ka naute pahni, Arama leh Azira te nen chaw fun in sikul kan kal ve ṭhin a, chhunchaw chu ka pawlpui ka ṭhian ṭhate inah kan fāk ṭhin a, chutih lai chuan ka naute chu an la te in enkawl ngai tak an la ni a. Kan in aṭang chuan kan sikul chu ka hre Chiang Chiah lo na in Km 2 vel ahla



chu a nih ka ring. Chawngtui venga sikul kan kalna a naupangte chu ka sikul kal hmasak zawkna ai chuan an ṭha zawk êm êm a, ṭhian ṭha tak tak pawh ka nei nual nghe nghe a ni. Kan sikul hmun aremin a nuam bawh a, keipawhin sikul chu nuam ka ti ve hle tawh a, mahse chutah pawh chuan ka pawlpui sual fâl deuh bik hi a awm a, chu chuan insualah min cho ṭhin a, a khattawkin chupa nen chuan kan insual ṭhin, mahse kan Headmistress Pi Kâmi chuan ka thlavang

ahauh thei hle thin a, mi nen a kan insulate chuan ka sualpuite chu a hau hrep thin, “Lura hian mi pawl a sawi hmasa ngai lo, Lura sualtu chu midik an ni ngai lovang,” ti in ka thlavang a hauh tlat thin.

Melveng tlang a kum engemaw zat kan awm tawh hnu; midang I.T.C. Treining-te leh sawrkarmi tam tak an rawn awm tawh hnu chuan keini chhung chu khaw chhung lamah chuan kan chhuk leh ta a, chuta kan in awmna chu Lungleng veng, Aithur veng leh Peniel veng inrina Lungleng veng huamchhungah a ni a. Kan chhungkua chu lawina tur Kohhranah kan lunglual thei ta tlat lo mai a, Ka Pa chuan, “Lungleng veng huam chhunga awm kan ni a, Lungleng Kohhranah kan lawi tur a ni,” ati a. Kei leh ka nu chuan thu hran nei in rohran kan lo rel ve a. Ka nu chuan a nu leh pa leh a unaute awmna “Peniel Kohhranah kan lawi tur a ni,” a ti a. Kei lah chuan a rem leh rem loh pawh ngaihtuah lem lovin ka lo tlangnel tawhna Hnahtial Bazar Kohhran a lawi ka rawt mauh mai baw a, Kohhran danga lawi chu ka duh lo bur mai baw si a.

Melveng tlang a kan awmlai pawhin hla hle mahse ke ngatin Hnahtial Bazar Kohhran-ah ka inkhawmin Sanday sikul pawh ka kal thin a, ka nu chu Peniel-ah a inkhawm thin a, ka Pa chu Lungleng Kohhran-ah a inkhawm thung. Kan chhungkuaah buaina ral alian hi a ni ringawt mai a, ka nu nen chuan ka Pa thlunglu kan ti hai ve thin khawp mai. Mahse Lungleng Kohhran hruaitute leh an thalai hruaitute an felin mi tih tlangnel dan an thiam baw a, nakinah chuan Lungleng Kohhran-ah chuan lunglual takin kan lawi za thei ta a ni. Lungleng Kohhran a tang ngei hian Lal Isua nen pawh kan lo intawnga. Lungleng Kohhran hruaitute leh thalai hruaitute hi Lal Isua Lal leh chhandamtu a ka lo pawm ve tirh hian ka thlarau lam nun thiam tak a min enkawla min dawm kangtu an lo ni ta hial nghe nghe a ni.

Pathian venna leh kaihhruaina in; ka hriselna a tha in naupang thangmawh tak ka ni lem lo baw a, tleirawl tia zet ka lo ni ve ta a. Hetih lai hian ka unaupa Denga (ka nu u, ka Nu Kungi fapa) chu Bazar venga kan inpui; ka Pa Hminga te inah chuan lehkhazirin a awm ve a. Denga chuan kan khaw lam a haw turin min sawm a, (hetih lai hian ka Nu te chu kan khua Bualpui ‘H’ ah an lo awm tawh

a) chutia Denga'n min sawm takah chuan Hnahthial naupang an sual bawk si a, insual duh loh pawhin insual a ngai reng thin avangte pawh chuan Hnahthial khua chu hreawm ka ti em em thin a, ka Nu ka ngai thei bawk si nen, Denga chu ka lungualpui ta a, kan khua a haw daih a ka Nu hnen a awm zawk tur chuan thutlukna ka siam fel ta a.

Naupanga thuchangin ka Pa pawh hrilh lovin zanah ka puanthuah ka tel a, thim zingah a ruka kan in chu chhuahsan turin ka inpu chhuak ta luk luk mai a, kan khua a kan naupan lai a kan thin; Hnahthial a rawn pem tawh, Hmunsanga te inah Denga nen chuan atuk zing khawvar hma a kan khua a haw tur chuan kan mu ngal mai a. Hmunsanga pa chuan Denga nen a kan thil tum chu a han hriat chuan kan thil tum chu tha a ti ta awzawng lo mai a, min hau hrep a, kan in lama kir leh tur chuan min ti a, mahse kir leh thei ni in kan inhre tawh bik lova.

Chutia zing a chhuak mai thei lova Hmunsanga pa in min hauh min hauh lai chuan min rawn hruai kir leh tumin ka Pa a lo kal a, ka Pa hnenah chuan Hnahthial-ah kan awm peih tawh loh thu leh haw ngei kan tum thu kan hrilh a, ka Pa pawh chuan tihngaihna tak min hriat bik chuang loh a vangin min kir san ve ta mai a, a hnu rei vak lovah ka Pa Hminga'n min rawn hruai kir turin Muana a rawn tir a, Muana chuan, "Ka Pa Hminga'n, 'rawn kal lawk tehse, an duh chuan nakinah an kal leh mai dawn nia,' a ti," a rawn ti a. Keini pahnih chuan chutia ka Pa Hminga'n atih chuan Muana chu kan zui chho ta ral ral a.

Ka pa Hminga kan han hmuh chuan, ka pa Hminga chuan kei chu pindanah min ko lut a, "Bualpui-ah chuan nang chu haw lo mai rawh, hetah tha taka lehkhia i zir chuan i hmalam hun a eng dawn a, Bualpuia i chhoh erawh chuan Bualpui chu thingtlang khawte a ni si a, rei lovah i inti tlangval ang a, nupuite i nei anga i hmalam hunah beiseina eng engmah a awm lo. Heta i awm chuan nupui neih i lo hun a nih pawhin tha takin nupui pawh kan neih sak ang che," tih leh thil dang tam tak min hrilh a, han hnial ngaihna leh han hnial dan ka thiam loh avang leh a sawi chu dik a ka hriat bawk si avang chuan ka thiltum chu ka thulh leh ta a, Denga erawh chu a haw chho ta a ni.

Lungleng veng a kan in a awm ta lo chuan Bazar veng a ka Pa Hminga te hnenah chuan ka awm nghal ta a ni.

Nikua a lo rei zel a, keipawh chu rawlthar ka lo ni chho ve ta reng mai a, naupan lai a insual hrat pawh a lo reh in mite pawn, “Tunlaiah chuan ar pawh an insual duh tawh hleinem,” ti in incho fo leh insual fote pawh an duh tawh lova, insual chin ai chuan a ruka ngaihazawng neih nachangte kan lo hre ta zawk a. Ka Nu, (Ka pa Hminga nupui) chuan min duat em em mai a, ka thaw a vengin fahrah ka nih pawh ka inhre lo hial nghe nghe a ni. Ka rualpui tleirawl keima phu tawh lek lek leh ka phu loh hial ni a ka hriatte pawhin min bawr ve tan a.

Tleirawl lungmawl lai tih takah; ka hmalam hun leh ka Nu min beiseina pawh hre chang lo lêkin ka tleirawl lai hun chu ka lo hmang chu lo ni in!!! Ka zirlaite pawh chu tunhma ang renga la tiṭha tura ka inngaih laiin ***Tleirawl dawntuai ṭha lengi-te*** tawnah ka thinlung ka lo seng tam lu deuh a ni chek ang chu!!! Inzir puitling thei talo chuan; ka tleirawl hma a ka pawl puite zinga ati ṭha pawl ni ve ṭhin kha ka zirlaiah ka hlawhchham ta der mai. Ka han harh chhuah meuh chuan khua atlai zo ta. ‘Apawi mange,’ tih vawng vawng mai loh chu tihtheih dang reng ka nei ta lo.

Midangte pawh keimah ang thovin an tleirawl chho ve in chhaitu leh chhai lai ‘d’ te pawh an nei ve thova, tam tak chuan an zirlaiah hlawhchham phah nan an hmang chuang lova. Lehkha zir lai a chhai lai ‘d’ neih pawh hi mifing tan chuan an zirlaiah ṭanlâk nan leh rual el nan a hmangin an hlawhtling tho ṭhin a, mahse kei ang dawntawi leh fîng lo, zalenna hmang thiam lo tan erawh chuan lehkha zir lai a chhai lai ‘d’ neih chu hlawhtlinna daltu lian tak leh beidawinna ruama min hnuk luttu mai alo ni zawk tih ka hrechhuak hnahnawh a ni.

Ka ngaihtuahna a kal thui hnahnawh hle mai a, ka dinhmun chu ka han ngaihtuah a, ka Nu leh Pa te chawm chu sawiloh, ‘Hmalam hunah nupui a chhia, a ṭha pawh lo nei in fanaute lo nei ve ta ila engtinng e rual awt lova ka siam ve tak ang le?” tih chu ka tan zawhna chhan har tak a ni ta a ni. Chutiang vel ka ngaihtuah chuan ka hmalamah eng chhete pawh awm a ka hriat loh a vangin ka

mangang lutuk chu ka bing chuk chuk hian ka inhria a. Ka Nu min beiseina pawh ka ti hlawhtling thei ta baw lo a ni.

“Khawia awm nge ka tan hlawk zawk a nga, enge ka thawh tak ang, a eng kawng ber nge ka zawh dawn,” tiin a chhun a zanin ka ngaihtuahna ka hmanq thin a. Mipa, tlangvala pumpa, thawh mumal pawh nei lova kum ka han hmanq liam leh ringawt mai tur ka han dawn chuan ka ngaingam ngang lova, mahse keimah mai chuan tihngaihna ka hre der baw lo si lo.

Chutih lai chuan ka Pa Hminga’n, “I duh chuan Mechanic i zir dawn nia, Sorkarin Machanic zir duh tan dilna hun an hawng a, B.D.O-ah kan dil ve a nga, kan hmu ve mai ang,” tiin min tawng thlamuan a, ka zirlaiah ka tluang lo a nih pawhin ka Pa Hminga’n chutiang chanchin min hrilh chu ka lawm em em mai a, “Hemi hna hi chu ngawrh tak leh tha takiin ka zir a nga, ka puitling hrim hrim tur a ni,” tiin ka rilru chu ka siam a, chutah tal chuan hlawhtlin ka tum ve ta ran mai a.

Machanic zir theih hun tur nghakhlel taka hun engemaw chen ka nghah hnu chuan ka Pa Hminga hnenah chuan, Mechanic zir tura dil hun chu a thleng tawh em, nge dilna i lo thehlut tawh zawk?” ti a ka han zawh chuan a lo theihnghilh daih thu leh a hun a liam tawh thu in min chhanga, ka ngaihdan hi a nilo em em mai a, “Kei tlangval a pumpa; hnathawh mumal neilo leh chhungte chawmhlawm ringawta awm ai chuan thingtlang lamah ka Nu hnenah haw chho ila, ka Nu hnathawh a hah thei baw lo si a; ka Nu hnathawh han pui zawk ila keima tan leh ka Nu tan ahlawk daih zawk ang,” tiin ka inngaihtuah a. Tuma dan rual lohvin ka puanthuah ka tela, kan khua Bualpui ‘H’ lamah chuan ka haw ta nal nal mai a.

Hetia kan khua a ka Nu hnena ka haw leh kum hi kum 1986 a ni a, Bualpui a ka Nu hnen a ka awm chuan ka theih tawkin ka Nu chu hahdama siam ka tum a, thlawhhma lakah pawh ka duhthawh em em a, ka pa nen chuan thlam nuam takin kan sa a. Ka pa hian a thinlung zawng zawngin min hmangaih a, a bul a awm hi nuam ka ti thei em em a, ka Nu leh ka pa chu thingtlang lo nei a rim taka hnathawh thin an nih a vangin an lang upa tawh hle nghe nghe a. Kan in te pawh

chu sak ʈat angai hle mai a, in sak ʈat lehte pawh chu ka ngaihtuah reng bawk a.

Hemi kum a kan lo vah chu ramchăng, thing lian pui pui hmun a ni a, kan lovah chu hreipui a kih ngai deuh vek a ni, ka ʈiante ho hnenah chuan, “Min khawngaih ula in lawmah min telh ve rawh u,” ti in an lawm a tel ve turin an khawngaihna ka va dil a, ka ʈiante chuan lo ka la vah ngai loh zia leh lo vah ka chak loh tur zia hre reng chung chuan lawm takin an lawmah chuan min tel tir ve ta a.

Lo vât a ramngaw thelh hun mai kâr a kan lawmte nen a kan han kal velte chu nuam ka ti in ka hlim thei em em ʈhin a. Lo kan han vah chuan nileng a hreipui han lek takah chuan ka kut chuan a tuar lova a durh pep pup mai a, Adurh a han keh lek pheih chuan a nâ in a thip êm êm mai bawk a, chuti chung chuan ka ʈiante ka tluk lo bik ang tih ka hlah a vanga ka ʈang lutuk ʈhin chu ka taksa nenlam a na vek zel a. Achang chuan ka kut leh ka taksa na lutuk a vang chuan ka ʈap lek lek ʈhin a. Engemaw chang chuan, “Ka tlin tawh ngang lo a ni, min hrethiam mai rawh u,” ʈah aw ʈau a ti in ka ʈut hnawk chang pawh a awm hial nghe nghe ʈhin a ni. Ka ʈiante pawh chuan min hrethiam êm êm ʈhin a, Chutiang a ka kut nâ chung a ka tih luih ve zel takah chuan ka kut leh ka taksa pawh chuan ngai a neih chin a lo awm ve ta a, kan lo pawh chu ʈiante tlawmngaihna zarah hlim tak leh nuam ti tak chuan ka vât zo ve ta a ni.

*1986 kum a kan lo hmun Kanghum ram*

Chumi kum chuan kan lo chu a ʈha in a hmunhma a nuam bawk a, buh leh thlai engkim mai chu a ʈha em em vek mai a. Ka ʈian, ka unaute ni bawk; hmun danga sikul kal a awm, Sawma, Zonuni (‘Zawni’ kan koh dan) te pawh khua a



an awm kum a lo ni kher bawk a, kan ʈiante nen chuan buh tuh leh hlo thlawhahte chuan kan inlawm chho zela. Kan hlim thei êm êm mai a. Kan buh a ʈha in thlai kan ngah bawk si a, kan thlam a lian ʈha in a nuam bawk si, thlam bul velah chuan zamzo, derhken leh chuailote ka phun a, favang lamah chuan thlam bulah chuan chung ka pangpar phunte chu an pâr chék chùk mai bawk a.

Achang chuan ka Nu leh ka pa chu loah chuan an riak thin a, kei in kawla a nichhuak chhiar a feh reng chungin in lam ka lo enkawla; ka naute an la te in eirawngbaw lah an la rintlak mang silova, zingah ka thova, tui ka chawi a, tuikhur a hla em em mai baw si a. ka tuichawi haw hnuah eirawng ka bawl a, eirawng bawl pahin vawchaw ka pe in ar ka chhuah baw a, eirawng ka bawl peih hnuin chaw kan ei a, fehna a ken tur chawte ka fun zawh hnuin ka naute chu sikul kal turin ka siam leh vek a, chumi hnu in chhun a an lo awm dan tur leh an lo ei turte ka hrilh in ka kawhbmuh vek hnu in nghawngkawla a ka pa lui kal bawmrang lian pui phurin lo lamah ka liam ve leh thin a, (Em pangngai phur lova bawmrang ka phurh nachhan chu dawrawn aiin aphurh anuam ka ti zawk a, bakah feh haw pah a thlai, vawchaw dawl leh vaimim phurh nan a dawnhlawk zawk vang a ni)

Chutianga in lama ran enkawl leh ka naute enkawl nen a ka buai theih thin em avang chuan a chang chuan lawm ka zui theih loh chang pawh a awm thin a. Nileng a hlo ka thlawh hnuin tlai lamah vaimim kawmchhum tur nen, chawhmeh antui tur thlai leh ka naute lawm tur fanghma leh vawchaw dawl a tam thei angber ka pa lui kalna bawmrang lian chuan ka inphur bawr thei hle thin a.

In ka thlen chuan chhun lama ka naute, an thiante nen a an lo khawsakna chhuat lai leh chhuar velte chu a lo hnaw nuai zel thin a, ar ek a lo awm baw nen, inchhung ka tihfel hnuin mei ka chhem a, eirawng ka bawl nghal a, vawchaw ka pe in ar ka lawi a, zanriah kan ei kham chuan ka nau te'n min muthilh san veka, vawchaw ka chum a, vawchaw ka chum zawhin a tuk zinga ei tur vaimim kawmchhum chhum in keimah chauhin tapchhak mei engah chuan lehkhahu chhiar pahin mei ka vil thin a.

Kei chu zanah ka len chhuah ve hman loh a vangin engemaw chang chuan ka thiante chu an rawn leng thin a. Atuk zingah thovin ka naute nen chuan zan lam a ka vaimin kawmchhum chu kan ei a, vaimin kawmchhum chu tukthuan a kan rin changte pawh a awm thin. Kan kawmchhak nu (ka Nu Engi) chuan chutia tukthuan a kan unau za a vaimim kawmchhum kan ring thin chu min lo hmuh zauh zauh thin avangin buhfai chum tur kan nei lo emaw a tia, min khawngaih a, an buhfai min rawn pe a; mahse kei chuan buhfai kan

neih loh vang nilovin kan unau chuan vaimim kawmchhum chu tui kan ti tlang a, kan pum pawhin a ngeih lo chuang lova, bâkah ka ngaih dan chuan ‘tui ti taka kan ei theih, puar leh fanna ni bawk chu kan pumin a ngeih lote a nih si loh chuan chawah kan ring thei zel tur a ni’ tih hi a ni. Pathian zarah kan unauin vaimim kawmchhum chaw a kan rin a vangin kan pumin a ngeih loh phah chuang lo. Chuti tak a ka buai thin chung chuan kan chhungkaw tan a tangkai leh thawk hlawk ve a ka inngaih a vangin ka nun a hlim em em reng a ni.

Ka lawmte nen a nui uar uar leh ring deuh deuh a, khêk ri chel chul chung chuan kan feh kawng hmunhlui lamtluang thing buk lian pui pui kêra kawng pheh leh theih hun mai a hnahchhawh pêt leng chum chum pah a inngamlak tak leh innel taka kan inbengberek pheh nawk nawk thinte kha ava han ngaihawm tak em. Kan thin thenkhatte chu kan lawmah an awm vek kher lova, lawm danga awmte pawh an awm ve bawk a, chung lawm danga kan thiante nen a hlim tak leh kham lo tak a feh kawng kan tumtawi thin chu fehna a dan a vangin kawngpêng thumamah pên hran a lo ngai si thin a, inui tak a inthen pah in, “A haw hmasa sa he laiah hian fanghmatuai inchhawltluaiah aw,” ti in kan inthen a, feh haw dawnah kan thin (tawn thar ‘d’ pawh a ni zawk maithei) chhawltluai tur fanghmatuai, thiante hriat ve lohah kan hawn a, kan han inchhawltluai thinte kha a va han hlimawm thin tehlul em. Kha tih hun laite khan khaw ropui leh in ropuite kan ngai lovin tu dang, leng dang kan ngai bik lova, kan va han hlim thei thin tehlul em.

Kan thiante zingah chuan Sawma leh Zawnite chu tleirawlte an nih atang tawhin an inngaizawng a, mahse naupanga thuchangin an tualthu a chhe zing thei êm êm mai a, mahse inhaw lo ve ve nà ná na chu kan hmuipui pu Denga’n a chalrem leh nge nge thin a. Tum khat chu kan hmuipui pu Denga awm loh hlan in an tualthu a chhe leh hlau mai a, Sawma chu a tuk lawkah a zirna chhunzawm turin hmunpui lam a pan a ngai dawn bawk si a, chuvang chuan a kal hma a remna thuthlung siam hman a duh si a. Atihngaihna hre lo chuan nilai zan inkhawm kan ban chuan Zawni’n an in a thlen hma ngei in an inkâra rem lentir turin hmanhmawh takin min tir a, tawngkam ka



thiam loh zia sawi chiam mahila a hriatsa a nih a vangin kan hmuipui pu ber a awm loh chuan lohtheih loh a ka kal chu a ngai ta a.

Min tirh luih tlat takah chuan hreh chung chungin Zawni inkhawm bang chu ka um thla ta char char a, mual pelh hlekah ka zu um phak a, an in a hla tawh bawksi lova, hun a tlem em tawh a vangin han thluaithlum hman ni hek suh, hun tlemte kârah hmanhmawh thaw hlawp hlawp chung chuan, “Zawn, engahnge Sawma hi i duh loh reng reng, duh leh mai rawh,” ka ti ta sek mai a. Anuihza lutuk insum si chuan min chhan zai reng a rel thei lova, a tawpah chuan, anui ri hrut hi ka hria a, kei nuih duh tih takah amah ai ring chuan khaw laiah chuan venthawn nei lo lêkin ka nui ve ta chiam mai a, a ni pawh chu ring tawkin a rawn nui ve a, nui bawk bawk chung chuan an inah chuan kan inchhawm lut ta a. Ahnuah chuan in haw lo ve ve ta chu an inrem leh a Sawma pawh chu ngaihtha takin a zirna lamah chuan a kal ve leh ta a ni.

Hlo thlawhte kan zova favang a lo ni chhova, ka pa nen kan in sakna tur thingzai tur zawngin kan ramchhuak ta a, thing tam viau e tilo chuan in sakna atan a ting zai tur han zawn ralah chuan a vang phian mai a, ram hlaah pawh luikawr kamah thing zai a tana kan duhthusam chu a lo awm duh riau mai a. Burma mi ruaiin kan in daih tur thing chu kan zai tir ve ta a. Ramngaw hmun hla tak taka kan thingzai awmte chu keimahin ka thiar thin a, ka pa hi ahriselna a that loh em a vangin a thiarah chuan min pui thei lova, luikawr hla tak tak a tanga kawngpui a thingzai ka han thiar chhuahte chuan ka hah viau nain ka hlim thei thin hle a.

Achang chuan ka thingput kawngahte chuan Pathian fak hla nuam ti tak hian ka sa thin a, a chang chuan keima phuahte pawh ka sa bawk a. Hreawm tihna reng reng ka nei ngai lo, kan chhungkaw tan a hna tha thawk ka ni tih ka inhgriat tlat a vangin. Nakinah chuan ka Nu leh ka pa chuan, “Thingzai kan putpui ve thei si lo che a, chhang kan deng a nga, thingzai putpui tur che in thalai ho kan sawm dawn nia,” an ti a. Kan khaw thalaite chu thingzai min putpui tur chuan kan sawm ta a, thalai tam takin min rawn putpui a, kan pu zo ta vek mai a ni. Kan khaw thalai hote kha an tlawmngaiin tanpuingaite tan an va han chhenfakawm tak em.

## BUNG 4

### KA NUNNA LALPA TAN

Pathian khawngaihna zarah ka han tleirawl chho kha suahsualna kawng dai lovin Inkhawm, sandesikul kal leh Kohhran program ngaipawimawh viau thin mah ila ka pianthar tlat loh a vangin ka chhung lam nun hi ruak tlatin ka inhria a, chu vang chuan pianthar ngei tumin theih tawpin ka bei a, mahse mite piangthar ka hmuhte khan an sualte inhrechhuak a, inchhir a tap zawih zawihin an Testimony te an sawi thin a. Mahse, kei chu ka ngaihtuah chiam pawhin Pathian hma a inchhir a, sim a, tah zawih zaih natur khawp thil tih soal ka neih ka hriat tlat loh avangin pianthar ngaihna reng ka hre lova.

Pianthar ka tum nasat poh leh pianthar ka hlat tulh tulh in ka inhria a, “Miṭha hremhmun kal tur mai ka ni, hmeichhiat mipatna kawnga ka soal loh chuan thil dang chu engmah pawisak a ngai lo, ka that hian awmzia a nei chuang lo,” tiin zu te ka in a, thin soal ka kawm a, inkhawm pawh chu ka hel ta tlat mai a. Ka Pa in inkhawm tura min tih chang pawhin, “Hremhmun kal tur tho tho inkhawm a ngai lo, mahni kan inbum mai mai a ni,” ti in ka chhang mai zel a.

Ka Pa chuan min tihngaihna tak pawh chu a hre lova, “Tlangval i ni ve tawh a, a chhia a tha hrilh loh pawh in i hre vek tawh a, i kalna apiangahrawn kal vein ka veng thei silo che a, kei chu min bum thei a, Pathian erawh chuan a hmu reng che a nia, i chhia leh tha hriatna hmang ve tawh mai rawh,” min ti ta ringawt mai a ni.

Hnahtnial Lungleng veng ka la awm laiin tum khat chu kan Kohhran-ah Pu Sangluaia Lunglei Rahsi veng leh a Team-te’n rawngbawlna an rawn nei a. Chutah chuan inkhawm ve turin thin thenkhat te’n min sawm thin a, mahse kei chuan, “Pathian thu ka ngaihlthla tam tawh lutuk, ka piangthar thei chuang lo,” ka ti a, inkhawm chu ka duh tlat lova.

Zan khat chu rui zet main zanlai pelh tawh hnuah ka haw a, dim tak maiin kawngkapui chu ka kalh a, ka mu ta a, ka mut a tanga rei vak lovah chuan kawngkhar chu a ri rawk mai a, ka han en chuan

kawngkhar chu a lo la inkhar renga, mahse kawngkapui hnuai lam a tang chuan luruhro hian âng bui hian min lo chhiatkhum hian ka hmu ta tlat mai a, ka pentawng tui inhal lah chu a tawrh har khawpin a zual zel mai bawk si a. Ka thil hmuh chu ka hlau bawk si; ka pentawng tui inhal avang chuan lohtheih loh a ka thawh a ngai si a, “Ramhuai hian min va han ngam sawt em em ve le, ka thih hun hma hian chatuan hremhmun a min hnuh luh hi a tum ta mai em ni le!!! Mai mai a, thih leh thih, ka pêt pawp mai ang,” ka ti a, ka pel than than a, karawn luh lam a ka thawm ka Pa te’n an hria ang tih ka hlauh tehlul nen, kawngkhar chu ka pêt ri ta bur mai a. Ka pa’n, “Engeni ta,” arawn ti a, ka thil hmuh pawh chuan min thlawhbo san ta nge, hmuh theih lohin ka bulah a awm reng zawk tih pawh ka hre lo, ka hmu tawh lova. Ka tui in tur thutthlengah ka inchhuih palh a nih thu in ka Pa chu ka chhang a, an mu hil zui ve leh mai a.

Duhtawk a tui ka in hnu chuan ka mu leh a, Setana’n min ngam tawh zia leh chatuan hremhmun mei leh kât a kang dila tawp chin awm lo lēk a ka han awm tur te leh ka ngaih em em thin leh min hmangaih em em tu ka Pu nen a chatuan a kan han inthen hlen mai tur raphlak tur ziate ngaihtuahin chumi zan chuan ka tlaivar der mai a.

Atukah chuan beidawn tawpah tiin ka pianthar tak tak theih pawh inring chiah chuang lovin beisei nei ve deuh si hian Pu Sangluaia te Crusade na-ah chuan ka kal ve ta a, an Crusade tawp dawn ni a lo nia a, chumi tum a Speaker thu sawi chu Estheri 4:14, “Lal nihna i lo chan hi tun hun atan ngei hian a ni dawn lawm ni, tun hun anga i ngawih mai mai chuan .....nang leh i pa chhungte hi kan boral ang,” tih hi a ni a. Chhandamna lam ahawi hian ka hre lo reng reng a, hlawk ka inti lo em em a, inkhawm ban chuan haw nghal mai ka tum a, mahse ka thiante chuan, haw nghal mai lova Counelling Class a kal ve tur chuan min sawm a, thiante thu hnial ka hreh avang chuan phur lo zet chuan thiante chu ka zui ve ta a.

Counselling Class-ah chuan Thingsai khaw chhuak, Pu Vawmkapa fapa U Faka’n Class min la a, chumi hunah ngei chuan ka beisei phak bâk van lawmna chu ka lo chang ve ta a ni. Lal Isua chhandamna chu awlsam tein ka lo chang ve in min hmangaih avanga a taksa leh a nunna ngei min petu leh setana bawih a nghet

tak a ka tâng tawh hnu, ka Nu pum chung ațang renga khawlohna a din sual sa a piang leh sual hlir a khat kei chhandam ngai leh Chhandamtu mamawh ngawih ngawih chu a thisen thianghlim thiltihtheihna chuan min silfa in min tlan chhuak a ni tih ka lo hre ta chu lawmna sawi sen lohin ka khat a, thlamuanna khawvelin a pek theih loh sawi fiah thiam rual loh thlamuanna chu ka lo chang ta a ni.

Ka rilru, ka taksa, ka nunna leh ka thlarau zawng zawng chu hmangaih a vanga min chhandamtu Lalpa tan chuan chumi hun lai là lá chuan ka hlan ve ta a. A hnen ka thlen ve theihna tura hun ța min pe a kawngte min buatsaih saktu Lalpa chungah ka va han lawm tak em! Tunah chuan khawvel a min hmangaih bertu leh ka ngaih ngawih ngawih ka Pu Ngunlinga nen chatuan ram mawi; Lal Imanuela thlazar hnuaiah hlim takin kan leng dun thei tawh dawn ta, ka va han lawm tehlul em. Lalpa chu chawimawiin awm kumkhua rawh se.

Pu Sangluaia te Team in kan Kohhran a rawngbawlna an neih zawh hnu chuan Lungleng khua, Muallianpui, S.Vanlaiphai leh hmun dang danga rawngbawlna nei leh turin kan Kohhran ța lai mi engemaw zatte nen chuan an chhuak a. Ka pianthar hnu chuan ka pianthar hma a ka thu ngaihthlak, ka tan a ța ngkai reng renga ka hriat loh kha ka thinlungah Chiang em em mai hian alo lut leh ta tlat mai a. Tunah chuan Van LAL fa ka lo ni ta a, a duh a a hman a tan ka nunna, ka thlarau leh ka taksa a hnenah ka lo hlan tawh a, Van LAL fa ka nihna chu tun hun atan ngei hian a ni dawn lawm ni? Tih chu ka thinlungah ainthumrawn tluk tluk mai a.

Hetih lai hi kan in sak buai lai tak, in bang kan bel mek lai a ni a, ka țiante hnen a kal ve a Lalpa rawngbawl ve chu ka chăk êm êm a, mahse ka Pa hnen a han sawi ngam chi-ah pawh ka ngai lova. Ka țiante an kal a ța ngkai ni thum hnua pawh chuan ka thillunga thu lo thleng chuan reh mai tum lo chuan zual lam a pan tulh tulh mai hian a hriat a. Atawpah chuan ka Pa hnenah chuan inthlahrung tak chung chuan ka han sawi ve rawih a, ka Pa lah chuan a lo remti awzawng lo mai lehngal a. Pianghar mang silova țiante kal vanga theuhleuh duh vang mai maiah min ngai a. Mahse, ka thinlung a thu awm chu

ka up bo mai theih si loh avang chuan ka Pa chu ka dil nawn leh a, ka Pa pawh chuan ka thiante rawngbawlna kal ve chu min phal sak ta a.

Lawm em em in ka insiam sawk sawk a, chawhnu lam tawhah chuan Lungleng khaw lam pan chuan ka inak chhuak ve ta a. ka lawmin ka phur bawk a Lungleng khua chu zanriah chum hun vel hian ka han thleng a, ka thian te'n min lo hmuh chuan min lo lawm em em mai a. Lungleng khuaah kâr khat vel kan awm hnu chuan Muallianpui, Lungpuitlang, S.Vanlaiphai leh hmun dang danga rawngbawl zel tur chuan kan chhuak leh ta a. Hetia Lalpa rawngbawltute ka zui ve ringawt pawh hian ka thlarau nun min chawm êm êm a ni.

Lungleng, Muallianpui leh Lungpuitlangah te chuan hlim tak leh hlawhtling takin rawng kan bawl a, S.Vanlaiphai a rawng kan bawl lai chuan kan Team Director U Faka pa a thih a vangin a ni chu Lunglei lamah a haw thla a, kei pawh S.Vanlaiphaia ka Pu Liana-te kan a ka nu rawn kal chuan in sa laite kan nih a vangin min hruai thla ve leh ta bawk a. U Faka nen a kan haw thlak hnu rei vak lovah chuan kan thiante chu kan tel lovin seramu an thur bik lo a ni chek ang chu, hmun danga kal ta bik lo chuan Hnahthialah an rawn haw thla ve leh ta a.

Hnahthial Chawngtui vengah rawngbawlna kan neih leh hnu chuan kan Team chu kan inthen darh a tul tak a vangin kan Kohhran Upa Rohnuna te inah kan Kohhran upa leh Rawngbawltu te nen chawhlui kil hona kan nei a, kham lo takin kan inthen ta a ni.

Khatih hun lai a tang khan Lalpa'n a rawngbawl turin min ko a ni tih hi ka ring tlat a, mahse Pathian thu hriatna lamah ka la pachhe êm êm mai si a; chuvangin Pathian thu zir hi tul ka ti in ka duh êm êm mai a, kawng erawh a la inhawng thei mai silova. Mahse Lalpa'n ka beisei loh lam a tangin kawng min lo hawn sak a. Kan khua Bualpuia 'H' ka hawn chhoh hnu chuan Pathian thu ka zir theihna turin Lalpa'n kawng min hawn sak ta a ni. Kum 1987 chuan kan khua Bualpui 'H' a tangin kei leh U Ngura (Rongura) chu Lunglei a kan Kohhran B.C.M Headquarter Serkawn a J.B.S. (Jublee Bible School) ah chuan hlim takin Pathian thu chu kan zir thei ve ta a ni.

Tluang tak a Pathian thu kan zir zawh tawh hnu chuan U Ngura nen chuan kan khaw lamah chuan kan haw chho leh ta a, kan khua-ah chuan kan phak tawh te tein Lalpa'n a rawngbawltu a tan min hmang ve a. Lalpa rawngbawlna kawngah kan Kohhran hruaitu te leh kan Ṭhalai hruaitu te'n min duhsak thei em em mai a. Ṭhalai hruaitu zingahte leh KNP hruaitu zingahte min tel tir ve ṭhin a, ka hlim thei ṭhin khawp mai.

Vawikhat chu ka kaihhruai naupang te'n, “U Malur, tunlai chu hla thar sak tur kan nei tawh lo emai hla phuah la K.N.P in kan zir ang,” an ti a. “Hla phuah ka thiam hleinem,” ka tih pawh chuan hla phuah tura min la ngen zel a vangin naupang te'n Isua hi anmahni angin naupang a lo ni ve tawh a, an ṭhian a ni tih an thinglunga achian thei nan “Naupang Isua' tih ka phuah sak a, chu chu hei hi a ni:

### **Naupang Isua**

1. Keini Kristian naupang pawlte hian,  
Ṭhian kawm tur ṭha tak mai kan nei;  
Aman pawl a kawm turin min sawm,  
Naupang Isua i kawm ang u.  
  
Naupang Isua ka ṭhian a ni,  
Naupang Isua ka ṭhian ṭha ber;  
Nitina ka pawl theih nan,  
Keimah angina naupang a ni ve.
2. Kan hnathawhna kawng tinrengah pawh,  
Naupang Isua i sawm zel ang;  
Aman min awmpui zel dawn si a,  
Amah nen kan kal zel anga.
3. Kan ṭhian engkima min hruai ṭhintu,  
Kan khawvel ṭhiante kalsan in;  
Kan thil chin ṭha lo te bansan in,  
Isua ang in i nung ang u.

He hla hi kan naute chuan thiam takin an zir a, Pathian ni zing inkhawmah thiam tak leh mawi takin an rem ṭhin a ni. Chutih lai chuan kan naupang hruaite zinga mi, hmeichhe naupang ṭhang duang

leh hmelftha tak, adam a nih chuan inkhawm, hla zir leh Pathian thu zir thulh ngai miah lo. KNP inkhawm leh Pathian thu zir hona a solo, tawngtai leh Bible changvawn sawi chanvo leh hruaitu te'n ti tura kan tih a piang phur tak leh chak tak a ti thin. Khawmpui kal phur em em thin baw. ka nu Siami fanu Lallunghnemi (Hnemi) chu khawvel natna leh hreawm tuar mih lovin (nat lawkna nei miah lovin) Lalpa'n a nunna a seng thut mai a. A KNP puite, KNP hruaitute leh khawtlangin kan ui em em mai a, a ralna a sak turin chawplehchilh angreng tak mai in hla ka phuah a. Kan thian, kan nau, kan fa Hnemi kan ral lai chuan hnukulh teuhin ka han sa a, amah ral turarawn kal khawm zawnzawngte chu tumah insum zo reng an awm lo. Kan mittui kan hru mawlh mawlh vek mai. Chu hla chu hei hi a ni:

### **Kan phal lo che.**

1.     Aw kan ngai che, kan phal lo che,  
        I then leh rual, unau leh chun leh zua te'n;  
        Theih chang se kan au kir leh nang che,  
        Nau ang nui za leh turin.  
                Hnemi, i nun mawi leh duhawm,  
                Lalpa tan i inpekna zawnzawngte;  
                Keini i u leh nau, lenrual te'n,  
                Mawi kan ti, kan zir zel dawn.
2.     Zamual i liam ni khan chuan e,  
        Kan phal lo che a sin zaleng zawnzawng te'n;  
        Mahse run nuam i lawi ni a lo ni,  
        Hreawm tuar tawh lo turin.
3.     Dawn ve teh u, len rual te u,  
        A lo par chhuak mawi te'n lenrual zingah;  
        Mahse hmangaihtu Lalpa'n a phal lo,  
        Khawvel sual khalh chul a tan.

Hetih hun lai vel hian kan khuaah UPC ho an lo awm tan ve a, hmun dang a tanga an UPC puite'n anrawn tlawh chang chuan an thawm a na thei hle thin a, kan Kohhran hruaitute chu inchaltauh-ah te an cho thin a, tum khat phei chu kan Kohhran hruaitu te chuan, "Em em a,"

an ti ve tawh a ni ang Mike (aurinna) in an intawng chiam mai a. Ka lo buai ru ve êm êm mai a, “Lalpa ringtu Kohhrante chu inhnial buai lova inthural a hlim tak a Lalpa fak a a rawng bawl ho dial dial zawk tur a sin maw kan nih le,” ti in ka ngaihtuah a, hla ka phuah leh ta a, chu ka hla phuah chu hei hi a ni:

### **Lalpa Kohhran ho**

1. Lalpa kohhran ho inthural zel ang u,  
Kross chuan indona a thai reh zo ta;  
Kross zar a unaute,  
Hlim tak a leng tur kan ni.  
  
    Kan chanvo a ropui e,  
    Thuthlung thar fa kan ni a;  
    Chunglam Pathian Zaion tlang,  
    Khua lehtui te kan ni e.
2. Keini ho hi Krista taksa chu kan ni,  
Pathian in min hmangaihna a vangin;  
Ro hlu tak mai min pe,  
Van Lal fa kan lo ni ta.
3. He khawvelah hian kumhlun tur kan ni lo,  
Khawvel ata min la hrangtu ngei chuan;  
Hreawm tuar lo turin,  
A ramah min la hruai ang.

Hetia kan khua Bualpui a ka awm chhung hian a chang chuan kan Kohhran thalaite nen Burma ramah rawngbawlin kan han fehchhuak thin a, a chang leh ka Pu Sangduna-te chhungkua nen Burma ramah rawngbawlin kan fehchhuah chang a awm bawka, nuam ka ti in ka hlim thei thin khawp mai.

Kum 1988 phei kha chuan Lalpa'n Halkha leh hmun dang dangah arawngbawlin min hruai a. Burma ramah rawng kan bawl lai hian ka thin Chuaailova nen an ram chhunga Evangelistic Team pakhat in an Team a tel ve tura min sawmna chu Lalpa aw a ngai in kan zui ve a. Chu kan Team hming chu ‘Makedonia Crusade Group’ a ni a. Kan



Speaker chu Enoch Hmunkhara a ni a, kan Speaker chu thusawi a thiamin zai pawh a thiam hle mai a. Fa an neih loh a vangin an nupa in min ho zel thei a, a thlamuan thlak in a hlimawm khawp mai.

Hetih hun lai hian Burma ram a Baptist Kohhrante chuan piantharna hi an duh lo mai nilovin an do êm êm mai a, piantharna chu ramhuai hnathawhah an ngai tlat a ni. Bungkhaw Baptist Kohhran Pastor pakhat phei chuan an khawmpui a Report a pekna-ah, “Pathian zarah ka bial chhungah piangthar an la awm lo,” a ti e, antih chu! He an Pastor nen hian Bungkhua a khawhar in a inkhawmna kan neih in “A va pawi hringhran dah a Pianthar chu,” tih thupui a hmangin thu a sawi a, a sawi zawh chiah-ah, “Ava pawi hringhran daha pianthar loh chu,” ti in thu ka sawi ve thunga, kan thu sawi zawhah kan inhnial hrep nghe nghe a ni. Chuvangin Burma ram a rawng kan bawl hian Baptist Kohhran-ah rawng kan bawl thei lova, C.J.C. (Church of Jesus Christ) ah rawng kan bawl ber thin. Pianthar apawimawh zia tihian hla in ka phuah a:

### **Apawi lutuk pianthar loh chu.**

1. Kan Lal Isua khawvela a len laiin,  
He thu hi a sawi a;  
Mi tupawh an pianthar loh chuan  
Pathian ram an hmu thei lovang.  
  
A pawl lutuk. A pawl ber mai,  
Pianthar loh chu;  
Chatuan hremhmun rapthlakah,  
An her liam ngei dawn si a.
2. Isua'n a sawm lai che hian rawn pan thuai rawh,  
Engahnge i la muan;  
Hremhmun rapthlak i thlen hma hian,  
Sim la hawikir rawh muang lovin.
3. Lalpa sawmna che i haider a nih chuan,  
I dam chhung ni tla a;  
Hremhmun rapthlak i thlen hun chuan,  
In lamlet hun i nei lovang.

Burma ram a rawng kan bawl hian Lalpa awmpuina kan chang nasa êm êm mai a, mi tam tak Krista hnenah hruai an ni a, damlo tam tak in taksa leh thlarau damna an chang a, Burma a kan chhoh tih hian Lai tawng a Pathian thu sawi chu sawi loh, an Pathian thu sawi pawh ngaithla ve mah ila ka hre thiam lo reng renga, mahse, Lalpa hruaina a kal ka nih a vangin Halkha ka thlen chuan Halkha tawngin nuam ti takin Pathian thu ka sawi thei ani. Halkha tawng a Pathian thu ka sawi thei chu Lalpa min pek liau liau a ni.

Kan Team Speaker Enoch Hmunkhara leh a nupui

Kan Team hi kan chhangchhe hle mai a. Mi thenkhat chu an chhung te'n, "Ka fa hi a sual lutuk a, in hnenah awm sela a zia ve deuh mahna," an tih a vanga rawn tel vete an ni a. Vawi khatmah ha la nawt ngai reng reng lote an ni nual a, hmeichhia pawh an awm nual baw a ni. Ka hun awl neih a piangin kan naute chu Pathian thu ka zirtir thin a. Chuta kan Team zingah chuan Halkha Kodawn veng nula Amengi chu a hmelfha in a nungchang a mawi êm êm mai a, tawngtai mi a ni in Bible chhiar a peih êm êm mai baw a. Kan Team hmeichhe ho chu a ni'n a enkawl deuh bik a, Halkha tawng ka thiam thuai theih nan pawh thahnemngai takin min tawngtai saktu a ni.



He Team a ka tel ve hma, Thau khua a C.J.C khawmpuina a ka tel ve tumin kan intawng a. Kan vawi khat inhmuhna atangin kan inngaina nghal êm êm mai a; adik tak chuan amah avang hian an Speaker in an team a tel ve tura min sawm pawh khan an zinga tel ve loh chu tha zawka ka hriat avangin ka lo hnar tawh kha a ni a. Tuntumah hian ka thianpa Chuailova'n Burma Hrihphi a C.J.C. khawmpuina a kal ve turin sawm takte in min sawm a, "Ka kal duh lo," ka tih pawhin ka duh hma chu min sawm ngat ngat a, a tawpah ka kalpui ta nge nge kha a ni a.

Hrihphi a khawmpui kan hman zawh chuan haw leh mai ka tum a, mahse U Khara (Enoch Hmunkhara) leh an Teamte chuan an Team a

tel turin min sawm leh chiam a, mahse an hnen a kal ve chu ka la tum chuang lova, mahse, keimah a fianrial tawngtaina ka neih hlan in ka bag min lo thuhruk sak a, chu vang chuan haw hunah ka haw thei ta lova, bâkah; kei tehlul mai chuti taka an rawngbawl na tawiawm ve tura min han sawm chu an zing a ka kal ve chu Lalpa'n rem ati a nih ka ringa, an Team-ah chuan ka tel ve ta kha a ni.

Chutia an zinga ka thianpa Chuailova nen a kan tel ve takah chuan Halkha nula Amengi chu a hmel, nungchang leh zeizia ka hre Chiang telh telh a, ka ngaisangin ka ngaina tulh tulh mai a, a ni pawhin achezia leh a tawngkam atang chuan min ngaina ve hle a ni tih ka hre thei mai a. Kan awmtlang rei tulh tulh a, kan pahnih chuan hmangaihna hrual hrui chuan min phuar nghet tulh tulh mai hi a lo ni a. Hun reilote chhung pawh kan inawmbosan thei ta reng reng lo mai a. Kan inhmangaihna chu a ni telin a zual zel hian ka hria a; mahse a ni pawh Pathian mi a ni a, kei pawh Lalpa'n a rawngbawl tura ami thlan ka ni tih ka inhre Chiang bawk a. Keimahni ah Krista a Lal ber ve ve avangin kan hmelpa diabawla'n tisa châkna sualin min beiin min tih mualpho tum mahse Pathian Thlarau thianghlim a hruai tlat kan nih a vangin hnehna chu Lalpa zarah kan ta a ni.

A ni tel a kan inhmangaihna chu a zual zel a vangin ka tum loh hunah nupui neih mai a ngai palh ang tih ka hlauva, chuvangin keimah inthiarfihlil chu tha zawk dawnin ka hre ta a. Chutia ka hmangaih chhaktiang lanu Amengi hmu leh ngai tawh lo tura ka han suangtuah ringawt pawh chuan har ka ti êm êm mai a, Amengi tel lo chuan ka lung leng lutuk hi fam Lalzova ka iang hial mai awm mange aw, tih te thlengin ka ngaihtuah hial a. Khawvel eng ka lo hmuh ve chinah hetiang em a ka lung 'd' hi lanute zingah ka la tawng ngai lovin ka tawn leh theih pawh ka ring tawh bawk hek lo.

Chutianga ka hmangaih hransan tura ka ngaihtuahna a buai êm êm lai chuan a ni chu ka kiangah ngaihngam takin a awm a, a ni pawhin a chang chuan a suangtuahna ramah kan pahnih a innei in an in leh leilet-te luah a nupa hlim tak ni a fanau maltluan chawi a kan dam chhung hun hmang dun turin a suangtuahna chu a lo hlimpui ve thin ziate min hrilh thin a. A ni chu fanu mal a ni a. Mizoram a ka haw san daih chuan keimah chauh ka hreawm dawn a ni lova, keimah

avangin a ni pawh lungleng tak leh hreawm takin a hun a lo hmang a nga, engang chiahin nge anun ka tih chhiat anga hreawm ka tawrh tir ang tih pawh ka ngaihtuah ngam lo. Achang leh Burma a kal tura min sawm lui tlattu ka thianpa Chuailova chu ka huat phah a.

Ka thianpa Chuailova lah chuan angaihtuah thui lo a ni tih hriat fahran hian, “Nei mai la, ahmeltha si, afel si, Pathian thimi a ni bawk si, bâkah a duh bawk si che a, a fuh ngawt ang,” te a lo ti ve chhen mai bawk nen. Kei chuan, “Mimah buai anaklai a, Amengi chungchangah chuan ‘Si’ tih-ah chuan kei pheii chuan a tha lamah ‘Si’ hlir sawm aitam sawi tur ka hria a sin, nangma vang a nih hi, ngawi hmakrawh,” ka ti a, ka vin hrep mai a, ka kum leh ka hnathawhin nupui nei thei dinhmunah min la din tir miau loh avanga ka Chhaktiang Chhawkhleii Pari chu hransan ngai ka ni tih reng min hriat thiam pui ve si lo.

Mahni maha lu hai leh ngaihtuahna buai a naklaiin Halkha Station venga rawng kan bawl laiin kan riah khawmna inchung kawngpui an a sam siamna dawr neitu Tidim nula, pumraw lian tha zetzawt, hmelttha leh pian nalh tak mai, amawi tawh chauhvah sam kir chiat mai bawh ‘Cheri’ chuan inneihpuiah min lo sawm ve reng mai bawh a, lawm tur nge lawm loh tur tih pawh ka hre thiam tawh lo.

Aenga pawh chu ni se, kei a kâr, mi fa duat lai te’n heti taka ka zûn an lo phur ve hi keima vang nilovin Lal Isua chanchin tha a vang ani Chiang mai, Rom 10:15-ah, “Thil tha chanchin lawmawm thlentute ke chu a va mawi em...” tih hi a lo dik ngei a ni. Chanchin tha ni lo, thil dang zuar chuan kal ila tumah, “Ka ui, ka ar,” min titu pawh ka hmuh dawn loh lain Krista Chanchin tha zuar a kal ka nih miau a vangin nula tam tak bâkah, mi nu te hial pawhin ka hmelt mai nilovin ka ke thlengin min lo hmu mawi ve chauh zawk alo ni. Achang chuan chungte avang chuan Pathian hnenah lawm thu ka sawi thin.

Pathian thu in, “Thlemna rualin tlanhhuahna remchang a siam,” (I Kor 10:13) a lo tih hi a va han dik em(kan tlansan ngam chuan). Ka Chhaktiang Chhawkhleii Pari chu thlahlel teh mah ila hransan a ngai miau si a. Halkha a kan rawngbawlna hmasa ber Halkha khawthar amite chuan, “Kan khua a in rawngbawlna zo lovin min kalsan a,

chuvangin kan vengah inrawngbawl na inchhunzawm leh a ngai, in Pathian thu sawi ngaithla châk mipui an awm thuap mai,” an ti a. Halkha veng hrang hrang a rawng kan bawl zawh hnu chuan Tahan lam panin chhuah kan tum a. Halkha khaw thar a mi U Bawri leh Pastor Chakunga te’n an khua a kan rawngbawl na chhunzawm leh tura min chelh tumin min lo chang dawn a ni tih ka hria a. Midang chuan an hre ve lo.

Kan Team chu rorelin kan han thu khawm a, “Tahan lamah chuan Motor a kal tur nge ke a kal tur?” tih kan rel a, kei chuan, “Ke in kal ang u, khaw dang dang pawh hmuh pah ka duh a, kan thlen chin a piangah Pathian thu kan sawi nghal zel dawn nia,” ka ti a, chu ka rawtna chu tha kan ti tlanga. Ke chuan kan kal ta a. Halkha khawthar chu Falam lam kawtchhuah, kan kalna tur lama awm a ni a, kan kal tlang ngei a ngai dawn a ni. Kan naute chu ka kal hmasak tir a, an hnung feah chuan kan Speaker U Khara nen chuan ti ti pahin zawimuangin kan kal a. U Khara pawn ka ruahmanna chu ka hrihl loh avangin a hre lova.

Kan nau te’n Halkha khawthar an kal pelh vek tawh hnu chuan U Khara nen chuan Halkha khawthar chu kan va thleng a, U Bawri leh Pastor Chakunga leh Kohhran mi thenkhatte chuan Halkha khawtharah chuan min lo changa, “Kan vengah in rawngbawl na a la zo lova, in chhunzawm leh ngei a ngai ang, in kal tlang thei lovang, in kal tlang lui hram dawn a nih pawhin U Sanga (Burma-ah chuan U Sang ti in min ko thin a) tal chu a awm a ngai ang,” an lo ti mauh mai a.

Kei chuan, “U Khar, kan naute an kal vek tawh si a, nang chu i kal mai a tha ang, keimah ka lo awm mai ange, Lalpa’n rem a tih chuan heta kan rawngbawl na a zawh hunah ka rawn zawm ve leh mai ang che u, rawn kalpui tur chu an awm mai ang,” ka ti a. Tichuan tawngtaina in kan inthlah a, U Khara nen chuan kan inthen ta a. Halkha khawtharah chuan kan rawngbawl na Lalpa’n nasa takin mal a sawm a, mitam tak Lal Isua hnenah hruai thlenin an awm leh a, mitam tak taksa leh thlarau damna ang chang leh ta a. Pathian thiltihtheihna a tak a changtu te zinga ka tel ve hi ka va han lawm tak em.

U Khara nen a kan inthen tlai a tang chuan ka lo rin lawk ang ngei mai chuan ka lung chu a leng ta em em mai a, a rei tulh tulh a ka lung aleng tulh tulh mai a. Chu chu lo thleng tur reng a ni tih hre sa a ka lo insehruh leh ka lo intih paukhauhna chuan tinther tia pawhin ka lunglen a dal chuang reng reng lo. Ka Chhaktiang Chhawkhlel Pari zun chu ka phur zo lo chu a ni ta der mai a. Fianrialah kalin vawi duai lo ka tawngtai hnu pawh chuan Amengi ngai a ka lunglenna chuan kian lam aiin zual lam a pan zel hian ka hria a. Pathian thu ka sawi lai leh Pathian fakna hla ka sak lai chuan lunglen ka hre lova. Mahse, Pathian thu ka sawi reng in Pathian fakna hla ka sa reng bik si lo. ‘D’ ngaia lunglen hi tuar alova har ngai em!!! Khatih lai kha chuan Jona ianga Lalpa hnena thih dil mai tak ka nâp hial a ni.

Amengi chu Halkha Kodawn veng a awm a ni a, a mah ngai a ka lungleng lutuk chu an inah ka va kal nal nal a, an inah chuan a nu hi a lo awm a, a nu hnenah chuan Amengi thlalak la tura lo kal ka nih thu chu sawi in Amengi thlalâk dah na chu ka va hai rawk rawk a, a thlalak tam tak zinga ka duhber pakhat chu ka la a, Halkha khawthar a ka thlen in lam pan chuan ka haw leh ta nal nal a, Amengi thlalâk chu kal pah chuan ka en zauh zauh reng bawk a, a bo palh ang tih hlau tak chuan tha takin ka keng a, ka roh em em a, amah chu hmuh leh ka inbeisei tawh loh a vangin a thlalâk tal chu Mizoramah hawn ngei ka tum a.

Mahse, Lalpa’n a thlalâk pawh chu ka kawl a phal lo a ni ang, Halkha khawthar a ka thlen in ka thlen chuan ka lo keng tawh reng reng lo mai a! Mak ka ti em em a, ka indap ngial pawh chuan ka hmu ta lova, thlalak zawng tur chuan ka lêt leh ta nal nal a, kalkawng a ka kalna zawng zawng chu ka chhui chhuak leh veka, ka hmu ta reng reng lo mai a. Tihian ka ngaihtuah ta a, ‘Lalpa’n Amengi thlalâk ka kawl reng chuan engtikahmah ka lunglen a reh dawn silova, ka lunglen reng a phal loh avangin Amengi thlalâk chu ka kawl a phal loah’ ka ngai ta a. Ui hle mah ila ka tan a tha tura kawng engkim a min thawh saktu chuan chu thlalâk kawl chu a phal miao lo a nih chuan lungawi ka tum chawp ta zawk a.

Halkha khawtharah thla khat zet Lalpa rawngbawl a hun ka hman leh hnu chuan ka Chhaktiang Chhawkhlel Pari, he khawvel a hmuh leh

beiseina nei reng reng tawh lovin amah nen a insi riala lamtluang kan lo tumtawi tawhna ngei mai chu zawhin ka haw ta hnak hnak a, kei tleirawl kum sawm leh pariat lek kha tar kum 70/80 ang maiin ka tha a thum zo ta emaw tih a awl khawp mai. Lung hi a len hian a leng vawng vawng mai a ni. Kan rawngbawlna a hmun danga kan kalte hian kan inthlahlel lutuk hi tu mitmei mah kan veng thei tawh lova, insi rial lo chuan kan kal ngai lova, tumah hi kan karah hian han tlakzehna hmun hi a awm lo reng reng a ni ber mai. Mahse, ahna athawh that em tho a vangin kan Speaker chuan Amengi chu a fak em em reng tho a ni.

Chutia khual lam sau a mahni chauhva Mizoram lam pan a Halkha leh Thlantlang inkar a ka kal hnak hnak lai chuan, “Ka hringnun lamtluang hi chu a va han chhuk chho thin tak em, engtia rei ngemaw ka la zawh dawn le, zawh zel turin chakna pawh ka neih tawh loh hi mawle? Hetiang renga hringnun hman ai chuan ka van Pa hnena haw mai tawh ka va chak em, ka tan chuan a nuam zawk dawn si a,” ti tein ka suangtuahna ka kawm a, mahse chu lah chu mahni hmasialna mai a ni bawk si. A aia palai hna thawk tura min ko tu Lalpa’n he khawvel, a athlawhhma zau takah hian a hreawmah pawh, a nuamah pawh, thih mai hlauhawmna hmunah pawh a aia palai hna chhel tak leh rinawm tak a thawk turin kei a chhiahhlawh tling lo tak mai hi min duh ve miao si a.

Mizoram a haw tura Halkha ka chhuahsan dawn zan chuan ka thlen in nu U Bawri chuan, “Ka ngai dawn che emmai, kan inchhung dung hi min paw chungin vawithum tal min hel chhuahpui tur a ni,” a ti mauh mai a, A ni hi nulian leh ruakhau, hmeltha tak mai a ni a, fapa pahnih kum 5 mi leh kum 7 mi a nei a, apasal chu pa upa lam a ni a, U Bawri rilru put hmang erawh chu kan rualpui ang vel chauh a ni bawk si a, an in lah chu an venga in lian leh zau ber, zaikhawmna a kan hman thin a ni a, vawi thum chu ka paw chhuak thei hram a ni. U Bawri khan min la hre ve tak ang maw, a ngaihawm takmeuh a ni.

Halkha a ka cham chhung zawng pawhin a ni hian min duat em em renga, eitur tui tak tak leh thei tui in tur min pe reng bawk a. Ka thian nula dangte paw’n Mizoram ka thlen hun a ka chhiar tur atan lehkhathawn pakhat theuh min pe bawk a, Mizoram ka thlen hma

chu chhiar lo turin min ti tlat bawk a. Atukah chuan inngai leh inthlahlel tak chungin kan lënna tlang a dan miau si a vangin kan inñhen ta a ni.

Kalkawngah chuan ka thlenna chin khuaah chuan ka riakin a ñul dan a zirin ka cham a, Pathian thu ka sawi pah zel bawk a. Ka kalna kawng ami te'n tunge ka nih a khawi awm nge ka nih min han zawh a ka sawi chuan awih har an ti hle ñhin a, "Mizorama Mizo nisi engtingnge heti taka kan ñawng i thiam!" ti in mak tih hmel deuh hian min en hâ ñhin a, kei chuan ka ñawng thiam chu Lalpa min pek a nih thu in ka lo chhang ñhin a. Thlantlangah China Bag hring lian zet mai chu Burma pawisa cheng sawmli leh panga (45) in ka lei a, Thlantlang khaw pelh lawkah ar chi ñha chi vulh atan pakhat ka lei bawk a. Tluang takin Lalpa'n Mizoram chu min hruai thleng leh ta a ni.

Mizoram ka thleng chiah chu Burma ram buai rapthlak lutuk chanchin in min deng nghal a. Ahnu thla engemaw zat hnuah chuan Burma a kan Team member pakhat rambuai avanga Mizoram a rawn tlanchhia nen kan intawng hlawl mai a, Amengi chanchin ka zawt nghal thuai a, a ni chuan, "Nang chu Halkha khawtharah khan i chambang tasi a, kan Speaker chauh a rawn tlang kan hmuh khan Amengi chu a ñhu chawta, a ñap nghal hawm hawm mai a, kan Speaker in theihtawpin athlem a, Halkha khawthar a i rawngbawlina i zawh hunah kan hnenah i rawn kal ve tur thu a sawi a, engemaw ti ti in kan kalpui thei hram a ni. A khawngaihthlak khawp mai," tih thu min han hrih chuan ka mit deuh sulh hian ka inhria a, ka khaw hmuhte hi a tawi tawh a, ka bing chuk chuk a.

Amengi ka ngai lutuk leh ka khawngaih lutuk chu ka khawlo thei mai dawn takngial in ka inhria a, keimah chu ka inhua in dawi zepte ka inti hnuhnawh hle a. "Engtinngae a awm zel?" ti a ka zawh chuan, "Ka hre tawh bik lo, ram buai avangin kan darhsarh zo vek tawh," a ti a. U Khara rual a ka hmel a hmuh ve loh pawh a ni zakzum leh nungchang zawi tak khan zah pawh dawn thei lova chuti taka a ñap a nih chuan min hmu leh ngai tawh dawn lova kan inñhen hlen dawn a ni tih a hriat phei chuan a va han tuar nasa dawn teh lul em, tihte ka ngaihtuah a, ka ngaihtuahna a kal thui kher mai. Fanu mal a ni a,



keimahah beiseina thui tak a lo nei ve tawh si a, chutiang a rambuaiah chuan tunge a belh tak ang le, min va han ngai dawn em.

A thlabar tur ziate ka ngaihtuah a, ka tel lovin rei pawh awm thei lo kha a ni si a, amah hruai tura Burma ram buai karah han tlan chhoh mai ka rilruk hman rum rum a ni. Engahnge Lalpa'n Amengi min lo tawn tir kher le? Engahnge hetiang kher kher a min fiah i duh le? Amengi kha nei ila enge pawl kher ang le? Tihte leh zawhna dang tam tak ka nei a, Lalpa hnenah ka vui lek lek thin a. "Lalpa, Amengi kha thatakin lo enkawl la, lo hnem angche, amah hmangaih taktu pasal thatak i pe ngei tur a ni," ka ti mawlh mawlh a. "Ameng, he kawvelah inhmu leh tawh lo pawh ni ila vanramah tal chuan kan la intawng leh dawn nia aw, min ngaidam ang che, keima thiamloh vek a ni," ka ti a, ka mittui a parawl teh mai a, tah hawm hawm tak ka nâp a. Tun thleng hian hriat chhuah chang ka la nei fo thin. Mahse a sawt tawh si lo. Lalpa'n a awmpui in a tan a tha turin a rel sak ngei ang tih ka ring tlat a ni.

Lalpa'n arawngbawl tur hian ka nu pum chhunga ka awm lai a tang tawhin min lo serh hrang tawh a, kawng hrang herangin min lo buatsaih a, ka Nu'n, "Ka pum chhunga i awm lai atangin Lalpa tan ka hlan tawh che a, Lalpa rawng i bawl theih nan ka tawngtai sak thin che a sin," ti in min hrilh a, ka Nu tawngtaina chu Lalpa'n a hlawhtlin tir a lo ni.

Ka pianthar hma khan kawng hrang hrangah suahsual rawng lo bawl ve mah ila hmeichhiat mipatna lamah chesual lo turin Lalpa'n min lo veng tlat mai a, nupui neih hun hma a lohtheihlohna a vanga nupui neihte, ka fa hi keimah anga fahrah in a awm ve palh ang tihte hi ka thil hlauh berte zinga mi a ni a. Hmeichhiat mipatna lam a nulat tlangval lai a inhman thinte hi nupui pasal nei a, in leh lo din chungchangah an tluan viau hi ka ring thei ngai lo reng reng a, churang chuan hmeichhe thenkhat te'n, "Pa lo emai," ti a min ngaihnêp thu min chhakchhuah khum bawrh bawrtu pawh ka tawn chang a awm reng a ni. Mahse kei chuan, "Pa lo," ti a hmeichhiate ngaihnêp nih ngam khawpa Pa-ah ka inngai ve tlat thung.

Tlangval thenkhat chu ‘Pa lo” nih ngam khawpa sual an do ngam loh a vang leh an insum theih loh luat avangin an tum loh hum an dai phah in an la inrin hma leh chhungkaw din tura an la inbuatsaih hma in chhungkaw din a lo ngaih phah thin a. Chumi in a a rah chhuah tha lo tak mai chu retheihnate, bawrhsawmnate, chhungkaw inrem lohnate, nupa inthennate, fahrah riangvai tamnate ram tihmelhemtu leh chhiatna hrang hrang, kan sawi vek seng lovang, athlen thin a ni.

Sualna thenkhat hi chu inchhir a sim in awmzia a nei in a sawt em em a, damchhung nunkhua a nuam leh in nunthar in a nun leh theih a, mahse, hmeichhiat mipatna hman khawlohna avang a chhiatna chu lo dam leh ang pawhin lang mahse ser thuk tak, reh leh ngai tawh lo tur a awm tawh thin a, apawi thui bik em em a ni. Chuvangin Pathian rawngbawlni tan kher lo pawh nupui pasal neih hma leh mi nupui pasalte chungah pawh, mahni hmasial tak pawhin hmeichhiat mipatna lam a kan inthiarfihlim hi thil tha ber a ni.

## BUNG 5

### MISSIONARY ATAN LALPAN MIN KO

Kan khua a ka phak tawh a Lalpa rawng ka bawl lai leh ka Nu tanpui a hlim tak a hun ka hman lai chuan Hnahthial atangin ka pa Hminga chu kan khuah chuan a lo kal a, ka pa Hminga chuan, “Hnahthial-ah rawn haw leh tawh mai rawh, hetiana thingtlanga lo hnathawk ringawta i awm chuan nakin zelah i tan a tha lovang; Bus Permission sorkar-ah kan dil mek a, kan hmuh ngei pawh ka ring, kan hmu a nih chuan nangman i enkawl dawn nia,” ati a. Ka pa Hminga thusawi chu ngun taka ka ngaihtuahin dik ka ti angreng hle mai a, lo neih a ei ka lo zawng a nih chuan nupui ka lo nei a nih pawh in chutianga a nupui fanaute chawm chu ka tlin reng ka ring lova, “Tuntum a tan chauh ka pa Hminga thusawi hi zawm leh rih phawt ila, ka tihsual pawhin, ka tihfuh pawhin,” ti in thutlukna chu ka siam leh ta a.

Kum 1988 chuan Hnahthial-ah chuan ka chhuk leh ta a. Ka pa Hminga'n a sawi ang chuan Bus Permission pawh chu an lo dil ngei a, kan hmu ngei bawh a, mahse han lei mainatur sum kan neih remchan mai loh a vangin hemi kum hi chuan hnathawh mumal tak ka la nei rih lova.

Kan Kohhran (Hnahthial Bazar Kohhran) chu Pathian Thlarau-ah kan hlim hle mai a, thalai leh tleirawl an hlim zual a, chung thalai hlim ho kaihhruai hna chu U Valtea (Tv Zorammawia) te nen kan thawk a. Kan Unit T.K.P. te'n, “Kan Kohhran a tang hian Missionary kan la chhuak ve mih lova Unit dangah chuan Missionary chhuak an awm nual tawh a, chuvangin kan Unit a tanga Missionary chhuak kan awm ve theih nan Pathian hnenah tawngtai in i dil ang u, zing tawngtai inkhawm kan neih thin bakah; thalai pualin tlai tawngtai inkhawm i siam ang u,” kan ti a. Kum hnih tawngtai in kan Unit a tanga Missionary kan chhuah ve theih nan kan dil hnu pawh chuan chhan-na kan la hmu thei lova, a la reh vung vung mai a.

Kum 1990 March thla (a ni chiah ka hre thei ta lo) tir lam chuan Ambassador For Christ Team Speaker Upa K.Lawmsanga chuan

Hnahthial Tarpho veng Salem Kohhranah rawngbawlina a nei a, an Kohhran a tanga Missionary chhuak Tv, Thangzela'n a rawn tawiawm bawk a. Missionary Tv, Thangzela Report ngaihthlak beisei pahin ka han inkhawm ve a. Missionary chuan inkhawmnaah chuan Report a pe lova, inkhawm banah an Kohhran Upa R.Lalmawia (Pu Mawitea) inah inpawlhona kan nei a, chutah chuan Missionary chuan Report a pe a, ngaihnawm ka ti em em mai a.

Upa K.Lawmsanga te nupa

Pu Lawmsanga chuan Mire ram a Missionary an intirh dan leh an Missionary an la luh theih loh dante a sawi bawk a. An mi tirh pahnih an bân tak dante a sawi zel a, Mire ram a thih ngam a inpe an la zawn thute a sawi in Mire hovin an lo auh dante hetiang hian a sawi a, “Miria, Pu Singchownga'n lehkha min rawn thawn a, ‘Pu Lawm, Mire ram a tanga in haw tak hnu khan Mire hnam zingah Kristian kan pung nasa em em mai a, meialh ang maiin Mire ram chu a tuam duai duai mai a, amârawh chu Kristian kan nih dan chu hria la chuan i rilru a na ngawt ang.



Mire tlangval pakhat, a hming Menleha'n sakhaw thar a siam chhuak a, chu a sakhaw siam chhuah chu ‘Kramadi’ an ti a. Kristian sakhaw zirtirna zulzui in a zirtir a, amah chu Isua angin a insawi a, amah ringtute chu nakinah a la chhandam dawn niin a zirtir a, chu chu Mire ho chuan sakhaw dik a ngai in mitam takin chu sakhua chu an zui a, min rawn pui lo a nih chuan Miriate thlarau chu kawng diklo lamah kan peng vek dawn a ni. Khawngaih takin keini in unau Miria te thlarau boral mekte hi min rawn chhanchhuak hram rawh u,’ tiin min rawn auva, ka tan chuan Pawla'n ‘Makedonia ramah lo kai la min pui rawh (Tirh 16:9) ti a kohna a hriat aiin a nep chuang in ka hre bik lova, kum thum Mire ramah Volunteert in rawng ka lo bawl tawh a, ram buai vang leh ka hriselna a that loh a vangin kan rawn haw a ni a, tunah keimah kal thei lo mah ila ka ai kal tur zawn chu ka mawhpurhna a ni tih hria in...” ti in a sawi zel a.

Mire rama Missionary intir turin Ambassador For Christ Mission Board an din thute, an mi tirh mi pathum Bangladesh ramri a Chakma hel hovin an lo man a an bag leh an thil neih zawng zawng an lo chhuhsak vek a, an kal leh a nih chuan kahhlumah an lo vau thute leh chung an mitirhte chu beidawng taka an rawn kir leh thute a sawi baw k a.

Chutia Pu Lawmsanga'n a sawi mek lai chuan Miriate chu ka lo khawngaih em em mai a, an mitirhte chuan han bei leh hram sela, han lut thei hram se, Miriate thlarau bo chu chhanchhuak thuai thuai se tihte ka lo ngaihtuah a. Keima kal turah chuan ka ngai lo hrim hrim a. Ka thiamnate a tlem bakah Missionary rawngbawl hna hi chu ka thawh ve phakah ka ngai lo hrim hrim a, a tum pawh vawi khatmah ka la tum chhin ngai lo hrim hrim a ni.

Chutia Pu Lawmsanga'n Mire ram a an mi tirh chanchin leh Miriate chanchin a sawi lai chuan lainatna nen mitkhap lo lêk a ka lo thlir doh doh lai chuan putar pakhat hian zawhna nghawng nei thui tak mai hi a rawn zawt tlat mai a, chu a zawhna chu: "Mire ram a Missionary hna thawk tur chuan zirna lamah Qualification bithliah chin in nei em?" tih hi a ni a, chu putar zawhna chu Pu Lawmsanga chuan tihian a chhang a, "Zirna lamah Qualification bithliah chin kan nei lo, Mire ram a Missionary hna thawk tur chuan Thih ngam a inpete chu an tling a ni mai," ti in.

Ambassador for Christ Team hi Mizoram hmun hrang hrangah rawngbawlin an kal reng a, Mire ram a Missionary intirh an tum hian Mizoram Baptist Kohhran Headquarter hriatpuina in A.F.C. Mission Board an din a, an Missionary te chu B.C.M in a lak theih hun huna B.C.M. a pek luh theih turin an inherem a, ziakin Agreement erawh an dah lo.

A.F.C. Team chu 1987 a din tan ni in A.F.C. Mission Board erawh chu kum 1989 khan din a ni. A.F.C. Mission Board member te chu hengte hi an ni:

- |                          |            |
|--------------------------|------------|
| 1. Evan, Upa K.Lawmsanga | Chairman.  |
| 2. Pu, P. Rochhuma       | Secretary. |
| 3. Pu, Lianchhawna       | Treasurar. |

|                               |          |
|-------------------------------|----------|
| 4. Pu, V.L. Sawma             | Member . |
| 5. Pu, Laltlanthanga          | “        |
| 6. Pu, B. Lalsangkima         | “        |
| 7. Pu, Lalsangkima            | “        |
| 8. Pu, C. Chungnunga          | “        |
| 9. Pu, F. Aithuama            | “        |
| 10. Pu, F. Challiana          | “        |
| 11. Upa, Biakmawia Hmar       | “        |
| 12. Tv, T. Zoramawia (Valtea) | “        |
| 13. Tv, R. Hmingthanzuala     | “        |
| 14. Tv, Lalnunmawia           | “        |
| 15. Pu, V.P. Vuana            | “        |
| 16. Pu, Tlangnghianga         | “        |

An Missionary enkawl dan pawh hetiang hian fel takin an siam:

1. A.F.C. Missionary te hian Kohhran, Pawl hovin Missionary an rawihte angin hlawh an nei ve lova, ramtinah Pathian chanchintha hril turin koh a ni tih a inhria in a thawk ang; an lawman beitham tak erawh chu A.F.C. Mission Board in a lo pe ve thin dawn a ni.
2. Missionary-te hian an thawhna Kohhran hnai berah an ringthar lakte chu an hlan zel tur a ni.
3. A.F.C. Missionary-te hian Kohhran, Pawl hrang hrang din an tum ngai tur a ni lo.
4. Missionary te hian an awmna/thawhna ram mite dinhmun leh an nihna a awm in chu chu an nihna tur a ni tih an hre reng tur a ni.
5. Missionary te hian tul leh pawimawh an neih apiang chu Mission Board Committee-ah an thlen thin tur a ni.
6. A.F.C. Missionary te hi Committee in tul atih hun apiangah a chawlh tir thei ang. Entir nan, Kohhran tan a nun dan thalo leh mawi lo an tih in.
7. Nupui pasal neih chungchangah a ruaitute phalna an la hmasa tur a ni.
8. Missionary te'n kum khat chhunga an hnathawh dan leh an hmalak tum dan Committee-ah an report thin tur a ni.

9. Furlough thu: Missionary te hi thil ùl bikna a awm loh chuan kum hnih (2) danah an Furlough ùin ang.
10. An chhuti/Furlough hun chhung chu thla hnih a ni ang.

Hetia Pu Lawmsanga'n an hma lâk tawh dan leh an hma lâk zel tum dan a han sawi hian ka pianthar lai a Lalpa hnen a ka lo inhlan tawh dan kha ka hrechhuak zawk mai a, "Lalpa, min hmangaih a vanga hreawm tam tak tuarin i fapa Isua Krista in min tlan chhuah a vangin kei pawh i tan a nung turin ka thlarau, ka nuinna leh ka taksa i hnenah, i duh a i hman atan ka rawn inhlan e. I duh angin min hmang ve ang che," tiin Lalpa tan ka lo inhlan tawh a.

Kei mi tling lo tak mai hi a rawngbawl turin a thlarauin min thuam a, Mizoram chhungah leh Burma ramahte pawh a chhandamna thu ka lo tlangaupui ve tawh ùin a. Hetia kum hnih dawn lai mai, "Lalpa, khawi lamah nge mi tirh leh ang?" ti a Lalpa aw ka lo ngaihchan ùin chu chù Putar in Pu Lawmsanga zawhna a zawh Pu Lawmsanga'n a chhanna chu Lalpa'n Mire ram a kal tura min kohna a ni tih min hrilhthu awm ang mai hian ka thinlungah chiang tak mai hian hriatna ka nei ta tlat mai a. Ka mangangin ka zam chhe nasa ta mai a, chhuanlam ka zawng ruai ta mai a.

Hun kha lehchen Lalpa min lo hruai tawhna leh Pathian chak, engkim tithei a a nihna kawng tam takin ka chung ngeiah leh ka mithmuh ngeiah a rawn lantir tawh zawng zawngte chu hai derin Mire ram kher kherah chuan ka kal duh loh avangin chhuanlam tam tak ka nei a. Bangladesh a awm hote ùawng ka thiam si lo, ram dang a kal turin saptawng lah ka thiam bawk silo. Chubâkah Pu Lawma te mitirh pawh Mire ram a lut thei lovin an rawn kir leh a nia, kei tehluh ka luh theih bikna tur a awm lo.

Tin, kal lo tum tehreng pawh ni ila, kal ka tum thu ka chhungte ka hrilh hún hún chu Mire ram a kal tum ting lo tura min tih hun a ni dawn tih pawh ka hriat sa a ni a. Tin, midang, Mire ram a kal ka tum a ni tih lo hretu apiangte'n midang kal theih lohna hmun a kei tehluh midang an lut thei lo tih hre reng chungka kal tura ka han inpe ve chu min lawmpui ai chuan an hmusitna leh nuih tizatu mai ka ni dawn tih ka hre reng bawk a, hlauhna leh zahna in ka thauah min man a ni ber mai.

Lalpa'n ka rin ai hla, hmun thim, hlahawm leh zahna ruam kal tlang kher ngaihna hmun a min han ko mai chu, ka pianthar tirh a, "Lalpa i duhna hmun a piangah min tir rawh," ti kher kher a ka lo inhlan kha ka inchhir rum rum mai a. Lalpa min kohna lah chu midangte hriatpui ve lohvin ka thinlungah a ri ring tulh tulh mai bawk si a. "Lalpa, i hnenah ka kâ ka lo âng tawh tak nâ in Mire ramah kher kher chuan min tir lo hram rawh, kei naupang leh mi chaklo tan chuan ka paltlang tur hmabâk a ko lutuk deuh emmai," tiin ka ãawngtãi mawlh mawlh a, mahse Lalpa'n, "Michak lo chuan 'ka chak' tirawh se, chaktak leh huai takin awm rawh, ka awmpui zel dawn che a lawm, tih te leh 'Tun hun anga i ngawih mai mai chuan nang leh i pa chhungte hi kan boral mai ang" tih thu hmangte in min chhang zel si a.

Lalpa'n min koh hun a ka chhan ngam loh chuan Jona dinhmun chu ka dinhmun a ni ve dawn tih ka hre bawk si a. A hnenah engmah sawi tur leh chan pawh ka nei dawn lovin Lalpa lakah engmah beisei tur ka nei tawh dawn miah lo tih pawh ka inhre Chiang a. Mahse Lalpa'n Mire ram a kal tura min kohna chu ka chhang ngam thlawt bawk silo.

Hetih hun lai hian kan Kohhran chu kan hlim em em mai a, Bible chhiar khaidiat-te, chawnghei ãawngtãi tlaivarte kan nei reng ãhin bawk a. Mahse kei chu chuta ãang chuan Pathian ka hnial tlat avangin ka ãawngtãi thei tawh lova, Pathian fak hla pawh ka sa thei bawk hek lo. Lalpa min kohna hnial reng chung si a a hming fak a zai leh ãawngtãite chu ka thei lo a ni. Tu hriatpui loh in ka nun chu a hreawm em em mai a, ka tihtheih chhun chu Bible chhiar chauh a ni.

Bible ka han chhiar lah chuan Lalpa min tirhna ngawt ka chhiar fuh leh ãhin bawk si a, ka tan chuan Bible chhiar pawh huphurhawm tak a ni. Tirhkohte 5:41,42 thu ka han chhiar chuan Tirhkohte'n Lalpa tirhna a chanchinãa an hrilhna a man leh roeltute hma a an hruai a an vuak a chanchinãa hril tawh lo tura an tih tlat pawhin huaisen tak a an tawrh dante, Lalpa Isua hming avanga tuar tlak a ruat an nih a vanga an lawm zawk ziate ka han hriat chuan Lalpa'n a hming a vanga kei mitling lo ber mai tuar ve tlaka min ruat chu mitam tak chan phak loh Van LAL duhsakna ka dawng a ni tih ka hriat chuan



vannei ka inti in lawmawm ka ti bawk si. Tirhkohte huaisen zia ka hriat chuan ka ngaisang in ropui ka ti hle a.

Bible ka chhiar zel chuan Tirhkoh Pawla chu Lalpa Isua hming a vanga phuar chang huam lova thih pawh a huam ziate (Tirh 21:10 – 16) ka hre zel a. Lalpa hmaah chuan ding tlak reng ka awm lo hian ka inhria a, ka zak em em mai a. Mire ram a kal tura inpek erawh ka la tum chuang reng reng lo. Michhuanawm ka nih tawh loh a hnuhmanah midangte hmuhsit a awm tura ka inngaih tlatnate, ka chhungte hnenah han sawi mah ila an remti dawn chuang lova ka hriatnate, mualpho riau dawn a ka inhriat tlatnate chuan Lalpa min kohna ka dal tir tlat mai a.

Mahse, Lalpa'n Mire ram a a rawng bawl tura min kohna chu midangte hriatpui lohvin Jeremia'n, "A ni chu ka lam lovang a, a hmingin thu ka sawi tawh hek lovang' ti mah ila; ka ruh chhung a mei kang inkhung ta ang mai hian ka thinlung chhungah hian a awm si thin a, ka pai hle hle zo lova, ka chelh ngang lova ni," (Jer 20:9) a a tih ang mai khan kei pawn Lalpa min kohna chu ngawih bopui mai chu har ka ti em em a, I Kor 15:10 a Tirhkoh Pawlan, "Nimahsela Pathian khawngaihna avangin ka nih nih ka ni ta," tih ka han chhiar chuan Lalpa min kohna chu chhang lo thei ka nih tak loh a vangin, Lalpa rinchhan in, Lalpa hming avang chuan ka nih nih nih inhuam in Lalpa tanpuina dil a tawngtai chungin ka chhungte hnenah chuan ka han sawi ta rawih a.

Ka pa Hminga chuan min chhan dan a ka lo rin lawk ang ngei in, "E!!! nang chu i kal thei lovang, Pu Lawmsanga-te pawh an kal tawh a, an rawn kir leh a, taksa leh thlarauva mi puitling tak tak mi engemaw zat Mire ramah hian an lo kal tawh a, mahse a rei berah kum thum, kum li bâk an awm thei lo, an rawn kir leh zel thin. Ram dang a ni a, nang chu Mizo tawng bâk eng tawng mah thiam i nei bawk silo. Bâkah, hei tunah pawh Pu Lawmsanga-te mitirhte pawhin Mire ram chu sawi loh Bangladesh pawh lut thei lovin an rawn kir leh a ni a, nang pawh kal mahla lut thei lovin i rawn kir leh a nga, nangmah i hming chhiat bâkah keini i nu leh pa leh i chhungte tan pawh a zahthlak dawn emmai, kal chu tum duh ting lo mai rawh," min ti a.

Chu chu Pathian min kohna min hriatpui ve lotu leh ka hmangâitute min chhan dantur a ni in min chhan dan tur a ka lo rin lawk dan pawh a ni reng a. Ka pa Hminga chu han chhan leh dantur pawh hre lo chuan a hmaah chuan ka ding zum reng mai a.

Ka pa Hminga'n chutia min chhan avang chuan Lalpa min kohna chu a nêp phah chuang si lova, nêp a hnêk in ka thinlung chhungah chuan Lalpa min kohna chu a ring tual tual mai si a. Ka chaw ei pawh a tui lova, zanah lah ka muhil thei bawh hek lo. Nikhat chu ka pa Hminga chu Lungleiah kal a tum a, a kal hma ni chuan a tukah Lungleiah a kal dawn a ni tih ka hriat chuan lehkha ka ziaak a, Lalpa'n Mire ram a kal tura min koh dante ka ziaak a, a tuk zingah chuan ka pa Hminga Lunglei kal rualpui chu Lunglei an thlen ve leh a ka pa Hminga lehkha chu pe turin a kutah chuan ka pe ta a.

Ka pa Hminga Lunglei a tanga a rawn haw chuan keiman sawi hmasak ngai tawh lovin aman min zawt a nga, chutih hunah chuan Chiang takin Lalpa min koh dan leh Mire rama kal tura chuti taka min kotu chuan a hmangaih a fa hi Mire ram thleng lova hming chhia leh mualpho tangrang a ka awm chu a phal ka rin loh thu leh min hruai thlen ngei ka rin thu sawi tur chuan ka lo inbuatsaih a.

Ka pa Hminga chu Lungleiah chuan zankhat a zu riak a, atukah chuan a lo haw leh a, a thianpa chuan ka lehkha chu a lo pe ngei a, a rawn haw chuan kei chu varanda-ah ka lo awm a. Ka pa Hminga chuan inchhungah min ko lut a, "Mire ram a kal chu i la tum reng ami?" tiin min zawt a. Kei chuan Lalpa min kohna ka hriat dante leh Lalpa min kohna chhang lo thei ka nih loh ziate sawi in, "Lalpa'n Mire ram a awmhlen turin min kova, ka kal a nih chuan ka rawn haw tawh lovang, thil t̃ul dang engemaw a vang chuan ka rawn haw zawk chu a ni maithai a, Mire ramah lut thei lovin Lalpa'n martar ve tlak a min ngai a Bangladesh ramri a Chakma hel ho kut a ka thi a nih pawh in ka thisen in Mire ram a kal tur kei ai fel leh tha Lalpa hnenah a dil chhuak tho thovang. Mahse, kei chu martar tlakah Lalpa'n min ngaih ka ring lo," ka ti a.

Lalpa'n ka pa Hminga thinlung chu a thlak sak a, "Chutia Pathian kohna i dawng tak tak a nih chuan Pathian fa i ni a, Pathian in a

tirhna hmunah chuan i kal tur a lawm, Pathian kohna che chu keini lo hnial theih a ni hleinem,” a ti dam ta diai mai a. A thlun phelh ang huai hi ni in ka inhria a, hlim leh lawm em em in A.F.C. Mission Board Chaiman Pu Lawmsanga hnenah chuan ka kal ta vang vanga, Mire ram a kal tura ka inpek thu ka zu hrilh a.

Atuk dt 24 March 1990 zing karah chuan Pu V.P. Vuana inah A.F.C. Mission Board Committee hmaah chuan ka va inlan ve ta a. Anni chuan ka beisei loh dan deuh mai in min lo chhang a, “Tun̄tum atan chuan mithar kan la tawh rih lovang, kan lâk tum zât kan lo la fel tawh a, kan tir liam tawh nghe nghe a ni, i tlai deuh hlek a ni,” ti in min lo chhanga. Ka rilru in, “Lalpa remruat dan hi hriat thiam har ka va ti tak em!!! Min kotu aw ka hriat kha Lalpa aw ngei a ni si a,” ti in ka ngaihtuah a. Chutiang vel ngaihtuak a ka la din reng lai chuan. An zinga pakhat, Pu Sawma chuan, “Apianthar dan leh Mire rama kal tura Lalpa kohna a dawn dante zawt ve hrim hrim phawt ila a tha lawm ni,” a rawn ti a. Chutia ka la din reng lai chuan an mi zawh duhte min zawt ta a, min zawhna chu thatakin ka chhang a, Pu Sawma vek chuan, “Kan duh tawk lo la tawh pawh ni ila chutia Lalpa kohna dawngtu keinin lo hnawl chu kan tisual palh a nge, i la ve mai ang u,” a ti a. Tumah hnialkalhtu an awm tak lohvah chuan min la ve ta hram a.

Min tanpuina an sawi angina thla that lawmman Rs 800 min pai a, ka kalpui turte chuan Lawngtlai an thlen tawh thu leh Lawngtlai a ka va umphak mai an rin thute min hrilh a. Hlim tak in ka haw ve ta a, In ka thlen chuan ka chhungte chu thil awmdante ka han hrilh a, Lalpa min kohna chhanga Mire rama ka damchhunga ama rawngbawl tur chuan ka inbuatsaih tan ve ta a.

Ka kal hma chuan ka thian, ka rawngbawlpui te’n Mire ram a ka kal tur thu chu an lo hria a, min rawn thlah liam liam a, Kan Unit T.K.P te pawh in, “Missionary dil a kan tanngtaina Lalpa’n min chhanna i ni e,” ti in min rawn thlah bawk a. Mimal leh pawl hming pawhin duhsakna thilpekte pawh min rawn pe nual bawka. Chutia, ‘Missionary’min han tihte chuan ka zak lutuk chu ka hmulthite hi a

ding sung sung hian ka hria a. Kei in a Missionary hming ka han pu ve chu phu lo ka inti in ka insit em em mai a, ka lawm baw si.

Ka lo rin angin min hmusit hmel pawh ka hmu lova, min lawmpuitu zawk hlir an ni tih ka hria a, “Lalpa, a vamak ve, ka rin angin ka chungah a thleng lo tlat mai, mi thinlung hi i lo tih danglam sak vek a ni maw?” ka ti hial a. Ka rin loh leh ka beisei loh em em Salem Kohhran K.N.P te pawhin min rawn thlah in thilpek hlu tak takte min rawn pe a. Kan zaipawl, Bible Society zaipawl pawhin min rawn thlahin duhsakna thil pek tha tak tak min pe baw a. Ka chungah Lalpa that zia hi chu mak ka vahan ti tak em!!! Lalpa fak a zai leh tawngtai te chu nuam ka ti leh ta a. Lalpa min lainattu chu fakin awm rawh se. Ka kal hma niah chuan U Valtea nen ka thil mamawh turte lei in kan bazar a. Lalpa min hruai dante ka ngaihtuahin ka lawm veng veng thin.

## BUNG 6

### MIRE RAM LAMTLUANG

Lalpa'n ka damchhunga a rawng ka bawlina tura ram min pek Mire ram lam pana kal tura ka inpeih fel hnu chuan ni 25 March 1990 Thawhleleh zan chuan A.F.C. Mission Board te'n kan inah min rawn thlah a. Thu tha tak tak min hrilh a, "Bangladesh a in va luh tawh hnu chuan in harsatna pawh kan rawn hriatpui thei tawh dawn lo che u a, Volunteer Missionary angin in kal a ni tih hre reng ula, in awmhlen thei a nih chuan awmhlen ula, a tul a nih chuan arammii ngei nupuiah nei ula a tha ang," tihte pawh min hrilh baw k a.

Atuk tukleh ni 27 March 1990 Nilaithawhtan chuan engtin nge Lalpa'n min hruai zel dawn tih pawh ngaihtuah thui lem lo chuan Lalpa kutah ka nunna leh ka engkim mai chu ka innghat a, ka Nu thu min chah fo thin, "*I awmdan tur chu Lalpa chungah nghat la, amah chu ring la aman ati vek ang,*" (Sâm 37:5) tih thu chu ka rilruah a cham reng baw k a. Kan in a tanga ka chhuah dawn chuan chhung inkhawm kan nei a, kan chhung inkhawmah chuan ka farnu Champuii'n Sâm 32:8,9, "Fing tak a awm tir che in i kalna tur kawng chu ka entir ang che a: ka mit a en reng chung che in rem ka ruat sak zel ang che. Ngaihtuahna nei lo sakawr emaw, sabengtung emaw angin awm suh: chung chuan thunun nan lakam thir barh an ngai a, chuti lochuan i kal thei lovang," tih a chhiar a, ka nu leh ka pa te chuan thu tha tak tak min hrilh hnu in tawngtaina in min thlah a, Mire ram lamtluang chu ka zawh tan ta a ni.

Hnahthial a tanga Lunglei thlengin Lunglei a ka thian, Nula Lalfamkimi nen kan kal dun a, Venghluna an inah chawte ka ei nghal a, Missionary ngaihven tak chhungkua an lo nih a vangin an in a ka chawlh reilote chhung pawhin min duat in nuam ka ti khawp mai. Chawhnu lamah chuan vawikhatmah ka la kal ngai reng reng lohna Lawngtlai a riak tur chuan Lunglei a tang chuan ka chhuak leh ta a. Lalpa hruaina in Lawngtlai chu tluang takin ka thlenga, Mire rama ka kalpui turte, B.Lalkima leh Lalnunthara (Nuna) te chu ka va umphak a. B.Lalkima chuan Vathuampui a mi Pang nula Kimpuii nupuiah a nei a, Nuna chu tlangval a la ni a, kan khaw chhuak a lo ni

ve nghe nghe a, U Kima (B.Lalkima) pawh keimahni Fanai tlangdunga Cherhlun khaw chhuak a lo ni bawh a, kan han inhmu khawm chu kan hlim tlang hle mai a.

Atukah chuan Lawngtlai a tâng chuan Bungtlang ‘S’ lam panin MST Bus in kan tlan ta vuah vuah mai a. Kawngte chu a chhia in ramngaw chhahpui, thing lian pui pui mai karah chuan kan tlan zel a, bus tukverh a tanga ram ka han thlir vel chuan thing lian pui pui leh hrui zam inphan chuat maite chu ka hmu thei a. Kan naupan lai a kan khaw dai a hrui zâm leh thingkunga nunchan kan zir laite kha ka mitthlaah a rawn lang uai uai mai a. Kan kal hla tulh tulh a ka tawngri hriatte chu a mumal lo tulh tulh mai a. Kei Hnahthial bâk la pel ngai lo ta chuan ka bul vel a mite chuan eng tawng nge an hman pawh ka hre der tawh lo mai a.

Diltlang khua-ah rei lote kan chawl a, chuta tâng chuan Mizoram a thlaraumi ber pawl a an sawi, a hming chu ka lo ral hriat fo tawh thin, Pu Khenhniara, Va̧thuampui B.C.M High School Headmaster, a thingrem lianpui lehkhahu a khat tlat pahnih kengin kan chuanna Bus-ah chuan a rawn chuang ve a, ka bulah chiah a lo thu a. A thut hma chuan Bus chhungah chuan athingthi rup a, a tawngtai ta mual mual mai a, chuta chin chu kan kalna kawng chu chhe hle mahse a ngaihthat thlak in thla a muang huai hian ka hria.

Pu Khenah chu kan kal tumna Va̧thuampui a kal ve tur a nih avangin kan kal tlang zel a. Kan chuan na Bus chu Bungtlang ‘S’ thleng chauh a kal a vangin Bungtlang ‘S’ atâng chuan M. Kawnpui lam kal tur motor kan chang leh a. motor veivak vel lah chu a vang em em mai a, Motor kan hmu thei lawk lova, Bungtlang ‘S’ atâng chuan Lalpa rin dante, dawhtheihnate, tuarchhelte, Lalpa’n min zirtir nghal ni hian ka hria a. Motor chu vang hle mahse Pu Khenah chuan, “Pathian hnenah motor dilin kan tawngtai a nga, Pathian in motor chu min pe mai ang,” a ti a. Vawi hnih vawi thum motor dila kan tawngtai chung pawh chuan kalna tur motor chu kan la hmuthei chuang lova. Khua lah chu a tlai tawh viau mai bawh si a.

Kan beidawn tawh hnu chuan Pioneer motor hi a rawn kal a, kan lo phar ding a; Pioneer ho chuan, “Keini chu kawng chanve thleng

chauh kan kal dawn a, mahse in duh chuan lo chuang ve ula, M.Kawnpui a t̃angin kan motor labour rawn dah tur a lo kal dawn a, a kir leh lamah in chuang thei ang,” an tih avangin Pioneer motor-ah chuan kan chuang ve ta nghawng nghawng a.

Pioneer Camp ãtang chuan ‘Hmarluang lui’ antihah chuan kan bag, mahni taw̃k a rit taw̃k tak mai ak chungin Pu Khena thingrem lian tak mai, lehkhabu a khat tlat pahnih chu kan zawn baw̃k a, Hmarluang lui ralah chuan motor chu kan chang ta t̃hap mai a. Nakin deuhah chuan Pioneer motor chu a rawn kal ta ngei a, a labour phurh an chhuk zawh hnu chuan beiseina sang tak nen an motor a chuan ve chu kan va dil a, an lo phal ta awzawng lo mai a! A inher a, a ruak chuan kan kalna tur M.Kawnpui lam pan chuan atlan liam ta vuah vuah mai a. Ka t̃hiante, Nuna leh U Kimate thinrim lutuk chu an puakkeh lo chauh a ni.

“Engatiah... Pioneer motor mai mai in min han phurh duh loh khanglan chu,” ti in vawm zui dawt dawt mai an tum a. Mahse kei chuan, “Eh..Eh...Eh...Kha motor kha engvangin nge vawm intum ringawt, kha motor chungah khan thinrim theihna kan nei reng reng lo, kan motor pawh a ni lova, kan Patea motor emaw, kan Nite motor pawh a ni hek lova, a khalhtu pawh kha kan hmelhriat pawh a ni hek lo, kha motor leina a tan khan cheng khat pawh kan thawh ve baw̃k hek lo. Pathian in kan hma-ah hreawm tam tak tuartur a la awm zia hria in tun a t̃anga ke a kan kal hi a remti a ni ngei ang,” ka han tih chuan anni pawh chu an inbeng dai leh thei ta hram a.

Pu Khena chu a thingrem lianpui pahnih a vang chuan a rilru a buai hle mai a, “Thingrem hi a lianin a rit si a, kan keng thei lovang, hetah hian t̃தாக in thukru ila, sikul naupang ka rawn lak tir mai ang,” a ti a. Mahse kei chuan, “E, nilove, M.Kawnpui thleng chu kan zawn tur ani, tlangval vek kan ni a, kan zawn thei em em ang,” ka ti a. A zawnna te kan siam a Pu Khena chu a t̃awngt̃ai leh te te a, kan bag rit taw̃k pai chung chuan thingrem chu kan zawn a kan kal ta a. Kan hah em avang chuan kan chawl zing hle a, kan chawl a piang chuan Pu Khena chuan t̃awngt̃aina hun remchangah a neih a, a t̃awngt̃ai zel a, a chang leh kan iñtawngt̃ai chhawk a. Khua a lo thim tan tawh nen; a chang chuan motor kawng chu a kual em a vangin

pumpelhahte kan kal bawk thin a, pumpelh chu a kawng ate in a chho chhengchhe thei em em mai thin a. Kan hah em avang chuan kan chawl zing si a, kan chawlh apiang chuan Pu Khena chuan tawngtai tur ati zel a, keini thian thum chuan thuchham tur pawh kan hre seng tawh thin lova, Pu Khena chu kan haw lek lek tawh mai a. Zan dar kuaah M.Kawnpui chu hah thifahnukchat in kan thleng hram a.

Kan chauh tlan em a vang chuan a tuka Vathuampui a kal pawh chu kan peih tawh lova, M.Kawnpuiah chuan ni khat kan cham a. M.Kawnpuiah hian Mizo hnathlak Bawm, Pang leh Mara te an awm a. kei chu Pu Hmangaiha te inah ka thleng a. Chaw kan han ei chu chawhmeh leh antui zawng zawngah leh hmarhcharawtah te chuan ka la eingai miah loh dangpuithu hi an lo telh vek mai a, ei theih mai ka inring a, ei pawh ka tum a, Buluih (mula) hmarhcha thak tak, dangpuithu a bai chu ka han ei chuan ka tilui thei ta der lo mai a, han ei luih ngial ka tum pawh chuan ka kawchhung hi inlet butin ka hria a, ka luak dawn ta mai a, ka mualpho dawn takngial a ka hriat a vingin, “Ka ril aham lova,” ka ti a, ka kham san ta ringawt mai a. Chuta tang chuan dangpuithu rim ka hriat tawh chuan ka luak a chhuak tlat tawh zel mai a. Kan la kal zel natur leh kan khawsakna tur chu dangpuithu ei mi vek an ni bawk si.

Dangpuithu rimchhia ti lo tur leh tui ti tak a ei ve thei tur chuan Lalpa hnenah vawi tam ka dil thin pawhin, Pawla’n a mit hrisel lohna tidam turin Lalpa hnenah vawi tam tak a dil a, mahse, a dil hlawhtling bik lova, “Lalpa’n ka taksaah hling min pe a ni,” atih ang khan kei pawh Lalpa’n hling min peah ka ngai ve ta mai a ni. Tun thleng hian dangpuithu hi tui ti takin ka la ei thei tlat lova, kan thian Nuna chuan dangpuithu chu tui ati laileng khawp a, “Dangpuithu pawh ti suh u, in ko na teh fawk lutuk, ‘Dangmami’ ti rawh u, ati hial nghe nghe a ni, a itawm khawp mai.

M.Kawnpuiah chuan 1987 kum a J.B.S. a ka Pathian thu zirpui, ka ngainat em thin U Faka, Non-Mizo a Evangelist a lo awm a, rin loh tak mai a kan han inhu hlawl mai chu kan inngaih ziate sawi in kan hlim hle mai a. Zana M.Kawnpui bul a Midum kawng lai Camp a a Pathian thu sawina-ahte ka zui a, chutah chuan Midum (Santali)



ṭawngin Pathian thu duhthawh leh ṭhahnemngai takin a han sawi ka hmuhte chuan ka ngaisangin ka it em em mai a. “Kei hi eng tikah tak Mire ṭawngin Pathian thu sawi ve thei ang imaw,” ti tein ka inngaihtuah a. Chumi ṭuma a thu sawi chu Baptisma chungchang a ni.

A ni U Faka chuan a hun tawp thlenga Lalpa tana thawkin arawngbawlina hmun aṭang ngeiin rawng alo bawl sak ṭhin Lalpa hnenah min lo kalsan tawh a, ava han nihlawh bik tak em. Midum (Santali) thlarau bo a hruai chhuah tam takte nen Lal Isua an la hmu dawn si a. Lal Isua’n eng ang takin lo lawm ang maw.

M.Kawnpui a nikhat kan cham hnu chuan kan thingrem zawn chu M.Kawnpuia hnuchhiah in Vaṭhuampui lam pan chuan kan pali chuan ke in kan kal leh ta a. Vaṭhuampui chu tlai lam zanriah chum hun velah kan va thleng a. Ka vawikhat kalna a nih a vangin thlen-na pawh ka hre lova, Pu Khena’n a awmna in a thleng ve mai tura min sawm takah chuan Pu Khena awmna Pu Laithatngura inah chuan ka thleng ve ta rawih a. Pu Laithatngura te nupa chu nu leh pa-ah ka nei h nghal a, an ni chuan fanu pakhat leh fapa pakhat an nei a. (ka nu leh ka pa ti in ka ko tawh) Ka nu leh ka pa tharte chuan an fa ang chiahin min en a, min duat em em mai a, Vaṭhuampui a an vuang leh vate zawng zawng pawhin an tu leh fa ang main min en a, min duat êm êm vek mai.

Vaṭhuampuia chengte hi Mizo hnahtlak Pang hnam an ni a, kei Hnahtthial bâk pel ngai lo leh mi hawizau lo tih takah, Pang hnam hi ka lo la hre ngai reng reng lo mai a, an ṭawng chu Mizo ṭawng a ang viau nain ka awmtirh chuan ka hre mai thei lova; mahse naupangte nenlam Mizo ṭawng an lo thiam vek a vangin Vaṭhuampui khua chu nuam ka ti in ka tlangnel nghal hle a ni. Mire ram a kan luh theih hma chu Vaṭhuampui hi kan awm lailawkna tur a ni. Vaṭhuampui a ṭanga Pharva lam a kalin Bangladesh chu nihnih kal chauh a ni.

Vaṭhuampui-ah pawh hian Kum 1987 a JBS a ka Pathian thu zirpui, kan Pathian thu zir lai pawh a ka ṭhian kawmngaih em em mai Lalmawiliana a lo awm leh a, chu vangte chuan Vaṭhuampui-ah chuan ka mikual lo em em mai a, Lalmawiliana nen chuan pianpui unau ang maiin kan inen a.

Vaṭhuampui-ah chuan ni li lai kan awm hnuin Bangladesh Mire ram a lut tur chuan Pharva lam panin kan ṭhian zaho chuan kan kal leh ta a, U Kima (B.Lalkima) chuan a nupui Kimpuii chu a hruai ve bawk a. Pharva pawh chu tluang takin kan va thlenga, Pharva-ah hian Pu Khena nau Pastor Vanlalsiama te chhung chu Bialtu Pastor in an lo awm a. Vaṭhuampui-ah Pu Khena nen chuan in khatah kan awm a vangin Pastor Siamate pawh chu ka chhungte ang mai in ka ngai a, anni pawhin an nau ang mai in min lo en ve bawk a.

Pharva-ah pawh chuan ni li kan cham leh a, heta kan cham chhung hian biakin tinah kan inkhawm a. Pharva khua hi 1 2 3-a ṭhen a ni a, 1-ah chuan Chakma an awm a, 2-ah chuan Tuikuk (Bru) an awm a, 3-ah chuan Bawm leh Pang an awm thung. 2 leh 3 amite chuan Mizo ṭawng an lo thiam deuh vek a, 1 a Chakma ho chuan Mizo ṭawng an thiam vak lo.

Pharva a ṭang chuan ni 9 April 1990-ah Ramritlang khua lamah kan kal leh a, Ramri tlang khuaah chuan Bawm leh Pang an lo awm a, an khaw awmna chu tlangah nilovin lui kawrah an awm a ni. Ramritlang khua ah chuan Pu Vanrothawna inah ka thleng a, a ni hian, “Fânai ka ni ve,” ati a, min duat khawp mai. Ka kalna a piangah Lalpa’n ṭhian ṭha leh chhungte ṭha tak tak min pe zel hi a mak ka ti in ka lawm khawp mai. Ka kalna tur takah ka kal ni a ka inhriat a vangin ka lawm khawp mai.

Ramritlang khua aṭang chuan ni 10 April 1990-ah Bangladesh lam panin kan kal a. An khua Kharbari chuan Takam hel ho Camp thleng min thlah a. Santibahini ho chuan kan rin ai in min lo dawngsawng ṭha a, an checkpost-ah chaw te kan ei a, chawhmeh an neih ang angte min pe in kan pawisa kente chu Bangla pawisa in min thleng sak a. “In rawn let leh pawh in India pawisa hi in rawn thleng leh thei ang,” an ti a. Ṭanpui kan ngaih huna an theih ang anga min ṭanpui an intiam bawk a. Kan beisei phak bâk in Lalpa’n kan chungah a ṭhat tir a ni.

Kan va riahna tur Bangladesh a Rumana khua chu a hla tawh lova, chawhma lek a kan thlen mai tur thute min hrilh a, kan lawm hle a ni. “Lalpa’n min hruai dan hi a lawmawm em a, lawmthu sawi in i

ṭawngṭai ang u,” ka ti a. Lawmthu sawi in kan ṭawngṭai leh rih a. Chumi hnu chuan hruaitu nei tawh lovin tunhma a M.N.F. ho kawng ruk, kawng pawh awm mumal tawh lohna-ah chuan vawikhatmah la kal ngai lote chuan ramngaw durkhung mai hnuaiyah chuan kan kal ve ta tawp mai a.

Kan zinga hnam dang ṭawng thiam awmchhun chu U Kima nupui Kimpui chu a ni a. A ni chauh in Bawm ṭawng, Tuikuk, Takam ṭawng a thiam a. A ni chu a naupai chak loh lai a lo ni bawk nen, keini mipa ho lah chu ka pa Hminga min tih angin Mizo ṭawng bâk eng ṭawngmah thiam nei lo vek kan ni bawk si a. Keini lam kan in en chuan, a dik tak chuan Foreign Missionary nitur chuan kan inchhuang lo tlang hle a ni. Awmhlen tum a kal kan nih a vangin kan thawkrip ve hle mai lehngal a. Kan China bag hring paiah chuan kan thawmhnaw chu kan inbeng leng lo achhâ a ni mai si a.

Bangladesh leh Mizoram inrina ramri tlang tak tak chu kan han thleng a, kawng a lo mumal lo zual a, kawng kan bo chu a ni ta der mai a. Pathian hnenah kawngdik min kawhhmuh turin ṭawngṭai in kan dil a. Kan ṭawngṭai zawh chuan thing lerah ka han lawn a, kan thlang hla deuh hlek a lo chul leh thlam ram tawhte chu ka zu hmu thei a. Chu lam pan chuan kawng mumal loah chuan hnim tawn thla bawrh bawrh pahin kan chhuk ta a. Engemaw chen kan kal hnu chuan lo chul chu kan zu thlengin kawng chu kan hmu thei ta a. Kawng kan han hmu chu kan thaw a veng huai mai

Thui fu kan kal hnu chuan kawng peng a lo awm a, khawi lama kal tur nge tih kan hre tatlat lo mai a, kawng zau leh bel zawk ni a kan hriat chu kan zawh thla ta ringawt mai a, Chu kawng chu kan zawh thlak zel chuan Tatpawng lui an tih chu kan zu thleng a, Tatpawng lui chu kan zawh thla ta zel a, thui fu kan kal hnu chuan rallehlamah chuan lui a ṭanga chhohna kawng a lo awm riah hi kan hmu a, chutah chuan kan rin kai ta ngawt a. Kawng lah chu a chho ulh em em mai lehngal a. Kawng kan bo tawh ni a ka hriat a vangin engemaw hmuh inbeisei niawm takin ṭhianta hmaah chak deuh mai in ka kal hmasa a. Ramritlang ami te'n, “Hma takah in va thleng ang,” min tih a vangin chaw fun leh tui kan keng tawh bawk si lova.

Chutia auih zawn ang vut vut a thiante hma a ka kal chuan khaw ram hi ka han hmu a, chu khaw ramah chuan pa pakhat, pian tha zet mai, hrenpereng kaih a chempui sei zet mai kenga in lo thiat mek hi ka han hmu a. A ni chuan min hmu chiah chu helhoah min ngai a ni ang, hlauvin a meng phar nasa mai a, tlanchhiat a tum a, a ni, kan mi hmuh chhun a tlanbo leh daih si chuan Rumana kawng chinchang zawh tur kan nei dawn miah silova. Ka kutin ka huih a, ka hmaah chuan hlau a khur zawih zawihin ka aikaih ang mai in a ding khawng ta reng mai a. Ka tawng thiam ve chhun Mizo tawng dik tak chuan, “Ka Pu, Rumana kawng min hrilh thei em?” ka ti a. A ni lah chu lungtum biak ang mai hian ka thusawi hre lo ang maiin a din ngaiin ading reng mai a. “Mizo tawng pawh hre hlei lo, i mawl e mai,” tih pah chuan Kimpuii chu lo chho hmanhmawh turin ka ko nghal a.

Kimpuiite an rawn thlen chuan chupa chuan kan zingah hmeichhia a han hmuh chuan a hlau lutuk chu a zia ta deuh hian a langa, Kimpuii chuan Chakma tawng in, “Kundi Rumana pawt,” atih chuan, chupa chuan kaw kua a riat nawk nawk pahin Mizo tawng a thiam zawng zawng sawm khawm niawm tak hian a tawngah chuan ‘luidung luidung’ a tih chu keini thian thum, kei U Kima leh Nuna chuan kan lo hre ve thei a, a bak chu enge a sawi kan hre ve thiam lova.

Kimpuii hnenah, “Hepa hian enge a sawi,” ti a kan han zawh chuan, “In rawn kalna kawng hi a dik lova, lui dung hi in zawh chho zel ang a, ding lamah luite a lo awm a nga, chu chu in zawh chho leh zel a nga, Rumana ho chhekin in han hmu ang, chutah chuan mi an lo awm a nga, chumite chuan kawng chu an lo hrilh ang che u,” a ti a ni,” a ti a. Muangchang lovin kan rawn kalna lamah chuan kan let thla leh ta a, Tatpawng lui dung chu kan zawh chho leh ta ngat ngat a, nakinah chuan kan ding lam a luite chu kan hmu ta a, chu luite chu kan zawh chho leh ta char char mai a, kei chu mi hmanhmawhmi tihtakah, thiante hmaah chuan chak deuhin ka kal fal a vangin Rumana khaw chhekin chu ka han thleng hmasa leh a, luite kamah chuan chhekin te tak te te hi a lo awm thliah mai a, chu chhekinah chuan mihring thawm reng reng hi ka hre lova, a reh hian a reh tlawk tlawk mai a, Ka hah tehlul nen; ka beidawng em em mai a, ka ril a tam tawh baw si nen.

“Lalpa, heti taka hreawm hi chu tuar har ka va ti ve le, e nge a awmzia ka va hrethiam tawh lo em, engtinngge kawng dik kan hriat leh theih ang? Tunah engemawti zawng talin i mi hruaina kut rawn lantir rawh, i rawngbawl tur hian hreawm tuar i phal tih chu ka hria; mahse, he kan kawng bona aṭang hian kawng dikah min hruai dawn lawm ni? Kan ril a ṭam in kan va han chau tawh em, tuarchhel tura min pui loh phei chuan kan chau zo tawh a nih hi, kan zingah hmeichhia, naupai lai a awm leh nghal,” tiin ka phun mawlh mawlh a, luite kam a chhekin lam chu ka han en leh chuan chhekin pakhat chungma mei khu lè lé hi ka va hmu a, lawm em em mai in chu mei khu lo chhuahna chhekin lam pan chuan ka tlan a.

Chu chhekin te takte chhungah chuan va luh ka tum a, chu chhekin kawngka chu a te in a hniam bawk si a, ka bag nen chuan ka lut mai thei ta tlat lo mai a. Chutia luh tum a ka bei lai chuan chu chhekin te takte a, putar te takte in bel te takte in chaw a lo chum mek hi ka hmu a. Chutia a chhekin te takte, kawngka a leng leh leng lova Rumana kawng zawt tura a hnen a luh ka tum min han hmu thut mai chu hel pawl a mi emaw minti ni ngei tur ani; min hlau em em mai a, achhekin kilah tawm in a meng phar na sa mai a. Ka han biak pawh chuan chu putar chuan a hlau lutuk chu min chhan nachang hre lovin hlau a khur zawih zawih hian min en reng mai a.

A chhekin teah chuan ka bag nen chuan ka luh hleihtheih loh a vang leh chu putar in min hlauh em a vang chuan luh luih chu ka tum ta lova, a chhekin kawtah chuan Kimpuii te rawn thlen hun chu ka nghak ta zawka. Ka ṭhianta an rawn thlen chuan thil awmdan ka han hrilh a, Kimpuii chu chhekin chhungah chuan lutin chu Rumana khaw Bawm putarte chu Bawm ṭawngin a va be ta a, Putarte nen chuan rawn chhuakin a chhekin kawtah chuan kan inbe ta a, chu putarte chuan Mizo ṭawng pawh a lo thiam em em mai a.

Chu putar chuan Rumana kawng chu ṭha takin min hrilh a, kawng peng bona tur a awm tawh loh thute min hrilh a. Lalpa’n kawng min hrilhtu min pek a vangin kan lawm hle a, U Kima nupui Kimpuii kan hruai chu a lo ṭul hle a ni tihte kan hria a. Min hre chiang lotu tan chuan ramhnuaimi/hel a min ngai a min lo hlau ṭhin pawh hi hlauh

àwm reng ka ni in ka inhre hnuhnawh a, a chhan chu; kekawrtlawn dum, mal lian hlek hluk, ke lam zuih angreng tak mai, tle deuhroh hi ka ha a, lukhum parh sen ka khum a, China ruksai hring ka pai a, chemte sei rengrawng, khawiah pawh riak ila riahbuk sual a ngaih pawh a thing leh mau duhtawk a sak theih tur khawp a chemte sei leh lian òa ka pai zuar mai bawh a. Min hre chiang lotu tan chuan chung lai ramhnuai pilril, suamhmang leh hel pawl ho tamna ramah chuan hel pawl ami emaw, suamhmang rual zinga mi emaw ka an duhhmel em a tin ni.

Putarte kawng min hrilhah chuan Lalpa'n kawng min hrilhthu min pek a vanga kan lawm thute sawi bawrh bawrh chung chuan; kawng chho ulh tak thui em em mai kan hmachhawn a ni tih pawh ngaihtuah lem lo chuan hlim tak chuan kan kal leh ta a. Engemaw chen chu chauh leh riltam sawi lovin kan kal a, kawng chu achho ulhin a thui hle mai a, kan han kal thui deuh chuan kan tuiinte a halin kan rilte a lo tam tan leh ta a. Chutih lai chuan kan vai mai chuan khaw chhunga chawhhmeh tui tak mai kân rim hi kan hre vek a, chuvang chuan khua chu kan hlat tawh lo turah kan ngai vek a. Phur takin thlen thuai inbeisei tak mai chuan kan kal zel a. Mahse, kawng chho chuan tawp zai reng a rel mawlh si lo.

Kawng phei kal kan chak tawh em em mai a. Kan chauh tawh em a vangin reilote kan kal chuan kan chawl leh òin a, kawng chu a chhoh em a vang chuan han chawlh pawh a rem lo thei em em mai a. Achang chuan kawng chho pawh chuan, “Chhoh ngaihna a hre tawh lo,” ka ti mai a, kham karah arleihlawn thingpum chawnpuar tiat vel lek, inrek ve hlek hlek te kan zawh a, a chang chuan chutiang arleihlawh pahnih indawhzawmte kan zawh chhova, vawnbân lah a awm mumal òin bawh silova, kan tamchhawh a vangin tha a lo khur tawh bawh nen, tlak palh hlauh chuan han inchhar ngaihna pawh awm lo khawp a kham chhengchhiahte chuan kan lawn chhoh a ngai òin a, ahlauhawm thei òin khawp mai. Chutiang kham kâr a kan kal lai chuan Kimpuii em chu keimahni mipate chuan kan ken sak òin a.

Chutiang kham sang tak tak a, arleihlawn te tak te te hmanhte a kan han lawn chhuak theite chu kan lawm em em òin a, Pathian hnen a

lawm thu sawi pah in, “Kham leh suar leh lengkirte pawh min hruai kaitu Isua a ni,” tih hla te chu chau leh riltam luat avanga aw lawi tham chiat chung chuan nui var var pahin kan sa thin a, kan hlim thei phian zel a.

Achang chuan Kimpuii, raipuar lehngal, chutiang a kawng kan han bopui a, kawng chhuk leh chho ulh satliah lo tak takte leh chutiang kham kârahte kan han kalpui thinthe chu nep ka inti in ka inthlahrung em em mai a; mahse Kimpuii chuan, “Hetiang a Lalpa hming a vanga hreawm kan tuar ve thei chu a lawmawm zawk a lawm,” a ti then zel a. Rinna kawngah keini mipa zawkte chuan kan tluk lo hle in ka hria.

Khua a tlai zel a, kawng chinchang hriat lohna hmunah khaw thim chuan min nang ta a, Kan tamchhawh a vangin kan thate a khur in kan mitte a thin a, tuihal dangcharin kan awm a. thui kan kal thei tawh lova, kawng chho lah chuan tawpin tai a nei bawk silo. Reilote kan kal a, kan chawl zut tawh mai a, chawlhna lah chu a rem lo em em mai bawk si. Kan chawl chiah chu Nuna leh Kimpuii chu an muhil a ni ngal zel mai bawk si a. Tlem a chawlh remna deuh kan han thleng a, Nuna leh Kimpuii chuan, “Kan kal thei tawh ngang lo, hetah hian i riak mai ang u,” an ti a.

An muhil chu a ni leh ta mai a. ‘Heta kan riah ngawt chuan zana kan lum palh mai ang, heta tang chuan kawng chho hi a thui tawh hauh lovang, ka tha neih zawng zawng sawmkhawmin ka tlan chho a nga, kawng phei ka thlen ve leh a rang thei angberin ka tlan let leh a nga, kawng phei a hnai tawh e,’ ka ti ang ka ti rilru a, ka bag ka ngat a, ka tha neih zawng zawng sawm khawmin ka tlan chho ta ngat ngat a, ka rin ang ngei chuan kan chhak lawk chu kawng phei a lo ni tawh a. A rang a rangin ka tlan thla leh a, ka thiante hnenah chuan, “Intiharh ula, i kal leh hram ang u, khi lai lawk khi kawng phei, hmun nuam tha chu a ni tawh e, hei ka han kal a, tun maiah ka rawn thlen leh hi,” ka tih chuan kan inak a kan chho leh ta a.

Kawng phei kan thlen chuan Nuna leh Kimpuii te chau tawh lutuk chuan, “Hmun a rualrem tha tawh bawk a hetah hian i riak tawh mai ang u,” an ti a. Mahse kei chuan, “Kan hma lawkah sawn kawr a

awm a, kan tuiin a halin kan dang a ro tawh bawk a, Lalpa'n saw lai kawrah sawn tui in tur min pe em em ang, i kal leh hram hram ang u," ka ti a. Kan hma lawk a kawrte lam pan chuan kan kal leh ta a. Kawrte kan va thlen chuan kan beisei ang ngei chuan Lalpa'n zotui thiang leh tui tak mai min pe a, kan duh tawkin kan in a, kan insil bawk a. Kan lo chak leh deuh in kan harh sawng sawng hian kan hria a.

Chuta tang chuan khua pawh hnai hle tawhin kan hria a, khawchhung ar khuang ri leh zaikhawm khuang ri te chu kan hre thei a, khua kan hlat tawh lova kan hriat in kan lawm hle a. Kawng aphei nuam tawh bawk a, hmalam pan chuan kal zai kan rel leh ta a. Thil mak deuh mai chu, kan kal thui hle tawh a kan hriat hnu pawh chuan kan thawm hriat chu kan hriat tirh a a hlat dan ngai rengin a la hla reng mai a ni.

Mizoram a Ramritlang khua a mite khan, "Khua in hnaih tawh a in thim a nih chuan meichher tih loh chu engmah va chhi eng reng reng suh ang che u, Rumana Army Camp atangin kalkawng thui tak a lang thei a, meichher ni lo thil dang eng an hmuh chuan Army in Santibahini (Chakma helpawl) emaw an ti ang che u nga, an rawn kâp maiang che u," an tih avangin eng chhi ngam lovin thim tham zingah chuan kan kal zel a.

Rumana khaw sedai kan han thlen chuan Nuna leh Kimpuii chuan an phur an nghat a, "Khua kan thleng thei chuang silova, engpawhnise, kan kal thei tawh ngang lo, hetah hian i riak mai ang u," an ti a. An bag lukham chuan an mu a, an muhil chu a ni leh ta mai a. Han kal luih pui chi a nih tawh loh avang chuan ka bag pai reng chung chuan eng eng emaw ngaihtuahin ka din ngaiin ka dinna hmunah chuan ka ding renga. Nakin deuhah chuan ka hmazawn di hmunah chuan ka lam pan a di hmun a rawn kal niawm tak hian thil ri sun sun mai hi ka hria a, ka chemte pâi a ka chemte fawng hum rân chung chuan ka piah di hmun a tanga keima lam pan a engemawni rawn kal ri sun sun lam chu ngun takin thim tham zingah chuan ka en rân mai a, "Min tina thei sa a nih chuan a hmui no-ah ka sat sawk a nga, a awmah ka vit nghal bawk ang," ka ti rilru a.



Ka bul a lo thleng a, ka chemte ka phawi a ka sah hma chiah in U Kima a ni tih ka hre hman a, “Eheu.... Kan va inhmu savawm hman teuh vele, savawm emaw ka ti che a, ka chemfawng char hman tep che a lawm le,” ka ti a. U Kima chuan, “Khilai lawkah khian thlam a awm a, kal kawng a riah ngawt ai chuan thlamah khian i han riak ang u,” a ti a. Nuna leh Kimpuii chu kan kaithova thlam lam pan chuan kan kal ta a. Thlam kan han thlen chuan thlam chhuat phah phelsep intel leh phêr lian tak lo inzial fel diam mai chu kan hmu a, chu phelsep tel chu phelhin kan phah a, a chungah phêr lianpui mai chu kan phah bawk a, Lalpa’n riahna thlam tha tak mai min pek a vanga lawm thu sawi a kan tawngtai zawh chuan kan chau tlang bawk a, tui takin kan mihil nghal bawrh bawrh a.

Atuk zing kan han thawh chuan ni a lo tlangsang tawh hle mai a. Kan thlang kawngah chuan Rumana khaw feh kal tawng ri nawk nawk hi kan hria a, thlam a tanga kan chhuah a khua kan han chuan chuan Rumana khua chu kan piah lawkah chuan hnai tak a lo ni tawh a. Khua pawh chu a lo lang uar mai a. Kan insiam sawk sawk a, Rumana khaw lam pan chuan kan kal leh ta a. Mi kan tawh a kan thu zawh hmasak ber chu, “Rumana khaw thlen hmain kawng cho ala awm em,” tih hi a ni. Kawng chho chu kan cho tawh lo tlang khawp mai.

Riltam leh tuiinhal takin Rumana chu ni 11 April 1990 Nilai ni zingah Lalpa’n min hruai thlenga, Pu Haukuala in zawnah kan va chhuak hlawl mai a. Chutia an kawt a kan chhuah tham tham lai chuan Pu Haukuala chu an sumhmunah a lo ding a, chutia keini min han hmuh chuan khawi lam mi nge kan nih tih leh eng ti tur a lo kal nge kan nih tihte min zawt a, min zawhnate kan chhan hnu chuan, “Engpawh ni se, kan inah lo lut phawt mai teh u,” a ti a, an inah chuan kan inzui lut diah diah a.

Bangladesh a kan rawn kal chhan leh kawng kan bo dante kan sawi chuan min khawngaih hmel hle mai a. Rei vak lo kan ti ti hnu chuan a fanu tleirawl hmeltha leh pian nalh em em mai, mitmeng mawi leh ngaihnopei bawk si hian sial sa, maipawl nen a chum leh chaw lum tui tak mai hi min rawn hlui a, keini thian zaho chu kan ril a tam tawh bawk a, chaw haitho leh sial sa nen a chaw min han hlui mai

chuh... kan lawm lutuk chu lawmthu sawi ngaihna pawh kan hre lo a ni ber e. Chaw ei minrawn saktu thingtlang tleirawl hmeltha pian nalh leh mitmeng mawi tak mai chu amizia kan la hre lo na in kan mit erawh a la tlang hle a ni.

Chu tleirawl hmeltha-i hming chu Rialkimi a ni a, ‘Kimte’ tiin kan ko a, kan chaw ei pah chuan Kimtei chu kan fiam pah a, chutia kan han fiamte chuan zah hmel deuh hian a nui seih ringawt a, anui mawi em em leh nghal a, a nuih lai a ahmui sen hiam kâra a ha vâh thah mai leh ahauingho lo lang zum van maite, abiang sum khuar kalh maite chuan ahmel a ti tha lehzual emawni tih mai tur hian an mawi em em vek mai a. Han en mai pawh hian a la naupangin a thinlung pawh ala thianghlim hle ang tih a rin mai theih a.

Kan chaw ei kham hnute pawh chuan kan la fiam zui zela. kan thian Nuna phei chu fiamthu a duhin fiamthu a thiam bawh a, puar leh fanin chaw kan ei tawh bawh nen, lawmthu sawi pahin a fiam bawrh bawrh a. Chutia kan fiam bawrh bawrh avang chuan a ni pawh chuan min ngam sawtin min nel ve hle nghe nghe a. Kan inbualnahte chuan tuikhur kawng min hrilh pahin arawn kal ve a, ka thawmhnawte chu min suk saka, chutia kan inbual zawh chuan a pa te nen chuan kan ti ti leh ta zawh a.

Rumana khua leh Sunsawng khua inkarah Bangladesh Army camp a awm a, keini chu Army camp-ah chuan in report a ngai a. Tawng min lehlin saktu atan Rumana khaw tlangval fel tak mai Vanrimawia hruai in Army camp-ah chuan kan han kal a. Army hotupa chuan kanrawn kal chhante min zawt a, keini chuan engmah zep nei miah lovin kan unau Mire ho zinga chanchintha hril tura lo kal kan nih ziate, kan awm thei a nih chuan Bangladesh ah awm hlen mai pawh kan tum thute kan sawi a. Army hotupa chuan, “Aw le, a tha e, kan ramah hian in awm reng a nga, kan hriat lohvin in haw tur a nilo vang; mahse, naktukah lo kal leh ang che u, hmunpui lam a kan hotute pawh ka lo be ve anga, hotute min chhan dan chu ka hrilh dawn che u nia,” a ti a. Army camp a tang chuan kan haw thla leh ta a. Ami chhan dan chu lawm tur nge lawm loh tur tih pawh kan hre thiam lova, ngaih erawh a tha thei zan lo a ni.

Atuk a kan va kal leh chuan kan hlauhthawn ruk ang ngei-in an hotupa chuan, “Hmunpui lam a kan hotu te’n in awm an remti lova, vawin ngei a haw tir leh nghal tur che u in min hrilh a ni. Vawinah hian in ram lamah in haw leh ngei tur a ni,” ati ta mauh mai a. Keini chuan, “Naktuk tukleh mai hi keini Kristiante ni pawimawh Good Friday a ni a, hemi kan hunpui chhung chauh tal chu min awm tir la, kan hunpui zawhah kan haw dawn nia,” kan ti a. A ni lah chuan, hriatthiamna nei miah lo hian, “Vawinah in haw ngei tur a ni, in haw lo a nih chuan ka sipaite ka rawn tir a nga ka man tir ang che u, enthlatu angin ka man che u a nih chuan in tan a pawi thui viau ang, ka thu awih mai rawh u,” a ti bur mai a. Atihngaihna dang awm tawh hek lo, Camp aṭang chuan lunghnur deuhin Rumana kaw lam pan chuan kan haw thla leh hnà hnà a.

Kan haw kawngah chuan Nuna leh U Kima thinrim lungpuam chuan, “Mai mai a, kan haw lovang, duhle min man sela, Jeil-ah kan tâng a nga, vai ṭawngte kan thiam phah zawk a nga a ni mai alawm,” an ti a. Kei chuan, “Chutiang a ni ngawt lo, Pathian thu chuan, ‘Fing tak a awm tir che in i kawng ka kawhbmuh zel ang che,’ (Sam 32:8,9) min ti a sin. Miriate hnen a chanchinṭha hril tur chuan kawng min la kawhbmuh in min la hruai em em ang. Ar talh dan pawh chi khat chauh a awm hlei nem. Sipaiin min manin kum 2/3 tâng ta ila vai ṭawng chu kan thiam a ni mahna, kan hriselnate a ṭha lo a nga, mi ram a chanchinṭha hril tur awm lo lēkin kan da vek mai tur asin,” tiin ka beng dai thei hram a, lungawi lo zet chuan Rumana chu kan thleng a.

Rumana khua a kan thlenna ah chuan thil awm dan chu kan han sawi a, pawi kan ti tlang hle mai a, haw mai loh chu engmah tihtheih kan nei tawh si lo. Kan tleirawl hmelṭha-i pawh chuan kan haw leh a ngai dawn a ni tih a hriat chuan ahmel a ṭang chuan kan haw ai chuan kan awm chu a lo duh ve hle a ni tih a lang chhuak nghal mai a, a hlim hmel reng reng hmuḥ tur a awm ta lo. Vei nei niawm tak hian a en ngai en in a ṭhu ngui bâm reng mai a.

Haw tura kan han insiam chuan a thlalak neih ang angte chu a rawn phawrh a, ka duh ber thlang turin min ti a, kei chuan, a thlalak zawng

zawng zinga a fuh lehzuana ni a ka hriat; kawrfual pawl hà a leihkapui a a sana bun chu a lang lo palh ang tih hlau niawm taka avei lam sir zawng deuh a a lanna chu ka thlang a. Ka bag chhungah uluk takin ka dah nghal a. Ka thianpa Nuna chuan a thlalak pakhat chu a han dil ve a, a ni tleirawl lungmawl tih takah; a lo phal ta awzawng lo mai a.

Kanrawn kal lama kawng kan bo ang khan kawng kan bo leh palh ang tih kan hlauh avangin kanrawn kal lama kawng kan bona kawng peng thleng map kan ziah tir a, chawfun lian taw keng theuhin kan in ak chhuak leh ta tham tham a. Rumana-ah chuan Vathuampui a kan hmelhriat Laithankhuma pawh a lo awm a. Kan haw tur chu Laithankhuma te, Miria, Pu Lawmsanga lehkha lo thawntu Pu Singchowng leh Mire tlangval pakhat leh kan thian thar Tv Vanrimawia leh tleirawl hmeltha Kimtei te'n kawtchhuah thlengin minrawn thlah a.

Kimtei chuan kawtchhuah thlengin ka Bible bag min ah sak a, ka bag chhungah chuan zoartui pum hnih hi a lo dah a. Thui fu min thlah hnu chuan kan inthen lo thei tasi lova. Kan han inthen dawn chuan Kimtei chuan a kut no leh nem tak mai chuan ka kut chu arawn vuan a, ka kut chu a hmer vawng vawng mai a.rawn dâk chhuak ngam loin a kun reng mai a, engmah sawi lo chuan a ngawi vang vang mai a, kei pawh chuan a tihngaihna tak ka hre mai bik lova, ngaihtuah erawh a thui duh kher mai. Chutia kan din ngawih reng hnu chuan, “Kimte, mi chah duh i neih chuan i duh a piang min chah rawh,” tih pah a ahmel ka han en chuan, a mit chu a lo sen ram mai a, a mit meng mawi tak atang chuan mittui a lo luang chhuak ngiai ngiai chu ka zu hmu thei a.

Chutia ngawi renga ka kut hmer vawng vawng chung a engemawchen a din hnu chuan a kut khinghnih a ka kut vuan chung chuan minrawn thlek chho hà pahin, zah hmel tak hian, “Kei chuan ka theihngihl leh tawh ngai dawn lo che a, nang paw'n min hre reng dawn nia aw,” zawi sapa ti chung chuan amittui a hru fap fap a.

Chu thingtlang tleirawl zakzum tak mai in rei lote kan inhmuh chhunga heti taka ka zun phur a hmangaihna zunzam a alo uai hman

leh midang zinga mualpho pawh dawn zo lova mittui kâra ðah aw ðiauva chu tiang thu a han chham chhuak ta mai chu a mak ka ti in ka khawngaih êm êm mai a. Lalpa'n a rawng ka bawlpui tur min pek nge hmelm pa setana tawktarh a nih pawh ka hre thiam lova. Aeng a pawh chu nise chu tleirawl lunghnur tak mai hnem chu ka mawh a ni tih erawh ka hai lo.

Akut chu nghet tak a hum pahin ka kut lehlam chuan a sam ngil siau mai chu chul heuh heuh pahin, “Kimte, ka theihnghilh ngai reng reng lovang che, lungngai matache, ka rawn kal leh thuai dawn alawm,” ti in ka han hnem a. Nghet tak a han kuah vawng vawng tak ka nâp a, ka ðhiantle leh min rawn thlahtute ho pawh chuan a tihngaihna tak hre bik hek suh, mak ti takin min lo uipui tuilian thlir doh doh ringawt mai a. khuavang kal lai an sawi ang mai a kan ngawih vang vang hnu chuan ka kut a vawn lai chu thlah ðial ðial pah chuan, “Min theihnghilh suh aw, min hre reng dawn nia aw,” ati leh hram a. Kei chuan, “Kimte, ka theihnghilh lovangche ka tih tawh kha, Lalpa'n rem a tih chuan ka rawn kal leh thuai ang,” ka ti a. Hreawm ti tak chung chuan kan inthlah liam thei ta hram a.

Kan ðhian zaho chuan kal pahin kha tia tleirawl zakzum rual lekin reilote chhunga hmangaihna zuna a lo uai mai kha mak ti in kan ti ti zui nak nak a. Lalpa'n a rammi arawng ka bawlpui tur min pek nge ni anga hmelm pa setana thang kam nge ni zawk ang, tihte kan ngaihtuah a. Lalpa'n a rawng ka bawlpui tura ka nupui a tan min pek a nih chuan engmi pawh ni se, neih mai ka hnial lova, mahse ka nupui atan a Lalpa min pek a nih loh chuan neih pawh tum ila ka nei thei dawn chuang lo tih pawh ka ring a. “Lalpa chhiahhlawh ka ni a, a remruatah chuan ka lawm zel ang,” ka ti a. Kan ðhian Nuna chu fiamthu a thiam in fiamthu a duh bawh a, min fiam bawrh bawrh a, “Nang chu i ngaihtuahawm tawh love, kei ni pawh nangma zarah Bangladesh-ah kan awm ve thei mahna,” ti te in min fiam zui bawrh bawrh a.

Thu dang dangte sawi in Mizoram lam panin kan kal zel a, tatpawng lui chu hmate ah kan zu thleng thla a. Tatpawng lui chu daikai in kal lam a kan bo ðan-na kawngpeng chu kan han thleng leh a, kan kawng

hriat chin a nih tawh a vangin kan thla a muang hle tawh a. Kan kal lam a kan luite dung rawn zawh thlak bawk chu kan zawh chho leh a, kal lam a luite peng awm a kan hriat loh chu kan haw lam chuan luite peng chu kan hmu ta tlat mai a. Chu luite chu a inang em em mai lehngal a, akhawi zawk nge kal lam a kan rawn zawhthlak zawk tih pawh kan hre thei ta der lo leh tlat pek a, nakinah chuan luite dinglam peng zawk chuan ramri tlang chu kawk zawk a kan hriat avangin ‘bo theihna awm zawng zawngah hian khawnghe inhan bo vek law law teh ang’ ti ni awm hrim in, kawng dik zawk chu pen sanin luite dik lo zawk chu kan zah chho leh ta char char mai a, chu luite chu kan zawh thui tulh tulh a, kal lam a kan luite zawh kha ang lo kan ti tulh tulh mai a, thui tak kan kal tawh hnu chuan kan kalna luite chu a dik lo zawk a ni tih kan hre chhuak a.

Min mawlhthu a awm nge kan nikhua lo ve hrim hrim zawk? Puh tur ber pawh kan hre thiam lova, han kir leh chu kan peih tawh bawk si lova, “Kan bo a, kan bo ta sa sa, kan kal hla tawh lutuk, kir tawh lovang, kir leh ka peih tawh lo, he luite aṭang hian Lalpa’n kawng dikah min hruai mai rawh se, kan hriatna hmang tawh lovin Pathian min hruaina chauh ringin kan kal tawh zawk ang,” ka ti a. Luite dik lo zawkah kan kal a ni tih hrerawng chungin chu luite chu kan zawh chho ta zel a. Khua alo tlaian chu kan bona luite-ah chuan khua in min thim hnan leh dawn a ni tih hria in riahna tur thlâm ram melhin kan ring kan fân a, nakinah chuan kan chhak hla feah chuan thlâm chu kan han hmu leh ta mial a.

Chu thlâm pan chuan kum hnih thlawhbua awih tak mai lehngal chu kan tawn chho a, kan chhohna lamah keimahni pawh kan inbo lo chauh a ni. Kan in au chul nghe nghe a, a tawpah chuan thlâm chu kan han thleng hram a. Chu thlâm chu a lo la ṭha phian mai lehngal a, a chhawng deuhreuh hi a ni a, Kum hnih rauh san tawh thlamah hian a neitu te’n kan riah huna kan phah atan a an dah niawm takin thlam chhuat sir lamah pher lianpui mai hi ṭha tak a tel diam in a lo awm bawk a. (Bawm thlam chu achhuat an siam dan chu mau pum chungah phelsep an phah a, chumi chungah pher an phah a, pher chu lo thlai an seng khawm zawh vek hnuah inah an hawn leh ṭhin) Chu pher chu kan han kai pharh a, pher chungah chuan ṭhu in kan han

inen vel a, vangvat kan lo kai nual mai a. Thlam kawt a buhpawl la awm te chu kan hal hluah bawk a. Kan chawfunte chu thetin engtia rei nge kan la bo zel dawn kan hriat loh a vangin tàmnhnen chauhin kan ei a, kan fun tha leh a.

Kan mut hma chuan thlâm chhung sir velah chuan eng engemaw seh phung laka invenna a kan ken agarbati chu kan hal a, riahna tur thlâm tha tak min pek avang leh naktukah pawh chu luite tho chu kan zawh chho leh dawn a, mahse kawng dik min hruai thleng ngei turin kan tawngtai in Lalpa kutah kan innghat a, tui takin kan muhil ta bawrh bawrh a. A tuk zing kan han harh chuan ni chu a lo sang hle tawh a.

Tawngtai a Lalpa kut a kan inkawl tir leh hnu chuan luite lam pan chuan kan chhuk leh ta a. Kan luite zawh mek bawk chu kawng diklo a ni tih hre reng chungin Lalpa'n chu luite a tang chuan kawng dikah min hruai tawh mai tura kan tih a vangin ngaihthat lohna nei chuang lo chuan kawng dik zawhin kan zawh hmiah hmiah mai a. Nakinah chuan kan luite zawh chu a tawp ta daih mai a. Kan han hawi vel a, kan veilamah chuan sa kawng tum bel deuh mai hi a lo awma chu chuan kawng dik min hruai thlen ngei ringin chu sa kawngtum chu kan zawh ta ngawt mai a. Chu sakawng chuan kal lam a kan luite zawh ngei mai chu hnim pik tawn ngai miah lovin min hruai thleng ta ngei a, kan lawm dan chu sawiin a siak lo.

Reilote kan han kal leh chuan kan kal lam a thlam ram kan hmuh kha kan thleng a, thlam chung a bepui rah teuh maite chu lovin mau chawngin kan chhum a, bona tur a awm tawh lo bawk a, kan chaw fun chu kan ei zo ta vek a, Mizoram lam pan chuan phur takin kan kal leh ta a. Kawng kan bo a talangin Rumana tleirawl hmeltha-i pawn ka thinlungah hmun a luah hman lova. Luite dik zawk zawh leh tura kan kir peih tawh loh a vangin kawng diklo zawk kan zawh a, mahse ngenngawl taka Lalpa hnen a kawng dika min hruai tura kan tih a vangin Lalpa'n ramsa kawng tum hmangin kawng dikah min hruai thlen leh dante mak ti a sawi hovin Mizoram lam pan chuan kan kal zel a.

Kan kal lam a Santibahini Camp kha kan va thleng leh a, India pawisa Bangla a kan thleng pawh kan la hmang then lo bawk a, Bangla chu India pawisa (Rupis) a thleng let leh kan han tum a, Santibahini ho chuan, “India pawisa kawl kan nei tawh miah lo, kan hotu te’n Tlabungah an keng vek,” an lo ti a. Kan tihngaihna hre lo chu kan Tuikuk chem bo din reng ta ringawt mai a. India pawisa cheng khat pawh kawl kan nei tawh bawk si lova, kan in en hrak hrak ringawt mai a. Kan rilru a buai tlang ani tih kan mit mengah chuan a hriat theih mai a. Atihdan awm chhun chu Tlabunga va kal a, Santibahini Camp va zawn a, an hotute hnen a va thleng leh chu a ni tawh mai si a. Tlabunga va kal tur chuan sum tam tak seng a hlate khua a va kal a ngai bawk si a. Beiseina beitham zet nen chuan a khaw awmna leh akhaw hming inrem lo tak, lui kawr a Ramritlang khaw awm pan chuan phur lo zet in kan inzui chhuak leh ta hnak hnak a.

Lalpa hruaina in tlai lamah Ramritlang khua chu kan zu thleng a. Ramritlang ho chuan Good Friday ruai an lo theh zo chiah hi a lo ni a. An kût sa pawh chu anmahni pawhin an khawp kham chiah lo ni ngei tur a ni. Akuang bang han zut tur takngial pawh a lo awm tawh lova. Thlahual hial tlak kan nih vei teh lul nen. Kan kût sa lo hawi ta mai mai a. Thingpui senhang erawh chu kan hlawh ve hram a. An thingpui no lah chu dangpuithu rim a nam em a vang chuan ka chhawlhal tehlul nen, thingpui pawh chu in thei lovin ka leihbuak a ngai leh bawk si.

Kût sa an eizawh tawh thu leh an ruai kan nang lo chu pawl an tih thute an lo sawi tliar tliar a, “Apawi love,” chu kan ti hming tha ve na in kan thinlung tak chuan, an kût sa chu dul hmul khat phuar a han inhnawh puar ve chu a chakawm khawp mai. Kal lam leh haw lama kan kawng bo dante leh Bangladesh Army in kan awm phal lova min haw tir leh dante, kan India pawisa kan thleng let leh theih loh dante kan han sawi chuan min khawngaih ziate an sawi tliar tliar a, min khawngaih ve hle a kan hriat a vangin min thlahualna nipah fawmin kût chawhmeh atan arte pakhat tal chu min khawn thluk sak ve chu kan ring deuhva, mahse chu lam reng reng chu a thawmvang



pawh hriat tur a awm lova, keini lah chuan kan ngen ngawt ngam bawk si lo.

Ramritlang khua-ah chuan zan khat kan riak a, a tukah chuan phur lo deuh in mite min lo ngaih dan tur, “Kha maw, ka tih reng kha/ka ring reng a,” min lo tih tur hre reng chungin kan Mission Head Quarter Hnahthial lam pan chuan kan kir leh ta tham tham a. Kan thian Nuna chu Tlabung lamah Santibahini hote hnen a kan pawisa chu va thleng let leh turin a zu kal a, a rawn hlawhtling lem hlei lova.

Hnahthial-ah chuan 2 April 1990 Zirtawp ni chuan kan han thleng leh tham tham a, kan hmai a uang lo kher mai. Kan hma a AFC Mission Board in a lo tirhte ai chuan kan lut thuk deuh zawk na in anmahni ang bawkin kan rawn lang chhuak rang ve leh hle tho va. Santibahini kutah kan sum neih zawng zawng a tang zo vek bawk.

Mithen khat chuan, “Pathian in Mire ram a luh hi rem a la ti lo ani ang, luh luih chu tum duh ting lo mai rawh u,” te min ti a. Kan hotute lungawi lo hmel leh an beidawng hmel han hmuhte chu a nuam lo thei thin khawp mai. Mithen khat chuan, “Hetiang a Missionary puitling ni mang si lova mahni thahnemngaihna a Missionary a kal/intirh hi chu a tha lovin a tlo lo reng a ni, inti buai duh ting lo mai rawh u,” te min tih bakah, kan hotute pawh a beidawng zawngin an lo sawipui thin a, a zahthlakin a nuam lo duh khawp mai.

Mahse, Abrahama a pa in leh ram leh a laichinte hnen a tanga ko chhuaktu Lalpa Jehova ngei kha kei paw ka nu leh pa, ka ram leh ka laichinte hnen a tanga Mire ram a kal tura min ko chhuaktu a ni tih ka hre chianga, engtik hunah emaw chuan min ko chhuaktu chuan Mire ram chu min la hruai thleng dawn a ni tih ka ring tlat a ni. Lei Kohhran leh Mission-in ropui takin min tir chhuak lo mahse, Kohhran leh Mossion neitu **VAN MISSION** tirh ka ni tih ka inhre Chiang a. Lalpa’n Mire ram a a rawngbawl turin min la hruai lut ngei ang tih ka ring tlat a, ka beidawng lovin ka zak bawk hek lo.

Kan AFC Mission Board chu kan Kohhran Upa Biakmawia Hmar te inah an Missionary te kal zel dantur ngaihtuahin an thu khawma, keini pawh kan tel ve a. Thenkhat chu an beidawng viau tawh na in Mire ram a lut tura la beih zel chu tha an ti tlang a. Chutia kan hotute

an thut khawm lai chuan kan thianpa Nuna chuan min han kâp zauh pahin, Rumana tleirawl thlalak ka kaw! thute a sawi a, chutah kan hotute chuan, “Chu, nang chu a rammi nupui a neih tur i hmu der tawh a ni maw? Khawng e thlalak chu va la teh, kan lo en ve teh ang,” an ti a, ka zak ve angreng viau na in Nuna’n a lo sawi tawh si avangin; kan in a hla vak lo baw! a, Kimtei thlalak chu ka va la a, kan hotute chuan an inen chhawk lai! lai! a. Hmeltha an tih thu leh Mire ram a luh theihna a nih dawn chuan ka neih mai an paw! tih loh thu an sawi bawrh bawrh a. Chu chuan an beidawng pawh beiseina thar a neih tir leh deuh ni in ka hria.

Hnahthial-ah chuan hun engemaw chen kan cham a, kan zin kawng a kan hah em avangin Hnahthial a kan cham chung hian kan hriselna a tha lo hle mai a, kan chawlh hahdam a, kan hriselnate pawh a lo that leh tak deuh hnu chuan 26 April 1990 Ninga zanah kan inah AFC Mission Board chuan Mire ram a kal leh turin min thlahna an nei leh a, fuihna thu tha tak takte an sawi a, atuk 27 April 1990 Zirtawp ni chuan kan kalna kawng ngai atang baw! chuan Mire ram lam pan chuan kan kal leh ta a.

Kei chu Lunglei Hrangchalkawn atang a Lawngtlai thleng zakin ka khua a sik leh a, Lawngtlaiah ka Pu Hrang (ka Nu nuta) te in ah ni sarih ka cham a. Lawngtlai damdawi inahte ka kal thin a, mahse ka khawsik chuan zia lam a pan theih chuan siloh a vangin ka thiante hnenah chuan, “Nangni chu lo va kal ula Vathuampuih min lo nghak mai rawh u, kei chu Hnahthial lamah ka va haw leh rih pawt mai a nge, Lawngtlai hi a lum si a, ka khawsik hian zia lam a pan thei chuang si lo,” ka ti a. Nuna leh U Kima chuan Vathuampui lam chu an pan a, kei chu Hnahthial-ah ka haw chho leh ta rih a.

Hnahthial-ah chuan hun engemawchen natna khumah hun ka hman leh rih a, chutih lai a ka chungte leh ka thenrual tha minrawn kantu a piang te’n Mire ram a kal tum tawh lo turin min thlem reng a, vawikhat phei chu ka khum bulah mangan hmel deuh hian ka Pa hi a vei a vei mai a, kei chuan ka natna khum atang chuan ka Pa mangan hmel taka a vei a vei chu ka lo thlir reng a, nakinah chuan ka Pa chu ka kiangah a lo kal hnai a, “Mire ram a kal chu i la rilruk reng a mi?” ti in minrawn zawt a. Kei chuan, “Ka Pa, Bangladesh Mire ramah

hian Lalpa'n a rawngbawl turin min ko a ni tih ka hre chiang a, eng hunah emaw chuan min la hruai thleng ngei ngei ang, Mire rama ka awm hunah harsatna tam tak tawrh tur a awm dawn a ni ang, chung harsatna tuar chhuak thei tur chuan Lalpa'n min buatsaihna a la zo lo a ni ang, a nih loh vek leh setana hian Mire ram a kal hi a phal lo viau pawh a ni mahna," ka ti a. Ka Pa chuan min be leh tawh lo chuan min chhuahsan ta daih a.

Ka khawsik chuan zia lam a pan ve hret hret zela, ka that deuh a ka han len chhuah vete chuan mi tu mai pawh hian Mire ram a kal tum tawh lo turin min ti vek mai a, Kohhran a rawngbawltu then khat, Mire ram a kal tum hram tura min fuih tura ka ngaih zinga pakhat pheih chuan fiam thu titak hian, "Keini pawh hetiang a Missionary nih te chu kan peih ve theuh ang chu," min han tih khum chuan han chhan mai ka châk viau na in ngawih mai chu tha zawk a ka hriat a vangin za lo deuhin ka nui ve ringawt a.

Ni 21 May 1990 thawhleh ni chuan Mire ram lam pan tur chuan ka in ak chhuak leh ta a. "Lalpa'n engtinngae min hruai zel ang aw," ti in ka inngaihtuah neuh neuh reng bawk a. Lunglei atang chuan ka rin loh leh beisei loh deuh maiin, Lunglei nula, tunhma atang ama hriat loh a ka lo ngaihzawn ruk tawh chu Lawngtlai a kal tum vein ka chuan-na Bus-ah chuan alo chuang ve a, ka bulah chiaah a rawn thu lehngal a. A ni hi kan khaw chhuak a ni a, kan naupan lai chuan a u chiaah nen hian kan inkawm ngeih em em mai a, a ni hi kan naupan lai, khaw khata kan awm lai atang a aruk a ka lo ngaihzawn em em thin kha a ni a. Lunglei a an pem thlak dawn a kawrfual par, fual hnalh mai ha a Thingsai lam kawtchhuah a aliam tur ui ngawih ngawih a ka thlir liam vawng vawng laite kha amah ka han hmuh leh chuan ka mitthlaah nimin lawka thil thleng ang mai hian a rawn lang chuai chuai mai a.

A lo puitlin ve tak hnu hian a pa a chhun a zai lamah a tui hle a, a lawina Kohhranah chuan zaipawlah te telin mal zaite pawh in a phak tawkin Lalpa rawng a bawl ve thin a. Missionary a kal ve te a rilruk a vangin Serkawn a MTI ah pawh kum khat lai chu a Treining tawh nghe nghe a. Mire ram a Missionary a kal ve a châk a vangin AFC Mission Board ah pawh Mire ram a kal dilna a pe ve hial nghe nghe

a, (kan intawn tawh hnuin) mahse an Missionary tih laite pawh kan la loh theih loh a vangin adilna chu an hnaw! sak ta rih kha a ni a.

Kan pahnih a Lawngtlai lam pan a insi rial a kan han kal chuan sawi tur kan ngah dun khawp mai. Mire ram a kal kan tum dante, Lalpa'n min hruai tawh dante min zawt a, chutiang vel sawi chuan kan ti ti dun bawrh bawrh a, nidanga Lawngtlai hla ka tih theih thin tehlu nen, hemi ni zet hi chuan engtik lai in nge Lawngtlai kan lo thlen hman pawh ka hre lo. A ni chuan a pa tingtang siam; mi lei sa, a leitu te pe turin Lawngtlai-ah zan khat riak chauhva kal alo ni a. Lawngtlai kan han thleng chu Bus a tanga kan chhukna hmun a lo inang a, kan thlenna tur ve ve kan han pan chuan kan thlenna pawh chu a lo inang lehzel mai a, thil engkim mai chu inthurual sa thlap a lo ruahman lawksa hi kan ang em em zawk a, keini pawh chuan mak kan ti dun hle a ni.

Kan thlen tuk chuan a ni pawh haw leh mai tur a nih lai leh kei pawh Vathuampui lam pan nghal mai tur ka nih lai in, a tua mah mah chuan chhuah zai reng kan rel thei ta tlat lo mai a, “Ka hrilh tur ka hrilh hma leh ka hriat duh ka hriat hma chu ka haw dawn lo,” ti niawm hrim in thupui hlapui em em sawi mang silo chuan ni hnih ni thum chhung chu kan inchei a, bengvar awm fahran in chhungkhatte kan kan kual thin a, achang leh tlawmngai awm takin ka Pu Hrangate in bula hmeithai pitar tuite kan chawi sak thin bawk a, Lawngtlai chu nidang zawng aiin a nuam ta emaw tih mai turin kan hlim dun em em mai a.

Bangladesh Chittagong Hill Tract Mire ram a Lalpa rawng bawl a awm kan tumna hmun chu Chakma hel ho Santibahini a vangin rambuai a ni si a, tlangval Bangla thiam lo tan chuan va awm ngawtna kawng a kaw lo em em mai a, rinhlelh thua jail bang zut mai chu thil har lo tak a ni tih chu ka hre chiang em em a. Chuvangin Bangladesh Mire ram a ka rawngbawlpui theih tur, Missionary rilru pu mi ka hmuh chuan nupuia neih a, nupa a kal chu thil remchang awmchhun ni in ka hria a.

Tuntum a a ni nen a kan intawn dante leh a ni pawh in engemaw tak beisei a nei a, chu a beisei chu a hmuh hma loh chu haw atum bik lo

a ni tih te a awmdan a t̃angin ka hrethiam ruau hiah ka hria a, bâkah; a ni chu tehna hrang hranga ka teh pawhin a ni bâk a duhaisam tling zo reng an awm hian ka ring thei lova. A ni hi Lalpa'n a rawng ka bawlpui tura ka kawppui a tan min pek a nih ka ring nghet bur mai bawk a, ani chu ka mi hriat chian a ni in a ni pawhin kan chhungkaw dinhmun nen lam min hre chiangtu a ni bawk a. Anuamah pawh a hreawmah pawh Lalpa rawng ka bawl̃na a min t̃anpui renga ka kumtluang nuthai chang turin a duh dawn leh duh dawn loh zawh chawt mai chu ka rilruk ta a.

Tuk dang ang bawkin chhung leh khatte k̃an kual turin inchei takin kan inzui chhuak leh ta a, ka thil zawh duh chu hlauthawng angreng tak si hian ka han zawt ta rawih a, ani chuan ka beisei aia t̃ha leh hawihhawm in min lo chhang a, “Kei chuan dam chhung a nang nen a Lalpa rawngbawl chu ka duhtusam a lawm. I kinga awm hi nuam ka ti a sin; mahse, nu leh pa thu a awm ka ni a, ka nu leh pa te rawn be ve phawt la,” a ti a. Min chhan dan chuan ka rilru a ti lawm takmeuh a ni. Ka nupui atan a Lalpa min pek ngei a nih ka ring nghet tulh tulh mai a.

A nu leh pa pawh hi Lalpa rawngbawltute ngaihsak leh ngaisangmi an ni bawk a, thil chu fel duak mai in ka ring a, Mire ram a Lalpa rawng bawl tur chuan hreawm tam tak tuar a ngaih tur ziate, a hreawm thei ang ber a ka sawi pawh in, “Chungte chu mipa in in inhuam phawt chuan hmeichhia chu in hnung zuitur kan ni a, i bul a ka awm chhung chuan Lalpa'n min pui anga ka tuar thei em em ang, min ngaihtuah reng reng suh,” atih te chu ka bengah ala chang reng mai.

Lalpa'n arawng ka bawlpui tur, “Naupang ngaihzawng neih” kan tih ang hun lai a t̃anga ka ngaihzawng leh kan lo puitlin tak hnu a kan intawn leh a ka duhaisam la ni ta fo mai chu nuthai atan min pe ngei dawn a ka hriat avangin ka thinlung chu lawmna sawihleihtheih loh hian a khat a ni ber mai. Lalpa hnenah pawh lawmthu vawi duai lo ka sawi nghe nghe a ni.

Kan sawi duhte kan sawi a, kan hriat duhte kan hriat tawh hnu chuan kan hmun lama haw zai kan rel ve thei ta a, kan haw tum ni ainang

lehpek a, ka Pu Hrangate chuan, “A tu emaw zawk zawk chu naktukah haw mai rawh u, ‘in pakhat a tanga tuk khat a chhim leh hmar zawnga inthen aṭha ngai lo,’ upa in an duh lo asin,” an ti a. Mahse atu a mah mah chu nikhat pawh cham hnufual bik nih chu a lunglen thlak dan tur kan hriat sa a nih a vangin kan duh lo vè vé a. Kei chuan, “Chungte chu hmanlai thil a lawm, ringtu tan hlauh tur a awm love,” ka ti a. A ni chu Lunglei-ah a haw a, kei chu Vaṭhuampaia kal turin Bungtlang ‘S’ MST Bus ah ka chuang ve ta a.

Chumi ni chuang Mizoram chhim tawp lam panin lungleng rilru angreng tak chuan Bus ah ka chuanga. Bungtlang ‘S’ chu tluang takin kan thleng a. Bungtlang ‘S’ aṭang chuan ṭhian ṭhenkhatte nen Vaṭhuampui lam panin ke in kan kal a. Vaṭhuampui pawh chu Lalpa hruaina in tlai zanriah chum hun velah tluang takin kan thleng leh a.

Hemi ni hian Lawngtlai a tanga Bungtlang ‘S’ lam pan a kan kal laiin Bungtlang ‘S’ thlen hma deuh in kan chuan-na Bus chuan kal kawngah rul a chil thawi a, Driver chuan rul chu la thi lo deuh a a hriat avangin ava chil nawn leh kher a. Chu kan chuan na Bus chu Bungtlang ‘S’ a tanga a haw lam chu kal lama a rul chilna hmunah tak mai chuan achesual palh ta hlauh mai a. A chetsualna hmunah chuan mi 17 lai an thi nghal a, mi 35 lai an hliah baw. A vanduai thlak in a rapthlak hle mai. He vanduaia rapthlak tak mai hi Vaṭhuampui a tanging kan lo hria a. Ram mipuiin kan tuarin kan thin a ṭhawng takzet a ni. Ahnu a ka lung ‘d’ nen a kan intawn leh chuan ka Pu Hrangate in a tanga tuk khat a chhim leh hmar zawnga kan inthen ni a nih a vangin vanduaiaah ka tel ve an rin a vanga an lo mangan zia ka kut nghet taka vuan chungin min hrih mial mial te kha ka mitthla-ah a la cham reng mai.

Hemi kum hian Mizoramah thil thleng lian tham tak tak a tam hle a, keima tan pawh kum hriat reng tlak a ni. Chungte chu henge hi a ni:

1. Missionary a ka kal kum a ni.
2. Mizoram Baptist Kohhran hruiatu hlun, Baptist Book Room Tresurer nilai Pu, R.T.Bawia thih kum a ni.
3. Mizoram Baptist Kohhran General Secretary nilai Pu Hrangena thih kum a ni.

4. Mizoram mi hmingthang, Mithianghlim Chawngkhupa thih kum a ni.
5. Mizo hnam Pa Pu Laldenga thih kum a ni.
6. Mizoram a El-Bethel lo lar kum a ni.
7. Bungtlang ‘S’ khaw bul a M.S.T. Bus Accident a mi tam tak thih kum a ni.

Hemi kum hian Mizoramin miropui kan ch  n tam hle mai a. Mi tam tak tan vanduinah kum a nih laiin thenkhatte tan vethung erawh chuan kum that kum, kum chhinchhiah tlak a ni ngei ang. Kei a tan pawh he kum hi hmangaih a vanga min tlantu ka Lal Isua tana ka damchhunga khawvel a hna tha ber leh ropui ber leh ka hna ngaihsan ber; lei leh van LAL BER hna, Missionary hna thawk ve tura Lalpa min kohchhuah kum a ni.

V  thuam  puih chuan ka thiante nen kan cham a, thiante hriatpui lem si loh hian ka lung hi a leng thei   m   m mai a, ka rilru in hmalam beiseina kaw  l eng   n uau hian ka hria a, ka chhailai ‘d’ nen a midang lo hriat ve loh pawh paw  i ti lem lova zawi sap a kan ti ti sap sap laite kha ka ngaihtuah chhuak leh a. “Kar hla-ah leng mah ila   awng  aina in Lal hmaah i leng dun   hin ang aw,” ti a kan inchah laite kha ka bengah a cham rengin ka mitthlaah a rawn lang leh uai uai   hin a. Amah mihlim tih dan takin, ka thinlungah hla a lo langa, pen leh lehkhapuan ka la a, hetiang hian ka zia  k zung zung a, athluk pawh keima siam siam chuan ka siam ve a. Hetiang in:

### **Kar hlaah leng mah ila**

1. He khawvel lungngaih buaina k  rah,  
Then nan kaw  l a lo her leh   hin;  
Mahse, Lal hnenah engkim thlen ila,  
Hlim takin kan la leng dun leh ngei ang.  
  
K  r hla-ah leng rih mah ila,  
  awng  aina in Lal hmaah i leng dun ang.
2. Khawi hmunah pawh a  m in cheng ila,  
Lalpa tan a rinawm zel in;  
  awng  aina nen hma lam i pan zel ang,  
Lalpa ram kan la thlen hma loh hi zawng.

3. Ṭawngṭaina chhangtu Lalpa hnenah,  
A rawng chauh ka bawl zel theih nan;  
Min lo ṭawngṭai sak ṭhin ang che aw,  
Kei pawh i tan Lal hmaah ka kun ṭhin.

Achang nihna hi, kan pahnih a kan awm dun laiin hun rei tak inhmu lovin hmun hranah awm daih mah ila ka tan a lo rinawm tlat turin ka chah mawlh mawlh lai kha ka hre chhuak a, ka ti dik lo riauin ka hria a, khawi hmunah pawh awm ila Lalpa tan kan rinawm tlat chuan kan kawppuite tan pawh kan lo rin awm tlat zawk dawn a ni tihte ka ngaihtuah chhuak a, chu vangin hla in Lalpa tan a rinawm tlatin min lo tawngtai sak zel turin ka chah ta zawk a ni. Lalpa tan a a rinawm chuan ka tan pawh a rinawm dawn si a.

Vaṭhuampui a kan cham chhung hian Bangladesh a luh theih dan kawng kan dap reng a, chutih chhungin Baptist Home Mission a thawktute ṭanpuuin Tuikuk, Takam khuaah kan zin deuh reng bawk a. Khua a lumin thosi leh vaihmite a tam êm êm mai bawk a, ei in alo ṭha lo bawk nen, kan hah thei hle a, kan hriselna lam pawhin a tuar a, kan bawrhsawm êm êm vek mai a. Mahse Lalpa remruat dan hi ava mak ṭhin tak em! Min thlahthlam ngai loh zia chiang takin kan hmu leh ta.

Ka u Mawitei (ka pi, ka Pa nu nuta fanu) Staff Nurse Aizawl a thawk mek chu kan awmna Vaṭhuampui a ṭanga Hospital hnai ber, ke a ni khat a thlen phakna Bungtlang ‘S’ ah Lalpa’n min rawn Transfer sak dawrh mai a. Kan hriselna a ṭhat loh a piangin U Mawitei hnenah chuan kan kal zel a, a chang chuan rei tak tak U Mawitei hnenah chuan inenkawl a kan awm chang pawh a awm ṭhin. Ṭum khat phei chu kan ṭhianpa Nuna phei chu Hospital a awm hial a ngai nghe nghe a ni. U Mawitei hnen a ṭanga kan haw dawn hi chuan kan zin veivah vel a midangte kan pek ve tur nenlam, damdawi min pai haw tir ṭheuh ṭhin a, kan ṭangkaipui takmeuh a ni. Doctor awmlohna hmun a damlo enkawl na bu pawh min pe a, ka hmanṭang ṭangkai khawp mai.

Ka ṭhiante’n min kir san a, kan Mission Board pawhin min ṭilh san hnu a keimah chauh a Bangladesh Mire ram a ka luh thlak a ṭanga reilote ah U Mawitei pawh chu Lalpa’n hmunpui leh hmun nuam



zawk, chhungkhatte hnaih deuhna hmun Lunglei-ah a sawn ve nghal a. Tunah chuan Lalpa malsawmna in Lunglei khawpui chhungah in leh lo pawh a nei ve ta. Ka lawmpui takmeuh a ni.

Vaṭhuampui a kan awm chhung hian Vaṭhuampui a ka nu leh ka pate chuan min duat thei em em mai a, kan zin loh chhunga in a ka awm ve te hian ka hnathawh an phal ngai lova, ṭhiant e bula hna han thawh vete chu ka nuam tih zawng a nih a vangin engemaw chang chuan an phal lo chung chuan hna ka thawh ve chang pawh a awm ṭhin. Hemi kum hian hlo a har em a vanga mi neih duh loh lamhnai, tin hnih hmun lek kan nei a, hlo kan han thlo chu rin angin a lo har lo tawp mai a, kan rin leh kan beisei ai tam daih mai in Lalpa'n mal min sawm a, kan buh in khat tlat buh kan thar chu midang pawhin mak an tih thu hahipin an sawi ṭhin.

Ka farnu Makimi'n pasal a neih pawhin man ka ei a, Pang dan a fapa upa ber puan thulkhung an pek ṭhin pawh min pe bawk a ni. Kan Pathian malsawmna hi ka va han dawng nasa tehlul em. Kei chuan Vaṭhuampui a ka nu leh pa leh ka chhungte tan engmah tih sak theih ka nei ve si lo, ka tihsak theih awmchhun chu an tan a lo ṭawngṭai mai hi a ni si a. Ka hnaah ka buai ve ṭhin em a vangin ka duh anga ka tlawh thei lo hi pawh ka ti in ka ngai thei ṭhin takmeuh a ni.

Vaṭhuampui-ah hian hun engemaw chen kan cham leh hnu in Bangladesh a mi Bawm tlangval Lungthausih khua, Lalsawmlian leh Darjiling khua Thliarthawn te Mizoram a an sumdawng haw lam zui thlak tur remchang an awm a. Kan ṭhian thum chuan Bangladesh a kaw hreuh dantur ngaihtuahin kan ṭhukhawm a, Ruma Upojela Chairman, Reform Church of Bangladesh (R.C.B.) Chairman ni bawk Pu, L. Dolian chuan Mire ram a Lalpa rawng kan bawl theihna tura min pui theih beisei in a mah be turin chung Bangladesh mi pahnih sumdawng haw lam zui thla tur chuan ka ṭhiant e chuan keimah chu min ti a, tichuan ka inbuatsaih nghal a, ni 17 August 1990 Zirtawp ni chuan Mire ram a kan awmna tur ngaihtuah turin sumdawngte chu ka zui thla ve ta a. In a ṭanga kan chhuah dawn chuan Upa Rokhupthang'n ṭawngṭaina in min thlah a. kan chhuak ta a.

Lalpa hruaina in tluang takin Rumana chu kan va thleng a, Rumana ah chuan riah ka rawt a, mahse ka kalpuite chuan, “Rumana khua-ah chuan riak lovang, mi report hmang an awm a, Lungthausih-ah kan riak dawn nia,” an ti a, keipawh chuan thuawih takin ka thiante chu ka zui ve ta a. Lungthausih khua-ah chuan Pathian ni ka cham a. Thawhtan ni chuan Ruma lam panin ka kal leh ta a, Darjiling-ah zan khat ka riak a, a tuk ni 21 August 1990 Thawhleleh ni chuan Ruma Upojela Chairman Pu, L.Dolian hmu turin Ruma-ah ka zuk kal a. Ruma-ah chuan Lairunpui venga Pu Lalthawnliana, Pastor H.Dala tupa inah ka thleng a.

Zanah Pu Lalthawnliana nen chuan Upojela Chairman Pu, L.Doliana chu Mire ram a rawng kan bawl theihna tura Bangladesh a kan awm theih nan min tanpui theih kan rin a vangin amah hmu turin kan va kal a, mahse Bandarban a a awm lai a lo ni a, Ruma a arawn kal leh hun tur pawh an sawi theih loh a vangin ka thlen in lamah chuan kan haw leh ta rih a, a tuk zing karah chuan R.C.B. a an hotupa pakhat, (Sawrkhar lamah pawh thil tithei tak ni in an sawi) Pu Indiatawn-a hnenah chuan min pui theih beisei in kan zu kal leh a. Pu Indiatawn-a hnenah chuan kan thianza hova Mire ram a kan awm theih dan min ngaihtuah sak turin ka ngen a, a tul chuan Bawm khua-ah a tul chen chen awm kan inhuam thute pawh ka sawi a, kan zingah nupui nei tawh kan awm thute pawh ka sawi baw k a.

Pu Indiatawn-a chuan, “Bangladesh a Bawm, Burma a raltlan mi engemawzat an awm a, chungte chu rawn haw leh turin Sawrkarin a kova, nupui nei tawhte in awm chuan Bawm, Burma a raltlan rawn kir leh angin in awm thei ang, mahse, tunah chuan a la tihfel mai theih loh ang, ka tihfel hma chu sakrau khua-ah emaw, Chaihkhiang khuaah emaw lo awm la, ka tihfel hunah ka rawn chah dawn che nia,” a ti a. Ngaihttha takin ni 23 August 1990 chawhnu lamah chuan Darjiling lam pan chuan ka chho leh ta a. Darjiling-ah chuan zankhat ka riak a, atukah chuan Mire ho awm na Sakrau khaw lam pan in Sakrau khua a mi Miria Menpu rualin ka kal leh ta a.

Sakrau khua-ah hian Kapchhuana (Kaptea) Falam lam mi rawngbawlin a lo awm ve a, a ni nen hian kan lo inhmelhriat tawh a. Sakrau khua ka han thlen chuan Murung Bahini (Mire VDP) hnenah

in report turin min ti a, ka han in report chuan Mire bahini ho chuan, “Naktuk tukleh Pathian ni-ah kan khua-ah Army an rawn kal dawn a, naktukah hmun dangah i kal a ngai ang,” min ti leh ta lat mai a.

Sakrau khua hi tunhma a Mizo hnam sipai (M.N.F.) Bawngladesh Bawm ram a an awm lai a an lo khawsak thinna khua a ni a, chuvangin Mizo tawng pawh thiam an lo awm nual mai a, Mizoram, Burma leh Bangladesh inrina Bangladesh ram chhung si a awm a ni a. He khuaah hian Pu Zahmingthanga leh Pi Romawii te chhungkua pawh rawngbawlin an lo awm tawh a ni.

Ka thlen in tlangval chuan zanah nula rim turin min sawm a, Mire nula leh tlangval inrim dan hmuh ka duh a vangin ka zui ve ta a. Torch light cell thum battery thar ka thun chu ka kenga. Thlamang lai a nih a vangin khawlai chu a thim hle mai a. Kan chhak lawkah chuan ka la hriat ngai reng reng loh thil ri mawi angreng tak mai hi ka hria a. Chutiang a ri mawi chu hetiang thingtlang khua, Mire khua lehngthal a ka han hria chu mak ka ti em em mai a. Kan han thlen chhoh chuan an thil tum rik chu tuithawl liang sei chi, ahamna dâwt mau a an siam, ahmalamah chho awn deuhin mau dâwt tlêp hnih a an siam, chung mau dâwt tlêpah chuan a hmehna kua a awm a, chung mau dâwtte chu khuaihna in an châr nghet tlat a, Mizo in ‘Rawchhem’ kan tih ang hi a ni. Ka la hmuh ngai loh avangin mak kati khawp mai a, han ham ve ka tum rawk a, thim zingah ka ham ri thei awzawng lo mai a, chu chu an ni chuan ‘Rina plung’ an ti.

Nula rim tur chuan nula in-ah chuan kan han lut a, nula pathum hi an lo awm a, chung nulate chuan pawnfen tawite, fen phel lehngthal tih loh chu thawmhnaw inbel an nei lova, ka thian tlangtvalte pawh hrenpereng bâk thawmhnaw inbel an nei bik chuang lo. Pitarte pakhat hi a lo awm bawk a. Kan lénna in chu a te in a chep hle mai a, athim êm êm mai bawk a. Tlangval pakhat chuan a rina plung ken chu a han tum a, tlangval pakhat chuan nula pakhat chu akarkalakah dahin ahnunglam atangin a pawm a, chutia a nula pawm nen chuan hlain an inchhawn a, (hla in an inbia a ni zakmah) kil khatah hian pitarte chuan mau tingtang hi a lo tum teng teng mai bawk a. Miria te chuan rimawi leh zai hi an lo ngaina ve hle a ni tih ka hre thei a.

Nula leh tlangvalte chu thim zingah akawp te te in saruak deuthhaw in an inpawm far mai a, pakhat chuan an rimawi (rina plung) chu thahnemngai takin a lo tum a, chung nula leh tlangval inpawmte chuan an pawm ate nen chuan hla in an inchhawn reng bawk a. An hla chu tah hla chham ang hi a ni a, tumah thluk danglam deuh bik a han thluk an awm lo. A thim em a vangin ka Torch light hmai chu thlawnin in chhung chu ka ti eng pup mai a. Chutia ka tih en pup pawh chuan an inkuah leh an inkhawih vel pawh chu an zak chuang reng reng lo mai a, chutiang a nula leh tlangval inrim ka la hmuh ngai loh a vangin keimah chu ka lo zak zawk mah a, en pawh ka en tha ngam lova.

Kil khat a pitarte lah chuan a mau tingtang ken chu alo kheuh ri tlang tlang reng mai bawk a, chu chu ka thiam ve zawng a nih a ringin chu pitarte chu a tingtang chu perh ve ka han dil a, a ni chuan min pek a hnêkin tapchhak kilah a tawm chho ta daih mai a, chutah pawh chuan a mau tingtang chu a kheuh ngai in a la kheuh ri tang tang reng a. Nula leh tlangval te chuan eng aichuan thim chu an duh zawk ni a kia hriat a vang leh eng takah pawh chutia an inkuah a an inkhawih vel chu an zah chuan si loh a vang chuan ka Battery chu ka chhi hek mai mai a ka hriat a vangin ka off ta daih a.

Ka rilru te te in, Lalpa'n heng hnamho zing a a rawngbawl turin min ko chu a ni si a, engtin tak inkaihruai ang i maw, ti in ka ngaihtuah neuh neuh a, Kristian-ah lo awm pawh ni se an khawtlang nun inthlahdah lutuk leh hmeichhiat mipatna-ah an zalen lutuk chu Kristian puitling tak a siam chu huphurh awm hle in ka ring a. Nakinah chuan hnawk min ti deuh a ni ang, ka thlen in tlangval chuan, "Haw tawh mai rawh, karawn thlah ang che," a ti a, an kawt thleng min thlah hnu chuan alêt leh ta a, a nula rim chu zingah arawn haw a, mak ti tak a ka zawh chuan chutiang chu an nula rim dan a nih thu min hrilh a.

Sakrau khua a ka awm leh theih tak silohah chuan hmun kilkhawr zawk Lungthausih a awm chu ka rilruk ta a. Zingah chuan Mire paho Ruma a bazsar kal turte rual chuan Sunsawng lam pan chuan ka kal leh ta a. Mire paho chu an kal chak em em mai a, kei lah chu Mire ram a ka awm remchang thei a nih chuan awmhlen mai theih tura

thawkrip ka nih a vangin ka bag ah chu a rit bawk si a, ka kalpuite um reng rengin ka hah em em mai a. Kalkawngah chuan, “Lungthausih pawh chu zuk thleng leh pawh ni ila, India mi ka ni in vai tawng kawī khat mah ka thiam bawk silova, Army ho hi tlang ramah an sualin an inluling em em mai bawk si a, Lungthausih khua chuan min lo khawī ngam lo leh mai a nga, Bangladesh ah hian ka ui, ka ar, min titu tur pawh ka hmu zo lo takngial dawn em ni le? Mahse Lalpa’n a fa duhlai tei rawlaih mai mai chu a phal bik lovang, ti te in ka inngaihtuah a.

Sunsawng ka thlen chuan Pastor Dirling te inah ka chawl a, hetia ka chawlh lai hian Lungthausih khua a ka hmelhriatte khawlai a an kal lai hi in chhung atangin ka va hmu a, va be turin ka va chhuak a, khawlaiah chuan Army ho hi silai kengin an lo tei thauau thauau mai a, ka hmelhriatte pawh chu ka va biak hma in Army pakhat hian min lo bia a, enge asawi hre hek lo i, ka duh dan dan in Mizo tawngin ka chhang ve mai a. Ka tawng thiam ve chhun Mizo tawng chuan, “Heta awm hi ka nia,” ka ti a, arang arangin ka chawlhna inah chuan ka lut leh nghal a. Pastor Dirling-a nupui Pitar nen chuan Army ho chu an rawn lut ang tih kan hlau em em mai a, ka bag chu kan thukru thuai thuai a, kei chu an pindanah khumah min mut tir a, pawnpui min sin tir a, “Tikhan lo mu la Army ho an rawn lut a nih pawhin ka fapa akhua a sik a, a mu a nih kha, ka ti mai ang,” a ti a. a ni chuan Army chu a enthla reng a.

Khua alum in Sakrau khua atanga ka rawn kal hah lutuk nen, ka pi in an pindan a khum sang deuh a an pawnpui min han sinter a, ka lu pawh lang lovin min han khuh chu alum lutuk hi ka â thei mai dawn hian ka inhria a, an khaw dunga ka pi in Army ahmuh tawh loh hnu chuan ka thova an inah chuan chawlh rei chi ni in ka hre lova Lungthausih lam pan a kal tum chuan ka in ak chhuak leh ta a. Sunsawng khaw chhung ka pel a, Lungthausih kawng peng a lang thei tawh tihah chuan Army patrolling haw lam thawm ka hria a, an uisathiam hrui chu a lo lang nghal mai bawk a.

Lungthausih kawng a ka pen hma a min hmuh hman tawh a vangin an hmuh lai a Lungthausih kawng hnim angreng tak mai a ka pen chuan min ringhlel a nga, min rawn man palh mai ang tih ka hlauh

avang leh chumi kawng aţang chuan Lungthausih khuaah ka la kal ngai loh a vangin kawng ka bo leh mai ang tihte pawh ka hlau va, ‘Lalpa ka kiangah a kal zel alawm aman min veng mai ang’ ti rilru chungin Army ho tawh zawngin Darjiling a riak tur chuan ka kal ta zawk a.

Army ho chuan aţhen in min bia a, ka duh dan da nin Mizo ţawngin ka chhang ve zel bawh a. Thenkhat chuan chibai min buk lawp lawp a, thenkhat vethung chuan ka bag check tum niawm takin ka bag chu min pawhthlak sak ţalh tumte pawh an awm bawh a, (Mizo ţawng in) “Mimah hah anaklai in khatiangin min ti ţhak suh u,” tin in ka vin hlawk hlawk a, min thlah ve leh mai bawh a. Hlim hmel taka min betu chu hlim hmel takin ka chhang a, rum deuh a min betu chu rum deuhin ka chhang ve mai a. An kal khâtin an tam si a, ka ning hman khawp mai. Chung Army hovin min kal pelh vek a kawng chho ka chhuah hnu chuan ka bag chu ka ngat a Pathian hnenah Army laka min chhanhim a vang leh ka hnen a aawm reng a vanga lawmthu sawi-in ka ţawngţai a. Tluang takin Darjiling chu ka thleng ta a.

Atuk Pathian ni chuan kan inkhawm a, inkhawm ban dawn lamah chuan khawi lam aţangin nge an rawn kal pawh ka hre lo, Army an rawn thleng leh ţeuh mai a, Biakin kawngkaahte, Biakin tukverhahte an rawn dâk huang mai a, kan inkhawm lah chu kan bang dawn hnai tawh bawh si a. Biakin a fanghma tuai an thawhte chu an rawn la a, Biakin kawtah chuan an ei bawrh bawrh mai bawh a. Army ho awm lai a kan inkhawm kan ban chuan; kei chu kekawrtlawn dum ka ha a, savun pheikhawh sen ka bun bawh a, kamis var bantluan ka ha bawh a. Ka Bible bag-ah chuan India pawisa Rs 2000 ka ak ran mai bawh a.

Kan inkhawm ban thleng a Army chu an la awm a nih chuan Biakin a ţanga kan chhuah hunah kei chu “Mastaw,” (zirtirtu) ti a min kovin min be ngei dawn tih ka Chiang sa a, achhan chu inkhawm zingah chuan keimah anga inchei smart an awm ve tlat loh vang a ni. Kei lah chuan an rin angin Bangla in ka lo chhang thei dawn der silova, min ringhlel nghal a nga, (ram buai lai a ni si a) min han check a nga, ka bag a India pawisa cheng sang hnih chu an hmu ngei a nga, ka hmabâk chu sipai ho vauk hrep leh Jeil a dalbad hawp chu ka

hmabâk a ni tih ka hriat a vangin tihian ka ṭawngṭai a, “Lalpa, kan inkawm ban hma ngei hian Army ho hi kalbo tir vek rawh, kan inkawm ban a an la awm chuan min be ngei dawn a, vaiṭawng ka thiam der silova, min ringhlel a nga, ka bag te min check anga, min man ngei ang,” ka ti a. Ka amen chuan Army ho chu an lo bo duak mai a, inkhawm pawh chu kan bang ve nghal a. Inkhawm kan ban hnu chuan khawchhung lam leh kalkawng lam chu ka va bih dek dek a, Lalpa’n Army ho chu alo kalbo tir vek tawh a ni tih ka hre ta a. Ka rilru in Lalpa hnenah lawmthu ka sawi mawlh mawlh a.

Darjilinga kar hnih ka cham hnu chuan Ruma a Pu Indiatawn-a chuan, “Lura kha Mizoram lamah haw leh rih phawt mai rawh se, a ṭul angin khualzin kal velte hnenah chanchin chu kan inhriattir mai ang,” ti in mi a rawn chah a. Pathian hnen a inkawl tir chungin thuleh awm hun lo nghak turin Mizoram lam panin ka chho leh ta rih a.

Vaṭhuampuiah chuan Pu Indiatawn-a min rawn chah hun chu kan lo nghak ta ringawt mai a. Hun rei tak kan nghah hnu pawh chuan eng thu mah a rawn thleng thei chuang si lova, kan mangang angreng hle mai a. Nakinah chuan Sakrau khua a lo awm tawh U Kaptea (Kapchhuana) chu a lo chhova, nupui nei tawh tan chuan Bangladesh a awm chu awlsam deuh a an sawi avangin U Kima te nupa chu an nupa a awm tura chhuk tawp mai turin kan ti a, mahse U Kima chuan a nupui tel lova a mah a chhuk a thil hriat chian hmasak phawt a duh a vangin U Kaptea rual chuan Bangladesh-ah chuan a zu chhuk a, U Kima chu Bangladesh-ah chuan thi lek lekin a khua asik chiam mai a, beidawng deuhin a rawn haw leh ta a.

Vaṭhuampui a lo thleng chu a cher lutuk a, kan lo hai lek lek nghe nghe a ni. U Kima’n report a han pek chuan; Pu Indiatawn-a te’n min pui theih dawn loh thute, Mire ram a rawngbawl na kawng a pin thute leh a beidawn thute a sawi a. Midang han be leh dawn pawh ni ila Bangladesh-ah tumah hmelhriat kan nei tawh bawk si lo. Atihngaihna hre lo chuan ngawi rengin kan inen hrak hrak ta ringawt mai a.

Hun engemaw chen Vaṭhuampuiah chuan kan la awm leh rih a, Vaṭhuampuia miṭhenkhatte chuan fiamthu titak in, “Keini hi Miria

kan ni a mi, min awmchilh reng a?” te min ti a, za lo deuh hian kan nui tawi tak mai a, hmai a uang lo thei khawp mai.

Bangladesh a sumdawng kal velte ka a t̃angin, “Dhaka-ah Mizo Pu Rualthanmawia a awm a, Mire ramah pawh thawktu a dah a, Mizo Mire ram a rawngbawl a awm duhte chu a t̃anpui thei,” tih kan hria a. Mahse Dhaka a kalna tur sum kan neih loh avang leh sum chu lo nei tehreng pawh ni ila tumah vai t̃awng (Bangla) thiam kan awm loh avangin kan tan chuan kawng a kaw chuang silova, chu pawh chu kan tan beisei bo a ni leh tho mai.

Chutia beisei bo deuh a kan awm lai chuan kan thlarau lam nun pawh Pathian in min kalsan ta emaw tih mai turin aro hian kan ro ngawih ngawih mai a, kan han t̃awngt̃ai ve pawhin chham tur kan vai a, t̃awngvaite kan ang zawk mah in kan inhria a. Vãthuampui Kohhran-ah min duhsakin thusawi hunte min han pe ve bawk t̃hin nain Pathian thu sawi tur kan van em em mai a, Pathian thu sawi tur chu hmeichhe thi hul in kan hul a ni ber mai. Kan hriselna a pan in natna chi hrang hrangin min zuam tawh em em mai bawk a. Bungtlang ‘S’ a ka U Mawitei Nurs hnenah kan inkal chhawk sek mai bawk a. Chu mai a la ni lo; kan Head quarter lam a kan hotute lah chu beidawn na chhumpui in a nitelin a tuam chhah tulh tulh mai bawk a. Hnahthial-ah han chho ila bei hram hram tura min fuih chu sawi loh, “Mi â” tih bâk kan hlawh dawn bawk si lo.

Achang leh kan t̃hian thum chuan ramhnuaiah kan Bethel a, mahse, eng kan an phah chuang si lo. Hun lah chu a kal ngaiin a kal reng mai bawk si a. Vãthuampui chuan Krismas kan hmanga, K.N.P. te ka kaihruai in l̃amte ka zirtir t̃hin a, Ramritlang khua leh Mautlang khuaahte chuan Vãthuampui naupangte hruai in rawngbawlnate kan neihpui t̃hin a. Ramtitlang khua a Kohhrante chu ka Kohhran phun ang mai in ka ngai a, ka tlawh deuh zut t̃hin a. T̃umkhat phei chu Vãthuampui ãt̃angin ni khatah ka va ban a, ka hah lutuk chu ka khua asik phah hial nge nghe a ni.

Chutih lai chuan Biakin an la nei silova, Kharbari inah Ramritlang paho chu ka ko khawm a, khawsik t̃lun hlauh hlauh chung chuan ka in beng k̃ang a, Pathian thu ka hrih a, Pathian thu ka sawi zawh



chuan ka chhawl a hal em em mai a, ka thlen in tlangval Nghaka chu mi hnen a thingpuife dil turin ka tir a, tlem hi a lo hmu a, chu chu ka chhuan tir a, Ramritlang khua a mite hi Bawm leh Pang Mizoram chhim tawp a awm, athen chu Bangladesh atang a rawn pem khawm te an ni a, khawthar din hlim ve mai an nih a vangin thingpui no pawh an nei lova, mau chawngin thingpui no kan siam a, kan tlangval Nghaka chuan thingpui chu a han sem a, a thingpui sem chuan min rawn thlen ve hma in a zo der mai lehngal a, chumi zan chuan chhawlhal em em in ka mu tlaivar thak a ni. Mahse, an hnenah Pathian thu ka sawi theih a vang chuan ka lawm em em tho a ni.

Kan thian thum chuan hetiang hian kan ngaihtuah a, “Mire ramah kan lut thei rih silova, hetia Vathuampui a awm ngawt chu a dik love, kan hriselna a tha bawk silova, Hnahthial lamah haw chho ila, kan hotute ngaihdan pawh kan hriat ve a tha e,” kan ti a. Ni 15 Feb 1991 Thawhle ni chuan huphurh angreng tak chung chuan Hnahthial lam panin kan haw chho leh ta tham tham a.

## BUNG 7

### A.F.C. MISSION BOARD PAWH BEIDAWNGIN AN ȚIL ZO TA

Kan haw kawngah chuan Nuna chu a hriselna a ȥat loh em avangin kan chawl chho pah zel a, Lunglei kan thlen phei chuan thi in a luak vak mai a, Lunglei damdawiinah a awm a, chumi hnu in Hnahthialah pawh chawl ve ta lo chuan Aizawl Zemabawk T.B Hospital-ah a va awm nghal a, ka khawngaih tak meuh a ni. Hnahthial kan han thlen chuan Mire ram a lut tura chhel tak a nghak fan fan a tih dan turte min finchhuah ai chuan, “Pathian in Mire ram a kal hi rem a ti lo a nih hi, tum duh ting lo mai rawh u,” tih lam ngawt kan dawng reng mai a. Ka ȥhian ȥhenkhat leh min lainattu te chuan, “Malur, hei i hang thu chhe zo vek tawh alawm, kal tawh lo mai rawh,” min ti tawh pawh an tam a. Pathian remruatna min hriatthiampui ve lotu tan chuan tih awm pawh kan ni reng a.

Kei chuan, Van Pathian tirh ka nih ka Chiang a, Lalpa’n Faroa bawih a a hnam thlan, a fa, Israel thlahte an ȥang hruai chhuak tura Mosia a tirh lai khan, han ngaih mai chuan Pathian nung, thil engkim tithei-a chuan a chakna hmanga va hruai chhuah lawk mai awm a nih lai in chutiang a awlsamtȥ a hruai chhuak mai lo khan Israel fate leh Augupta mi te’n thil ȥhalo leh harsatna tam tak an tuar a, Pathian kut chak leh thiltihtheihna tam tak an hmuh hnuah Mosian Israel fate chu a hruai chhuak chauhvah. Kei pawh Lalpa’n a kut chak leh thiltitheih min hmuh tir a duh chu min la hmuh tir zo lo a nih ka ring tlat a. Lalpa’n, “Atawh tawh e,” a tih hunah Mire ramah chuan min la hruai lut ngei ang tih ka ring tlat a, mihringte kan beidawn vek hnuah Ama thiltihtheihna leh ama remruat liau liau in min la hruai dawn a, chu chu a ni ka nghah chu.

A.F.C. Mission Board chu kan Kohhran Upa Biakmawia Hmar te inah ni 12 Feb 1991 zanah chuan an Committee leh a, Mire ram lamah chuan an beidawng tlang em em tawh a, ȥhenkhat chuan, “Ka Missionary te hi B.C.M. kutah hlan mai ila, an nin Arunachal lamah tir mai se a ȥha mai lawm ni,” an ti a. An zinga pakhat chuan, “Pathian in Mire ram a chanchinȥha hril hi a remtih loh natur chhan

ka hre lo, anmahni an la beidawng lo a nih chuan keini lo beidawn ngawt chu a tha lovang,” a ti a. Board Chairman Upa K.Lawmsanga chuan, atam zawkte chu an beidawng hle tawh a ni tih a hriat a vangin, “Hetiang a Mission Board a awm reng ai chuan Mission Board hi thiat mai ila, kan Missionary-te hi A.F.C. Team kutah awm mai se tha in ti tlang em?” ti in zawhna a siam a. Chu chu tha anti tlanga, Mission Board chu thiat in an Missionary te chu A.F.C. Team kutah chuan min dah ta a.

Hnahthial-ah hun engemaw chen ka awm hnu in kan khua Bualpui ‘H’ lamah ka han chhova, kan khua a tanga Hnahthial lam a ka chhuk leh dawn chuan kan Kohhran chuan min thlahna an nei a, fuihna thu tha tak takte min hrilh a, duhsakna thilpekte min pe bawk a. Hemi tum hian fuihna thu ka dawng leh a, min ti chak thar leh a ka lawm hle a ni.

Hnahthial chu Lalpa hruaina in tluang takin ka thleng a, Hnahthial ah ni khat ni hnih emaw ka awm hnu chuan ka chhailai ‘d’ hmu turin Lunglei-ah ka zu chhuk leh nghal a. Ka ngaih tawh em avangin an inah ka thlen chilh a, a ni pawh chuan kan han inhmuh chuan min lo ngaih tawh zia thu min lo hrilh mawlh mawlh a. Kan kan han inhmu leh chu kan hlim dun hle mai a, amarawh chu “*Tiam tlat e,*” kan la tih loh vang erawh chuan lawm a la kim thei rih lova. Kan lawm a kim nan leh Mire ram a nupa kawp chawi a kan luh theih nan palai tirh hmasak phawt angaih thute kan sawi dun a.

A nu leh pa lo thâwt lawk turin ka ti a, âm tak leh duhthawh taka hun kan hman dun hnu chuan chutiang a hun hman reng mai chuan awmzia a neih dawn loh a vangin chung kan duhthusamte chu a tak ram a athlen theih nan Hnahthial-ah ka haw leh ta a, ka chhai lai ‘d’ chu ka nuthai chang tura palai tir tura ka pa Hminga biak vat a tul a vangin Lunglei atang chuan phur fahran in Hnahthial-ah chuan ka haw leh ta a.

Ka pa Hminga hnenah chuan thil awmzia chu ka han sawi a, ka lo hmanhmawh tawh tehlul nen; ka pa Hminga chuan, “Palai tirh hma in a pa hmu hmasa ila, in innei a nih pawh in Luangmual a i pa Hluna te inah thingpui nen kan lawm dawn nia,” ati ta daih mai a. Ka

pa Hminga min chhan dan chuan ka lung a ti awi lo hle mai a, Bualpuia ka awm lai a Hnahthial a haw thla leh tura min thlem lai a aṭawng dante kha ka hre chhuak uai uai mai a. Ka duh dan chuan kan Biakin ngeiah Pathian leh Kohhrante hriatpui in, “*Tiam tlat e*,” han tih thawp sat chu a ni a. (Hetih lai hian ka pa Hluna te chu Lunglei Luangmualah M.A.P. Inspector in a awm lai a ni a.) “Mhahse, Lalpa’n engkim a hria a, ka phu tawh lek a ni a nge,” ti in ka inhnem lungawi leh mai a.

Hun engemaw chen aher liam leh hnu pawh chuan ka pa Hminga chuan engmah a sawi zui tak loh avangin nupui ka neih ve theih natur a hma alo lâk tawh leh hma a lo lâk loh chu inthlahrung tak chung chuan ka han zawt a. Hma a lo la lâk loh thu a min han chhan chuan ka rilru hi a na ngawih ngawih mai a. Ka ngaihtuahna a kal thui hman khawp mai. Ka rilru na lutuk tihngaihna hre lo chu Lungleiah ka tlan thla leh ta ringawt mai a, ka hmangaih em em, ka chhailai ‘*d*’ chu an in a cham chilhin inthlahlel tak chung chuan ni engemaw zat hun kan hmang dun a. Kan inhmangaih em a vang leh kan inthlakhlelh em a vang ngawt chuan kum tluang atan run hmunah kan leng dun thei chuang si lova, Hnahthial a ka haw chhoh leh a ngai si, Missionary ka nih a vangin han inruk mai lah a rem lo tumhrang ve bawh si. Lung a va han zing tehlul em.

In Thlahlel ngawih ngawih chung chuan kan inṭhen leh rih chu a ngai ta si a, ka haw tur chu thui tak thleng minrawn thlah a, kan han inṭhen dawn chuan inthlah nan kun lapin, ka mitah pawh min en ṭha ngam lo hian chibai min buk a, chibai min buk pah chuan lehkha thawn, lian vak lova thleh hi min pe a. Chu a lehkhathawn min pek chu a kal liam hnu chuan chhiar chak tak maiin ka han hawng thuai a. Kare...!!! Ka rin loh leh ka beisei loh em em mai, ṭhenna biah thu a lo ni. Achhung a thu inziak chu tam hle in thlum hle mahse, “Mire ram a kan luh theih tak tak an rin loh a vangin ka nu’n kan inneih a phal lo,” tih thu chu chhiar hreawm lai ber nimahse, ka mit ka nuai a, ka chhiar nawn leh ṭhin a.

“Avamak leh zel em!!! Ka ring phal mawlh lo, a nu leh pate pawhin min duat theih em kha, mahse a inziak miao si. Nichin a ka mit pawh en ngam lova kun lap chung a chibai min buk kha inthlah hlenna

chibai a lo ni maw! Ka hma lam beiseina kaw! a êng tan ve dawn emaw ka tih laiin lungngaihna chhum dumin min khuh leh si thin maw. Lalpa, ka chung a i khaw rel hi hriatthiam har ka va ti tehlul em. Hetiang tur chuan engahnge a ni kha min lo tawn tir kher le.

A ânka nem min tihlim thinu leh beiseina kaw! en tirtu ni a ka lo hriatte kha suangtuahna khawvelah zan mang ang mai in a tham ral leh dawn ta maw? Tlang romei ang mai a zam ral leh mai atan chuan ka phal mawlh lo a sin. Nge, kawppui nei lo pawh a Bangladesh a min hruai luh theih zia lantir i tum zawk? I remruat dan hi ka va han hrethiam lo tak em,” ti in ka bulah mi an awm nge awm lo tih pawh ngaihtuah lo chuan ka phun mawlh mawlh a, ka khaw hmuhte chu tawi tawh hian ka hria a.

Hnahthial Bus chu a rawn thleng a, Hnahthial lam pan chuan ngaihtuah lem bik pawh nei lo chuan Bus chu ka phar ding a, Bus ah chuan ka lut ve rawih a. Bus tukverhah chuan ka dâk voh voh a, ka bing chuk chuk hian ka inhria a. Eng chen nge kan kal tawh a, khawi lai nge kan thlen tawh pawh hre lova chutianga kawng sira thing leh tlang lian pui pui ka thlir reng lai chuan Zobawk khaw dai a, **“ISUA’N A HMANGAIH CHE A SIN,”** tih thu inziak lo intar kulh mai chu ka han hmuh chuan ka harh zawk hian ka inhria a, **“Aw, a ni tak maw!!**

Min hmangaihtu Isua ka nei a. A nin kei aiin ka thatna tur a hre zawk a, ka thatna turin rum sawihleih theih lohin min tanngtai sak thin a, ka duh leh ka hmangaih em em, ka chhailai ‘d’ kha lo nei ta ila, ka tan a thatna tur a ni lo zawk dawn a ni ang. Kei chuan ngaihzawng reng reng ka nei leh tawh ngai lovang, ka duh zawng pawh ka zawng ngai tawh bawh hek lovang. Pawla ang a nupui ka neih loh ka tan a tha zawk dawn a nih chuan nupui nei lovin ka dam chhung zawngin Lalpa rawng ka bawl a nga, Lalpa’n ka nupui neih tha zawk dawn a ahriat leh aman min pe tawp mai rawh se. Min pek apiang chu eng hnam pawh ni se, lawm takin ka pawm ang,” ka ti a. Chutianga ka suangtuahna kawm chuan Hnahthial chu kan lo thleng ta der mai a. Amârawh chu ka haw dawn zan a athlalak min pek chu ka la kawh ran a, a ni pawhin ka thlalak aduh ka thlan tir pathum lai mai chu a kaw! ve bawh a.

## BUNG 8

### MIRE RAMA KA LUH THEIH LOH CHHAN LEH MIN HRUAI LUH HUN TUR PATHIAN KA ZAWT

Ka thian Nuna chuan a hrisel lohna a vangin damdawiinah min awm san a, minrawn zawm leh turin Nuna lak atang chuan beisei a bo leh ta a, U Kima pawh chuan, “Pathian in ka kalna tura ka tan kawng min ruat sak a nilo a ni ang,” ti in kawng dang min zawh san bawka. Kan Mission Board lah chuan beidawngin min tilh san vek bawka, chu mai a la ni lo, ka hmangaih em em, naupangte kan nih lai atanga ka lung ‘d’ lah chuan chun leh zua dawn tawi vangin then na biahthu min lo hlan leh zel bawka si nen. (Ahnu a amah ngei in a nu tawngkam min hrilh dan phei chuan, “Hnathawk peih lo, thatchhe vak mai mai, ka fanu pasal a tan a duh lo,” a ti a, amah pawh valupa lam sawrkar hnathawk hnenah pasal a neih luih tir thu leh tap zawih zawih chung a pasal a neih thu min hrilh) Na ka ti ve takmeuh a ni. Keimah chauhvin, khawhar takin Pathian-ah chauh beiseina nghat chung in ka ‘d’ hlui nen a lamtluang kan lo tumtawi tawhna Lawngtlai lamtluang bawka chu zawhin Hnathial atangin Vathampui lam pan chuan ka inak chhuak leh ta hnak hnak a.

Lawngtlai ka va thlen chuan ka Pu Hrangate inah bawka chuan ka thleng leh a, anni chuan nidang ang bawkin min lo lawm leh em em mai a, mahse ka tan chuan in ruak a va lut ang mai hi ni in ka inhria a, nuam tihna chhete mah ka nei tawh lova, ka thil hmuh leh ka hawina lam apiang mai chu ka lung ti lengtu an ni vek mai a, mithi vui hnu a in ruak tahuai ang mai hi ni in ka Pu Hrangate in pawh chu ka hria a. Zan khat chiah ka riak a, atukah chuan Vathampui lam pamin Bungtlang ‘S’ Bus ah ka chuang leh ta a. Lalpa hruaina in tluang takin Vathampui chu ka va thleng leh a, Vathampui a mite pawh chuan keimah chauh min han hmu chu min khawngaih ve hle a, kei pawh chuan Vathampui pawh chu nuam ka ti tawh lova, reh ta huai hian ka hria a.

Hmangaihtu rilru chhung rila lian ber mai chu ringtute kan nawm leh kan hreawm lam aimahin thlarau boral mekte chhanchhuah a an lo

awm theih hi a ni tlat reng a. Keini chu he khawvel hi kan khualzinna mai leh Lalpa thlawhhma a kan fehna ani miauva; kei pawh kan khua Bualpui a ka Nu tanpui a ka awm lai chuan lo vah a tanga buhseng thlengin kawla nichhuak chhiarin ka feh thin a, achang chuan ruahte a surin nite a sa a, khua a lum hle pawh ni se ka feh chu ka thulh chuang ngai reng reng lova, achang chuan ka thiante kawm hman lo khawpin buai thin mah ila, ka tih tur dik tak ti ni a ka inhriat tlat avangin ka pawisa chuang reng reng lova, hlim tak leh nuam ti takin ka hun ka hman thin a, ka Nu leh pa leh Pathian hnenah vawi khat mah ka vui ngai reng reng lova, vui ai chuan kan buh seng khawm hun tur leh ei bâr harsa lova kan lo awm ve hun tur ngawt ka ngaihtuah a, kan thlawhhma a tha bawk a, ka hlim hle zawk kha a ni a.

Chutiang bawk chuan tunah pawh hian ka Pa van ami thlawhhma a feh turin ka kal mek a ni a. Ka thawh tam a ka thawh that leh keima tan, Van Lal fa ka ni miauva. Anuamah pawh, ahreawmah pawh, ahlimawm lai leh a khawhar thlak lai pawhin Lalpa zem a thlarau bo seng khawm turin ka thawh a ngai a. Ka khualzin-na leh ka hnathawhna hmun a nih miao avangin lung len vanga hreawm tawrh leh thil dang hreawm tawrh pawh inhuam mai a tawk lo, thih a tul a nih pawh a ka thihna hmun tur ani mai a, Lalpa ka lam a atan chhung chuan hlauh tur leh zam natur a awm lo a ni, tihte ka ngaihtuah a. Chutia ka ngaihtuah lai chuan Lalpa'n hla min lo pe leh a, ka ziaak leh ta mawlh mawlh a, athluk pawh min pe tel bawk a, chu chu hei hi a ni:

### **Lalpa, min tir tache.**

1. Lalpa, min tir tache, heta hi ka awm,  
I bawih thahnem lo hi i tan ka rawn inpe e;  
Ka theihna i tan tlem mahse,  
I tan lo chuan ka nung ngam lo khawvelah.

Kan hril zel ang, Lalpa, min tirhna ah,  
Ram tin leh hmun tinah kan hril zel dawn;  
Kan thih leh thih, kan nun leh nun,  
Ramtinah thangchhuak se, Krista chanchin tha hi.

2. Hmangaihtu rilru chhungril berah chuan in,  
A hmangaihte an cham reng, suaia tlu chhan ngaite;  
Anun na pe in a rawn zawng,  
Hmangaih vanga hreawm tinreng tuar zovin.
3. Lalpa, i chanchin tha puang darh thei turin,  
I Thlarau-in min thuam la, min kalsan suh ang che;  
Nang lo chuan theihna ka nei lo,  
I hmangaihna thuchah puang darh zel tur hian.
4. Khawvel zawng zawng Lalpa ram a nih hma chuan,  
Chawl lovin i bei zel ang, Lalpa chakna ringin;  
Lalpa kan lama atan chuan,  
Hlah tur a awm lo, Kristan min awmpui zel si.

Kristan min awmpui tlat a, ka lamah a tang zel bawh ani tih ka hriat in ka zam ngai lova, zam pawh ka tum bawh hek lo. Ka lam a tang hi engkim chungah thu neitu a nih tlat avangin.

Vathuampuih chuan ni engemaw zat ka cham leh a, nikhat chu hetihian ka ngaihtuah a, “Hetih mai a awm chu a tha dawn lo, Pathian remruat pawh ka hre thei dawn hlei nem, Pathian hnenah eng vanga Mire ram a min la hruai lo nge a nih, eng tikah nge min hruai luh dawn ka zawt teh ang, min hrilh hma chuan chaw pawh ka ei lovang a, mut pawh ka mu bawh hek lovang. Tui pawh ka in lovang,” ka ti a. Vathuampui Biakinah chuan keimah chauhin Bible chhiarin ka tawngtai a.

Zanlai pelh tawh hnu chuan Lalpa’n ka tawngtaina chu Bible thu hmangin min rawn chhang ta, “Lalpa in Pathian-in a pek che u ram chawlhna chu in la thleng rih si lova,...” (Deut,12:9) tih chu ka chhiar a, “Lalpa, Mire ram chu mi pe tawh a ni tih chu ka hre Chiang leh zual ta a. Mahse, hriat duh ka la nei, chu chu hei hi a ni: Chu i mi pek ram chu eng vanga min la hruai thleng lo nge i nih, eng tikah nge min hruai luh i tum? Tunah min hrilh rawh. Min hrilh loh chuan chaw pawh ka ei lovanga tui pawh ka in bawh lovang, mut pawh ka mu hek lovang, riltam leh tuihai a ka thih rem i ti lo a nih chuan min hrilh thui rawh,” ka ti leh a.



Rei rial lovin Lalpa'n Bible thu hmang bawkin minrawn chhang leh ta, "Jentailte hnen a chanchin tha ka hrilh theih nan a fapa chu ka hnen a a inlar lai khan tumahrawn lovin, tirhkoh ka nih hma a tirhkoh lo ni tawhte hnenah Jerusalem khua a han kal hek lovin, Arabia ramah ka kal bo ta nghal zawk a; tin, Damaska khuaah ka kir leh ta a. Tin, kum thum a vei hnuin Kifa kan turin Jerusalem khuaah ka han kal a, a hnenah ni sawm leh ni nga ka cham a,..." (Galatia 1:17, 18) tih thu hmanga min han chhan chuan ka zak ta em em a.

Pawla chu khatih hun lai khan kei aiin a upa zawk a, tin, ahring ahran in a hmai hma ngeiah Lal Isua a inlar bawka, thlarau lamah pawh kei ai chuan a puitling daih zawk a, mahse a ni meuh pawh Arabia thlalerah Lalpa'n a rawngbawl turin kum thum lai a training tir a ni a. Kei kum lamah pawh naupang, thlarau lamah pawh puitling lo em em mai bawksi chu kum ruk ai tam pawh Training ka ngai ngei ang.

Lalpa'n arawngbawl tur hian aduh ulukin a fimkhur em em a, churang chuan a tul chen chen Training a lo pe thin a ni tih ka hrechhuak a. Isua zirtirte ngei pawh kha amah Isua ke bul ngeiah kum thum an Training phawt a, chumi hnuah pawh rawngbawla an chhuah ala phal mai lova, Jerusalem-ah ni sawmnga zet thlarauthianghlim a nghah tir leh a, chumi hnuin Thlarau thianghlim in a thuam te te hnuah arawngbawl turin khawvel hmun hrang hrangah a tir chhuak chauha ni tih ka hrethiam a. Heti hian ka tawngtai ta a: "Lalpa, min ngaidam rawh, ka lo hmanhmawh em em a, ka hriat loh vang a ni.

Apostol-te ngei pawh Lal Isua ke bulah kum thum an Training a, chumi hnu a i Thlarauva i thuam hnuah i rawng an bawl chauhva, Mithianghlim Pawla meuh pawh Arabia thlaler-ah kum thum a Training hnu in i tir chhuak chauhva, kei chu kum khat emaw chauh ka la Training a, ka kalna turah kal thuai duhin ka lo mangang tawh mai a, min ngaidam mawlh ang che. Kei chu kum ruk pawh min training tir rawh, a tul a nih chuan kum ruk ai tam pawh,"ti in. Chumi zan chuan Bible chhiar leh tawngtaiin Pathian pawlin ka tlaivar ta thova, ka nun a hlim ta em em mai a.

Mahse, Lalpa'n mi hmusit leh mi min sawichhiat a ka awm reng chu a phal lova, Treining ka pass tawh vang pawh ni lovin, min khawngaih a vang zawkin. Bangladesh atangin min tanpuitu tur mi a rawn tir ta thuai a. Bangladesh Bengsuri Hmunthar khua ami, Govt Primary Teacher Mizo Pu Lalhmachhuana chu a rawn tir a. A ni tan chuan achhungte awmna Aizawl a kal tur chuan ke a kal hah ngai miah lovin Rangamati lam a tangin Motor leh lawngin reilote a Aizawl a kal mai theih laiin ke a kan kal thin na, ni li ni nga lai ke a kal ngaihna lam a rawn tir in Vathuampui-ah chuan min rawn lama, a ni hi vawi khatmah ka la hriat ngai mi a ni lo in a ni pawhin tunhma in min la hre ngai miah lo bawk.

Vathuampui a a rawn thlen lai hian kei chu Vathuampui veng mawng a BCM Quarter a ka awm lai a ni a. A ni chu ka hnenah a rawn kal hman silova, Field a lo inkhel mekte hnenah chuan, "Rosanglura kha ka hnenah rawn kal se la, keiman a awmna tur ka lo ngaihtuah sak a nge, Kei chu tunah Aizawlah ka kal dawna, ka thang rei lovang, helamah ka rawn haw tawh dawn lova, ka haw hun awm velah rawn kal mai rawh se," ati a, a kal leh ta daih mai a. (A rawn chhohna kawngah ka chanchin a lo hria a ni)

Chu thu chu Vathuampui a ka thiante'n min han hrilh chuan ka lawm em em mai a, "Lalpa, ka vahan lawm tak em, kum rei tak i rawngbawl tura Treining la ngai ngawih ngawih hi i mi ngaihnathiamna thuk tak leh i lainatna a vangin mi hmusit leh sawichhiat a ka awm reng phal lovin ka rin leh beisei ai a hma in Mire ramah chuan min hruai lut dawn ta a ni maw?" Lawm a vanga hnukulh teh chungin ka tawngtai a, Lalpa hnenah ka inhlan thar leh bawk a.

## BUNG 9

### LALPA'N MIRE RAM MIN HRUAI THLENG TA

Våhuampui a hun engaw chen ka chām leh hnu chuan Pu Lalhmachhuana haw hun awm velah Våhuampui Ṭhalai-ho Pharva lam a rawngbawl a chhuakte rualin Våhuampui



chu ni 15 March 1991 chuan Mire ram Bangladesh lam panin hlim takin ka chhuak leh ta a. Pharva khua thlen hma Tuikuk leh Takam ho khua BCM Missionary-te awmnahte chuan riakin Pathian thu kan sawi pah zel a. School sakpui ngaite pawh kan sakpui nghal zel bawk a.

Pharva khua åang chuan Bangladesh a sumdawng a kal tur Laithankhuma rualin 22 March 1991 Zirtawp ni chuan Bangladesh lam panin kan chhuak a. Ramritlangah kan riak phei a. A tukah Ramritlang åang chuan Bangladesh lam panin kan chhuak leh a. Rumana khua kan thlen chuan ka kalpui pa Laithankhuma chu Rumana ah a riak a, kei chu, “Rumana khuaah chuan report hmang an awm avangin riak suh, Lungthausih khua-ah riak mai rawh,” min tih avangin Rumana-ah chuan riah duh viau mah ila ka riak ngam lova, Lungthausih khuaah chuan ka tlang a.

Lungthausih khua chu thim dawn tepah hian ka zu thleng a, Lungthausih khaw kharbari chuan an khua a ka riah chu a lo phal ta awzawng lo mai a, “Nangchu India mi Mizo i ni si a, Army an rawn kal thut a, an man che chuan ka phur a rit dawn e mai, Army ho hi an sual si a, arte bawngte min dil a, kan pek loh chuan khaihlumahte saisak vakahte min vau ṭhin a, min hrethiam la, kan khua hi chhuahsan mai rawh,” min ti a.

Chutia kharbari in an khaw chhuahsan tura min ngen takah chuan han riah luih chiah pawh ka ngai bik lova, tlai tawh tak, pafa hmelhai hun vel chuan chau tak chung chuan Darjiling a riak tur chuan Lungthausih khua chu ka chhuahsan leh ta a. Zan thim zingah

Lungthausih leh Darjiling inkar ramngaw chhahpui mai ka kal lai chuan ka hmuh phak si lohah hian Ungau hi ka hnung lamahte, ka sir lamahte ka hmalamah te ahram chhen mai a, naupan lai a thingtlanga kan awm lai a nu leh pa te'n min tihthaih nan a Ungau an lo hman thin vang nge ni, ka hmul thi a ding sung sung mai a, ka hlau lek lek thin hian ka hria a, athim chhah em avangin ka kawlphe khawnvar lah chuan a en thui thei bawk si lova. Zan dar sawm rik hma deuh chuan Darjiling chu ka va thleng a.

Darjiling-ah zankhat ka riak a, a tuk ni 26 March 1991 chuan Faruk khua chu Lalpa'n min hruai thleng a, Faruk khua-ah chuan RCB Kohhran Upa Santhuang inah ka thleng a, a ni chu pa-ah ka zawng nghal a. Faruk khua hi an District khawpui Bandarban hnaite a awm a ni a, Bawm khua-ah chuan khaw lian pawl tak pawh a ni a, in za dawn an awm ve ani. Faruk khu-ah chuan ni khat ka cham a, Ni 28 March 1991 chuan Faruk thalai thenkhat Tv, Rokhup, Tv, Nazarit (ka thlen in tlangval) NI, Nawlsum, NI, Zingnem te Mire ram a Good Friday hmang turte chu ka zui ve a.

Mire ram ka thlen tirh lai

Motor in mel 7 kan kal hnu in mei 12 ke in kan kal leh a, Pastor chownglowk awmna Empu khua chu kan thleng ta a. ***Mire rama kal tur a kan in atang a ka chhuah hmasak ber kha Dt 27 March 1990 a ni a. Lalpa'n Mire ram min hruai thlen hun hi Dt 28 March 1991 a a ni a, a tahrik leh a thla en chuan March ni 27-ah Hnahthial a kan in atangin ka chhuak a, March ni 28-ah Mire ram chu ka thleng a, vawiin a chhuak, naktuk a thleng ang mai ka ni a, mahse ka chhuah kum hi 1990 a ni a, ka thlen kum chu 1991 kumah a ni thung.*** Lalpa min hruai dan hi a mak tih loh rual a ni lo.



Empu khua-ah chuan Pastor Chownglowk te inah ka innghat phawt a, ahnuah thlen in min han sem chuan Pu Menkawh-te inah min thlen tir a. Pastor Chownglowk hi a naupa'n lai a tanga Mizo kebul a sei lian a ni a, North East India General (NEIG) Mission School Arthah

leh Chorachanpur-ah te Mizo Missionary-te hnen a lehkha zir tawh a nih a vangin Mizo ṭawng pawh a lo thiam hle a.

Empu khua hi kawngpui in a pal tlang khua a ni a, in sawmhnih chauh an ni a, Miria vek an ni. Kristian an lo awm ve nual tawhin Pathian ni tih lohah chuan an lo inkhawm thei meuh lo a, Pathian ni ah pawh inkhawm theih loh chang an lo nei nual bawh. Biakin pawh kawng bulah bawngin tia lekin an lo nei ve tawh a, chu an Biakin pawh chu thli in a tih tluk avangin an sa leh thei tawh lova. An inchei dan lah chu ka tan chuan thil thar hliir a nih avangin mak ka ti thei hle a ni.

Kan thlen zan a kan inkhawm chuan Tv, Rokhupa'n hun ahmang a, inkhawm ban chuan kan zaikhawm a, Mizo lengkhawm zai hi an lo thiam ve nual mai a. Good Friday zing inkhawmah chuan Tv, Nazarita'n thu a sawi a, tlai lamah chuan Pastor Chownglowka'n Lalpa zanriah a buatsaih a, chu chu Mire ram a Lalpa zanriah ka kil hmasak ber ṭum a ni.

Atuk ni 30 March 1991 Inrin ni chuan Pastor Chownglowk te nen Mangtawng khua a Biakin thar hawng tur leh Easter Sunday hmang turin kan kan kal leh a, Empu khua a mite pawh mi engemaw zat an lo kal ve a, chumi ṭum chuan mi 12 laiin Ringtu Baptisma an chang a ni. Ka ṭhiant e chuan Mire ṭawng thiam lo mahse Bangla an thiam avangin Mire hote nen chuan an inbe thei a, kei chuan Mizo ṭawng bâk ka thiam ve loh a vangin ka be ve thei lova, an inbe lai chu ka lo thlek tawn chhen ringawt mai a ni.

A tuk thawṭanah chuan Empu khaw lam pan in kan haw chho leh a, Empu khuah chuan Pastor Chownglowk nen kan inkawm a, Empu khua a ka awm hun a ka in hmun turte min kawhhmuh in Biakin ṭha zawk a sak theih hun a Biakin hmun turte min fan pui a, ka in hmun tur leh Biakin hmun chu a in hlat lova, hmar lam a ṭanga Empu khua luh dawn kawngpui chhak tlang dung thengthaw muam tak mai hi a ni a. Chu lai hmun chu, “Nakinah Missionary te an lo la kal a Biakin te kan la sathei a nih chuan,” tiin thing phekah ‘JEHOVA-JIRE’ ti in ahmun hmingte an lo phuah diam nghe nghe a. Vaṭhuampui khua a Lalpa'n ram leh chawlhna min pek tawh thu min hrilh kha tunah

chuan min hruai thleng ta a, ka mit ngei-in ka hmu a, ka ke ngei-in ka rap ta. Lalpa chu fakin awm rawh se, Lalpa chu a thutiamah chuan avahan rinawm tak em! Keini kan rinawm lo thin mai pawh a.

Ka Pu Lalhmachhuana te nupa

Ka mi hmuh tum Pu Lalhmachhuana chu ka la hmuh loh a vangin ka thiante rualin Faruk khaw lamah chuan ka kal leh rih phawt a, Faruk khua a ni hnih ka cham leh hnuin Pu Lalhmachhuana awmna Bengsuri Hmunthar khuaah chuan ka unaupa thar Tv Lalnazarit nen kan zu kal a, Pu Lalhmachhuana chuan min lo lawmin min lo duat em em mai a, akhuate hnenah chuan, “Hei Mizoram a ka tupa alo thleng a, lo leng rawh u,” tiin a khua a mite chu lengah a sawm a.



Ar a talh a, a hnen a kan cham chhung hian ui pawh a talh deuh reng baw, kei aimahin ka Pu Lalhmachhuana chu a lawm zawk emaw tih mai turin ahnen ka zu thleng chu a lo lawm thiam zawkmah a ni. A nupui ka Pi pawhin min duat em em mai baw a, an hnenah hun engemaw chen ka cham a, Bangladesh khulehtui nihna Identity Card pawh awlsam takin min siam sak a. Bangla la thiam rih lo mah ila zalen takin Bangladesh-ah ka awm ve thei dawn ta a ni tih ka hriat in Lalpa kawng engkim a ka thatna tur hlir a min thawh saktu chungah leh ka Pu, Lalhmachhuana chungah lawmthu ka sawi bang thei lo.

## BUNG 10

### REPORT HLIMAWM MIZORAMAH

Ka Pu Lalmachhuana'n Bangladesh khualehtui nihna Identity Card min siam sak hnu chuan Bangladesh Mire ramah zalen takin Lalpa rawng kan bawl thei tawh dawn a ni tih Mizoram a thlen chu thil tul hmasa ber ni a ka hriat a vangin Mizoram lam panin ka kal leh ta vang vanga. Lalpa hruaina in tluang takin Vaṭhuampui chu ka han thleng leh a. Hetih lai hian kan Team, Ambassador For Christ Team-te chu Speakek Upa K.Lawmsanga hova Vaṭhuampui a rawngbawl na an neih lai alo ni a. Repor hlilmawm: Bangladesh; Mire ramah zalen takin Lalpa rawng kan bawl theih tawh tur thu ka han sawi chuan kan Speaker Upa K.Lawmsanga leh a Team-te chu an lawm em em a, Vaṭhuampui khua mite pawhin min lawmpui em em bawk. Pathian hnenah lawm thu sawi-in kan ṭawngṭai mum mum ta mai a, a vahan hlilmawm tehlul em. Vaṭhuampui a rawngbawl na kan neih zawh hnu chuan Damddep-ah Camp kan nei a, chumi hnu in M.Kawnpuiah te, Diltlang-ah te rawngbawl na kan nei chho zel a, tichuan Hnahthial chu tluang tak leh hlilmawm takin kan thleng chho ta a.

AFC Team

Hnahthial kan han thlen a Mire ramah zalen takin rawng kan bawl thei tawh dawn a ni tih thu ka han sawi chuan mite chuan mak an ti in min lawmpui hle mai a, min ṭawngṭai saktute pawh an lawmin an phur phah sawt in ka hria. Kan Unit Ṭ.K.P. te paw'n an ṭawngṭaina Lalpa'n a tih hlawhtlin sak ngei a ni tih an hriatin an lawm ve hle a. Ka chhungte, ka laina hnai leh ka hmelhriat ṭhate pawh an thaw a veng huai in an lawm ve em em a ni.



Hnahthial a ka cham chhung hian kan Unit Ṭ.K.P te'n Leite Unit Ṭ.K.P kan tlawh a, Hun neitu thenkhatte engemaw rokhawlhna a vanga an rawn tel theih loh avangin kan hotu te'n min duhsak a,

ahun khatna min kian a, a bâk chu kan hotu te'n han hmang zawk se, kei chu thu ngaithlatuah țang zawk ila, tia ka ngaituah lai-in hun neitu apiang te'n an hun chu min kian ta zel mai a, han hnial pawhin min duhsakna chu ka hnial hneh silova, thusawi tura inbuatsaihna nei miah lo leh chawpchih tak chuan lawm tak leh huphurh takin Sermon hun zawng zawng chu a bul a țanga atawp thlengin ka hmang ta vek mai a. Achang pheï chuan kan hotu te'n hmang ve tawh zawk se ka tih avangin pulpit bulah, thusawitu koh dawn țep thlengtein kan han inhnawn leh rih changte pawh a awm hial a. Thusawi hun chu Speaker ang hrim in ka hmang ta vek a.

Hemi țum hian Lalpa'n ka thusawite mal a sawm a, Pathian thlarau pawlna changin hlim tak leh kham lo takin hun chu kan hmang zo ta a ni. Kei tehlul, kan hotu fel tak tak leh thusawi thiam tak tak kâra Pathian leh kan hotu-te duhsakna changa hun ka han hmang chu ropui ka ti in ka lawm em em a ni. Lalpa hi chu mi hnuaihning zawkte chawikangtu hi ava han ni chiang em. Hemi țum hi chuan Hnahthial a ka cham chhung pawhin hlim takin hun ka hmang ve thei ta. Lalpa chu fakin awm mawlh rawh se.



## BUNG 11

### AWMHLEN TURIN MIRE RAMAH

Hnahthial a hun engemaw chen ka cham hnu-in Lalpa'n ka awmna tura tlang min ruat sak; Mire ram a awmhlen tawh turin ka inak chhuak leh ta a. Lalpa hruaina in tluang takin ni 3 June 1991 thawhtan niah Mire ram a ka awmna tur Empu khua chu ka thleng a. Empu khua-ah chuan Pastor Chownglowk-a inah ka awm a, Pastor Chownglowk-a chu Pa-ah ka siam nghal a, ka thlen zan chuan Pastor Chownmghlowk-a nen chuan hlim takin kan inkawm a, Mire thalai ho pawh an rawn leng nual a, Mire thalaite nen chuan han inkawm bawrh bawrh a duhtawk a han ti ti kan châk hle a, mahse Mire tawng ka la thiam loh avangin kan inkawm thei lova, kan inen a kan innuih leh ringawt zel a. Kei in anmahni kawm ka châk ang bawkin anni pawh chuan min kawm chu an châk ve a ni tih an awmdan atang chuan ka hre thei mai a.

Chumi zan chuan, “Ka la awm dawn chauh a lawm,” ti in Pastor Chonglowk-a hnenah chuan Mire tawng ka la zir rih lova. Amah nen chuan zankhaw tairek thleng kan inkawm a. Atuk zing; ka la thawh hma chuan Pastor Chownglowk-a chuan, “Hei Dhaka-ah Bible Thuthlung thar lehlin hna thawk turin ka kal dawn a, thla hnih emaw thla thum emaw ka thang ang,” a ti a, ka la thawh hma chuan min kalsan ta daih mai a. Mire pa nin tawng a “Hei hi enge ni,” tihna takngial pawh ka la zawt hman silova. Empu khuaah chuan Mizo tawng thiam pakhatmah an awm bawk si lova, ka buai ta hle mai a.

Pastor Chownglowk-a Dhaka a thla hnih zet a awm chhung chuan Mire tawng chu ngaihruatna in ka zir ta a, a buaithlak duh khawp mai. Ka awmnaah chuan thalai ho an lo leng thin a, “Lo leng rawh u,” tihna takngial pawh ka hre si lova. Heti hian ka ngaihtuah ta a; “Mi inah ka va leng a nga, ‘Lo leng rawh,’ min ti ngei ang, chu chu ka chhinchhiah a nga, mi lo leng apiang chu ‘Lo leng rawh,’ ka ti ve thei mai ang,” ka ti a, Mi inah ka va len chuan, “Uang pua diah,” min lo ti a, chu chu ziakin ka chhinchhiah nghal a, mi lo leng a piang chu, “Uang pua diah,” ka lo ti zel a, chutia ka lo tih chuan an lawm thei hle a, mahse han be zel tuarin Mire tawng ka thiam tawh bawk si lo.

Adang thiam leh dan tur chu tihian ka ngaihtuah leh ta a; Pastor Chownglowk-a te in chu kawngpui bul a ni a, kawngpui lo lamah chuan turverh te tak te te pahnih chu a awm a, kawngpui lamah erawh chuan turverh a awm lova, kawngpui lamah chuan lian leh zau deuhin tukverh ka siam a, chulai chu ka khum awmna pawh a ni nghal a, tukverh aṭang chuan kawngpui a mi kal vel chu ka thlir thin a, nikhat chu paiper ka la a, chem ka keng bawk a, ramah ka kal a, thing ka pu a, ka kal lam a min hmu apiang chuan, “Towng kowi chow en kowi kown?” min lo ti a, ‘Khawng e i kal dawn?’ min ti a nih ka ring a, chu chu ka note buteah chuan ka ziaka, ka haw lamah chuan thing ka pu a, “En kawt sing ba?” min ti leh a.

Chu pawh chu ka chhinchhiah leh a, chutiingin maute ka pu a, ka kal lama min biak dan leh ka haw lama min biak dan chu ka chhinchhiah zel a, tuite ka chawi a, ka kal lamah chuan, “En tawngtui kown ba?” min lo ti zel a, “Tui i chawi dawn a mi?” min tihna a nih ka ring a, ka haw lam chu min hmutu apiang in, thenkhatin “En tawngtui mi ba?” min ti a, then khatin, “En bowm ba?” min ti a, hah hmel tak a ka awm a vangin, “I hah em?” min tihna ni in ka ring a. Ka kal lama min biak dan leh ka haw lama min lo biak dan chu ka chhinchhiah zel a, chutiang chuan mi tuichawi leh ram kal, kal lam leh haw lam chu ka tukverh aṭang chuan ka lo be ve thei ta a.

Miin thil min zawhna apiingin ‘En’ leh ‘Ba’ an telh zel dan ka ngaihtuah in a hmanna hmun leh hun awm chu ka hre thiam thei mai in ka inhria a. Chung Mire ṭawngkam ka ngaihruatnate chuan mi hnathawk kal lam leh haw lamte chu ka lo be ve thin a. An mi chhan dan leh an awmdan aṭang chuan ka ngaihruat thiam ve zel hian ka inhria a. Pastor Chownglowk-a rawn haw hma thla hnih chhung chuan min zirtu awm miah lovin Lalpa ṭanpuina in Miria te chu ka lo be ve nawk nawk thei tawh a.

Lalpa’n Mire ram Empu khua min hruai thlen hian ka kum 23-na ka hmang ṭan ve mek a. Ṭhalai ka lo nih avangte pawh a ni ang; duh angin ṭawng inpawh ṭha thei rih lo mah ila, min nel em em mai a, zanah chuan ka awmnaah chuan ṭhalai ho chu an rawn leng thin a, an zinga pakhat chuan ka Torch Light mawng lam Battery tuiin a ei chhiat, ka hman theih tawh loh, ka lehkhabu dahna a ka dah chu a lo

hmu a, pawisa lo inkhawn khawm in Torch Light thar min lo lei sak a. Min ngainat zia leh min hmangaih zia an tih lan-na ni a ka hriat avangin ka thinlung takin ka lawm tak meuh a ni.

Pastor Chownglowka a rawn haw chuan a hnenah Mire ṭawng chu ka zir zel a, Mire ṭawng thiam thuai ka duh a vang leh ka hmanhmawh lutuk vang tepawh a ni ang, Mire ṭawng chu har ka ti in thiam har ka inti em em mai a, ka pa Chownglowk-a hnenah chuan, “Ka Pa, Mire ṭawng hi a har emai, ka thiam theih pawh ka inring love,” ka ti a. Ka pa chuan, “I hmanhmawh lutuk a ni, ‘Thiam ka duh lo’ ti in thiam tum miah lo mah la Mire ram a i awm a nih hrim chuan i la thiam em em ang, hmanhmawh lutuk duh suh,” min ti a. Mire ṭawng ri han ngaihthlak hian Mizo tan chuan zurui ṭawng ṭaduh mang lova ṭawng hi a ang em em mai a, thumal chhar fuh pawh a har em em a ni, ‘OW’ leh ‘Ü’ ri hi a tam hle mai a. (ow leh ü hi an ṭawng ka thiam tawh hnu a, a aw bu ka siam lai a an ṭawng mil a hawrawp ka siam chawp a ni)

Mire ho hnen a Pathian thu sawi thuai thuai ka châk em em mai a, ka Pathian thu sawi duhte chu Mizo ṭawngin ka zia a, ka pa Chownglowk-a chu Mire ṭawngin ka lehlin tira, chu chu a bulah chhiar ka zir ngat ngat a, ka pa in, “Azia deuh tawh e,” a tih chuan chu chu midang bulah ka chhiar sak ta ṭhin a, a chang chuan chu chu ka zin chhuah pui a, ringlo khuaahte chu chu ka va chhiar sak ṭhin baw a. Engtik lai mai pawh hian ka ipteah hian Note bute leh pen hi ka keng reng a, Mire ṭawng ka zia a, ka zir reng a, a chang chuan ka zia en chungte hian mi ka be ṭhin.

Kan ṭhalai hote chuan hla zir an châk em em tawh mai a, Pastor Chownglowk-a Dhaka a a thang hlan chuan kan nghak zo tawh lova. Ka ṭingṭange, Hnahtial a kan veng nula U, B.N-i (Biaknii) min pek nen kan ṭhalaite chu hla ka zirtir ṭhin a, Teyprecord te ka nei baw a, ka Cassette a an hla duh ber, “Ka dawn ṭhin ropuina ram,” tih hla chu Mizo hlain ka zirtir a. Ṭawng inpawh mumal lova hla inzirtir buaithlak zia chu namai lo tak a ni. An hnam hla thluk chu ka sawi tawh ang khan ṭah hla chham ang deuh a nih a vangin, hla ka sak leh an sa ve a, ka hril leh an hril ve a, hla kan zir hun chhung chuan ka ṭawng a piang mai chu hla emaw an ti vek tawh mai a, “Atawh tawh,

ka tih leh, “Atawk tawh,” an ti a, “Hla a ni tawh lo, ngawi tawh rawh u” ka tih leh “Hla a ni tawh lo, ngawi tawh rawh u” an lo ti rual ṭhup ṭhup tawh zel mai si a, ka ṭawng ang apiang an lo zir rual ṭhup ṭhup zel avang chuan ka mangang thei em em mai a.

Pastor Chownglowk-a rawn haw hnu pawh chuan Mire ṭawng chu ka la thiam mai bik si lova, ṭingṭang perh pah nen, ka ṭawng zirna bute pawh chu ka en zung zung hman tawh silova, a buai thlak ṭhin khawp mai. Pastor Chownglowk-a rawn haw hma chuan engmaw ti ti in ‘Ka dawn thin ropuina ram,’ tih hla chu kan lo zir thiam hman a. Mire ṭawng ka thiam ve deuh chuan ṭhalaite hian min ngaina ve tak zet in ka hria, vaimim kawmchhum ka awmlah lai a an lo ei te hian ka tel lo chuan tui takin an lo ei thei ṭhin lova, “Tai Rova ei ai,” (Tai Ro tih hi U Ro min tih na a ni. Ka hming Rosanglura ah hian ‘Ro’ lai hi min koh nan an hmang) ti in vaimim kawmchhum; kawm li kawm nga an lo paih hnuah chiah an ei ve thei chauh ṭhin.

Mire ram a ka awm tih hian hlawnh nei lova awm ka nih a vangin mi inah ka awm a, an thawh ang apiang ka thawh ve zel a ngai a, loahte ka feh ve ṭhin a, achang chuan lawmte ka nei ve ṭhin a, nuam ka ti ve ṭhin khawp mai. An ei ang apiang tui ti tak a ei har ka ti hle ṭhin a; mahse tui ti awmtak a ka ei erawh angai a ni. Ka pa Pastor Chownglowk-a chuan min duat em em mai a, afa ang takin min en a, ka pawisa neih chhun ang angin buh ka lei ṭhin a, a monu chuan ka buh lei chu keimah min den tir a tum ṭhin a, ka pa chuan buh ka den chu a phal si lova, “Mipa in hmeichhia awm rengin buh an deng ngai lo, deng suh,” min ti a.

Amonu erawh chuan, “I buh chu nangman deng rawh,” min ti bawk si a, awmdan thiam a har ṭhin khawp mai. Ka buh lei a zawhte hian a monu chuan a hre thei em em mai a, “I buh a zo tawh a nia,” min ti chhen ṭhin a, buh leina ka neih mai loh chuan a inthlahrun awm thei ṭhin khawp mai. Achang leh a fapa chuan, “Awmpui neih kan duh tawh lo,” te min tih khum ṭhin a, ka theih tawka hna ka thawh leh Mizoram a ka kal chang a an monu chu thawmhnaw hawn sak ṭhin mah ila ka chungah ṭhat chhuah a tum chuang ngai lo.

Ka indanna turin ka puah ve a, a buaithlak thin khawp mai, Mire ram a ka kal hma hian ka la naupangin hetiang hian thingtlang khuaah maurâp in sak ngai-in ka awm ang tih ka lo la ngaihtuah chhin ngai miah loh a vangin maurâp in sakah tawn hriat ka nei lo em em mai a. Thing tha leh tha lo ka hre hrang lova, thing tha a ngai a hah taka ka thing putte chu, Miria te chuan, “Hei chu thing tha lo a nih hi,” min tih sak zel mai a. Hnâng tur rua ka han sat ve a, “Hei hi chu hnâng atan a tlak lovang,” min tih sak leh a.

Anmahni rualin hnâng tur chu ka sat ve ta a, ka hnâng sah ka han hlai ve chuan, “I hnâng hlai chu âr in sak nan pawh a tlak loh,” an ti leh a. ka tihngaihna hre lo chuan kan khaw pa pakhat hnâng hlai chu lo vahah ka tha thleng ta a, kei chuan a lo chu nilengin, kut durh phungin ka vât a, a ni vethung chuan nilengin hnâng têt hnih chiah min hlai sak a, akhât tawkin, “Dawrah thingpui min khilai rawh,” a ti deuh reng bawk a. khatih hun lai a ka rilru nat dan chu sawi ngaihna pawh ka hre lo. Ka Pa ka ngai em em a, tihtheih ka nei si lo.

Ka in chu hla zirna tur, lehkha zirna tur leh rawngbawltute an lo kal chuan mikhual thlen a ngai dawn bawka ti in lian tak a sak ka tum ve bawk si a. A chhuat chu ram hla tak ami rua ka pu a, chumi chik tur chuan kan khaw thenawm hnaite Kurang khua mite ka ruai a, zing dar riat velah hna an tan a, chhun dar sawm pakhat pawh a la rik hmain chaw ei-in an chawl a, an chaw ei kham chuan an mu a, ka kaitho ngam si lova, an mut rei em evang chuan Pastor Chownglowk-a monu chuan tlai dar thum vel chuan, “A awm lo em em lutuk e,” ti in min kaihthawh sak a, dar li vel chuan, “Ban a hun,” an ti a, min haw san leh duak mai a. Ka lungawi lo lutuk hi ka tah a chhuak zawk a ni, tih theih lah ka nei silo. Miriate hian tlawmngaihna hi an pianpui lo hrim hrim emaw tih tur khawpin an tlawmngai lo a ni.

Ka in sak lai chuan hlawhfa han lâkna tur pawisa ka nei thin silova, In te deuh a sak lah chu ka duh bawk si lo. Ka in chung tur di tel khat ka sah chhung pawh a rei thei thin si a, in ban lah chu thing lian pui pui ka sat a, in ban zawnah leh in rel lai chuan kan khua a mite chuan min pui a, an ni pawh an in sak apiang leh in ban zawnah leh in relah ka pui thin. Ka in chung chu chhunparh a ni a, keiman ka chih thiam

der si lova, midang ka sawm a, ka in chih tan a tanga a ni ngana-ah kan chih zo theih ram a ni. Ka in sak lai hian Kangku khua a Kristian te'n cheng zahnih (Tk 200) lai in minrawn tanpui a, ka lawm zia chu sawiin asiak lo, lawm tak ka ni. Ruma atangin Pu Lalduhsanga'n Bawm thalaite rawn hruai ni khat chu min lo tanpui bawk a, an chungah ka lawm bang thei lo.

Ka in chu keima tawkah chuan tha ve takin Lalpa'n ka in hmun tura a lo ruat lawk Jehova-jire tlangah ngei chuan Lalpa tanpuina leh thenrual thate tanpuina in engemaw ti ti in ka khawr pum ve thei ta hram a. Ka in chu Thalai hote zai hona, hla zirna leh lehkhazirnan kan hman thin a. Ka in chu zau tawkin ka hung a, ka in bulah chuan chuktuak huan ka siam a, thingkung pakhat a ban a ring in ar in ka sa a, ar ka vulh bawk a, pangpar mawi tak tak ka ching teuh bawk, ka in bul thingkungahte chuan nauban hmun hnan hnan ami la khawmin ka phuar bet teuh bawk a.

Ka in hian thlifim a dawng tha in a fianrial a, khaw chhung a lang thei vek bawk a, tlak lamah By of Bangol tuifinriat a lang ruhi a, zanah Chittagong eng ut mai a lang thei bawk. Zing lamah nichhuak min hliahtu tlang a awm loh a vangin ni achhuah rual rualin ka in chuan hliahtu awm miah lovin ni chhuak eng mawi tak mai a dawng nghal iar bawk. Tlai ni tlak pawhin min hliahtu tlang awm lovin tuifinriat zawnah nitla eng phut mai a hmuh theih bawk a. Tunah chuan inthlahrung lo leh zalen takin Mire ramah, keima in ngeiah ka awm ve ta. Ka thatna tura kawng engkima min thawh sak thintu Lalpa chu fakin awm mawlh rawh se.

Kum 1991 August 18 Pathian ni chuan Kohhran pawh mumal zawkin kan din a, hruaitu-te kan inthlang a. Thalai pawl, Kristian Kürthümmei Powchak (CKP) leh Hmeichhe pawl, Kimrengchah Masiuua Powchak (KMP) pawh kan din nghal bawk a, tun thleng hian CKP leh KMP Day hi ropui tak leh hlim takin kan hman thin. Kohhran, CKP leh KMP-ah chuan a hming chuan O.B. kan inthlang ve a, mahse, a zia kan leh a hruai kan an la thiam hma chuan keiman zirtir pahin engemaw chen chu ka thawk kawp vek rih a ni. Kan Kohhran chu Lalpa awmpuina in kan chak phah in kan phur phah khawp mai.

Miraia te chu anmahni khuaah chuan aia upa pawh hi an hming in an inko mai thin a, Pastor Chownglowk-a upa tawh tak pawh naupangte pawhin ‘Chownglowk,’ ti in an ko mai thin. Mire tawng ka thiam deuh hnu chuan aia upa koh dante ka zirtir thin a. Atir chuan keipawh ka hming pum in min koh an tum a, ka hming a lo sei deuh a vangin min ko thiam lova, chuvangin hming thar min vuah a, ‘Menring’ min ti a, “Enge a awmzia?” ka tih chuan, “I hmui a sen hlar a vangin ‘Pasen’ kan ti che a ni,” an ti a.

Ka hmingah hian ‘Ro’ tih a tel avang leh anmahni pawh an hmingah ‘ro’ tih a awm ve bawk avangin a lam awl zawng in ‘Rosang’ min ti mai rawh u, ka ti a, chuta tang chuan puitlingte chuan ‘Rosang’ ti te in min kova, kei aia naupang zawkte chuan ‘Tai Ro’ (U Ro) ti in min kova, thenkhat chuan ‘Lur’ ti a min ko pawh an awm. ‘Menring’ ti chuan min ko zui ta lo.

Mire tawng pawh ka lo thiam ve zel a, Miriate nen chuan kan inngaina tawn hle mai a. Ziak leh chhiarte ka zirtir thin a, zirtan bu kan la neih loh avangin ziak leh chhiar zirtir pawh a hautak khawp mai. Thenkhat phei chu zirtir fe pawhin thiam hlei thei lote pawh an awm a, thiam hma takte pawh an awm ve bawk. Mire tawngin Johana bu mal leh Hla 75 chuan-na hla bu an lo nei ve a. Mizo A Aw B pangngai hmangin hmanlaiin NEIG Mission hun lain Mizo Missionary Pastor H.Dala te’n an lo siam sak a, chutih lai chuan Mizo A Aw B bu hi an lo zirtir ve mai a, mahse hmanlai thil a nih tawh avangin chung pawh chu hmuh tur a awm tawh lo.

Khaw dang a ka kal changte pawhin, kan khaw chhehvel a mi, thalaite chuan ‘Tai Ro’ tiin min ko ve mai thin a, ka hla sak chu ngaihnaawm ti takin nutling, patling leh thalai leh naupangte pawhin an ngaithla thin a. Chutih lai chuan khaw dangah chuan ahmei apa in thawmhnaw an la inbel mumal lo hle a, mipate chuan hrenpereng an kaih a, hmeichhiate chuan fenphel tawite an fenga, an lu, an nghawng, ang kawng leh kerek thlengin awrh, beh leh bun chu an ngah thin khawp mai.

Thalai ho zingah chuan hla hmangin rawng ka bawl ber thin a, Puitling ho hnenah vethung chuan Mizo leh Miriate chu hnam

inunau kan nih ziate, Burma Khampat hmun a ɽanga kan lo thlang tlak dante, Miria leh Mizo kan ɽawng a inan-na laite, sawiin a chang chuan Mizo thawnthute ka sawi ɽhin a. Miriate chuan naupang chauh nilovin puitlingte pawh in thawnthu hi an ngaithla duh em em ɽhin a. Chung karah chuan tlem te te in Pathian thu ka zep hlek hlek ɽhin; tin, ngun leh uluk deuh a ka ziak chuan milem pawh Miriate ennaawm tih khawp chu ka ziak thiam ve a, chung ka milem ziak hmangte pawh chuan rawng ka bawl baw ɽhin. Milem chu an lawm em em ɽhin a vangin a tihchi phian.

Ka awmtirh lai khan incheina a la hniam em em a, chutih lai a kei Mizoram a ka inchei dan ang renga ka inchei chuan kan inkarah incheina a vangin daidan-na a awm tlat a vangin anmahni ang chiah in hrenpereng nen chauh awm thei lo mahil a mipa ɽhen khat chuan vai lawnggi veng tepawh an awm ve tho a vangin an lawnggi rawng duhzawng ka lei a, chu chu chhing to hian ka veng a, Lawnggi ven hi ka peih loh em a vangin Burma Halkha a ka awm lai khan U Bawrin lawnggi mawi tak min lei sak a, mahse ka ven thiam loh avang leh ka ven peih loh em a vangin ka pe lêt leh kha a ni a, mahse Mire ramah chuan Mire hnam ni tura ka luh a vangin ka ven mai a ngai a, lawnggi pa khat chu ka veng hlui ve ɽhak a ni.

Kawr pangngai chu hlipin tawnzau kobah ka ha a, achang chuan T-shirt ɽha vak lo ka ha bawka, ɽhalai ho nen a kan awm chuan anmahni angin ka ha leh kê te ka ti senin powder paw tawkin ka inhnawih a, ka bengah pangpar ka beh a, chutiang chuan ka inchei ve ɽhin a, an incheina a runhmui ang deuh a par pawl (bawkbawn rawng) chu rim na ka ti em em a, ka luak a ti chhuak thei em em ɽhin a, ka benga chutiang leh a dangte pawh ka beh chuan ka biang a zar a, a ɽhak ɽhin a, mahse anmahni nen a kan inkungkaihna a ɽhat dawn chuan ka tuar hram hram ɽhin a ni.

Miriate chuan inkhungkaihna hi an ngaipawimawh em em a, khaw khatah hnam khat an awm tlang pui a, ka awm na Empu khua chu Atuang hnam deuh vek an ni a, kan inchhungkhat deuh vek a, kan inkungkaih dan azirin ka nu, ka pa, ka pate, ka pa pui, ka ni, ka ɽang, ka u, tih leh anmahni hnam dana inkohna tam tak a la awm a, chutiang chuan ka koh ve zel avang chuan anmahni pawhin Pastor




Chownglowk-a fapa ang tak takin min en thei a. khaw danga ka kal chang pawhin hnam inunau leh chhungkhatte inkoh dan in ka koh ve zel avang chuan anmahni Miria ang maiin min ngai ve tawh a ni tih ka hre thei a.

Mahse, chutianga incheina changkang lo taka anmahni anga awm reng chu an tan pawh a tha dawn lo a ni tih ka hriat avangin kan incheina chu zawi zawi a thlak a ngaih thu ka sawi thin a, milem lian pui pui-in hmeichhia leh mipa tuak li lem ka ziaka, an inchei dan mawl ber a tanga changkang tak thlengin a lem ka ziaka, chung hmang chuan an mit a entir chungin ka zirtir thina, a sawt hle in ka hria. Zawi zawi in kan khua chu incheina lamah hma kan sawn hret hret a, mahse khaw danga mite chuan kan khua chutianga incheina kan han thlak leh Pathian ni a kan han chawl vekte chu min sawisel nasa hle mai a. “Hnam dang tih dan zir, Bawm, Vai,” te min ti a, mipa in an samzial an han tan te chu, “Lubul” te an ti a, kekawr kan han ha tante chu, “Bawng chhu kekawr” (Chiakaidawng) te an ti a. Pathian ni a hna thawk lova Pathian fak leh chawimawi a kan han awmte chu, “Empu khua chu an thatchhia,” te an ti a.

#### Mire nula tuichawi

Ka awmna Empu khua hi kawngpui dunga awm kan ni ka tih tawh kha, kawngpui a lo chhuah tantirh hian, “Kawngpui a awm chu a tha lo, miruangte an rawn phur tlang anga, natna a tam bik ang, misual pawh an tam ang,” an ti a, thenkhat chu kawngpui hlatah an pem hlawm a, Mire khuaah chuan kan khua chiah hi kawngpui dung a khaw awmchhun a ni a. Kawng hrang hrangin an sawisel nasa em em reng a, mahse nikhua a lo rei zel a, kan khua chu kawngpui a awmte a lo nih bawk avangin dawrte an siam a, khaw dang a mite chu kan khuaah an rawn bazar a ngai ta a.



Ka in chu kawngpui chhak a awm a nih a vangin khaw dang a tanga kan khua a bazar rawn kalte hi ka lo en thin a, Empu khua a mite chuan thawmhnaw an inbel deuh vek tawh avangin thawmhnaw ha lova kan khua rawn luh chu zah nachang an hre ve tawh a, khawchhung an luh dawn chuan lawnggi an vengin kawr an ha a, an

haw lam chuan kan khaw kawtchhuahah an inphelh leh a, saruak deuhthaw in an khaw lamah an haw leh thin.

Kan khua amite pawh chuan awlsam takin thawmhnaw an inbel in an tawng zahmawh sawi hrat lutukte chu an bân mai a ni bik lova, theih tawp a ka beihna Lalpa'n mal a sawm a, zawi zawi-in kan zia chho ve hret hret a ni a. Kan tuikhur hi a hnâi hle a, khaw chhung ang deuhthaw a ni a, a hmei a pa in tuikhurah an inbual veka, an inbual chuan ahmei a pa in saruakin an inbual zela, theihtawpin kan inkhap pawhin a sawt mawh hle a, CKP Committee ah, "Tuikhur a saruaka inbual apiangin cheng nga chawi tur," kan tih chinah chuan kan zia ve ta deuh a, upa lamte chu kan la in khap hleithei chuang lova.

Chanchintha hril a ka vah velnaah chuan an ei ang a piang tui ti taka ei chu har ka ti thei hle thin a, tui ti awm tak erawh chuan ka ei ve zel thei hram a. An mutbu a nuamti awm tak a mut chu a tir chuan har ka ti em em thin a, pheikhawk an bun ngai lova, an mut dawnin an ke an sil ngai bawk si lova, an mutbu chu kum khatah vawikhat emaw chauh thenkhatin an suk thin a vangin an mutbu thenkhat chu a bal khâk thei em em a, an vaihlo thial rim leh dangpuithu rim niawm takte a nam huam a, an puan thar lah chu zo la kai a tanga tah a nih a vangin a thapin a rit luh mai bawka, thlasikah a lum miah bawk si lova, mutlum a har thei thin khawp mai. An mutbu puan min vurh tir hnuai a puanhlap ka ken ka han sin lah chuan, "Min te'n, kan puan a sin duh lo," an ti leh bawk si a.

Kan mutna lu lam, bang a tanga inchhung lam tawng khat awm tur vel hi chu dâp an phah lova, an vaihlo thialna chil an chhâkna leh inchhunga hnâng an hlai a, hnâng sei tak an rawlh thlakna âwng a tana zuah leh chil an chhâkna a ni. An chhuat a an mutnaah chuan lukham a tan thing bung emaw, rawpui phel phawk emaw hi an dah a, chu chu an mut hun a an lukham chu a ni a, a dup lo chiang khawp mai. Ka Pu in ka naupan lai a min lo zirtir tawh a vangin kei chu lukham lo pawhin tui takin ka mu thei a, an lukham kham chuan rei lovah lu a na in a hit vek thei a ni, mahse ka Pu khan Mire mutbu a mut min lo zirtir si lova, hmun thenkhatah phei chuan an chhuat leh mutbuah chuan khumfa a tam thei em em mai a.

Nuam tih hmel taka mut a har duh ðhin khawp mai. Atir lamah chuan puan hnuainawh tur a tan puanhlap ka keng ðhin a, ka mut chuan ka puanhlap ken chu ka invur hmasa a, chumi chungah chuan an puan chu ka invur leh chauh ðhin a, chu chu min lo hmuh chuan, “Min ten,” an tih chu ka hria a, chuta ðang pheï chuan puanhlap pawh chu ka keng ngam tawh lova, vai diar (gamsa) ka ken chu ka hmai zawnah ka invur hmasa ðhin. Vaidiar chuan an pawï a sawï tawh lem lo.

Fur lai a khual han zinte hian, an khaw lai hnim leh bawng êk, vawk êk chiau nen, an in hulhliap a bawng zun leh êk rim nen, an inchhung han lut in tui inhal takin tui han in dawn ïla, an tuithawl kâah dangpuithu an tât vek emaw tih turin, mahni mah dangpuithu rim lo tihtheih tawh loh sa nen, (an tui hmunah dangpuithu bawmrang, an dangpuithu lei khawl an dah ðhin vangin) dangpuithu rim a nam huam vek hian ka hria a. Eng emaw chang pheï chuan kan zanmu chu vangvat seiðial in min lo zuk puar lung changte a awm ðhin.

Þhenkhat an zan mu rulin a chuk hlum pawh sawï tur a awm nawk mai bawk. An inhnuaiah hian thing an khawn a, thing an khawn lohna chin chu vawk leh ar awm nan an ping bawk a, an in bul vel tihfai nachang hre lovin a ðawp em em bawk vang a ni. An arder (ar tuibawm) chu an sumhmun bang pawn lamah emaw chhung lamah emaw an dah mai ðhin a vangin nipui lai chuan an inah chuan arhrik, uihli leh khumfa a tam thei em em bawk.

Nula leh tlangvalte chu infiam an uar ve in an infiam dan pawh a rorum thei ðhin khawp mai, an hmaiah chilate an inchhak khum tlawrh tlawrh ðhin a, achang leh an bul a thil awm apiangin an invaw fawk fawk a, an nulate pawhin an la kaihna hmuï hmawr bawk leirawhchante chuan an inleng tlangval ngalahte chuan an vaw fawk fawk ðhin a, an nulate insawitheihna pawh, “Ka hmuï bawk pahnih/pathum tlangval ngal/khupah ka vaw keh tawh,” tih te a ni.

Zahmawh sawï hi a hmei a pa in an uar em em mai a, an hming pawh zahmawh buru tak tak a ni nawk mai, hming ðha an neih reng pawhin zahmawh hminga inkoh hi kohduatna ang tlukin an hman, zahmawh tel lova inkote pawh an awm ve tho. Athuhrimah an hming

hi zahmawh a nih kher loh pawhin an inko uluk lo ve hrim hrim a, hming tha lo tak tak a inkoh an ching hle bawk. Entir nan,”Sanghar ěk, Zawng chhu, Bhahratlang, Ui-â tih leh a dangte pawh. An thil ei a hrawmhraw em avangin vawih pawh an ngah hle a, vawih ngah hle e tilo chuan vawih a inpuh hi an haw em em thung. An duh loh hmelmang an ti chhe thei hle bawk.

An chaw chhum chu khawrh chhuakin hnah in an fun emaw, pateah emaw an dah vek thin a, chuta tang chuan an kutin an ei khawpin an tham chhuak mai thin. Thenkhat chu chawbel a inchhawp a chaw bel a mi chu kutin an tham chhuak mai thin. Chaw an ei hian fian an mamawhna a tlem hle mai a, Mizo te angin antui an hawp ve ngai meuh lova, an chawah an chawm mai thin, an hawhmeh, antui thleng a mi chu an kutin an duh duh, mi hma a mi pawh ni se an la mai thin. Mahni chhungkuaah chuan an chaw bel/bawm chu an in pas kual a, kut a an tham chhuah theuh a vang leh chawhmeh, antui chaw a chawm thin an nih bawk a vangin chaw bel chhunga chaw kan va lâk chhuah chu a thak al pulh tawh thin.

Mikhualna-ah chuan mikhualte chu in neitu te'n anmahni ei hma in min ei hmasak tir thin a, chu chu a zia khawp mai. Mahni chawthleng theuh chu an chaw eikham rualin a chhung lam hi tuiin an tleng ve puat a, chawthleng pawn lam chu sil ngâiah an ngâi lo a ni. Chuvangin an chawthleng pawn lam chu chaw ei dawna en ngam chi pawh a ni lo. Thenkhat chuan an chaw ei khama kut an silna kut huh chu an chaw ei lai a an tui inchhawpna tuithawlah an tât mai thin. (tuithawl chu kut hruk nan an hmang)

Bawngsa vawksa thau thang bâl pawh sahbawn a thleng chhung chhung lam leh pawn lam chu an sil ngai loh a vangin thleng thenkhat chu thleng tâng thàng bâlah chuan fiah takin mahni hming pawh zia theih hial tur khawpa thàng bâl pawh a awm thin. Tunah chuan Kristiante chu theih tawpin thianghlimna lamah kan inzirtir nasat em evangin hma an sawn tawh khawp mai, Ekin sa tur erawh chuan tunah pawh kan la inhmin thei meuh lo a ni. Ekin nei an la tam lo khawp mai.

## BUNG 12

### MIRE RAM A MISSION THAWK TAWH LEH THAWK MEKTE

Bangladesh ram zau zawng hi 1,43,998 Sq Kms (55,598 Miles) a ni a. Chutah chuan Chittagong Hill Tract-ah hian Hill District pathum – Bandarban, Rangamati leh Khakrachhuri te a awma. Heng District pathumah hian Bandarban District-ah deuh chauh hian Miria-te hi an awm a. Bandarban District zau zawng hi 4502 Sq Kms a ni a. He District a Miria Population dinhmun chu hetiang a tarlan hi a ni:

| KUM  | MIHRING<br>ZAT | TAR LANGTU                                                            |
|------|----------------|-----------------------------------------------------------------------|
| 1872 | 2,378          | B.H.Suharuairdi                                                       |
| 1901 | 10,540         | Chittagong Hill Tracts Destruc Census                                 |
| 1956 | 17,000         | National Encyclopedia of Bangladesh,<br>Asiatic Society of Bangladesh |
| 1959 | 16,121         | B.H.Suharuairdi                                                       |
| 1981 | 20,000         | National Encyclopedia of Bangladesh,<br>Asiatic Society of Bangladesh |
| 1991 | 22,129         | Banglasesh Sorkar Census                                              |
| 1995 | 59,748         | Mro Social Council                                                    |
| 2001 | 29,383         | Banglasesh Sorkar Census                                              |
| 2005 | 67,376         | Mro Social Council                                                    |
| 2011 | 38,021         | Banglasesh Sorkar Census                                              |

*Mire nun leh hnam dan phek 38. Ziaktu : Singiawng Mro*

Bangladesh-ah hian tlangmi hnam sawm leh pakhat (11) **1. Chakma. 2. Marma (Mawk) 3. Tripura (Tuikuk) 4. Miria.**

**5. Tawngchawngia. 6. Bawm. 7. Khumi (Matu) 8. Khiang.**

**9. Pang. 10. Lushai. 11. Chak** te an awm a, Heng Bangladesh a tlangmi hnam infin khawm chu Population Census 2011 in a tarlan dan chuan mi 3,88,335 (*Mire nun leh hnam dan phek 14. Ziaktu : Singiawng Mro*) heng zingah chuan kan unau Miria te hi hnam hnufual ber an ni.

Miriate hi khaw khatah in tlem te te in an awm a, khaw khatah hian a tlangpuiin hnam khat chauh an awm a. Entir nan: Mizoramah hian Fanai chu a hlangin khua siam tasela, chutiang bawk chuan Sailo leh hnam dangte pawh anmahni hnam hlangin awm zel ta ang se.


### Bangladesh map

Miriate hian anmahni awmdan hi tha tawh an inti em em mai a, hnam dang nen pawh an inpawh tehchiam lova, hnam dang nun dan pawh an zir duh loh hle a vangin an changkang thei lo a ni. Kristian an la tlem em em mai bawh a. Bangladesh sorkar leh NGO te pawhin tanpui chu an tum thin na in khaw khatah tlem te te a an awm a vang leh inkalpawhna kawng a that loh em a vangte in tanpui ngaihna an hre vak lo ni in a lang. Hmun thenkhatah chuan Sorkar-in School in tha takin a sak sak a, mahse chung Mire khua-ahte chuan khawpui a tangin zirtirtu tumah an awm thei silova, bakah Miriate hian zirna ngaihsan nachang an la hriat loh em bawh a vangin chung School Building-te chu bawng in leh vawh inah a chang leh thin a ni.



Ka kalna apiangah School kal a that zia theih tawpin ka sawi thin a, mahse, “Kan pi pute a tangin keini chu kawlawm in ei kan zawng ngai lo, chempui-in kan ei tur chu kan thawh chhuak ve tho,” an ti tlat mai a. Mahse Kum sanghnih hnu lam a tang chuan zirna ngaihsan nachang an lo hre tan ve ta. Nu leh Pa te’n an fate zirna tur zawngin an buai ve tawh khawp mai, mahse an fate zirna a vanga insenso erawh an la harsat rih khawp mai. A free a an fate sikul kal tirna an zawn thin a vangin Mission thenkhat tan chuan Kristian a siam a awlsam phah in

### Bandarban Distric map



Kristian tawhsate pawh thenkhat chu an fa te zirna a free theihna tur a nih chuan Mission hrang hrangah an zuan lawr phah bawk a ni. An fate zirna a vanga sakhaw danga awm ta pawh sawi tur an awm nual bawk. Chutih lai chuan thenkhat chu fate zirna avang a insengso ngam pawh an awm ve tan tawh.

Kum sanghnih hnu lam a tang chuan Mire ramah Bangladesh a hnam dang Kristiante a tangin Mission hrang hrang an lo lut a. Kan unau Miriate hi an la changkan loh em a vangin lo changkan deuh tawh hnam dang Kristian thenkhat te'n sum siam nan taka hmangete pawh an awm a, thil hrang hrang tawktarhin Kristian ni turin an thlem a, chutia Kristian a an lakhte chu enkawl tha leh mang silovin Kristian hming ti chhe zawnga lo awm tawh lah bo lo. Mission thenkhatte lah an thawktu rawihte Pathian lam hawi lo fe fe an lo awm bawk.

Mission thenkhat-te chuan an thawktute hlawh tlem te te in an pe a, a chang phei chuan hlawh pawh pe mumal lova thawktute harsa taka dahte pawh an awm bawk. An thawktu te'n thlawhmate nei in ei zawng pah a an thawh a ngaih avang leh Mire ho hnenah pawisa pukte an ngaih zawk avangin leibate an nei erh urh a, an thawhna hmun ami te'n an ngaihsan theih tura awm aiin hmusit awm a an awm zawk thin a vangte in chutianga rawngbawl chuan Miria-te ringtu puitlinga siam chu thil har tak tur a ni. Chuvangin Mire ramah Lalpa ram a zau hleithe lo mai nilovin achang chuan Kristian-te kan hming a chhiat em em changte pawh a awm thin a ni.

Mire ram a thawktu thenkhat chu Krista hming ti chhetu an ni a, chutih laiin thenkhat chu thahnemngai taka thawktu pawh an awm bawk. Tunah chuan Miriate hi Kristian Mission-te hian kan ti chawmawlh zo tawh emawni tih mai tur a ni. "Kristian a kan awm chuan enge min pek ang, pawisa engzat nge min pek ang?" ti te in min lo zawt phawng phawngte pawh an awm thin a ni. Chung rilru lam a piangsual tak tawhte Krista hnen a hruai a Kristian puitling leh Kristian tha tak a siam chu mihring tak a ngaihtuah chuan a huphurh awm thin khawp mai.

Khawimaw laiah chuan Miriate zingah Kristian sawichhia a Missionary te anchhia min lawh bawrh bawrh changte pawh kan

tawn chang a awm fo thin. Bangladesh a kan Bawm unau, za a za Kristian ni tawhte chuan, “Miria te hi Lalpa’n a hawisan tawh a ni, an zinga rawngbawlin awmzia a nei tawh lo,” an ti a, Bangladesh a kan unau Bawm te hian anmahni tawkah Mizo Kristian te’n India ram a kan thawh ang chanve, chanve leh tal pawh thawk se chuan Mire ram a an thawhna hian awmzia chu a neih ngeih ka ring tlat a ni. Lalpa’n Miria te Chhandamna kulhpui chhunga hruai lut turin min ti miau si. Kan unau Miria te hi Krista hnen a hruai thlen theih loh khawp a Lalpa hawisan hnam chu nise an thlarau bo hruai chhuak tur hian Mire hnam zingah Lalpa’n min tir lo tawp ang tih hi ka ngaih dan chu a ni.

Mitam tak an sakhua a nun hahchawlhna hmu zo lo, Kristian a hahchawlhna beisei a minrawn beltute pawh an awm ve bawk a. Kan unau Miriate hian an thlarau boral tur hruai kir a, Kristian puitling a siam turin belh tlak Mission, thawktu Lalpa mitirh ngei an va mamawh tak em. Krista hnen a an nun hahchawlh beisei, mahse anmahni hmangaih tak leh thahnemngai tak a enkawltu tur an hmuh si loh avanga nun tuihal tam takte hi an va lainat awm teh lul em.

Kan unau Miria te hi thlarau lama puitling tur chuan; tuna kan Kristian-te pawh achung a kan sawi takte ang khian naupang, puitling tura kan enkawl thin angin Miria te Kristian puitling a siam tur chuan thil namai a ni lova, Field-ah ram lak tawngpawng duham ngawt hleih theih a nih loh a vangin kei chuan kan enkawl phak loh leh kan vil sen loh khawp a bial zauh hi thil tha ber niin ka hre lo a ni. Tuna ringtu kan neihte hi ringtu puitling ni tura theihtawp a kan beih a ngai takmeuh a ni.

Taksa leh thlarauvah chhanchhuah an ngaih zia han hmuh meuh chuan ka lainat ngawih ngawih a. Mire ramah hian Lalpa rawngbawlna thawh ava han tul bawrh bawrh tak em, Lalpa ram a lo zau thuai thuai a, taksa leh thlarauah hma an sawn thuai thuai ka duh a, mahse Office ah hna thawh tur ka lo ngah ve bawk si nen, ka indaih ngang lo a ni. Kan unau (Mizo hnathlak) Miriate hian keini Mizo te nen hian hnam inunau kan ni tih an hre tawh a, tin, tunah rih chuan Mizo te hi min la ngaisang rih bawk.



Tin, Mizo te hi Mire ram a rawng lo bawl hmasatu-te kan ni a, tun hun hnukungah pawh hian kan unau Miria-te taksa leh thlarau chhanchhuah hna thawk turin Lalpa'n Mizo te hnenah mawhphurhna min pe niin ka hria a. Engtik niah emaw tal chuan chu kan mawhphurhna chu kan hlen ngei chu a la ngai dawn a ni. Miriate hian taksa leh thlarauvah hmangaih taka enkawltu an mamawh em em a ni.

Mire ram a Mission thawk tawhte leh thawk mekte hi ka theih ang angin han târ lang ila, mahse Record mumal a lo awm loh a vangin an chanchin chipchiar tak leh kimchang tak chuan ka ziaak thei dawn lova pawl ka ti khawp mai. Heng ka ziaak lante pawh hi Pastor Chownglowk-a hnen a tanga ka hriat leh keimah in ka chhuina atanga ka ziaak a ni a, tihsual palhte a awm a nih chuan ngaihnhathiamna nen a adik zawk min lo hrilh hre turin chhiartu duhtak ka ngen che a ni.

**Mire rama Mission thawk tawhte leh thawk mekte chu  
hengte hi an ni:**

**Mission Hming.**

**Thawhtan kum**

|                                                             |             |
|-------------------------------------------------------------|-------------|
| 1. North East India General (N.E.I.G) Mission.              | 1919        |
| 2. Voluntary Missionary-te.                                 | 1965 – 1978 |
| 3. Evangelical Chirstian Church (E.C.C)                     | 1980        |
| 4. Christian Fellowship of Bangladesh (C.F.B)               | 1989        |
| 5. Bangladesh Tribal Association Baptist Church (B.T.A.B.C) | 1960        |
| 6. Bangladesh Baptist Sangha(B.B.S)                         | 2000        |
| 7. Presbyterian Church of Bangladesh (P.C.B)                | 1991        |
| 8. Bangladesh Baptist Fellowship (B.B.F)                    | 1989        |
| 9. Youth With A Mission (YWAM)                              | 1992        |
| 10. Baptist Church of Mizoram (B.C.M)                       | 2000        |
| 11. Evangelical Reform Presbyterian Church (E.R.P.C)        | 2007        |
| 12. Evangelical Apostolic Church (E.A.C)                    | 1998        |
| 13. Lairam Isua Krista Baptist Kohhran (L.I.K.B.K)          | 2007        |
| 14. Independent Baptist Church (I.B.C)                      | 2007        |
| 15. Bandarban Hill Churches of Christ (B.H.C.O.C)           | 2007        |
| 16. Christian Mission Church (C.M.C)                        | 2017        |
| 17. Believers Church (B.C)                                  | 1997        |

Heng Mission kan rawn târlan zinga thenkhat hi chuan Mire ram a an rawngbawlina an chawlhlan tawh a, tun a la thawk mek pawh an la awm a ni. Miria te Lalpa hmangaihna a tanga hmangaihna nen a thawk tawh leh thawk mek zawng zawngte, Krista tana in thahnem ngaihna leh in thawhrimna zawng zawngah Miria te aiawhin inchungah lawmthu ka sawi takmeuh a ni. Chung Mission leh thawktu zawng zawngte chanchin ziaak lan vek ka duh em em lain Docoment tha leh Record tha kan neih loh avangin ka ziaak lang vek thei lova pawl ka ti khawp mai.

1. **North East India General (NEIG) Mission chanchin :** N.E.I.G Mission hi Pastor Chownglowka'n Mire ram a an thawh dan leh an thawh hun chung a lo chhinchhiah dan chuan kum 1920 – 1944 chungin Mire ramah an lo thawk a. Ahnu a ka hmuhchhuah dan chuan kum 1919 atang daih tawh khan Mire hnam zingah Mizo Missionary-te an lo lut tawh a ni. Chutih hun lai a an Head Quarter chu Churochanpur India-ah a ni a, chutih hunlai chuan Mire ram a an Missionary te chu Mizo vek an ni. An Missionary te chuan kan unau Miriate thlarau bo seng khawmna kawngah thahnem an ngai in hreawm tam tak an lo tuar a, Miria te'n taksa leh thlarauva an lo puitlin theih nan thil hlu tak tak an lo hnuchhiah a ni. Chung an hnathawh leh an thiltihte chu kan la sawi zel ang. Mahse kan sawi kim vek thei dawn lo a ni tih erawh min hriatpui ka beisei.

Chutih hun lai a Mire ram a Missionary te hming leh an chanchin kan tarlan theih ang ang kan tarlang a nga, kan chhinchhiahna in a atarlan loh Mire ram a awmchilh a Missionary hna lo thawk si, kan tarlan hmaih emaw kan tihsual palhte a awm a nih chuan chhiartu duhtak, khawngaihna a dik zawk min hrilh turin ka ngen a che. Heng kan han tarlante pawh hi an awm hun chung engmah record fel kan hmuh loh a vangin kan tarlang thei lo a ni. Chungte chu hengte hi an ni:

1. Pastor H.Dala.
2. Pi Rozami, W/o Pastor H.Dala.
3. Pastor Patlaia.
4. Pi Buangi, W/o Pastor Patlaia.

5. Pastor Rohmingliana.
6. Pi Siamtawii, W/o Pastor Rohmingliana.
7. Evan Chalmawii D/o Pastor Rohmingliana.
8. Evan Saikunga.
9. Evan Liandanga.
10. Pi Lalfuali, W/o Evan Liandanga.
11. Evan Kawha. (Sapkunga)
12. Pi Biakcha ni W/o Evan Kawha.
13. EvanTleikawnga.
14. Pi Dengzingi, W/o Evan Tleikawnga.
15. Evan Thangkunga.
16. Pi Chemtawii, W/o Evan Thangkunga.
17. Evan Thanghnuiaia.
18. Pi Zazawni W/o Evan Thanghnuiaia.
19. Evan Zakhuma.
20. Pi Siamkungi W/o Evan Zakhuma.
21. Evan Darkanga.

Hengte hi Mire ramthim lo su hmasatu-te an ni a. Khatih hun lai khan awmchilh lem lova rawngbawl a lo tlawh kual thin mi engemawzat an awm pawh a rinawm. Hengmite hian an Lalpa tan an nun hlan chungin Mire ram thim chhah tak mai chu an lo su tawh a, mi sawm (9) lai in Mire ramah lu an lo phum tawh nghe nghe a ni. Khatih hun lai khan inkalpawhna kawng mumal a awm lova, Miria te pawh an la mawl chhah zual em em a, Pathian thu ngaihthlak pawh an duh lova. NEIG Missionary-te sulhnu la awmchhun, an thing thei phun, Theihai leh Te'ngtere kungte

Lalpa rawngbawltute kha Pathian thu hril a an zin in thlenna pawh an hnawn chang a tam thin a, khawlaiah Bible kengin Pathian thu an tlangau pui thin a, Miria te lah chuan lo ngaihthlak a lo pawm a hnek in, “Lusei ui â ho saw lehkhahu kengin ui â ang mai in khawlaiah an bauh an bauh mai,” an lo ti thin a ni. (Pastor Chownglowk)



Missionary te chuan Miria te entwain a tan thei te an phun thin a, chung an thei phunte chu, “Hei hi Lusei thei phun a

nih hi,” ti in an sat chhe thin a. Mahse, Missionary te chuan beidawng duh lovin an zirtir lui zel a, tunah pawh khatih hun lai a an awmna ‘Mission veng’ an tih, Tun a Ngarinchah khaw bulah chuan an thing phun, Theihai leh Te’ngtere kungte chu upa tawh tak hmuh tur a la awm a ni.

Chutianga Missionary te’n dodalna kâr a chhel taka an lo zirtir chu Mire Kristian hnasa te’n Pathian thu bâkah huan thlai neih dante an lo inzirtir chhawng ve zel a, tunah chuan Mire hnam pumpuiin huan thlai neih nachang an lo hre ve ta a ni. Tunah chuan thenkhat chuan huan thlaite chu hausakpui tak tak pawh an lo awm ta a ni. Thlarau lamah pawh Miria te’n malsawmna tam tak an lo dawn phah a, Bible Johana bu mal leh hla 75 Mire tawngin an lehlin sak a, Mizo a aw b bu chu zirtir ve in chung Johana bu mal leh Hla bu te pawh chu Mizo a aw b hmangin an lo chhut sak a. Thil hlu tak an lo hnuchhiah sak a ni.

Chutih hun lai a an awmna ‘Mission veng’ an tih a tang chuan an in sem darh a, Mire ram hmun tinah chanchintha an hril darh ta a, mahse Miria te chuan chanchintha chu an lo do tlat avangin ram an la thei lo em em mai a, mahse Mire hnam Kristian a awm chhunte chu lehkha an zir tir in Churochanpur-ah lehkha zir leh Pathian thu zir in an lo tir a, chung zinga thenkhat te chu an tangkai khawp mai.

Mire hnam zinga Kristian hnasa berte chu Klawnglai leh Menkrawi te unau an ni. Chumi hnu chuan Angka leh a nau Chownglowk te, Laikowi, Singtai, Menpiaw leh Tumsek-i te Kristian-ah an rawn inpe ve leh a ni. Hengte hian lehkha an zir nghal vek a, thenkhat chu sikul kal kher lova Missionary te in a zir mai te pawh an awm.

Thenkhat chu Mire ram a Mission sikul-ah an kal a, Mire ram a Mission sikul a awm tawh loh hnuah Bawm ram Pankhiang khuaah leh Lunginkhar-ahte sikul an kal a, chuta tang chuan Churachanpur ahte an kal a ni. N.E.I.G Missionary te chu Miria te’n an do em a vang leh Kristian na in hma a sawn theih loh em a vangin Bawm ramah an insawn ta vek a, “Israel te’n an hawl a an paih hnu kha Van Lal Reng ro pialral lungghlu ka char ta,” ti a hla siamtu in a lo siam ang khan kan unau Bawm hnam te’n Chahchintha chu an lo dinchhuah pui ta hlahzaw a ni.

Chutih hun lai a Missionary te chanchin leh an awmna kan hriat thei ang ang han târ lang leh ila :

### **N.E.I.G. Missioonary te chanchin.**

Mire ram a Missionary hmasate chanchin hi North East India Genaral (NEIG) Mission, tunhma a lo thawk tawhte chanchin bik a ni a; mahse kimchang taka ziaak erawh chu a har hle a, achhan chu; an awm hun chhung leh Mire ram a an rawngbawl dan chanchin ziaakna leh an hnuhma hmuh tur a awm mumal loh vangte leh khang hun lai a an chanchin hre chiangtu, an chanchin han zawh tur an awm tawh loh vangte a ni a, heng tuna ka han târ lante hi Mire Pastor Chownglowk-a hnen ațang a ka lâk leh Pu Zakhuma (Mire ram Missionary) fapa Pu C.Sangliana ziaak a țangte, Upa T.Lalzara Tlabung hnen etc... ațangte a ka lâk khawmte a ni. Ka ziaak sual palhte a awm a nih chuan chhiartu te'n in mi hriatthiamna ka ngen che u a ni.

1. **Pastor H.Dala** (Haudala) : A ni hi Evan Zakhuma nen Dt, 9 March 1931 Tlabung bul Sirte ațangin an rawn kal a, Pastor, H.Dala chu Chawngbawt (Chingbaw) khua, 'Mission veng' an tihah chuan a awm a, chutah chuan kum hnih a awm hnu in Miza Ngarua khuaah a insawn leh a, kum 1933 – 1941 thlengin chutah chuan a awm a, chuta a awm lai chuan Bible Johana bu mal leh Mire hla bu hla 75-te an siam a, chutih lai a amah țanpuitu te chu Evan Zakhuma leh Evangelist Teacher Menkrawi (Miria) te an ni a. School pawh an hawng nghal a ni.



Pastor H.Dala thlanlung Hmunnuam khua a mi

Kum 1941-ah Bawm ram Pankhiang khuaah a insawn a, chutah chuan Bawm hnam tan hna țha tam tak a thawh hnu in T.B natna in a thi ta a ni. Chumi hnu chuan a nupui Pi, Rozami pawh chu chumi khua vekah chuan a thi ta a ni.

Zirliana thlanlung

2. **Evan Zakhuma** : A ni hi Pastor H.Dala rualin Mire ramah kum 1931-ah a lo kal ve a, Mission khua an tihah chuan kum hnih an awm a, chumi hnu in Ngarinchah khuaah an awm leh a, heta an awm



lai hian a fapa pahnihna Zirliana athi a, Zirliana hi Mire ram a Lalpa rawngbawlna a vanga lu phum hmasa ber a ni. Chumi hnuin kum 1941-ah Evan Zakhuma nupui Pi Lalsiamkungi pi (a pa nu), Pi Thanghmuni a thi leh a, Zirliana thlan bulah an phum ve a ni. Hetih lai a an awmna hi tunah chuan kawngpuiin a pal tlang a ni.

He khua-ah hian engemaw chang chuan tuihri (Colera) te a leng thin a, tuihri vei an khua a an awm tawh chuan ramhnuaiah an tlanbo vek thin a, chung hri an vei thin nachhan chu an khua zin kawngin a paltlang vangah ngai in an khua a tanga km 2 a hla, tlâk lamah khaw thar an kai leh a, chu an khaw thar kainaah chuan Evan Zakhuma pawh hian in a sa ve a, mahse; ram a buai avangin May 1.1943-ah Bawm ram Mualpui khuaah an awm ta zawk a. Mire ramah hian kum 12 an awm a ni.

Pi Thanghmuni thlanlung Ngarinchah a mi

Kum 1944 Janary thla chuan an lo awm tawhna Upper Ngarinchah khuaah chuan an hmangaih leh an ngaih em em Miria te kân tur leh an hnen a Pathian thu sawi leh turin Evan Zakhuma chuan a fate pahnih la naupang tak (Afate hian an Pa, an awmna khaw hlui lama kal tur an ngen tlat a vangin) Sangliana leh Rinliana hruai in a zu kal leh a, an khaw mite chuan an lo lawm em em a, Evan, Zakhuma chuan Mire ho chu duhsak tak leh duhthawh takin ni hnih chhung Pathian thu a hrilh a, a fate erawh chu an thiante nen an tual chai in dâi velahte an lo tlâ a.



A ni thum ni chuan khaw dangte fang zel a Pathian thu sawi zel a tum lai-in Evan Zakhuma chu a khua a sik a, khawsikpui alo ni a, a khawsik chu a zual zel a, a fapa naupangte, Sangliana hnenah chuan, “Ka êk a chhuak, min hruai teh,” a ti a, daipawnah a va dailen chuan a êk chu a tui hle mai a, chu chu Mire hovin an hmuh chuan, “Tuihri a vei,” an ti a, ramhnuaiah an tlanbo san ta vek mai a, tlanche ve thei lo tarho chauh chu inah chuan an awma, nakinah chuan Evan Zakhuma chuan afa pa Sangliana chu a ko va, “*Pathian in min kir tir leh thut a nih loh chuan ka kalsan dawn che u a ni, i nu ka va ngai ve le! Ka kalsan che u a nih pawh in i pute lo bel ang che u,*” ti in a fapa chu a chah a, chawhnu lam chuan a fapa Sangliana hnenah chuan, “*Sangpui, min tung rawh, ka thaw a tawp dawn ta,*” a ti a.

A fapa in a han tun chuan a chat thla chu a ni ta der mai a, chumi khua a putarte chuan, “A pang a daih hma in pawnah thangteah (Thil phona) a ruang hi dah a ngai ang, chuti lo chu inchawi a ngai ang,” an ti a. Pathian Pasaltha ruang chu bawisawmtu pawh awm mumal lovin pawn a thangteah chuan an zalh ta a. An lo khawsak tawhna khua mah ni se, hmun danga an pem tawh si a vangin mikhual an nih tawh miao si a.

Krista pasaltha chuan a ruang zalh nan in chhung lum a luah phak lo a ni (Mire hnam danin khual khua a mi in a an thih chuan vawk chawi a ngai a, a fate naupang pawnto rual lek chuan vawk chawi tur an nei dawn si lo.). Tarho leh a fa naupangtë Lalsangliana te unau chuan Krista pasaltha zalhna tur thlan chu kawng thleng vel lekin an lai a, chumi ni chuan Evan Zakhuma lei taksa chu a rawng a bawl sakna hmun ngeiah chuan ropui lo takin a fate; (pate khualzin tur ngen a tap rual lekte) pahnih leh Mire Putar tlemte te’n Lalpa’n ropui taka a kaihthawh hun nghâk turin mangang leh thlabâr a mittui tla chungin an thah liam ta. A hrai leng naupang chumchiap pahnih te’n an Pa tel lova an chhungte hnen an thlen hun chuan Lalpa hliahkhuha an va han mamawh dawn tehlul em.

Kum 1944 kum tawp lamah chuan Saichalah (Bawrkawlh chhak lamah) Evan, Zakhuma nupui leh a fate chu an pem chhova, chutah chuan kum thum an awm hnuin Chhota Horina Bazar-ah an Pu, Dânga Dahrawk, Evan Challianthanga nau hnenah kum khat an awm leh a, chumi hnu kum 1948 chuan an pianna ram Mizoramah an haw chho ta a ni.

Evan Zakhuma hi Mire ram a rawng a bawl lai hian thahnem a ngai thei hle thin a, Mire ho rilru sak zia leh luhlul zia a hmuhin Evan Zakhuma chuan nun leh chetzia in Kristian nun chu en tir a tum tlat a, Miria te hian tlawmngaih hi an pianpui ve lo emaw tih turin an tlawmngai lo em em mai a, damlo enkawl ngai leh mithi sawngbawlah pawh a theih tawpin hma a hruai zel thin a. Mire hovin lo an neih ngam loh ramhuai awmna ni a an ngaihna hmun a piang mai chu “Leipui hmun a tan,” ti in a vât zel a. Damlo na tak an awmin lo thi ta se Lal Isua ring a thih an duh leh duh loh a zawt zel a, thih dawn tepah pawh chhandamna an chang thei a ni tih a hrilh

zel a, tual meilum ainaahte, a remchan dan angin Pathian thu a sawi zel thin.

Kum 1941 khan an awmna Ngarinchah khuaah hian Sante'npui hri aleng vak mai a, pa valai ngawt pawh chawlhkar khat chhungin mi 7 ngawt an thi a, damchhuak zo lo tura inngai ho khan Lal Isua rin an tum tawh thu sawi in, “Ka hming Kristianah min ziaak lut ve rawh,” ti a ngen an awm nual a, chung zing a pakhat; Battua pheii chuan, Changlenpa, (Sanglian Pa) dam leh pawh ni ila, lo thi pawh ni ila Lal Isua i tih hi ka ring tho tho ang,” a ti a, mahse a dam chhuak zo ta lo a ni.

Pastor Rohmingliana

3. **Pastor Rohmingliana** : A ni hi Serkawrah Primary School Head Master a ni a, chumi hnuin Manipurah Pastor in a awm leh a, chumi hnu in kum 1929-ah Mire ramah a lo kal a, Mire ramah chuan Chawngbawt Mission vengah a awm a, chumi hnu chuan Matamohori lui ruam lamah Ingsa khuaah School din in Evangelist Teacher hna a thawk a, Menkrawi (Miria) nen an thawk dun a, Ingsa khua-ah hian engtia rei chiah nge a awm tih leh Mire ram a a thawh hun chhung chiah hi kan hre chiang thei lo a ni. He khua a tang hian a ni awm e Mizoram a ahaw chhoh leh tak ni.



4. **Evan, Saikunga** : Kum 1922 – 1928 thleng Mire ramah rawng a bawl a. A ni hi Mire ram a awm hmasa pawl a ni a, a awm lai hian Mire Kristian pathum chiah an la awm a, A awmna hmun chu Chimbawkhuaah a ni, heta an awm lai hian khawsikpui in a na vak mai a, dam chhuak dawna a inhriat loh a vangin a nupui Pi, Zapuii chu a kova, a nupui hnenah chuan, “*Mire ramah ka lu ka phum dawn a, he ka lu phum hi Chanchintha lungphum tur ani. Mire ram a ka lu ka phum a vang hian Mire thangthar lo la awm zel tur te'n Chanchintha an la rawn hria ang,*” a ti a, Krista Pasaltha Evan Saikunga chu a khum bulah thingthi in a Lalpa hnenah a thlarau a kawl tir a, a tangngtai zawhin a nupui chu chibai a buk a, a hmangaih em em Miriate leh a nupui duh takte chu chatuan ram a intawh leh turin a kalsan ta a ni.



Evan Saikunga hi Mire ram a an awmna Chingbawkh kuaah an vui liam ta a, a thlan awmna lai hi tunah chuan motor kawng in a palthag a vangin a thlan lung pawh motor kawng laitu te'n an ti bo tawh a, tunah chuan khawi lai chiah nge a thlan a hriat chian theih tawh lo a ni. A nupui Pi Puii chuan lungleng tak leh khawhar tak chungin an nupa a thahnemngai tak leh duhthawh taka an Lalpa tan rawng an lo bawl thin-na Mire ram chu chhuahsan in Mizoram lamah a haw chhoh a lo ngai leh ta a ni.

5. **Evan, Liandanga:** Kum 1924 – 1928: A ni hi Mizoram Muallianpui khua a tanging Mire ramah an chhungkua in an rawn kal a, a tir chuan 'Mission veng' an tih Chimbawkh-ah kum khat an awm a, chuta an awm lai chuan Sap nupa NEIG Mission a Missionary Incharge Rev Rosted leh Mrs Ella Rosted te an rawn kal a, NEIG Missinary te chuan an Missionary te chu hmun hran hran a awm tur in an ti a, Evan Liandanga leh a nupui Pi Lalfuali te hi Empu khua a awm turin an ti a, anni nupa chu Empu kuaah chuan an awm a, heta an awm lai hian Evan Liandanga nupui Pi Lalfuali chu khawsik natna a vangin a thi a, tun a kan thlanmualah hian Krista tan a huaisen taka hreawm tam tak tuartu chu an vui liam leh ta a, a thlan lung pawh an phun hman lova, a pasal leh a fate chu Mizoramah an haw chho ta a ni. Pi Lalfuali hi nu taima leh lainatna ngah tak mi a ni a, Chownglowk nu nen phei chuan an inkawmngaih em em a ni. Chownglowka nu chuan, "Hmangaihi nu chu a tlawmngai em em a ni," ti in afa pa Chownglowka a hrilh thin a ni.



*Pi Lalfuali thlan hmun*

6. **Evan Kawha (Sapkunga) :** A ni hi Mahmuam khua Bangladesh Chittagong Hill Tracts a piang a ni a, a tleirawl lai in Kristian-ah a inpe a, Kristian a a inpek hnu hian Pathian thu hriltu Siamlianpuia a zui ve thin a. Kum 19 mi a nih in Vangchhe khua a North East India General Mission khawmpuia a kal ve a, Pastor Dohnuna'n ramthim rawngbawl na a tul zia leh a hmanhmawh thlak zia a sermon a, "Kawlkil thlenga buh awmte chu lakkhawm a hun ta

e,” tih hla an sak zawh chuan ramthim a kal tura sawmna a siam a, chutia sawmna a han siam a, “Buh seng tur a tam hle si a, tunge sengkhawm turin kal ang?” a han tih chuan Kawha chu chungmi zozai zingah chuan thlarau bo seng khawm tur chuan sawmna chhangin a ding chhuak ta a, Kawha’n ramthim a vei zia leh kalchhuah a châk zia a han sawi chuan Pastor Dohnuna chuan, “Kha naupang thusawi kha Lalpa’n malsawm sela, achungah Lalpa thatna chu ni angin lo eng rawhse,” ati a. Mipui chuan, “Amen,” an lo ti dual a.

Chumi hnu lawk; kum 1926-ah kum 20 a nih in Mire ramah a kal a, kum 1928-ah Empu khua-ah a rawn awm ve leh a, Empu khuaah hian hun engemaw chen a awm hnu in a hriselna a that loh a vangin a rawngbawlpuite awmna Chimbuk khuaah a awm leh ta zawk a, Empu khua a an awm chhung hian fapa pakhat an nei hman a, chu an fapa hming chu T.Lalhnema a ni a, afapa chuan Mizoramah Componder hna kum 17 a thaw tawh hnu in B.A a zova Offecer-ah a kai sanga, Training tam tak a paltlang hnuaah Doble Promoson in Heald Aducaation-ah a kai a, chuta tângin State Mass Aducaation and Madia Offecer cum DY Director hnaah 1998 ah a panson a, a person hnuaah pawh Sorkar in kum khat an la ruai zui bawk a ni. Tunah hian Aizawl Khatla South-ah anupui fanaute nen an cheng a, Apostolic Indian Mission rawngbawlinaah akhaipa zinga mi a ni. Mizoram a zaithiam leh hmelttha tak mai Feli Thangluah hi a tunu a ni. Evan Kawha nupui chu Pi Biakchani a ni.

Mire ram a tanga Mizoram a achhoh leh hnu kum 1940-ah Bru leh Chakma zingachte Missionary in ZBM (tun a BCM nita) hnuaiah a thawk leh a, Tiante khuaah a awm a, athawhna apiangah athawhna hnam te’n an ngaina em em thin a, hetia Bru leh Chakma zing a rawng abawl lai hian abial fanna a tângin natna chharin a rawng a bawl sak thin a Lalpa hnen a chawl hlen tawh turin ni 22 May 1945 khan alei taksa chu a chhuahsan ta a ni.

Evan Kawha hnukchah lai tak hian Tiante khaw Lalnu Pi Lalziki leh mi tam takin van sang taka Angel zairi mawi tak an hria a, chung van a zai rimawi hretute chuan, “Kan Tirhkoh chu Angel te’n van kawngkaah an lo hmuak ngei a nih hi,” an ti. (*Chanchin tha ramthimah By Upa T.Lalzara Tlabung*)

7. **Evan Tleikawnga** (Lallawma Pa) : Kum 1926-ah Mizoram Rualalung a t̄angin Mire ramah a rawn kal a, Miza Ngarua khuaah Pastor H.Dala nen an awm a, chuta an awm lai chuan a nupui duh tak Pi Dengzingi leh a hmangaih em em a fapa Sawnluaia te'n an thih san a, chumi hnu chuan Saichal lamah an insawn a, Saichalah chuan hun engemaw chen an awm hnu in Mizoram lamah a haw chho ve leh ta a ni.

8. **Evan Thanghnuiaia** : A ni hi Champhai lam mi a ni a, Mire ramah Lalpa tan a thlarau bo seng khawm hna thawk turin a kal a, Mire tlang a Mission hmun Chingbawk-ah a awm a, chumi hnu in Matamohori luiruamah hun rei tak a Lalpa tana thlarau bo seng khawm hna a thawk a, mahse; Indopui II buai nasa tak a vang leh ei leh bârah harsatna namen lo a tawh a vangin lohtheihlohna in Mire ram chhuahsan in Mizoram lamah a haw chho ve leh ta a ni. A awm kum leh a awm hun chhung chiah hi kan hre thei lo a ni.

9. **Evan Darkanga** : A ni hi Mizoram Ngopa khua a t̄angin Miriate thlarau Lalpa zem a seng khawm turin Mire ramah a rawn kal a, Matamohori lui ruamah kum khat Evangelist Teacher in a awm a, Mizoramah chhuti a a kal zawk laiin khawsikpui natna in a thi ta a ni. Amah hi mi huaisen tak leh viak t̄ha tak a ni in a aw pawh a t̄ha hle a, a thil tih a piang hlim tak leh phur tak a ti t̄hin mi a ni.



Evan Darkanga thlan

Evan Thangkunga thlanlung Empu khua-ah

10. **Evan Thangkunga** : A ni hi Mizoram a t̄angin Mire ramah Lalpa'n a rawngbawl na tura tlang a ruat sakah a hmangaih Lalpa rawngbawl hna thawk turin a rawn kal a, Mire ram a NEIG Mission hmun Chimbawkah hun engemaw chen a awm hnu in an chhungkua in Marking khuaah an awm leh a, he khuaah hian hun engemaw chen an awm a, heta an awm lai hian a nupui duh tak Pi Chemtawii leh a hmangaih em em a fanu Roziki te'n an thih san a.



A nupui leh a fanu te'n an boral san a vangin kum khat chhung chu Evan Zakhuma (Sangliana Pa) te inah an awm a, chuta t̄ang chuan

Empu khuaah an rawn awm ta a, Empu khua-ah hian kum 1938 – 1940 thleng an awm a, chumi hnuin Mizoram ah chhovin Ṭhuampui khua-ah a awm a. Pi Zaii Lunglei Theiriat khua a mi nen innei leh a ni. Evan Thangkunga hian fanu pathum a nei a, chungte chu Biakhnuni, Roziki leh Lalrokhumi te an ni a, Mire ram a boral ta hi an milai niin kan hria. Amah hi Mire ram a rawn kal leh in, Empu khua ah ni 29 September 1940-ah Empu khuaah a thi a, a thlan pawh tunah Empu khaw thlanmualah a awm.

11. **Evan Neihlaia** : A ni hi kum 1939 khan Reng ram Tlangsang khua a ṭangin Mire ramah a rawn kal a, Mire ram a lo kal lai hian a chhungte hruai lovin a rawn kal a, a kum leh 1940 chuan a nupui fanaute rawn hruai in Mire ram Matamohori lui ruamah Singkhung khua-ah an chhungkua in an awm a, chutah chuan hun engemaw chen an awm hnu chuan Mire ramah ṭam a tla a, Indopui II buai a lo nih bawk avangin Mizoramah an chhova, Mizoram aṭang chuan Bawm ram Arthah khua-ah an rawn kal leh a, chutah chuan kum khat a Lalpa tan ṭahnemngai takin a thawk leh a, heta an awm lai hian a ni pawh chu thawhlelna ṭha lehzuai a ropui taka a Lalpa'n a kaithawh leh hun nghâkin a lei taksa chu thlah liam a ni ve leh ta.

## 12. **Pastor Patlaia** :

Zosapthara (Edwin Rowlands) rawngbawlina hnung zui ṭhin tu. An rawngbawl dunna a ṭanga hla ṭha tak, Kr.Hlabu No.314 (*“Thlaler vak ka lo nih hi”*) tih lo pian chhuahna. Zofate zinga Chanchin Tha buh chi Zoram pel a fehchhuahpui hmasatute zinga mi, Pastor Patlaia hi a chanchin ziaṭ turin ka hriatchian ngai mi a ni lo a. A hun hnahnung lama Lunglei Damdawiin (Civil Hospital) a inentir tura a kal ka hmuh chu a hmeh ka hmuh chhun a ni mai a: Chutih laiin BCM



Chawngte Kohhran Centenary Souvenir buatsaihtu te'n min ngenna zahawm tak erawh theih ang anga tihpuitlin ka han tum a. A tu leh fate leh Upa ṭhenkhatte rawnin kimchang lo takin ka han buatsaih a, duhthu a sam zo lo ang tih ka ring. Tin, hun rei deuh tawh leh

Chhinchhiaahna mumal awm lo a ni a, hriat dan a inang lo maithei. Hei hi ka chhui theih chin a tanga ka hriat dan a ni.

Pastor Patlaia hi kum 1893 khan S.Bungtlangah a pianga. Chhakchhuak hnam a ni a. A pa chu Chalchhuaka a ni a, Chalchhuaka pa hi Khuangkhaia a ni a, Khuangkhaia pa chu Lianlula a ni a. A nupui chu Chuaubuangi a ni a. Nula hmeltha tak, pangti senno chek mai, a nih avanga ‘*Senbuangi*’ ti a koh lar zawk mah a ni. Kum 1917 *Indopui I* naah Tangrual Sipai a tanging France ramah ral runin a kal a. *Indopui* a lo reh chuan a lo hawng ve leh a, hei hi 1918 a ni.

Kum 1906-a Pastor Zathanga leh a thiante’n Khasi ram harhna an rawn puakchhuah zar zoin Piantharna a chang ve a. Chuta tang chuan Bawm leh Pang leh Mire ram hi a vei em em a. Kum 1919 vel khan NEIG Kohhran chuan Mire hnam zinga thawk turin Tirhkoh atan a ruai ta a ni. Hetah hian amah mai niloin Kuaichika te, Zachhawna te nen an thawkho a. Kum 1921 Zotlang Presbytery Inkhawmpui lian chhimin a thiante nen NEIG Kohhran atanging an rawn chhim nghe nghe a ni (*India, Burma Bangladesh Mizo kohhrante Chanchin p152 By B. Lalthangliana*)

Chawngbawt tlang (E. Pakistan, tuna Bangladesh ram ni ta; tunah chuan Chimbuk tlang an ti) khuaah bul tanin awmhmun a bengbel a. (Chimbuk tlangah hian engtia rei nge a awm kan hre lo) Chuta tang chuan Pankhiang khuaah a insawn a. Chuta a awm lai chuan a fapa ‘*Bawmtawna*’ chu a thi a. A thawhna ram mite chuan, “Vawk i talh loh chuan, thlan kan laih sak lovang che,” an tih avangin vawkpui a talh ta a. Chuti chung pawh chuan amahin a bula tan hma chuan an lai duh lo va. Amahin bul a tan hnuaah chuan an pui ve duh chauh a ni. Chumi hnu lawkah chuan Tharte khuaah Biakin hawngin a kal a.

An Biakin hawn lai chuan, ram atanging Sakhi hi an rawn phur hawng a. Fiamthuinn, Biakin hawnna ruai sa atan i hmanng mai ang u hming a lo ti a,” Chu chu ngaithiam lovin, Chem-sen leka sah an rawn tum ta mai a. An inkara remna zawnga banphar tute zarah buaina lian tham a thleng ta em lo a ni. A thawhna hmuna chengte thlarau hi a thim hmel hle mai. Tuikuk (Bru) zinga ka thawh laiin, an rawngbawltu

pakhat chuan ti hian a sawi. “ *Keimahni Tuikuk khua chu thim em mai, Tirhkoh Paula meuh pawh kha lo kal se la, Meichher eng tak chhit loh chuan lo kal thleng thei bik lovang maw le,*” a tihte pawh min hriatchhuah tir e. Pastor Ruala a chawlh tak avangin a hmunah Patlaia chu Pastor puitlinga hlankai niin Full Superintendent-ah a awm hnuin Saichal Area chhung Lunginkhar-ah an sawn a. Lunginkhar hi Headquarter a hmangin, Middle School te an din a.

He School-ah hian, chunglai hmuna awm Bawm mai ni loin Tlabung atangte, Sirte atangte, Mauzam atangte leh Chawngte Area atangte, Mire ram atangtein mi tam takin lehkha an rawn zir nghe nghe a ni. Kum 1960 atang chuan Kohhran-in an chhawr thei ta lova. Saichal-ah insawnin, a kum leh (1961) ah Kanghmunah a pem leh a. 1962-ah Chawngte-ah pem lehin, 1963-ah Tlabung khuaah a pem leh ta a ni.

Tlabung khua a a awm lai hian natna khirh tak, Cancer-in a tlakbuak a. Lunglei Civil Hospitalah hun rei tak enkawl a nih hnuin 20.2.1968-ah kum 75 mi niin Thih leh nat awm tawh lohna ramah Lalpa tana a lo thawhrimna chu a chawlhsan ta a. A tupa Pu C. Zasiama’n a ruang lain Serkawn thlanmualah ropui taka vuiliam a ni ta. A hriatrengna Lungphun thlanmual hluiah hmuh theihin a la awm.

Pastor Patlaia hian tu leh fate engemawzat a nei a. Chung zingah chuan, Sawrkar hna pawimawh tak tak thawkte, Kohhran leh Khawtlang tana mi tangkai tak takte engemawzat an awm a. Dr. Remsangpuia Ph.D tuna China rama an nupa a Missionary a awm mek te hi a tute zinga mi a ni nghe nghe. Rawngbawltute thawhrimna chu an tu leh fateah malsawmna tam takin a lang chhuak thin.

Chawngte a Upa thenkhat sawi dan chuan, kum 1908-1910 vel khan, S. Lungrang khuaah a awm a. Mual a Pathian thu sawi turin an tir a a sawi ngam lo va. Pu Chuaudzika (Kuaichika ti a an hriat lar zawk) khan a sawi ta zawk a. Lungrang Lal chuan a vaw ta hrep a, tih te. Kum 1911-12 vel khan Chawngteah an chhungkuain an awm tih te an sawi.

*(Pastor Patlaia ropui zia tilang chiang zualtu chu Pu Buanga nena lehkhha an inthawwna thu Kristian Tlangau 1922 December thla ami hi a niin ka hria ka han tarlang tel e)*

Pu Duh tak,

He ka thu zawh duh che hi thu sei deuh tur a ni a, tun hnua Lalpa Sipai huaisen lo la chhuak turte pawhin an hriat duh ve ka rin avangin, ka zawhna che leh i mi chhanna thu hi a rem chuan Kristian Tlangau-ah chhuah nise.

Lalpa tirhin Sap ho hi tuifinriat ral a t̃angin ram hla taka awm keini Mizo fate hnam âtzia leh naupangchhia ang a, thil t̃ha duhna chang pawh hre ngai lo chu Puitling rilru min rawn puttir a. Finna tui fim, hmangaihna thli vawt chhandamna kim, Mamsawmna hlu Lal Isua thilthlawn pek chu min lo hmuhtir ta a. Tin, Lusei hnam chauh ni loin khawmualpui hmun tinreng amite, mi that, sa kap a pialral kai tum hnam leh mihring sate hmeh t̃ha ber a ngai t̃hin hnam ngei chu Krista Chanchin T̃hain a lo khat zo ta a. Tunah chuan Gospel thlan chhuahna Pathian Tirhkoh t̃ha tak tak lo chhuahna hmun chu a lo ni ta zawk.

Hei vang hian Pathian leh Missionary zawng zawng chungah leh kan Lusei ram ngei a lo chhuak chhim leh hmar a mite hnenah lawmthu hril chungin he Bawm hnam kan Lusei hnam aimah a â (*fing lo*) tih theih ho enkawl dan tur hi ka zawt che a ni.

Bawm ho hi an chanchin tam tak chu i hnenah ka ngeiin ka hrilh tawh che a. Amaherawhchu, keini mi rilru t̃e te tan chuan thil engkim hi Pathian tih theih a ni tih hre mah ila heng an nungchang hlui ngainatna Roman Catholic dan ang a, an pi leh pute thu rochhiah an vawn ngheh zia hian rilru a tibeidawng dawn dawn t̃hin a ni.

- (1) Pawn lamah mihring thuawih angin lang mahsela, an rilru chuan Rûn ral a la chhun.
- (2) An Dawizepna hian thil t̃ha a hliah vek.
- (3) An zu hehna hi finna kawng khartu a ni.  
Heng pathum ka rawn tarlan hian an rilru awmdan a huam vek a ni ber mai.

Sawrkar lo awp lohna hian nu leh pa thu awih lo fahrah fa a ti ang deuh a ni. Ka rilru a hmanhmawh avang nge ni. An zingah hian chamchi-in hnathawh a harsa hrih hle. Chuvangin zawi zawiin naupangte tal hi zirtir ila hriatna bul a lo ni thei ang chu, tiin ka awm tirh aţang khan zan men lai chhung chauh sikul ka neihpui hram a. Chhunlamah chuan hnathawh an duh a, “kan zir hman lo,” an ti a. Chawlhni pawhin kan zir thei lo a ni.

Zu zuk an ching êm êm mai a, zan sikulah takngial pawh chuan, naupang ho chu an zu in duhin bân min dil min dil thin a ni. Tin, ven sen an ni lova, Lalpa hnen a hming pe ti a kan lawmna berte pawh chuan, kan khawilo nih hlante hian upa te’n an lo sawithaih thin avangin zu an lo in leh a, “Ka u kan chhuak leh mai ang e, keini Bawm fa zawng kan chhiat kan that ni hian zu hi kan engkim tihna a ni a, kan do thei lovang, kan thiante’n min pek chuan, hnial zia a awm lo,” an ti hulhual thin. “Kan lehkha zir pawh hi *Miria*, *Mirang*, *Kawr* ho leh nangni angin kan thiam ve lovang,” ti hian an inngaihtuah beidawng a, Sikul bân leh hi min dil min dil thin a ni. Kawng thenkhatah chuan, “Kan lehkha zir hi kan bân leh vek chuan Sap ho hi an hrih ang a min tantir vek mai ang,” tih te an hlau thin. Tin, an upa ho chuan, “Lehkathiam chu KANDIA (Mahadmagandi) dovin an kalpui vek ang che u, an lo ti thin a,” an mangang letling phian thin a ni.

Han vin deuh ila, duh loh mai mai hi an hmang a, han thlemin nelawm tak hmel pu ila, min pawisa si lo va. Hetih avang hian, mihring lâk theih loh van thiltihtheihna ko thla theitu ţawngţai sakna leh tunhma lama hnam mawl in lo kilkawi dan thenkhat tal kan hre duh a, unau tinrengte ţawngţai sakna kan ngai em em a ni.

He Ram hi kawng engkimah a vanduaiin a khawngaihthlak a ni. Tih te hi an hlau bik mang e, tih turin an awm a, damlohna hri bawlhhlawhin a khat a, an hri veite:- (1) Thek, (2)Phar (3) Pheitumlian, (4) Thawchham (5) Kapkâr nâ. Heng pangate hi chhak lama leng ngai lo zawng a ni. Tin, khang lama hri leng ang kha chu a awm ve vek tho. Heng hrite hi an Dangpuithu leh Nghathu dang reng reng an eiluat niin ka hria. Tin, Luite tui kang chat phuan var biah



buahhte hian chawhmeh zawng hian kal an ching em em a. Hengah hian Phar leh Thek leh Uithak an chhar ber niin ka hria.

Nimahsela, heng natna zawng zawng hi an lo tuarin, Ramhuai tihnatah vek an ruat a, “In thil ei that loh leh in thil khawih that loh vang a ni,” tiin han hrilh mah ila, awih àwm takin an awm a, an rilru hian an awih lo êm êm a ni. An vela hnam thenkhat te’n, damdawi han zuar sela, “Kan lei ngam lo, inthawina a dâl, a hriin a hua ang,” an ti mai thin. Heti êm a âtna leh sual thuneihna hi Lal Isua thuneihna leh Hmangaih finna hian rawn làn thuai thuai turin in mi tawngtaipuina kan ngen em em a ni. He Bawm ramah hian sualnate lo tlawmin thatna lo sang deuh deuh rawh se.

I khawngngaih, Patlaia.

PU BUANGA CHHANNA:

Patlaia,  
Ka nau duh tak,

I thu min zawh chu ka hriat ang angin ka han chhang ang che .

Bawm ho awm dan hi i sawi angin Mizoram kan lo luh tirh ang deuh tak khan ka lo hria a. Anmahni vei a i rilru mangan ziate pawh keimah ang kha i ni bawkin ka hria a ni. Zorama kan luh tirh chuan pa te hian Kristian nihna lam hi an ngâisâng lo em em a,. An dan pangngai an la ngaina em em a ni. Kristian ni tur hian an lang lo ve. Tunlai thangtharte hian hmanlai Zo hnam mawlzia hi an hrechiang lo va, tunlai hian Isua Krista hming avangin awihlote hnenah pawh awmdan danglam daih a ni tawh.

Hmanlai Zo hnam awmzia kha ulh tak leh la thianghlim lo tak chu Lalpa Isua hmingin Thlarau Thianghlim tanpuinain, beidawng hauh lovin ka beisei thin a ni. Tin, Sap kan ni a, hnamdang Zoram a mite rilru putzia leh awmdan hi kan hre lo hle si a. Tin kan awm renga, rei tak pawh Pathian hnena mite hruai thei mai loin kan awm a, a chang chuan beidawn thlak hle mai, beidawna rilrute kan lo pu bawk thin.

Mihring ngaih mai chuan kan lo chhuah tirh lai Zo hnam hi Pathian thu hrilh hi a sak a, sawt lo angin a lang a ni.

Paulan, “Thil tha tih i ning lovang u khai, kan inthlahdah loh zawngin a hun takah chuan kan seng dawn si a,” a tih angin, hmangaihna a beidawng lovin kan bei kan bei zel a. Tichuan Krista thu nung kan theh chu mite rilru thuk lamah chuan a lo dah ta zawk a ni. Paula chuan, “Nau vei angin ka vei che u,” a ti. Nuin nau a vei a, a chângin an chhiat a, a piangsual thei bawk a, nimahsela, lawmna lam hi a ngah zawk fo thin.

Chutichuan, nang pawhin tunah hian Bawm ho hi na takin i vei tih ka hriatpui che a. A changin keini ang bawk chuan tih rual loh beidawn thlak takin i hria ang. Nimahsela, keini Sap ai hian Zo hnathlak hian heng in vel amite rilru put zia hi in hmu awl thei a, an thlek zia in hre thuai thei. Keini Sapte ai chuan awlsam takin mite Pathian lamah in hruai thei zawk a ni. Theihtawpin Lalpa Isua Krista tan mi tam tak in lo ngam thei ngei ang tih ka ring a ni.

In tan lawmawm ka tih chu mitthite hian thlarau nung an nei tih an hriat hi a ni. Taksa thi mahse, thlarau a nung reng tih an rin hi a ni. An hnenah Krista ram thu thlen a remchangan, in tan a lawmna pakhata ni. A dang chu an Kristian-na an bân dawnin nangmahni an dil che u hi; nu leh pa angin an ngai che u a, a lawmawm a ni . Chuti ni lo sela an mahni thuin an bâng mai ang.

He Bawm ram hi theihtawpin Krista hmangaihna kengin beidawng lo va bei zui zel a tul ni berin ka hria. Rei lo deuh chinah chuan Krista chuan mi tam tak a hnenah a la pakaitir ang.

Zoram a kan thawh dan hetiang hi a ni. A tirin lo vât vât ang kan ni a, chumi hnuah chuan buh chi theh theh lehin chuan, Pathian in a Thlarau Thianghlim ruahpui a rawn surtir a, buh chi theh chu nasa takin a lo tiak a, a lo pung a, a lo hlawk ta a ni. Chutiangan rei fe a tan engmah hmu mang lovin thlarau Thianghlim ring ringawtin kan thawk a. Pathian lehkhabu taima takin kan zirtir a, nakinah Lalpa Pathian remtih hun a lo thleng ta a. Kan rin ai a nasain a Thlarau chuan a tifing zo ta.

Chutianging, nangmahni pawh, lo vât chu inla ni rih a. Thlai chi tuhin Pathian lehkhabu thu hi lo zirtir fo ula. Zoram angin nakinah hrilhfiaktu Thlarau chuan a la rawn thawk leh ang tih ka ring a ni.

Aizawl a kan awm tirh chuan, Isua khenbeh thla hi mite ka entir a, an nuih an nuih mai a. Ka entir duh leh ta ngai lova. Tunah erawh chuan, chumi thla chu mi tam takin tih tak zet a an ngaihhlut a lo ni ta zawk. Chuti angin, tunah engmah lo angin lang mahsela, in chi tuh chu Thlarau vin a to-tir ang. In hnathawh zawng zawngte hretu Isua Krista chuan thihna hlim kawr a mi ên zel turin tanpui che u rawh se.

I pu,  
Pu Buanga  
Serkawn

Upa T.Lalzara  
Tlabung

Pastor Patlaia chanchin Upa T.Lalzara Tlabung ziak hi a ma ziak angin ka dah a ni, ama zarah Pastor Patlaia chanchin leh Mire ram a Missionary nitur a a luh kumte kan hriat phah a, Bawm hnam Kristian an nih hma nun leh Kristian an lo nih tan dante kan hriat phah bawk a, Upa T. Lalzara chungah ka lawm takmeuh a ni. Upa T.Lalzara Lalpa'n malsawmin vengin kaihruai zel a a dam khua lo sei zel turin duhsakna ka hlan e.

Bangladesh a kan unau Bawm hnamte hian hmelma pa setana bawih a, thim zinga chanchintha hre lova an awm chu kum 1919 khan Mizo Krista pasaltha Pastor Patlaia te'n Pathian atanga thinlung taka hmangaih a veiin harsatna leh hreawm tam tak tuarin chanchintha an lo hrilh a, Mizo Krista pasaltha Missionary-te thawhrimna leh an tawrhate chu Lalpa'n mal a sawm a, Bawm hnamte chu za-a za Kristian an lo ni ta a ni.

Pathian malsawmna pawh an dawng nasa hle nghe nghe a. Mahse an ni chuan chu chu hre duh lovin sap pa Edwin Rowlands Mizoram a tanga Burma kal turin 1918 khan akal kawng a Bawm khaw pakhat-ah ariak a, chu chu Bawm ho chuan an hnen a chanchin tha thlentu hmasa ber (Missionary hmasa ber) a puangin sailungvarin a limte an

siam a, kum 2018 khan ropui takin Gospel Sentenary an lawm nghe nghe a ni. An Gospel Sentenary a tel turin sap pawh an sawm nual a, kei pawh a bul a tanga a tawp thlengin ka awm ve a, anmahni thim ata êng a hruaichhuaktu, Mizo Missionary-te hming reng an lam ri lova. Bandarban a Pu Thanzama'n (Mizo) Bawm hnam thim ata eng a hruaichhuaktu leh mi engemaw zat te'n chanchintha a vanga Bawm ram a an lu an lo phum tawh ziate a sawi hnuah Rev, Paksim (Bawm) in an Mizo Missionary te chanchin tlemte arawn sawi bâk chu an mahni thim ata êng a hruai chhuaktu an Missionary Mizo chanchin sawi chhuaktu reng an awm lo kha a mak ka ti in ka rilru a lo na ngawih ngawih a, Pathian rilru pheih chu engang takin na ang maw. Khang Missionary-te kha Lalpa ngaiha milian an ni si a.

Bangladesh a Bawm hnam hian an Missionary, anmahni thim ata êng a hruai chhuaktu Mizote chawimawi leh hriat reng ai chuan hman a an Missionary Pastor H.Dala'n Pathian thu zirna alo din tawh, ama hming chawi a Haudal Baible Seminary tia an lo dah tawh pawh a tu leh faten ahming ama ziakdan anga 'Haudala' ti a dah tura an ngen avangin ahming pum tibo in anmahni hmangaih em emtu an Missionary Pastor Haudala hming chu an thai bo leh ta ni.

Bawm thalaite, mi thenkhat chu India-ah Pathian thu an zir a, an ram a an rawn haw chuan sap te dawrin Kohhran thar an din a, tunah hian Bangladesh a Bawm khua chu Biakin in a khat a ni ringawt mai, inkhawm tur mihring awm mumal silovin. Ring lo te pawh in Bawm hnam tlemte zing a Kohhran pawl hrang (Biakin) tam lutuk chu mak an ti hial a ni. Hnam tlemte zingah Kohhran pawl hrang atam em a vangin a eng kohhran mah chak lovin sum pathianna bawih-ah an tang zota. Eng tikah tak Bangladesh a kan unau Bawm hnamte hi harh chhuak ang maw?

Hetia kan unau Bawm chanchin ka ziak duah nachhan chu an ni hi Mizo hnahthlak an ni a, Mizo Missionary hmasate a tanga chanchin tha êng a lo awm a Kristian lo ni ta an nih a vang leh Bawm ram a Missionary hmasa Pastor Patlaia chanchin kan ziak ta sa sa a, chuvangin thil nih phung leh awm dan ka han ziak lang a ni e.

## Mire ram a, Krista Pasalṭha lu lo phum tawhte :

1. Evan Saikunga.
2. Evan Zakhuma
3. Pi Lalhmunthangi. (Evan Zakhuma nupui Pi Lalsiamkungi Pi ‘a pa nu’)
4. Evan Thangkunga
5. Roziki (d/o. Thangkunga)
6. Pi Lalfuali. (W/o. Liandanga)
7. Pi Dengzingi. (W/o. Tleikawnga)
8. Sawnluaia. (S/o. Tleikawnga)
9. Pi Thanveli (W/o. Menkrowi)
10. Evan darkanga hi Mire ram a a thawh mek lai in Mizo ram a a chhoh zawk laiin Mizo ramah a thi a ni.

Mizo Krista pasalṭha kal hmasate khan kan unau Miriate thlarau boral tur chhanchhuak turin hreawm tamtak tuarin mi heti zawngte hian Mire ramah Lalpa tan an nunna hlu tak an lo hlan tawh a, Field mal khaih chuan Mire Field hi Mizo; Lalpa tan a rammute luphum tamna ber a ni hial awm e.

### Empu khua Biakin

Evan Saikunga’n a lo sawi ang ngei in tunah chuan Mire thangtharte chuan Lalpa an lo ringin Mire ram hmun hrang hrangah Biakin a ding tawhin Empu khua ngeiah pawh anmahni sak ngei, Biak in mawi leh ropui tak a ding luah tawh baw a ni. Zaipawl hial pawh kan lo nei ta. Krista Pasalṭha te’n lu an lo phum tawh avang leh Chanchinṭha a vanga an tawrhna leh an thihna chuan Mire ramah rah ṭha chu a chhuah ngei a ni tih mit ngei a hmutu ka ni e.



Keini thangthar, Lalpa tan a aṭul hun a pianga thawk tura inpeihsate hian engemawti zawng tal pawhin kan mi huaisen kal hmasate’n hma min chhawp hi kan chhunzawm dawn lawm ni. Kan mi huaisen

kal hmasate hmabâk, Mire ramah thawh tur a la tam hle si a. “*Mire ramah lo kai la min pui rawh*,” ti in min la au reng a ni.

### **MIRE RAM MISSIONARY HMASA TE’N RAWNG AN BAWLNA A HARSATNA AN TAWH THENKHATTE**

1. Kan Pi Pu te kha mi lulâk ching an lo nih kha a lo thang thui viau mai a, kan unau Miria te hian a tha lo zawngin min lo hmelhriat daih tawh mai a, chuvang chuan kan Missionary hmasate khan Mire ram an zuk thlen thlak khan Mire hote chuan an lo nel lo hle mai a, an rawngbawlnaah nasa takin harsatna an tawh phah a ni.
2. Inkal pawhna (Communication) a tha lo hle bawk a, chu vang chuan harsatna tam tak an tawh a ni.
3. An hlawh a tlem hle hlawm a, thenkhat chuan khatih hun lai a pawisa Rs 8/10 te an hlawh a, engemaw changin tamte a tla in, inkal pawhna a that loh em a vangin hlawh pawh ahun takah an hmuh theih loh chang a tam ang tih a rin theih a ni.
4. Ram a la changkan loh em avangin natna leh hri leng a tam a, damdawi hmanga inenkawlina (treatmant) tha an tlakchham em avangin Missionaryte an inhloh tam phah ni in a lang.
5. Miria te hi khaw khatah in tlem te te in an awm thin a, hemi a vanga harsatna hi chu tun thleng hian kei ni pawhin kan la tawh a ni.
6. Miria te hi hnam luhlul tak leh lungual lo tak an ni a, midang/hnamdang tihdan zir duh lo hnam an ni bawh. Chuvangin hetih hun lai a Missionary te tan ram lâk a harsat tur zia chu Pastor Chownglowka (Miria) chuan “Missionary hmasa te’n Mire ram a rawng an bawl lai kha chuan mite an luhlul in an sak em em a, lung bang sut aimah in harsa zawk hial ang,” a ti a ni. An luhlul leh an mawl a vanga thlahthlam chu Lalpa hmaah chhuanlam a tling si lo.

Mahse, Krista Pasaltha te’n Mire ram a Chanchintha meichher an lo chhit tawh chu kan Pathian thu in, “*Maichamah mei a nung reng*

*anga, a mit tur a ni lo.”* a lo tih tawh angin tun thleng hian Chanchinṭha mei chu mit lovin a alh zual zel a, tunah chuan hmun tam tak a kâng kâi tawh a, Mire hnam sing ruk velah Kristian mi sangkua leh zahnih velh lai chu an awm ve tawh a ni. Empu khua-ah pheî chuan Biakin ropui tak a dîng luah tawh a ni. Chanchinṭha meichher chhi eng zau zel tur chuan Mire ramah thawh tur a la tam hle a ni.

Mire hnam zinga lehkha zir hmasa ber chu Klownglai-a a ni a. A ni hi NEIG Mission hnuaiah Evangelist in a thawk a, NEIG Mission a awm tawh loh hnuaiah pawh Malumghat Baptist Mission hnuaiah Evangelist hna hi a la thawh chhunzawm zel a ni. Adawttu chu Menkrawi a ni a. A ni hi NEIG Mission sikulah ztitirtu in an hmang nghal a ni. Chutih hun lai a an Sikul awmna chu Miza Ruaza Para-ah a ni a, Bandarban a ṭanga Mire ram lam a kal in mei 16, tun a C.M.B Banglow tlak lam a awm a ni, tunah chuan chumi hmunah chuan khua a awm tawh lo. Mire ram a NEIG Mission in chumi hmun a Sikul an siam chu kum 1939 bawr vel kha a ni. Chu Mission School ah chuan Missionary fate pawh an kal nual a, chung Missionary fa, chu mi hmun a sikul kalte chu hengte hi an ni.

1. **Pastor H.Dala fate** : 1. Kamliani. 2. Thangliana.  
3. Remlala.
2. **Evan Zakhuma fate** : 1. Sangliana. 2. Rinliana.
3. **Evan Tleikawnga fate**: 1. Lallawma. 2. Thantlaii.  
3. Singmen.
4. **Evan Thangkunga fa** : Biakhnuni.

#### **Chuta Mire naupang lehkha zir ve te:**

Mire Kristian hmasa ber Klownglai thlan Empu-ah

1. Chownglowk. 2. Laikowi. 3. Khamlai, 4. Klownglai Dawlapow, 5. Menkrawi Dawlapow, 6. Angka Kolodain Atuang, 7. Menpiaw Kuaichah, 7. Tumsek Simlung (Hmeichhia) te an ni a, heng mite bâkah pawh hian duh chang changa sikul kal ve ṭhinte pawh an awm nual bawk. NEIG Mission hun lai a Miaria lehkha zirte an chanchin han chhui leh deuh bik ila.



**1. Klownglai Dawlahpow** A ni hi Mire ram a sikul a kal hnu in Tlabung bul Sirte khua-ah pawl ruk thleng a kal a, a nau Menkrawi Kristian-ah a siam a, Menkrawi chu Mire ram a sikul a kal hnu in Churochanpur-ah sikul a kal tir leh nghal a. Klownglai chu NEIG Mission hnuai a Tirhkoh hna a thawh hnu in Malumghat Baptist Mission hnuai a Tihrkoh hna a thawh chhunzawm leh nghal a ni. A ni hian fapa 2 anei a, chung afapa pahnih chu Mangchowng leh Mangling te an ni a, anni hi tunah hian Dingte khua a kan Kohhran ban pawimawh tak an ni.

Menkrawi nupui Pi Thanveli thlanlung Empu khua ami

**2. Menkrawi Dawlapow** : Churochanpur-ah sikul a kal zawh hnuin Mire ramah NEIG Mission hnuai a Evangelist Teacher hna a thawk a. Pastor H. Dala nupui Pi Rozami nau Pi Thanveli nupui a nei a, Pi Thanveli hi a naupan lai a tanga Mire ram a awm a ni a. A ni nen hian fa 3 an nei a. An fa upa ber chu Kamdingliana a ni a, 'Dingte' tiin an kova. Chutih lai a an awmna chu Boli Bazar leh Thanchi inkaraah a ni a, Chu khua chu tun thleng hiang 'Dingte' khua an la ti a. He khuaah hian kan Kohhran (BCM) Pastor Quarter tha tak awm a, Thanchi Aria Field Supervisor Pastor Lawmtliha'n a thut chill a ni.



Menkrawi hi Kristian hmasa niin Evangelist Teacher hial nimahse, rinna kawngah a chak lo hle a, a hun tawp lamah phei chuan Kristian a chhiar ngam loh khawpin a tlachhia a, Afate pawh pakhatmah Kristian-ah a siam thei lova, tunhnu a kei nin an khua kan awp tak hnu hian a fa naupang ber tih loh chu atu te nen Kristianah an awm vek tawh a ni. Afa naupang ber Khamlai-a chu Budish a la ni.

**3. Angka Kolodain Atuang** : A ni hi Churochanpur-ah pawl hnih thleng lehkhah azir a, Mire ramah a rawn kir leh a, a nau Chownglowk Kristian-ah siam a, lehkhah a zirtir nghal baw. A ni Angka hi chuan Pathian rawng a bawl thu kan hre lo.

**4. Menpiaw Kuaichah** : A ni hi Churochanpur-ah pawl thum thleng lehkhah a zir a, Mire ram a a rawn haw leh hnuin Pathian rawng a bawl duh lova, a hun tawp lamah phei chuan a hnu ngai,



ramhuai biakna lamah a kir leh a, a thih thleng in Lalpa lam a hawi lehtawh lo.

5. **Laikowi Saula** : Churochanpurah pawl hnih thleng lehkha a zir hnu in Bawm ram a NEIG sikul ah pawl thum a zo leh a. A ni hian achipui Miriate zingah a phak ang tawkin a chhandamtu Lalpa rawngbawl hna a thawk a, Bawm khua-ah awmin a tu leh fate pawh Kristian an ni vek.

6. **Tumsek Simlung (Hmeichhia)** : A ni hi a nu nen a hmeithai an ni a, a ke a zen avangin Missionary te'n an inah lehkha an zirtir thin a, Chumi hnuin NEIG sikul Churochanpur-ah pawl khat thleng lehkha a zir ve a. Mire ram a arawn kir leh hnu chuan a ke a zen a vangin Lalpa rawngbawl hna a thawk thei lova, mahse Bible a ngaina em em a, a thih dawn thleng in Bible chhiar a thlah lo a ni.

7. **Chownglowk Kolodain Atuang** : Apa hming chu Nüdowi a ni a, 'Nüdowi' tih awmzia chu, 'midang engahmah ngai lo' tih na a ni. Nudowi fapa Chownglowk hming awmzia chu "Amah chiah hi mi a tling" tih na a ni. An pafa hming hi a dangdai em avangin ka han tarlang ve hrim hrim a ni.

Pastor Chownglowk

Apa Nüdowi hi an khua Kharbari a ni a, a ni Chownglowk hi an unau sawm leh pakhat zinga a sawmna a ni a. Kum 1928 January thla-ah apiang a, kum 11-mi a nihin Mire ram NEIG sikulah lehkha a zir a, kum 1942-ah Manipur State a NEIG Mission sikulah lehkha a zir leh a. Heta lehkha a zir lai hian Pachhunga nen an inkawmna a tanging Thlarau lam a piantharna a chang a.



A lehkha zir lai hian Kristian a nih a vangin a chhungte'n an ngaihsak duh lova, hreawm a ti viau na in Kristian a nih tawh a vangin a chhungte ngaihsak lohna pawh chu chhel takin a tuar zel a. Lalpa tanpuina in a zirlaiah pawh a tluang hle a ni.

British leh Japan indo buai a vangin kum 1943-ah Bawm ram Pankhiang khua-ah Primary a zir zawm a, Primary a zir zawh hnu in Churochanpur-ah Junior High School a kal chhunzawm leh a, chuta lehkhā a zir lai chuan an zirtirtu Rev Lalthanliana'n an ram a haw leh a a chipuite hnen a Lalpa rawng a bawl theih nan a chipui, Miria te inchei dan a inchei chu ṭha zawk dawn in a hrilh a; bâkah, chutiang a Mire inchei a a inchei loh chuan nupui pawh a hmu thei dawn lo a ni tih a hre nghal bawk a. Chutia lehkhā a la zir lai chuan a sam a zuah a, a chhipah a zial ngoh mai a ni.

Junior High School a zawh hnu chuan an ramah a haw leh a, nupui nei in a nun chu a lo inthlahdah deuh a ni ang, ringlomi ang main a tlusawp ta hle mai a, a nupuite then in nupui dangte a nei a, ramhuai puithiamah hialah a ṭang leh ta mai a. Mahse Lalpa mihriat, piangthar tawh leh a chipuite zinga Lanpa'n a rawngbawl tura a belruat a nih a vangin Lalpa'n a tlukna a ṭang chuan a kaitho leh a. Mire hnam zinga Lalpa rawngbawltu ṭangkai tak leh Kohhran ban pawimawh tak a lo ni leh ta a ni.

A u Angka ang main huan thlai siam lamah a tui em em mai a, huan thlai siam turin midangte pawh a zirtir in a ṭanpui nasa hle ṭhin a. Kohhran pawh an lo pung zel a. Chutih hun lai chuan NEIG Mission a awm tawh loh avangin Mission hrang hrang a bel kual a, mahse eng Mission mahin a duh angin Mire Kristiante chu an enkawl thei lova, chuvangin kum 1978 khan rinna a anmahni hringtu Mizo te bawk chu anmahni enkawl tura sawm turin Mizo ramah a kal a.

Chutih hun lai a Zoram Baptist Mission (Z.B.M) hruaitu Rev C.L. Hminga a rawn bia a, mahse chutih lai chu Mizoram chu rambuai a la nih a vang leh Mire ram chu Bangladesh a awm a nih a vangte, Chakma hel ho avangin ram buai an ni ve tho si a, kawng a la inhawng thei rih lova. Mahse, Miria te'n an mamawh em em; NEIG Mission hun lai a Mire ṭawnga an lo dah tawh Johana bu mal chu Z.B.M chuan Emergency in J.B.Printing Press-ah Copy sangkhat lai an lo chhut sak a.

Aizawl lamah Pastor pakhat (he Pastor hi a hming kan hre lo) in copy sanghnihi lai a lo siamsak ve bawk a, Chu chu Presbyterian Kohhran in Mire ram a phur thla turin Lunglei thleng an rawn dah

bawk a. Hla Pastor H.Dala te lo lehlin, Evan Lal̤huama'n a bu a a buatsaih pawh bu tam tak an chhut sak bawk a. An mamawh em em Chanchin̤tha Johana bu mal leh hlabu; hla 75 awmna chu Lalpa'n Mizo te hmangin Miria te a pe leh ta. Lalpa chu fakin awm rawh se.

Pastor Chownglowka'n Beiseina sang tak nen a Miria te thlarau bo chhanchhuak tur leh thlarau lam a an puitlin ve theih nan a anmahni enkawl tura Mizo Kristian te a sawmna chu ahlawhtlin tak loh a vangin a beidawng em em a, a mah alo upa tawh bawk nen, chakna reng a nei tawh lova. chutih lai-in Mizo-te a auh a ̤anga a kum 13-naah Lalpa'n kei achhiahhlawh tling lo tak mai hi Mire ramah chuan min tir thla a ni.

Pastor Chownglowka'n an hnam thlarau bo chhanchhuak a enkawl tura a lo bei sei em em Mizo min han hmu chu a hlim em em mai a, Kohhran angin Mizo te'n Mire ramah hma la thei rih lo mah ila a beiseina Lalpa'n ati hlawhtling ngei dawn in a hre tlat a ni. Kum sawm chhung tukhaw hriat lova mahni a ei inzawn chawp a ka awm hnu in kum 2000 Jun thla a̤ang chuan Baptist Church of Mizoram (B.C.M) chuan Mire ram chu Field a neihin hma a rawn la ̤an ta a, Pastor Chownglowka'n a auh a ̤anga kum 22-naah Lalpa'n kei, achhiahhlawh tling lo tak hmang hian a rawn hlawhtlin tir ta a ni. BCM-in Mire ram chu Field ang a hma an rawn lâk tantirh lai hian Pastor Chownglowka chu kum 72 lai a upa ni tawh.

Pastor Chownglowka hian Mire Bible Thuthlung thar a letling a, Thuthlunglui lehlin lai chuan kan thawk dun a, alo upa tawhin a hriselna a lo ̤ha lo zela, duh angin rawngbawlna lamah a inhmang hlei thei tawh lo hle mai a, natna khum a a awm lain min kova, ka hnenah chuan, “Ka fapa, ka hna chhunzawm zel tur leh Mire hnamte hmangaih tak a lo enkawl zel turin ka ring che a, nang i awm a vang in thlamuang takin ka kal thei dawn ta e. Ka Almera kha hawng la ka Certificate te leh ka lehkhaw pawimawh zawng zawng chu la vek la, ka Bible lehlin lai pawh la vek rawh, nangman i lo chhunzawm dawn nia,” min ti a.

Kei chuan a sawi ang chuan ka la vek a, a hnu lawk chuan kei chu Office thil tul pawimawh a vangin Mizoram-ah ka kal a, Mizoram a

ka awm chhungin kum 84-mi niin, ni 13 April 2013 chuan a rawng a bawlsak thin Lalpa hnenah chawl hlen tawh turin Lalpa'n a hruai haw ta a ni. Ka Pa Pastor Chownglowka thih thu Lunglei a ka awm lai in ka han hria chu; ka awm lohva min lo kalsan chu pawl ka ti em em mai a, a ni pawhin a thih dawn darkar thlengin min lo lam lawm lawm chungin mual min lo liam san ta a ni.

Mahse, Lalpa'n Pastor Chownglowk hi chawimawi a lo duh zawk a ni. Pastor Chownglowk vuina inkhawm chu Lunglei a ka awmna Pu Lalmangaiha (Mangaiha) te in, Lunglei Moria-ah kan nei a, BCM hruaitu lian mi engemaw zat leh Lunglei veng hrang hrang a Kohhran hruaitu te leh midang tam tak, Mangaiha te in lian ve angreng tak mai, a chhungah pawh leng lovin an kawt laiahte an la thu hmur mai a. Chuti tak mai a ka Pa Pastor Chownglowk BCM Hruaitu te leh veng hrang hrang Kohhran hruaitu leh mipui tam tak in Lunglei khawpui atanga a ruang thlahna inkhawm kan han nei thei chu ropui ka ti lutuk leh ka lawm lutuk chu ka hnuk a ulh zawk a ni.

Mire ram a an in a a ruang thlahnaah pawh Mire Kristian tam takte an rawn kal khawm bâkah Bawm ram a tangin Kohhran hruaitu leh Kohhran-mi tam takin a ruang chu ropui takin an thlah liam bawk a ni. Pastor Chownglowk hi Lalpa'n a va chawimawi nasa tehlul em. He lehkhahu a NEIG Mission chanchin leh Miriate khawvel ka ziaaknaah pawh Pastor Chownglowk, mifing tak mai hnen a tang hian a tam zawk chu thu chiang ka hriat phah in ka ziaak theih phah a ni. Achungah ka lawm tak meuh a ni.

## **1. VOLUNTARY MISSIONARY-TE CHANCHIN.**

N.E.I.G. Mission awm tawh loh hnu chuan rambuaita a lo ni bawk nen, Mire ramah chuan Mission mumal awm lovin Lalpa rawngbawltute an reh thuap mai a. Chutih lai chuan Mire Kristian tlemte lo awm tawhte pawh chu an thamral ta emaw tih mai turin chakna reng an nei tawh lova. Chutih lai chuan Mizoram pawh rambuaita a lo ni ve leh zel bawk si a. Mizo mipuite chuan an unau Miria te thlarau bo chu an lainatin an vei em em renga, mahse eng Mission mahin Miriate thlarau bo hruai chhuak turin hma an la thei bawk si lo.

Chuvangin an unau Miria te thlarau chu aboral mek a ni tih hre reng chung chuan mahni inlumah an thut reng theih loh a vangin Miria te thlarau borat mekte hruai chhuak turin mahni inchawmin Voluntary Missionary mi engemaw zat Mizoram a vangin an liam thla a, chung Voluntary Missionary-te chu kan hriat thei chinte lo târlang ila, tihsual palh leh kan târlan hmaihte pawh an awm mai thei, kan tihsual palhte a awm a nih chuan khawngaih taka adik zawk min hrilh turin chhiartu te ka ngen a che u. Mire ram a awmchilh a **Voluntary Missionary te chu henge hi an ni:**

| <b>Hming</b>                             | <b>Awm rei zawng</b> |
|------------------------------------------|----------------------|
| 1. Rev, H.Killuaia                       | 1965 – 1966.         |
| 2. Evan Zahmingthang                     | 1974 – 1981.         |
| 3. Pi Romawii, w/o Evan Zahmingthanga    | 1976 – 1981.         |
| 4. Evan Tv, Raldokhuma                   | 1976 – 1986.         |
| 5. Evan, K.Lawmsanga                     | 1977 – 1980.         |
| 6. Pi, F.Lianzari, W/o Evan, K.Lawmsanga | 1977 – 1980.         |
| 7. Evan Tv, Lalthanmawia                 | 1977 – 1978.         |
| 8. Evan, Tv, Biakzama                    | 1977 – 1978.         |
| 9. Evan Tanmanga                         | 1977 – 1978.         |
| 10. Evan NI, Machhini (Mapuii)           | 1977 – 1978.         |

Heng Mizoram a tanga Voluntary Missionary te'n Mire hnam zinga chanchintha an hril lai hi Mizoram buai lai a ni a, chutih lai chuan Mizo hnam sipai M.N.F te chuan Bangladesh Bawm ramah Headquarter nei in Bangladesh sipai te nen a inberem in Bangladesh sorkar chuan Mizo hnam sipai te chu Sangha (Songgo ti a lam rik tur) chhuah lam a awm turin an ti a, Sangha luiral tlak lamah chuan Mizo hnam sipaite chu kal lo tura tih an nih a vangin chung hun lai a Voluntary Missionary te tan pawh chuan Sangha luiral Mire ram a kal chu a him loh a vangin Bawm ram a Mire awm ho zingah chanchintha chu an hril ta a ni.

Pu Tanmanga leh Machhini (Mapuii) te chu Sangha luiral tlak lam Mire talangpui a Empu khua-ah kum khat an awm a, an awm chhung hian Pathian in a veng tlat a, engemaw ti a Mizoram a an chhuah hlan in Bangladesh Army te chuan Empu khua-ah Mizo an awm tih an lo hria a, Empu khua Kharbari leh Pastor Chownglowk bâkah mi

pathum, anvai in mi panga an man a, mahse Mizo hnam sipai MNF te'n an chhanchhuak leh ta a ni. Mapuii leh Pu Tanmanga pawh chu Mire ramah an rawn kir leh tawh lo.

Mizoram a tanga Voluntary Missionary te chu Mire ramah an luh thlak theih loh a, Bawm ram a Mire awm hote hnen a rawng an bawl lai chuan Bangladesh a Bawm thenkhat te chuan Mire ramah Mission puitu pawh nei mumal lovin rawng an lo bawl ve bawk a. Mire tlangpui, Matamuhuri leh Marancha hungh velah anmahni kotu Lalpa rinchhanin thahnemngai takin an Lalpa tan an lo thawk a. Lalpa hnenah Miria te thlarau bo tam tak hruaiin Biakin pawh engemawzat an lo din hial nghe nghe a.

Mahse, Mission tanpuitu mumal an neih loh avang leh Miria te thlarau lam a an thanlen theihna atan a an mamawh phuhruk saktu an neih loh a vangte in anni pawh chu an duh anga thawk reng thei lovin, Mire ring thar, rinna kawnga tiak tir te te, la enkawl ngai em emte chu enkawl zui zel thei lovin an kir san leh vek ta mai a, chuvang chuan Mire Kristian te chu thang thei lovin an awm a, tam tak chu hnim hlingnei zinga tla ang mai in an nun dan hlui chuan a chim ral leh ta a ni.

**Chutih hun lai a Bawm ram a tanga Voluntary Missionary te chu:**

- |                          |                   |
|--------------------------|-------------------|
| 1. Evan Tluangkhop.      | 2. Evan Sangtel.  |
| 3. Evan Ngunzuam.        | 4. Evan Zingmuan. |
| 5. Evan Ruatkual.        | 6. Evan Paknin.   |
| 7. Evan Pakthliar.       | 8. Evan Saitling. |
| 9. Evan Phundo te an ni. |                   |

Heng ka han tarlan bâkah pawh hian Mire ram a Kohhran chawm nilova Bawm ram a tanga Voluntary Missionary ka ziah hmai h palh an lo la awm a nih chuan, chhiartu duhtak, chung ka ziaak lan hmaihte chu khawngaih taka min rawn hrilh turin ka ngen a che.

Heng kan han tarlan tak Voluntary Missionary te hi an awm hunchhung ka hriat theih loh a vangin an awm hunchhung kum ka rawn tarlang thei lo a ni. Tin, heng mite bâkah awmchilh lem lova Mire ram a rawngbawl a kal thin, kan unau Bawm hnam zingah mi engemaw zat an awm ngei ang tih ka ring bawk a ni.

Heng Bawm ram a tanga Voluntary Missionary te hi Mire tawng thiam tak tak tepawh an awm nual a, chungte chuan hlate lo lehlin sakin a aw b te an lo zirtir thin a, Mizo lengkhawm zai hla pawh Mire Kristian thenkhatte chuan an lo thiam em em a ni.

Heng kan sawi takte, Lalpa tan a thahnemngai tak leh rim tak a lo thawktu te'n harsatna tam tak a vanga an ram a an haw leh tak hnu a tanga kum engemawzat liam hnuin tun hun hnahnung lamah hian Lalpa'n kei achhiahhlawh tling lo tak mai hi Miriate thlarau bo hruai chhuak leh chawm puitling turin Mire ramah min tira, keimah mai chuan thawh theih ka neih tlem em a vangin kum sanghnih hnu lam atang chuan Baptist Church of Mizoram leh Mission dang dang Lalpa'n a rawn tir bawk a ni.

Hmelma pa Setana, Diabawla an tih bawk chuan Miria te taksa leh thlarau boral tur chhanchhuak a Krista hnen a hruai thlenna dodal turin theihtawp a chhuah a, a dodal theih natur a nih phawt chuan eng hmanrua pawh a hmang duh a, a hmang mek zel bawk, Miriate thlarau bo chhanchhuah in an awm mek a ni tih a hriatin, "Tlangsamah ramhuai a pawng tal e," an tih ang mai in kan hmelma pa hi a pawngtal mek a ni.

Engang pawhin hmelma pa hian min bei mahse Lalpa kan lamah a tanga, Lalpa Kohhran te hian kan unau Miria, satana bawi a tang mekte chhanchhuah hna hi beidawn san mai lovin, chhel leh huai takin i bei zel ang u. Indona chu Lalpa indona a ni a, huai tak leh chhel taka kan bei zel chuan hnehna kan chang ngei ang, hnehtu Pathian vangin.

### **3. Evangelical Christian Church (E.C.C) Mission:**

Evangelical Christian Church (E.C.C) tunah rih chuan Bawm ram Kohhran hrang hrang zinga atam ber leh achangtlung ber an ni a. Tunhma, Voluntary Missionary te'n Mire ram a an thawh hun lai 1973 – 1974 bawr vel khan ECC kal tlang a Prenbyterian Fellowship of Bangladesh te Sponsorna in Mire ramah an thawk a, chutih hun lai a Mire ram a an thawktu te chu hengte hi an ni:

1. Pastor Chownglowk (Miria)
2. Pastor Nguntuar (Bawm)
3. Evan Singrau (Miria)
4. Evan Laikowi (Miria)
5. Pastor Krawngtawng (Miria)
6. Evan Ruatkual (Bawm)
7. Evan Sangtel (Bawm) te an ni.

Heng kan han tarlante hi Mire hnam zinga an thawh hun chhung kan rawn tarlang thei lova, Prenbyterian Fellowship of Bangladesh te Sponsor-na a an thawh hunchhung hi a rei vaklo niin alang. Prenbyterian Fellowship of Bangladesh te Sponsorna atawp hnuah pawh tun thleng hian Mire hnam zingah hian tam vak lo chu thawktu an la indah a ni.

#### **4. Christian Fellowship Of Bangladesh (C.F.B) chanchin.**

C.F.B. Mission President chu Rev Rualthanmawia Chhakchhuak a ni a, a ni hi S.Koria leh America a tanga Sponsor nei a Mire ram leh hmun dang dang a Lalpa rawngbawl na hna thawktu a ni a, Mire ram bik hi kan ziah lan duh a nih a vangin Mire ram a thawh dan kan ziaik dawn a ni.

Mire tlangpui, Pawpla Headman khuaah ni 7 February 1989 khan ruai ropui tak a buatsaih a, Mire Kristian te a ko khawm a, chutah chuan Mire Christian Church (M.C.C) a din pui a, MCC kaltlang chuan Mire ho zingah chuan Lalpa rawngbawl hna kum 1990 ah a thawk tan nghal a ni. Pu Rualthanmawia chuan Mire ram a Lalpa rawngbawl hna tihtakzet a a thawk dawn a an hriat a vangin Mission dang dang a awmte pawh chu Mission pakhat a awm chuan tha zawk dawn a an hriat a vangin MCC ah chuan an awm tlang ta dial a.

Chu Mire Kohhran thar MCC chu enkawl turin Dt 7 February 1989 chuan hruaitute an inthlang nghal a.

#### **Chung an hruaitu (O.B) an thlante chu:**

- |               |                           |
|---------------|---------------------------|
| 1. Convener   | Rev, S.L. Pardo (Bawm)    |
| 2. Senior Adv | Pastor Chownglowk (Miria) |
| 3. Chairman   | Evan Vanlalruata (Miria)  |



4. Secretary
5. Tresurer

Evan Lalngura (Mizo)  
Evan Chawngtai (Miria)

### **Committee Member's:**

1. Nawmprah (Miria). 2. Paleh (Miria) 3. Meniawng (Miria)
4. Menpiaw (Miria) te an ni.

He an Kohhran thar din, Mire Christian Church (MCC) hian Pu Rualthanmawia Kohhran din Christian Fellowship of Bangladesh (CFB) chu a zawm nghal a, chu Kohhran a thawktute hlawh pawh chu CFB chuan a peksak vek a ni. Mahse, MCC chu anmahni chhungkuaah buaina neuh neuh a awm a vangin heng an hruaitu thlante hian kum khat pawh an hruai hma in an tilh san leh ta deuh vek a, mahse chu an Kohhran thar din chu CFB hnuaiah a la kal ve zel a.

CFB chuan Mire ram a thawktu pawh a ruai tam hman hle a, mahse thenkhat te chu reilote kum khat pawh tling lo an thawk a, an ban san leh a, thenkhat chu hlawh a pe tlem em em a, a pek a te pawh regular tak a pek mumal a nei meuh lo. Thenkhatte phei chu thlakhatah Tk 500 chauh pe a a rawihte pawh an awm.

Pu Rualthanmawia chuan Mire ram a ka awm thu a lo hriat chuan kum 1992 kumtir lamah Dhaka a a hnen a kal turin min chah a, a hnen a ka va kal chuan Pu Rualthanmawia chuan, “Lalpa rawngbawl in Empu khuah harsa takin i awm tih ka lo hria a, a remchan chuan tanpui che ka duh a ni,” a ti a. Kei chuan, “Pu Mawi, min tanpui i duh a ka lawm takmeuh a ni, mahse Mizoram a kan hotute ka biak ve phawt a ngai ang,” ka ti a, a ni pawh chuan a remti a, Mizoram a kalna tur Tk 500 min pe a, Mizoram a kan hotute hmu tur chuan ka kal ta nal nal a.

Mizoram ka han thlen a kan Team, Abassador for Christ Team Speaker Upa K.Lawmsanga chu thilawmzia ka han hrilh chuan a ni chuan, “Chutia CFB Mission in a lo tanpui theih che chuan a tha a lawm. Pathian remruat a nih dawn chu, keini lahin duhangin kan tanpui thei mang si lo che a, mahse keini lam pawhin tanngtaina leh thilpekin kan theih ang tawh chuan kan tanpui ve reng thovang che, kan thlahthlam dawn chuang lo che a ni tih i hre reng dawn nia,” a ti

a. Phur takin Bangladesh-ah chuan ka kir leh a Dhaka a Pu Rualthanmawia hnenah chuan va kal leh in thilawmzia chu ka va hrilh a, CFB Mission chuan ni 22 Feb 1992 atang chuan min tanpui a, thla khatah cheng 1200 min pe ve a, ka lawm khawp mai.

CFB Mission in Mire ram a a thawh tak tak hun chhung chu kum 1990 – 1999 a ni a, mahse kum 2000 hnu lam a la awmte hi CFB President Rev R.T. Mawia anmahni Sponsor leh tura an ngen avang a hlawh a pek leh te a ni. Mire ram rawngbawlna chawlhsan a tum hnuah mi tlemte in anmahni tanpui tura an ngen tlat a vangin hemi lehkhahu ka ziah lai thleng hian mi 2/3 te hlawh chu a la pe a ni.

Ahun lai kha chuan Mire ram a Mission thawkte zingah a thawk hlawk ber a ni. Chutih hun lai a thawktute chu henge hi an ni:

|                                  |              |
|----------------------------------|--------------|
| 1. Pastor Chownglowk (Miria)     | 1990 - 1999. |
| 2. Pastor Ngungtuar (Bawm)       | 1993 - 1999. |
| 3. Evan Lalngura (Mizo)          | 1990.        |
| 4. E/T. Sailuaia (Bawm)          | 1990.        |
| 5. Evan Kapchhuana (Lai)         | 1990 - 2004. |
| 6. Evan Vanlalruata (Miria)      | 1990.        |
| 7. Evan Rosanglura Fanai (Mizo)  | 1992 - 1999. |
| 8. E/T. Ruisi (Miria)            | 1990 - 1992. |
| 9. Village Doctor Tuarbil (Bawm) | 1992.        |
| 10. Evan Meniawng (Miria)        | 1990.        |
| 11. Evan Mentui (Miria)          | 1990.        |
| 12. Evan Lalrawngbawla (Mizo?)   | 1991 - 1992. |
| 13. E/T. Hranglianthanga (Pang)  | 1992 - 1993. |
| 14. E/T, V.L. Renga (Pang)       | 1993 - 1995. |
| 15. E/T. Ramtawntang (Bawm)      | 1993 - 2002. |
| 16. Pastor Iowngtung (Miria)     | 1998 - 2002. |
| 17. E/T. Lalhuntiam (Bawm)       | 1998 - 2002. |
| 18. Evan Daikhu (Miria)          | 1990 - 1993. |
| 19. Evan Menlawng (Miria)        | 1995.        |
| 20. Evan Patdi (Miria)           | 1997 - 2000. |
| 21. Evan Tlanguai (Miria)        | 1997 - 2000. |
| 22. Evan Kainguai (Miria)        | 1998 - 2002. |

CFB Mission hian Mire ramah School te din in Mire hlabu ka buatsaih chu min chhut sak a, Mire a aw b bu ka siam pawh copy 50 lek chu min chhuah sak bawh. Mire Bible thuthlung thar Pastor Chownglowka lehlin chu a lettu lehlin dan ngai ngai leh Computer a chhutu chhut dan ngai ngai in vawikhat pawh lehlin sual leh chhut sual pal a awm leh awm loh ennawn lek lohvin a bu an siam thawr bawh a, awmlo ngawt ai chuan azia ve hrim hrim tho mai. Mahse, alehlin lai leh a chhut laiah ennawn loh ngang a nih a vangin hnam dang Bible hman thei te chuan kan hman duh lo.

### **5. Maruchah Chgristian Church (MCC) thiat in Maruchah Christian Fellowship a lo piang chhuak leh ta.**

Kum a lo in her zel a, kum danga kan tih thin ang bawkin MCC Annual Conference chu Empu khua-ah ropui takin hman leh kan tum a, hemi tum hian kan hotu Rev RT Mawia te chhung pawh kan sawm ve a. Anni chhung hman remchan dan in MCC khawmpui chu ni 25 January 2000-ah kan sawn ta a. Chu kan hun ruatah chuan Pu Rualthanmawia te chhungkua leh Koriam engemawzat an rawn tel ve a.

Kan hotu Pu Mawia te rawn kal chu nghakhlel tak a kan thlir lain an lo thlen har tak em a vangin kan lo inkhawm san a. Kan inkhawm ban dawn lamah chuan an lo thleng a. Chawhnu lam rorel kan neih hma chuan Pu Mawia chuan Biakinah min ko khawm vek a, “Pastor Chownglowk leh Pastor Iownglung chauh hlawh ka la pe ang a, midang zawng chu hlawh ka pe thei tawh lovang, Mire ram a ka rawngbawlna hi chawhlsan ka tum tawh a ni,” ati a, chumi hnu rei lovah chuan an haw leh ta a.

Pu Mawia te haw hnu chuan MCC khawmpui rorel turte chu Biakin chhungah chuan rorel turin kan lut khawm leh a, Pu Mawia thil sawi chu mak kan ti in angaihna kan hre lo tlang hle mai a. Chutih lai chu MCC Secretary ka nih lai a ni a. Chutia rorel tura kan han thut khawm chuan, sawi tur kan van hlawm hle mai a. Pastor Chownglowk chuan, “Thiante riltam a awm lai a puar leh fan a lo awm bik chu ka duh love, kei pawh hlawh ka la bik lovang,” a ti a. Chutiang bawh chuan Pastor Iownglung pawh chuan a ti ve a.

Chutia Pu Ralthanmawia'n midang tumah hlawh a pe dawn tawh lova Pastor Chownglowka leh Pastor Iowngrung te pahnih pawhin Pu Rualthanmawia hnen a tanga hlawh lâk an tum bik bawk silohah chuan buaina lian tak mai kan nei ta tlat mai a. MCC thawhlawm lah chu Pu Rualthanmawia'n CFB ah pek vek tur a tih a vangin kan lo pe vek zel bawk si a, pawisa kawl sa kan lo nei miah bawk silova.

Chuvang chuan chuti mai chuan thawklehkhatah mahni ke a ding tur chuan kan tlin dawn lo a ni tih inhria in CFB Precident Rev R.T. Mawia hnenah kan chung a athatnate leh kan tan a thil tam tak min tih sak tawh a vanga lawm thu sawina leh zalen taka min tanpuitu tur kan zawn theih nan MCC in CFB Mission a thlahna lehkha pek chu kan sawi hovin tha kan ti tlang a.

Kei chuan MCC Secretary ka nihna in MCC in CFB a thlahna leh kum engemaw zat min lo tanpui tawh a vanga lawm thu sawina sei angreng deuhin ka ziaak a, Mizoram a ka chhoh a ngaih thut a vangin chu ka lehkha ziaak chu CFB President Rev R.T. Mawia lo pe turin Pastor Iowngrunga kutah ka dah a. A ni chuan ka chah ang ngei chuan a lo pe a. Mahse, Pu Rualthanmawia'n lehkha a han chhiar a MCC in CFB an thlah a ni tih a han hriat chuan a thin a rim ta em em mai a, lehkha chu amah petu Pastor Iowngrung kutah bawk chuan a lo pe kir leh a, Mizoram a tanga ka haw hnu chuan CFB President Rev R.T. Mawia tan a ka ziaak chu keima kutah bawk a lo kir leh a, CFB President chuan chu lehkha apawm leh pawm loh thu tanwngka in emaw, lehkha in emaw min rawn hrilh hran chuang lova. Apawm a ni ngei ang, Pastor Chownglowk leh Pastor Iowngrung te chu hlawh pawh a rawn pe zui ta bik lova.

Hun engemaw chen chu MCC chuan tanpuitu dilin kan tawngtai thin a, mahse min tanpuitu tur Mission kan hmu thei lova, Lalpa'n kan tanwngtainate min ngaihthlak sak lo ang mai hian a reh hian a reh vung vung mai a. Chutih lai karah Mission fahrah te te min thenhran tum an lo lawr ve chhen bawk nen, kan mite lah chuan, "Engtinnge min kalpui dawn, eng Mission in nge min rawn tanpui dawn, Hei kan khua-ah chumi Mission, kha mi Mission in, 'Kan Mission ah awm

ula chumi chu, khami kha kan pe ang che u,’ min ti,” an rawn ti chhen bawk si nen.

Ka tihngaihna hre lo chuan, “Puitling in ni a, ða in tih tih naah awm mai teh u, engpawh an lo pe che u in an lo ðanpui che u a nih chuan a dawn dan leh a hman dan in lo thiam chuan a ða vek e, Mission chuan thil chhia chu a rawn tihsak tawp lovang che u, an hnen a in awm chuan in chhiatna tur an ngaituah bawk hek lovang,” ka ti ta zel mai a.

Atawpah chuan Mire Kristian zawng zawng MCC a hmun khat a awm a lungrua tak awm ðin kha Mission dang dangah kan lo inñhen darh ta vek mai a. Kan khua Empu chauh chu Lalpa chhàna la nghak awmchhun chu kan ni ta mai a. Mission hrang hrangah lo awm darh pawh ni se, kan mi lehsate an lo nih tawh ðin a vangin kan inngai thei hle ðin a. Engemaw chang a anmahni tlawh a ka kal changte hian min lo lawm thei hle ðin a. Mahse, bialnu hlui pasal nei tawhte in a len ang maiin a awptu dang an lo awm tawh avangin ðawng kam fimkhur angai em em tawh mai a.

Hmun ðhenkhatah phei chuan anmahni awptu Mission leh lo awmchilhtu hnam dang thawktu te’n min ngaithei lo a ni tih hriat fahran in Pathian thu an hnen a kan sawite chu min khap ðin a. Kan inngaih leh kan inthlakhlelh tehlu vei nen, a lungchhiat thlak thei ðin khawp mai. Engmah lah chu tihtheih kan nei tawh bawk si lo. Thlarau lamah pawh Mire Kristiante chuan tlakhniam lam an pan phah hle mai a.

Mire Kristiante chuan Mission hmun khat a kan awm ho lai kha kan ngai thei hle ðin a, chuvangin heti hian ka ngaituah a, “Abul lamah insuih khawm thei lo mah ila a ler lamah tal chuan kan insuih khawm a ngai a ni,” tiin Mire Kristian zawng zawng, hmun hla leh hnai a mi pawh ka ko khawm vek a, Mission hrang hrang, dan leh in enkawl na dan inang tawh lo tak takte kan han inhmua khawm leh chu kan hlim in nuam kan tih hle rualin venthawn tur a tam a, a nuam hreawm a ni ber mai.

Chung Mire Kristian hmun hrang hrang a ðanga rawn kal khawmte chuan, “Mission khatah kan awmkhawm thei tawh lo a ni tih inhria

in kan awmna Mission thlauhtla chuang si lovin Fellowship din chu tha kan ti tlang em?” tih ka zawt a, tha kan ti tlang vek a. Ni 12 November 2000 kum chuan lungtual takin Marucha Christian Fellowship (MCF) chu kan din ta a. Kan awmna Mission hotute lam pawh tha tak a hrilhfhah theuh turin kan inti bawh a,. Chumi kum chuan hruaitu pawh temporary-in a ruat in kan inruat a. Chung kan hruaitu ruatte chu henge hi an ni:

1. Chairman : Pastor Iowngrung.
2. Secretary : Evan Ramtawnthang.
- 3, Tresurer : Mr Menpungh.

**Executive Committee Member's :**

1. Mr Meniawng. Kangku khua.
2. Evan Kainguai Naplaw khua.
3. Mr Bulu Mangtawng khua.
4. Mr Pale Kurang khua.
5. Evan Tuarthawn Kapru khua.
6. Evan Vanlalruata Sarawn khua.
7. Mr Menkaw Empu khua.
8. Mr Kuarnum Englai khua.
9. Evan Rambuaithang Namdui khua.
10. Evan Nawmpira Lama khua.
11. Evan Rosanglura Fanai Empu khua.

**Senior Advisor-te :**

1. Pastor Chownglowk Empu khua.
2. Pastor Chowngtai Malumghat.
3. Mr Singiawng Union Porisot Member.

Heng hruaitu a kan ruatte hian MCF khawmpui kan neih leh a hruaitu kan inthlan fel hma chu MCF hi an hruai rih ang a, khawmpui kan neih leh hmasa berah hruaitu kan inthlang tha leh a nga, kan hmalâk dantur pawh kan rel fel nghal ang, kan ti a.

Lalpa hruaina in ni 20 November 2001-ah kan khua Empu-ah bawh chuan MCF khawmpui chu kan nei leh a, hruaitu thar pawh kan inthlang leh a, chung kan hruaitu thlante chu:

- |    |                     |   |                              |
|----|---------------------|---|------------------------------|
| 1. | Chaiman             | : | Pastor Iowngrung B.C.M.      |
| 2. | Vice Chairman       | : | Evan Rosanglura Fanai B.C.M. |
| 3. | Secretary           | : | Evan Peklian E.C.C.          |
| 4. | Asst Secretary      | : | E/T. Ramtawnthang B.C.M.     |
| 5. | Tresurer            | : | Mr Menpawi (Iusup) B.C.M.    |
| 6. | Financial Secretary | : | Evan Kainguai B.C.M.         |

### **Executive Committee Member's**

1. Pastor Nguntuar. B.B.S.
2. Mr Saialh E.C.C
3. E/T. Vannunsang E.A.C.
4. Mr Singrau B.B.S.
5. E/T. Menngih B.T.A.B.C.
6. E/T. Zuamthliar B.B.F.
7. Evan Rengien B.C.M.
8. Evan Paia C.F.F.
9. Mrs Lalbuki E.C.C.
10. Mr Mangling B.C.M.
11. Missionary Sanghmunga L.I.K.B.K.

Mire Christian Fellowship (MCF) khawmpuiah hian Mire ram a Mission hrang hrangte intibuai lova Lalpa rawng kan bawl ho dial dial theih nan leh Mission hrang hrangte Pathian thu sawi a inrawih pawlh a inpumkhatna tha zawka rawng kan bawl ho theih dan turte kan rel a, MCF din chhan leh athiltum chu Mission hrang hrang a kan hotute/Head Office ah sap tawng, Bangla, Bawm tawng leh Mizo tawngte a ziaak a pek vek turin kan rel bawk a. Mission hruaitu thenkhat chuan tha min tihpui in kan khawmpuiah te min lo telpui ve thin a, thenkhat vethungte erawh chuan MCF a ding chu duh lovin min do tawp pawh an awm bawk.

MCF khawmpui wawi 2-naah chuan kumtin khawmpui neihte pawh kan rel a. Inkhawmpui kan neih chuan thupui kan thlang thin a, Speaker pawh hmun dang a mite kan sawm thin a, Pathian thu leh hlaahte inelnate kan nei a, infiam hunte pawh kan siam a, a nuam kan ti in kan hlim thei thin khawp mai. Khawmpui kal pawh kan thahnem thei thin khawp mai. Mire Kristiante thlarau lam nun

pawhin hma asawn phah hle niin ka hria. Kum hnih danah hruaitu kan inthlang thin a.

Hetia Mire Kristian Mission hrang hrang MCF hmang a kan inthlun zawm leh a khawmpui kan neih hian thlarau lamah leh Pathian thu leh hla hriatna lamah kan hlawk in hma kan sawn phah em em a. MCF khawmpui lian kan neih hmasak ber chuan Tv Ramengmawia Mizoram a tanga Bawm ram a Pathian thu hril a awm mek chu Speaker atan kan sawm a, a nin kan sawmna chu ngaipawimawhin min rawn tih hlawhtlin sak a, chumi tum a kan Thupui chu, 'Chhandamna' tih a ni a, A ni chuan fel fai leh fiah takin min zirtir thin a, khawmpui a rawn kal te'n kan hlimpui-in kan kham lo tlang hle a ni.

Kan khawmpui lian vawi hnihna-ah chuan Speaker atan Susil Tripura (Tuikuk) B.B.F Mission a an hotupa a ni a, a ni pawh hian Pathian thu Mire Kristian te hriat thiam phak tawh in min zirtir a, kan hlawkpui tlang khawp mai. Kapru khua a khawmpui kan neih leh tum chuan E.C.C. Mission Senior Pastor Lalsanga Speaker a tan kan hmang a, chuta kan thupui chu 'Thlarau thianghlim' tih a ni a, keiphei chu ka zai nasa lutuk chu khawmpui tawp dawn chuan ka aw achhang lutuk a, ka zai tha hlei thei tawh lo. Ava han hlim awmin avahan nuam thin tak em.

Thutak puangtu Team-te Prenchü-ah

Kum 2004 a Empu khua a khawmpui kan neih tum chuan kan Field Director Rev Lalhmunsanga chu kan Speaker a ni a, chumi tuma kan thupui chu 'Thiltih nei lo rinna chu a thi a ni' tih a ni a, min zirtir dan athiam bawh a, khawmpui palai te'n kan hlawkpui tlang takzet a ni. Kum 2012 a Prenchu



khua a khawmpui kan neih lai chuan Mizoram a Evangelist Team Thutak puangtute Team Speaker kan sawm a, mahse a ni chu a rawn kal hman loh a vangin an Team Director (J.Sanglawma, ka Nu nuṭa, ka Pu Mama) leh Team member thenkhatte an rawn kal bâkah Mire hla Music Vedio leh Audio a Cassettee pathum lai min lo zai saktu



ka farnu Lalmuanpuii (Puitei) zaithiamrawn tel chuan mi a hip leh zual a. Kan khawmpui chu a hlungin kan hlim tlang takmeuh a ni.

Prenchu a MCF khawmpui kan neih tum hian kei chuan tunhma angin thalaite hla ka zirtir hman tawh loh a vangin Mire Kristian-te chuan hla zirtirtu tur Mizo min dil nasa hle mai a, ahlawh pawh pek an inhuam hial a, chuti taka min ngen avang chuan ka nau Sangtea (J.Vanlalsanga, ka Nu chhang chiah ka Pu Lalduha fapa) Bualpui 'H' a zaipawl hruiatu; a aw a tha a, music a thiam in Solfa a thiam bawka, a ni chu minpui turin ka sawm a, a ni chuan ka sawmna chu Lalpa kohna a ngai in Mire thalaite hla leh Music zirtir turin arawn kal a, a ni pawh chuan a haw san thei tawh bik loh a vangin Bangladesh a mi Pang nula nupui a neiin tun thleng hian a awm ve tazel a ni.

Upa K.Dengdailova

Kum 12/13 chhung kum tin khawmpui kan neih khan kan khawmpui neihna hi a hautak ve em em a, Mission dangin sum leh pai-in min tanpui ngai meuh bawksi lova, kan Mission khawmpui lian Assembly kum tin neih ngei ngei kan ngai bawksi avangin kum 2013 lam atang chuan MCF khawmpui kan huaihawt thei tawh lova, keimahni BCM khawmpui ah



Mission zawng zawng kan sawm ta zawk thin a ni. Kum 2013 a kan Assembly-ah chuan Thutak puangtu Team Speaker Evan K.Dengdailova (Ka Nu u, ka Nu Kungi fapa) Speaker-ah kan sawm a, kan thupui chu 'Thilpek' tih a ni a, a sawi thiam em em mai bawka, tun thleng hian Mire Kristian te'n kan la hlawkpui em em a ni. Abiktakin kei ni Empu BCM Kohhran te'n kan hlawkpui leh zual. Chumi tum chuan Mire thalai hmun hrang hrang a tangin anrawn fuan khawm a, Pathian thu ngaithla leh Pathian fak leh chawimawin kan tlaivar a, thalaite an lam nasa in thlarauah harhna changin tam tak chu Lalpa tan a an lo inpek loh zia hriain an tap nasa mai a, khatiang tak a Pathian thu a vanga Miria te an tah leh an lam nasatkha ka hmuh vawi khatna a ni.

Mission hrang hrang aṭanga ṭhalai, Baptist Church of Maruchah (BCM) Assambly (khawmpui lian) rawn chhimtu te chuan Pathian thu ngaihthlak leh Lalpa fak a zai chu an la kham loh em a vangin ṭhalai ho te chuan, “Pastor, hetiang hian thlarau ruai min buatsai sak ṭhin rawh aw,” an ti a, thenkhat chu min kuah ngawih ngawih mai a. Kum 2014 a khawmpui BCM Assambly kan neih leh chuan, Speaker atan Evan Upa K.Lawmsanga, Ambbasador For Christ Team Speaker ah kan sawm leh a, a ni chu a nupui Pi Zari nen an rawn kal a, chumi tum a kan thupui chu ‘Pathian thu awih’ tih a ni a. Kan Speaker chuan a sawi thiam in angaithlatu te’n kan hlawkpui takzet a ni.

Kum 2013 a Baptist Church of Maruchah (BCM) Assembly ah chuan Mission hrang hrang a ṭhalaite Inthlahrung hauh lova thlarau lam ruai an ṭheh theih nan All Christian Kürthummi Powchak (ACKP) din sak ila kan ti a. Kan din sakta a. ACKP ti a hun engemaw chen an kal hnu chuan Sorkar hnen a thil dilte a la ngaih dawn a vang leh hnam dang tan pawh hriatthiam a awlsam zawk theih nan tiin ‘Maruchah Christian Youth Association’ (MCYA) tiin an thlak a, tunah chuan kan puihna tel lovin anmahni in an in-functions thei tawh a.

#### MCYA khawmpui 2020

An inkhawmpuina hnun thlanah pawh hian an duh uluk ve em em a, ring lo tamna hnun, an nungchang leh an thiltih te a vanga Pathian ram a zau theihna tur hmun an thlang deuh kher ṭhin a ni.



An khawmpui a Mire ṭhalai 600/700 rual zet Pathian thu an inzirtir leh Pathian chawimawiin an han fuan khawm chu a hmuhnaawmin a ropui tak zet a ni, an khawmpui chuan zaipawlte pawh an nei ve tawh a ni. Taksa chetna, harhna chang pawh an awm nual tawh bawh. Mire ramah, ka chhan ngeiah hetiang hi ka hmuh phak ka inrin loh tehlul nen. Ava ropui em. Lalpa chu fakin awm mawlh rawh se.



An Activety dang lehte chu Mire tlangpuiah hian Motor kawng a rawn awm a tang hian Pathian ni hi Bazar niah an hmang thin a, chu chu Kristiante tan a buaithlak em em a, inkhawm lova an thlai zawrh turte Bazar a zuar a ngaih thin a vangin Pathian niah inkhawm an tlem phah a, chubakah, chutia Pathian ni a pianga Bazar a kal chu ngaiah neihin inkhawm loh pawh pawisak lohna a lo lian zel a; chu chu tha lo an tih a vangin Mire tlangpuiah chuan Pathian ni a Bazar tawh lova Inrinni a Bazaar zawk turin an ti a, chu chu Kristian lote pawhin an zawm ve ta vek a, vai sumdawng ho pawh thil zuar leh lei tura Pathian ni a rawn kal tawh lo turin an ti a. Chuta tang chuan Pathian ni a inkhawm pawh kan tam phah leh ta a ni. An ti tha khawp mai.

MCYA te chuan chanchin tha hril in an feh chhuak thin a, an chipui Mire Kristian ziaak leh chhiar la thiam lo te ziaak leh chhiar an zirtir in zirtirtu te pawh an ruai ve bawk a, hei lo pawh hi MCYA hian Lalpa tan nasa takin an thawk bawk.

## 6. Baptist Church of Maruchah (B.C.M) lam vethung:

Mire Kristian-te hian Mizo Kristian-te hi taksa leh thlarau a anmahni chhanchhuak turin an beiseina hi a rei tawh hle a. Kum tam tak liam tawhah khan kan unau Miriate thlarau bo chhanchhuak turin Mire ramah hian Mizo tam tak an lo awm tawh in mi sawm (10) laiin Mire ramah hian an lu an lo phum tawh nghe nghe a.

Rev. Sangvela leh Pastor. Chownglowk

Mizo-te leh Miria-te hi thlarau lam a tangin nge thisen atang zawkin? Chhungril lam a inzawmna thuk tak kan lo nei tlat ni hian a hriat a. Mizo Kristian te'n thlarau bo veina kan neih phat atang khan Miria te thlarau bo hi kan lo vei rum rut mai a ni. Kum 1919 - 1944 daih tawh khan NEIG Mission kaltlang leh 1965 – 1978 Voluntary Missionary te'n Miria te thlarau bo zawn hna hi hautak hle mahse kan lo thawk daih tawh a.



Ka hriat theih chinah chuan a Field malkhai a Mizo te'n chanchin tha a vanga ram pawnah chuan Field dang zawng zawng ai a kan luh hmasakna ber leh kan lu phum tamna ber a ni in ka hria. Miria te thlarau bo zawn hna leh enkawl hna hi Lalpa'n keini Mizote kovah a dah tlat a ni. Miriate thlarau boral mai tur chhanchhuah hna kan thawk lo a nih chuan an thisen mawh kan phur lovang tih tunge sawi thei ang le. Anni lah chuan keini Mizo-te min auhna leh min beiseina a rei tawh bawk si a. Mizo Kristian te hian, "Miria te chu ram dang awm an ni a," ti in chhuanlam kan siam reng dawn em ni. Lalpa'n chu chu chhuanlam tlingah a ngai ve a ngem le?

Lalpa'n kei a chhiahhlawh tling lo tak mai hi tun hun hnuhnung lamah hian ka phak tawh leh ka theih tawkte a Miria te thlarau bo hruai chhuak tur leh kan hruai chhuah tawhte enkawl turin Mire ramah min dah ve a, a tul leh ka mamawh angin finna, thiamna leh hmanrua pawh min pe zel bawk a. Mizoram a ka chhoh chang a piangin Mire ram a rawngbawl a tul zia leh Mizo-te hi Miria-te thlarau bo chhanchhuak a enkawl tura Lalpa'n kan kova mawhphurhna a nghah zia Kohhran zingahte, BCM Office-ah leh mimal hnenah pawh, ka theih dan ang angin ka tlangau pui thin a.

Nakinah chuan Lalpa'n mite thinlungah leh kan hotute thinlungah thu sawi a, Mire ram rawngbawlna chuan ngaiven a hlawh ve tan ta a. Kum 1993, Rev B.Thangchina Associate General Secretary i/c Mission & Evangelism a nih lain Baptist Church of Mizoram (BCM) chuan Mire ram a thawh chu an rilruk a, chuvangin a ram, hmunhma leh a michengte en thlithlai turin mi pahnih; Pu Ngurliana leh Pu Zachhinga Thenhlum khuate chu an rawn tir a.

Anni pahnih rawn kal lai hian CFB President Rev R.T. Mawia leh American sap te nen Chittagong-ah Seminer kan neih lai a ni a. Kan Seminer zawh a ka rual a Mire ram a kal turin kan Seminer tawp thleng chuan an awm ve a. Pu Rualthanmawia chuan anni pahnih chu Mire ram a kal chu a rem ti zan lo a ni ang, an kal loh theihna tur in, "Ram a buai si a, ramdangmi in ni bawk si a, buaina in tawh palh ang, Mire ram lamah chuan kal lo mai rawh u," a ti a. Mahse, Pu Ngurliana chu Bangla thiam tak, tunhma a Bangladesh a lo awm

tawh thin a nih a vangin chu chu kal loh phah nan a chhuanlam tlingah a ngai lova, kal chu an tum thova.

Kan Seminer tawp dawn zan chuan vawilehkhatah thi in ka luak ta chiam mai a, ka thiante chuan a zan azanin damdawiinah min dah nghal a. Pu Ngura leh Pu Chhinga chu Mire ram lam a ka kalpui theih tak loh a vang chuan Pastor Nguntuara rual chuan Mire ramah chuan an kal ta a. Kei chu Seminer zawh tawh hnuah pawh chuan damdawiinah ka la awm a, ka thian, ka rawngbawlpui E/T Ramtawn leh E/T VL Renga'n min awmpui a. Pu Rualthanmawia chuan ka in enkawl nan midang kut atangin Tk 500 min pe a, min hawsan tawh bawk a. Kan thian thum chuan atu a mah chuan pawisa kan nei si lova, kan haw mai loh chuan Chittagong Hopital lianah Tk 500 chuan inenkawl ngaihna a awm si loh a vangin Doctor leh Nurs te phal lo chungin thisen chaw (Drip) min khai lai chu pawt phawiin Hospital atang chuan kan tlan chhuak ta a.

Nur's ho chuan, "I thih pawhin amawh kan phur lovang," min ti a. Kei chuan, "Thi hman ka la ni lo, Mire ramah hna ka la ngah lutuk tlat, ka thih dawn pawhin Lalpa'n ka thawh tura a duh chin ka thawh zawh hunah a ni ang, Tunah chuan ka hna ka thawk tan dawn chauh a lawm," ka ti a, kan chhuak lui ta a.

Chutih lai chuan ka nupui rai hram tawh tak chu Faruk a a pa te inah a lo awm a. Seminer a rawn kal ve Bawm ho lo haw hmasate chuan ka nupui hnenah chuan thi a ka luak tam zia leh ka damchhuah pawh an rin loh thute uar takin an lova sawi a, "Baltin khat deuh thaw thi in a luak," ti te in an lova sawi a. Ka nupui Zopuii leh a chhungte chu an lo mangang em em mai a. Ka Pu hi tawngtai a ni a, ka dam leh theih nan min lo tawngtai sak char char a. An rin loh leh an beisei aia dam in Faruk khua chu ka va thleng a, ka chhungte chu an lawm hle mai a, Pathian hnenah lawmthute kan sawi a.

Chittagong a damdawi in a ka awm chhung khan thi in ka luak reng a, Doctor te'n en na chi hrang hrang a min en pawhin ka natna chu an hre thei si lova. Farukah chuan kan cham deuh reng a. Faruk a kan cham lai chuan Pu Rualthanmawia chu Farukah a lo kal a, Pu Mawia hnenah chuan, "Hetah chuan ka natna an hriat theih loh a vangin Mizoram ah chho ila, Mizo Doctor hnenah inentir ila a tha in

ka hria, kan kal a nih chuan kan nauneih hun nen ain nan dawn a vangin kan cham rei deuh ka ring,” ka ti a, Pu Mawia chuan, “Mizoram chu kan ram a nih avangin kan duh mai pawh a, hetah hian Doctor an thiam zawk a sin,” a ti a. Kei chuan, Keimah avangin i buai a, sum i seng tam tawh si, engzat nge la insen ngai dawn ka hre si lova, ka nu leh pa leh ka chhungte awmna Mizoram a kan kal mai chu a tha ang,” ka ti a, a ni pawh chuan min hnial zui ta lem lova.

Kan khua Empu-ah kan haw a, MCC Annual Conference te kan hman leh te te a. MCC inkhawmpui chuan Miria te thlarau bo hruai chhuak a enkawl tur chuan Mizo Kristian te chu an la beisei reng mai a, chuvangin Mire ram a rawngbawl turin Baptist Church of Mizoram (BCM) sawm chu kan rel ta a. Inkhawmpui zawh chuan Mire Kristian te’n Mire ram a rawngbawl tura BCM an sawm na lehkha keng chuan ka nupui rai hram tawh tak nen chuan Mizoram lam pan in kan chhuak ta a.

Lalpa hruaina in Lunglei chu tluang takin kan han thleng a, kan thlen tuk chuan muang chang lovin Mire Kristian te’n an ram a BCM thawk tura kan sawmna lehkha chu kengin BCM Office chu ka pan ding nghal a. Chu ka lehkha pawimawh ken chu A.G.S i/c Mission & Evangelism Rev, B. Thangchina chu ka pe ta a. Mire ram a rawngbawl a tul zia tawngka in ka hrilh nual baw a.

Ka fanu Mazuali leh a hming phuahtu, a Pi Zawni

Hnahthial a kan awm lai ni 7 April 1994 Ninga ni zing tukthuan ei lai a tanguin ka nupui Zopuii chuan nau a vei tan a, Hospital-ah kan tlan chho nghal a, tlai lam dar 5:04 chuan Lalpa’n ka fa tir a tan fanu duhawm leh hmeltha tak min pe a. Achhartu Nurse chu Pi Biakchhungi a ni a. Ka fanu pian lai hian Hnahthial a ka nu leh ka Nu Zawni (Ka Pa Hminga nupui) an awm ve ve a. Ka nupui Zopuii chuan,



“Kan fanu hming chu a Pi Zawni hian phuah rawh se, a ni hi a zaidam em em a, a hmel a tha baw a, alo len hunah pawh a Pi Zawni achhun ngei theih nan,” a ti a. Dt 11 April 1994 Thawhtan ni

zingah ka Nu Zawni chuan ka fanu hming a tan Lalhmangaihzuazeli ti in a sa a. Ka nau te'n, "Ka nu, i hming sak hi a sei lutuk a ni, 'zel' tih hi paih mai rawh," an ti a, ka nu chuan, "Paih love, Lalpa hi kan hmangaih zual zel tur a lawm," a ti a, a phuah ang chuan a pu hlen ta a ni.

Hnahthial a kan awm lai hian kan fanu Lalhmangaihzuazeli (Mazuali) chu Pathian hnenah kan hlan nghal a, a hlantu Pastor Chalhmingliana a ni. Kan nauhlan lai a nau hlan ve hi an tam hle a, Gospel Centenary kum leh Mizo a aw b Centenary kum a ni bawk a, kan rual a nau hlan vete nau hmingah chuan Centenary a tel nawk hlawm mai.

Hetia Mizoram a kan cham chhung hian Mire hnamin an hnam thlarau bo chhanchhuak tura Mizoram an rawn auhna chuan mite thinlungah nasa takin hna a thawk a, BCM pawh chuan Lalpa kohnaah ngai in an ngaipawimawh em em a ni. BCM Assembly-ah hial lo sawi a, Mire ram a Lalpa rawngbawl chu tha an lo ti tlang a, Mire ram a thawh danturah CFB President Rev RT Mawia biak a, a tul chuan thawhho pawh pawl an ti lova, Pu Mawia chu rawn be turin kan haw thlak rualin Missionary Lalthawmliana rawn tirh chu an tum ta a ni.

Ka natna Aizawl Civil Hospital a ka inentir chuan TB te a lo intan tir hi a lo ni a. Lalpa zarah ka natna pawhin min kian san tawh a, Mizoramah thla kua zet kan cham hnu in min entu Doctor pawhin, "In haw thei tawh ang, mahse damdawi kha kum khat chhung chu i ei tlingtla ngei ngei tur a ni," a ti a. Ka fanu chu thla ruk mi lek a nih lai in khaw lum em em lain, hmun lum lehzualah, Lalpa'n awm tura min ruatna hmun Bangladesh Mire ram lam pan chuan kan inpaw thla ve ta hnak hnak a. Kan rual hian BCM in Mire ram a thawh danturah CFB President Rev RT Mawia rawn be tura an mi tirh, Missionary Lalthawmliana chu a rawn kal ve a.

Bangladesh a kal tur chuan Pukzing lamah Sajek a lut thla turin kan kal a, khua a lum em em mai a, kawng lah chu a hnim bawk si a, kan thuam phur Chakma pahnih lah chu kir leh hman an duh avangin an kal chak em em mai a, keini chuan kawng kan hriat siloh a vangin

kan thuam phurte chu kan umphak loh chuan kawng kan bo mai kan hlau bawk si a. Chuvangin kan um hlawk hlawk reng mai a, kan chau em em mai a, Sajek New Lawngkawr kan thlen dawn chuan ruahpui vanawnin min nan hrep lehngal a.

New Lawngkawr ah chuan U Tlangmawia teinah kan thleng a, an ni chuan min lo duat em em mai a, vawk lian zet mai hi min lo talh a, ni thum kan cham a, chutia kan cham chhung chuan kalkawng a khaw lum em em a hah tak a kan kal a vang leh ruappui vanawn in min nan a vangte pawh a ni ang; kan fanu chu thih ngamin a na ta mai a, New Lawngkawr chu Bangladesh thingtlang khaw chengker tak mai a nih a vangin damdawi han lei mai tur lah a awm bawk silova, kan thla aphan tak zet a ni. U Tlangmawia nau Nghakthanga chu tlawmngai in New Lawngkawr a tanga nikhat kal zet Tuisen Bazar a mi damdawi min zu lei sak a, a ni chu keimahni a vangin a hmanhmawh em avangin a rawn lehleng hman a ni. Kan fanu a dam theihna turin Nghaka chu ava han hah dawn tehlul em.

Kan fanu pawh chu a zia ve leh ta a, Lalpa hruaina in tluang takin Rangamati chu kan zu thleng leh a, hetih lai hian BCM in an biak duh Pu Rualthanmawia chu Rangamati a a awm lai a lo ni hlauh mai a. BCM palai Thawma'n asawi duhte sawi in inkawm na hun tha chu an nei thei ta a. Mahse, CFB President chuan thu tawp a sawipui duh tatlat lo mai a, "Han haw leh la, in hotute Dhaka-ah ka hnenah rawn kal rawh se, an rawn kal thei dawn lo a nih chuan min rawn hrilh se la, Calcutta-ah kan inhmui mai dawn nia," a ti a, Thawma pawh chu a haw chho ve leh ta mai a.

Thawma chuan BCM hotu te hnen a thil awmzia a han hrilh chuan, BCM hotu te –President Rev Raltawnga leh AGS Rev. B.Thangchina te chu CFB President Rev. RT Mawia hnen a Mire ram rawngbawl dan tur sawipui tur chuan Dhaka a rawn kal an tum a, mahse Culcatta an thlen hnu in engemaw rokhawlhna a awm a vangin Dhaka-ah chuan an kal thei ta lova, Culcatta a tanga chuan engemaw rokhawlhna a awm avang a Dhaka a an kal theih loh thu leh a theih chuan amah chu rawn kal a Culcutta a in be mai turin Rev RT Mawia chu an phone a, mahse Rev RT Mawia chu Culcutta ah chuan a kal thei leh si lova, an inbe thei lo hlen ta a ni. Chutia an



biak tur an biak theih tak lovah chuan BCM hotu te chu Mizoramah an haw leh a, Mire ram a thawhna tur kawng dapin BCM hotute chuan CFB President Rev RT Mawia chu vawi thum lai lehkha an thawh leh a, mahse BCM hotute chuan chhan na vawikhat pawh an hmuh loh avangin Mire ram a thawh dan kawng chu tihngaihna awm ta vak lo ni in a lang leh ta a ni.

Mire ram hi setana kulhpui a ni a, hmelmapa setana chuan a kulhpui thiat a Pathian ram din tur chuan a phal lo em em a ni. Tunhma NEIG Mission hun lai a Mire ho an sak zia te, Voluntary Missionary hun lai a rawngbawl na a sak zia leh Mire ram tak a an zuk luh thlak hleihtheih loh dante leh kei ni AFC Mission Board ngei pawh beidawng a an lo tilh zia leh an mi tirhte pawh pakhat mai bâk chu an kir leh vek dante, tunhnu a Mire ram a Mission hrang hrang a awm hnuah pawh thawktu thenkhat chu Pathian ram ti zautu ai a Pathian ram zauna kawng daltu an nih zawk zia zawng zawngte leh tumna tak tak tel lo chuan awlâi takin Mire ramah hian a luh mai theih dawn loh ziate kan hotute hnenah ka sawi thin a.

Kan hotute pawh chuan a tihngaihna tak an hriat loh avangin Mire ram a thawh tumna pawh chu a reh leh ta vang vang rih a. Kum 2000 a lo inher chhuah chuan CFB Mission chuan Mire ram chu hnuchhawnin Bawm ram lam a hawi ta zawk a, Chutia CFB Mission in Mire ram a a rawngbawl na a chawlhlan tak hnu chuan thil tul a vangin Mizoramah ka chhuak chho a, kan khua Hnahthial ka han thlen chuan kan Kohhran hruaitute chuan kan rawngbawl dante min zawt a, chutia kan ti ti naah chuan Mission tanpuitu kan neih tawh loh thute ka sawi a, chu chuan kan Kohhran hruaitute beng a verh hle mai a. Local Church Committee naachte an lo sawi a, a remchan chuan kan Local Church chuan min rawih an duh thute relin a remchan dawn leh dawn loh BCM Head Quarter ah phone in an lo zu zawt a.

BCM Head Quarter lam a hotute chuan anmahni kut a ka awm a that zawk tur thu leh kan Kohhran (Hnahthial Bazar Local Church) Committee Resolution keng a Head Quarter Committee hma a keimah ngei kal a inlan turin an rawn hrilh a. Kan Head Quarter lam hotute duh dan ang chuan kan Kohhran Committee thurel keng

chuan a thuk Dt 22 February 2000 Thawhle ni chuan Lungleiah chuan ka chhuk ta a. BCM Head Quarter Working Committee hmaah chuan Mire ram report leh CFB Mission nen a kan inthlah dante sawi tura min duh leh an hriat duh min zawhnate chhangin ka sawi a. Ka lehkhaw pawimawh ken pawh chu ka pe nghal bawh a.

BCM in Mire ram a hma an rawn la dawn a nih chuan keimah chauh ni lovin Mire ram a ka rawngbawlpuite pawh la a Mire ram chu Field a la law law turin ka ngen a, keimah chauh a min lâk dawn ai chuan Mire ram a BCM in hma an lak loh law law a that zawk tur thute pawh ka sawi nghal bawh a. Achhan chu Mizoram atangin Field dang angin Missionary an in tir thla ve zung zung thei dawn lova, ka thawhpuite an la ve lo a nih chuan Mire ramah keimah chauh chuan engmah ka ni dawn chuang lova, BCM Mission hming a chhiat phah mai mai zawk dawn a ni tihte ka sawi ve nual bawh a. Min zawh duhte min zawh hnu leh ka sawi duhte ka sawi hnuah chuan kei chu ka chhuak leh ta a.

Atukah chuan Working Committee Member Pa Ngurzika (Lunglei Moria Kohhran Upa) chu nimir lam a an thu tluknate ka zawt a, a ni chuan, Mire ram a thawh an rel thluk thute, June thla ral hma ngei a anmahni ngei rawn kal an tum thute, chuta tanga a tul anga hmalak chhoh zel an tum dante min han hrilh chuan ka thinlung hi lawmin akhat hi a ni ber mai. “Lalpa’n kan authawm hria in min lo ngaithla ngei mai,” ka ti a, ka thinlungin Lalpa hnenah lawmthu ka sawi nghal mawlh mawlh reng bawh a. Rev. Sangvela leh Rev. Ramdinmawia te pawh an rawn kal tawh bawh.

Rev. Sangvela leh Rev. Ramdinmawia Empu khua-ah

Tichuan ngaihtha takin Mire ram lam pan chuan ka haw thla leh ta vang vang a. Kan khua ka thlen chuan kan Kohhrante chu thil awmdan kimchang takin ka han hrilh a, thenkhat an lawm hle laiin then khat chuan rin harsa an la ti hle bawh a. Keini chu, “Mizoram Baptist nen kan inzawm



tawh dawn a vangin kan Kohhran hmingah pawh Baptist Church of ‘Maruchah’ “Miria” (BCM) kan intih a tha ang,” ka ti a. An ni

pawhin tha min tihpui a. Hun a kal zel a, Baptist Church of Mizoram (BCM) chuan an thutiam ang ngei in ni 31 May 2000 Nilaini chuan mi pathum : Promotor R.Zaichhuana, Pu R.Thianghlima Zotlang Mission Committee Member leh Pu Lalngurliana Thenhlum Kohhran Secretary te chu an rawn thleng a. Kan Kohhran chuan kan lo lawm hle mai a, anni pathum chuan rei deuh cham a Mire khaw dang pawh tlawh kual an tum a, mahse anzing a mi Pu R.Thianghlima chu a khua asik ta tlat mai a, hmun dangah pawh kal thei lovin kan khua Empu atang chuan an haw leh ta a ni.

Mizoram a tanga rawn kal, kan hotute an haw hnu chuan thil tul a vangin Mizoram-ah ka kal leh a, hemi tum a Mizoram a ka kal hian BCM Head Quarter ka tlawh a, Mire ram a rawngbawlina bultan nan kei, Bible Thuthlunglui lettu, Pastor Chownglowk, Evangelist pahnih leh Evangelist Teacher pakhat te hlawh min rawn pe nghal a, kan lawm takmeuh a ni.

BCM Mission chuan chak zawkin Mire ram rawngbawlinaah hma a la chho zel a. Ni 9 February 2002 Inrinni chuan BCM Associate General Secretary i/c Mission & Evangelism Rev T.C. Laltlawmlova leh Promotor R.Zaichhuana leh Audio Visual – a thawktu Pu Ruata Kawlni te'n min rawn tlawh leh a. Chutah chuan a rammi thawktu min pek belh leh a, kan Hostel naupangte pawh engemawzat min chawm sak baw a, Hostel cook hlawh pawh min lo pek sak baw a ni. Heng kan thawktute hlawh min rawn pek sak bakah pawh hian sum sen ngaihna a piangah a tul angin hma an rawn la ta zel a ni. A tul angin kan hotute chuan min rawn tlawh reng baw.

Kum 2004 atang pheii chuan Field Director fel tak, Bangla thiam em em, kan dinhmun min hrethiam em emtu ni baw Rev Lalhmunsanga min rawn pe a, a ni chu Chittagongah a awm a, a awmna atang chuan min rawn tlawh reng thin a. Mahse, kan Field Director chuan Bangladesh a awmreng turin Visa a neih theih tawh loh a vangin kum 2005 December thla khan Mizoram lamah min haw san leh a, kei chu Field Incharge in min dah ta a ni. Kan Field Director Rev Lalhmunsanga chuan Baptist Church of Maruchah (BCM) te hmalam hun min thlirpui a, kan tlin vang nilovin, kan mamawh a

vang leh kan inzir chhoh zel nan Baptist Church of Maruchah (BCM) chu Assembly te min siampui a, Kohhran inkaihhraina bu- te min siampui bawk a, tun thleng hian kum tin BCM rorelna sang ber Assembly chu kan la nei ziah thin a ni.

Kan Kohhran-te hian Pastor niturin min duh thu hi an sawi reng thin a, vawi tam tak Pastor hna thawk turin min ngen thin a, mahse kei chuan, “Pastor ka nih kher a ngai hleinem, ka thiamna pawhin a tlin lova,” ka ti a. Mahse kum 2002 a Mizoram a tanga kan hotu BCM AGS Rev T.C. Lalhlawmlova te rawn kal khan helam (Mire Baptist Kohhran) a kan Kohhrante chuan kan hotu rawn kalte hnenah chuan keimah Pastor atan a min duh thu leh a tul zia leh Pastor ka nih thei danturte an lo zawt in an lo sawipui a, kan Pu chuan, “Chutiang tak a in duh a in mamawh a nih chuan Pastor-ah lo la ula, ramthim in la ni a, keini pawh tunhmate chuan Tirhkoh a tanging a tul angin Pastor-ah kan inhlangkai zel mai a lawm, amârawh chu keini chuan kan nemnghet thei lovang a, in tih tih in lo ti ula, keinin kan lo hriatpui dawn che u nia,” an ti a.

2004-2005 a kan Field Director Rev. Lalhmunsanga te chhungkua

Chutia kan hotu berin a tih takah chuan, ka duh emaw, ka duh lo emaw ngaipawimawh tawh lovin, a tulna a vang zawkin kan Kohhran chuan ni 10 November 2003 Pathian ni a Baptist Church of Maruchah (BCM) khawmpui rorel chuan, “Evan Rosanglura Fanai hi



kan Pastor tura kan duh leh kan mamawh a vanging Pastor a la nemngheh tur a tan Probatiobnary Pastorah kan ruat e,” ti in Pro Pastor nihna chu min pe ta a. Ka hnial thei lo na in ka hming bul a Pro-Pastor tih ka han dah ve tur chu ka inthlahrungen ka zak ru hle mai a. Bangladesh ah chuan a zia tak a la awm a, Mizoram a ka kal hunah Pastor atan a min hmuh tlin dawn loh tur ziate ka ngaihtuahin ka zam hle mai a.

Chutia keima lam in en a ka insit em em lai chuan kan Kohhramte chuan, “Kei nin Pastor atan kan duh che a, i duh leh i dil a vanga Kohhran in Pastor a tan ruat che kan nilova, Pastor a tan kan mamawh em vang zawk che a ruat che kan ni, khawi hmunah pawh

Pastor i nihna hi zak lovin a ṭul chuan i sawi zel zawk tur a ni, i zah a vanga i inzêp a nih chuan Pastor a tana ruattu che Kohhran leh Pathian i zahpui tihna a ni dawn a ni,” min ti a. An sawi ang chuan Pathian leh a Kohhran te’n min ruat ka nih a vangin Pro-Pastor ka nih thu chu a ṭul angin ka sawiin ka lehkhahu ziaak leh ka Article ziaakahte pawh Pro Pastor tih ka ziaak ve ta kalh zel a.

Hun a lo kal zel a Head Quarter lam a kan hotute pawh an lo inthlak ve zel bawk a, kan hotu ṭhenkhat chuan, “Nangchu kan milehsa i ni a, kan milehsate reng reng chu tunlaiah chuan B.D pass phawt loh chuan Pastor a nih ngawt theih loh, chuvangin Pro Pastor inti tawh lo la a ṭha ang, kan Missionary te chu a ṭul angin serh leh sang khawih theina kan pe ṭhin a, serh leh sang khawih theihna kan pe zawk dawn che nia,” min ti a.

Chutia kan hotu te’n min tih takah chuan lawm takin ka pawm a, kan hotute in a min tih dan chu kan Kohhranah ka sawi a, an ni pawh chuan a tihngaihna tak an hre bik chuang lova, “Kan tan chuan Mizoram a B.D sawm rual ai chuan i hlu fe zawk a sin mawle, mahse chutia hotu te’n an tih chuan an thu chu i ngai chang phawt ang u,” an ti a, kan hotute thu chu kan ngaichang ta a.

Athuhrimah ka dinhmun hi mihringte mithmuhah chuan a khawlhkham ve angreng khawp mai a, kan hotu te’n Pathian thu zir leh tur a min tih lahin Field chhuahtsan a kum thum, kum li B.D. han zir leh tur chuan ka milehsate chutiang chen chen chhuahtsan theih dinhmunah an ding si lova, ka awm loh hlan a min thlaktu tur lah an awm bawk si lo. Kan hotute hnenah chuan keiin a B.D. ka zir leh ai chuan nakinah ka milehsate a ṭanga zir thei an awm hun a min Sponsor sak zawk turin ka ngen a, ka ngenna pawh chu min pawm sak nghe nghe a ni. Kei chu Lalpa’n arammii ni turin min dah a, mahse Pathian khawngaihna zarah BCM chuan an Missionary ah min ngai nghet tlat bawk si a. Khirh nalai tak pawh a awm a, mahse, a enga pawh chu ni se, kei mi tlinglo leh ṭhahnem lo tak mai hi khawngaihna a vanga Lalpa’n a rawngbawltu te zinga pakhat a min ruat ve a ni tih erawh tuma hnial rual loh in ka Chiang a ni. Lalpa’n a rawngbawltu tlinglo tak hi min hre reng a, a mite thinlungah thu sawi in ka nih phak bâk leh ka phu loh nihna min pe in min chawimawi

nasa hle a ni. Bangladesh ah kan Field Director chu a awm leh theih tak siloh avangin kum 2006 Baptist Church of Mizoram (BCM) Assembly vawi 110-na Assembly Executive Minute January 2006 page 67-71-ah Mire zing a rawngbawl dantur ruahmanna (Recommendation) 7-na-ah chuan Mire Field Incharge a min ruat thu a lo chuang kalh mai a.

Hetia Field Incharge hial a BCM Assembly in min lo ruat ta mai hi ka mawhphurhna a sangin ka phu lo hle a. Mire ram a kan hma lâk zel dantur-ah leh Field a serh leh sang khawih theihna dan turah pawh AGS i/c Mission and Evangelism Rev Sangvela chuan min sawipui nghal baw k a, “Mire Kristian te’n an Pastor-a an duh che a an mamawh em em che lai in keini lam chuan Pastor-ah kan nemnghet thei silo che a, mahse tunah chuan Baptist Church of Maruchah (BCM) in Assembly in nei ve tawh a, In Assembly-ah lo in nemnghet mai rawh u, kei ni chuan kan lo hriatpui ve dawn che u nia,” a ti a.

Pastor a min nemnghet lai

Kan AGS in thurawn min pek ang chuan Pro Pastor a kum thum ka awm hnu leh Baptist Church of Mizoram (BCM) in serh leh sang khawih theihna min pek tak si loh a vange chuan **kum 2006 Baptist Church of Maruchah (BCM) Assembly December ni 17 Pathian ni zing inkhawmah chuan Rev Chownglowka’n Pastor a tan min nemnghet ta a ni.** Pastor a tana min nemngheh lai hian Pastor Ioungtung leh Upa Menkaw-a te’n an lo tawiawm baw k.



Mire ram a Mission thawktawh leh thawk mekte hi an zavai chuan an chanchin kan chhui kilkelh thei lova, a chhan chu Record tha kan neih loh bâkah Mission thenktahte chu an la awm reng emaw kan tih lain an lo awm leh tawh lova, thenkhatte chu chhui zui tlak vak lohte pawh an awm baw k vange pawh a ni baw k. Chuvangin heti chin hi kan han tarlan theih chin chu a ni e.

## BUNG 13

### MIRE RAM RAWNGBAWLNA A KAN HMALAK DANTE

1. Thuhрил leh Zirtir.
2. Literature lam a ka hmalakna.
3. Audio leh Vedio hmanga rawngbawlна.
4. School leh Hostel hmangin.
5. Damdawi hmanga tihtamna rawngbawlна in.
6. An eizawnna (Aconomy) lam.
- 7, Mire hnam ngei hruaitu puitling a chher chhuah.
8. Anmahni ke a ding thei tura buatsaih.

Mire ram a Missionnary rawngbawl hna thawk tura kei, mi tling lo leh thiamna lamah pawh rual ban zo lo tak mai Lalpa'n min han thlang ve tlat mai hi a mak ka ti in a ropui ka ti a. Engkim titheitu, engkim neitu leh pe theitu, a mamawhtute hnen a ui lo leh hau lova finna leh remhriatnate leh a t̃ul anga hmanrua thlenga pe t̃hintu Lalpa chuan a thlarau-in min thuam a, ka thiamna in a phâk bâk thlengin thiamna, remhriatna leh finna min pe a. Dil nachang ka hriat lohte pawh ka mamawh apiang min pe zel bawk a ni.

**1. Thuhрил leh zirtir :** Lalpa rawngbawlнаah hian khawi hmunah pawh Thuhрил leh zirtir hi a pawimawh em em a. Mire ram a rawng kan bawlнаah pawh chu chu kan hna hmasa a ni a, tun thleng hian he hna hi kan la thlahthlam ngai lo a ni.

Mire ram a ka awm tirh khan kan unau Miria te chu taksa leh thlarauah an la hniam em em mai a, chuvangin an hnen a thuhрил leh zirtirna pek chu ka huphurhin chu hna chu thawh thuai thuai t̃ul ka ti em em mai bawk a, chuvang chuan an t̃awng chu theih tawpin ka zir a, Lalpa t̃anpuina in kum hnih ka awm chuan Mire t̃awngin Pathian thu ka sawi thei a, nuamti takin Mire t̃awngin ka t̃awngtai thei bawk a ni.



Kum li (4) ka awm chuan an ṭawngin Zirṭan bu, Mire ṭawng Grammar bu, hlabu, leh Kristian vanram awngzawh bute ka siam in ka letlin thei a ni. Lalpa chu fakín awm rawh se.

Bangladesh-ah hian ka awmna Bandarban District-ah deuh chauh hian Miriate hi an awm a, Bandarban District zau zawng hi 4502 Sq Km's a zau a ni a, Miriate chu a tlangpuiin chhim lam Mire tlangpui (Chimbuk range) Matamahuri, Marancha hung leh Bawm ram chhim lamahte an awm a, chungah chuan bial pawh nei hran lem lovin Chanchinṭha hril in ka vak chiam mai ṭhin a, Matamuhuri lam Burma ram ri thlengin Biakinte pawh kan nei ve nual mai a.

Ka sawi tawh ang khan Miriate hi chu inkungkainna ngaipawimawh mi an ni a, Mizo ka nihna nilovin Pastor Chownglowka fapa (Miria) ka nihna chu ka hmang ṭangkai hle a, ka kalna khuate chu eng hnamte nge an nih ka hrechiang hmasa a, ka mi kawmate chu engtia koh tur nge ka hriat hmasak leh a ngai a. Ka papui, ka pate, ka pu, ka ni, ka ṭang (pate farnu ni-te pasal), leh ka u emaw unaupa (Miria te chu an inkungkaihnaah inkoh dan keini Mizote ai chuan an ngah fe zawk a ni) tiin emaw kovin, thlawhhma lamte leh an dam ṭhat leh ṭhat lohte zawt a sawi puiin zawi zawiin Pathian thu ka sawipui chauh ṭhin a, chuti chuan inpawh takin kan inkawm thei ṭhin a ni.

Miriate hi an la hnufual em a vangin hnam dang lak aṭang hian an inlahrang em em a, chuvang chuan hnam dang thusawi chu han zawm tinah an tin ṭhin lo ti ila kan sawi sual tampui awm love. Chuvangin a nih ka ring, Mire ram ka zu thlen thleng khan an chhehvelah hnam dang changkang zawkte lo awmin kan unau Bawm phei chuan an hnenah chanchinṭha an lo hril ṭhin a, Kristiante pawh engemawzat lo siam tawh mahse an incheina, an ṭawng zahmawh tak tak leh an khawsak phung an la thlak chuang meuh lo a ni.

Kei pawh ka incheina an mahni anga ka la inthlak hma leh an ṭawng ka la thiam chian hma chuan chanchinṭha hrila ka zin changte hian ṭhen khat chu nutling patlingte pawh min hmuh chuan an tlanchhiat dawr dawr chang leh keimah zawkin ka hlauh a ka tlanchhiat changte pawh a awm ṭhin a ni.



Pathian thu sawi a ka vah velnaah hian kan veng nula U, B.N-i (Lalbiaknii) țingtangte min pek leh Arth & Culture Didector Pi Bawihchhingpuii Hand Mike (aurinnate) min pek chu mipui ka hipna atan a hmanraw ẵngkai tak mai a ni a, ka ẵngtẵng ri leh aurinna ri an hriat chuan ka zai ngaithla tur leh ka ẵngtẵng perh en tur chuan mi tam tak tak an rawn pungkawm ẵn a. Tin, milem Pathian thu sawina atan a remchangin lian pui pui a ka ziaak hmangte chuan ka zir tir bawk ẵn.

Hetia chanchinẵha hril a ka vah hlan hian ka nupui Zopuii chu a lo hah em em ẵn a. Keima insak ve, lian leh ẵha tawk a ka sak chu kum khat em pawh kan luah hma in CFB President Pu Rualthanmawia chuan Empu khaw chhim chhuah lam a naupang za ngawt leng tura a sak Hostel lian leh seipui mai khaw pawna awmah chuan awm turin min ti a, chu Hostel lianpui mai piah lawkah chuan School atan a a tih Bawngin tia lek School in te tek te hi a awm bawk a. Chu a Hostel sakah chuan naupang awm tur an awm loh a vangin a rawp angreng hle tawh a, chutah chuan kan awm ta a, thli a tleh dawna a lan chuan khawchhungah tlanchhiat zel a ngai bawk a.

Ka khualzin chhung chuan ka nupui duhtak leh ka hmangaih em em ka fanu kum khat pawh la tling lote chu kan awmna chu ramhnuai a nih avangin an lo awm ngam ẵn si lova, chutih lai chuan Army te'n kawngpui an siam a vangin an teivẵk reng mai bawk si a. Mire ho lah chhunah chuan an feh vekin tar leh naupang bẵk inah an awm ngai bawk silo, bẵkah an in chu thim in a ẵwp em a vangin Mire in bathlarah chuan nau paw chungin nileng ẵhak a lo din changte pawh a awm ẵn a, zanah chuan kan khaw nula thenkhatin an riahpui ẵn a. chutih lai chuan Tk 1200 ka hlawh ve a, mahse hlawh hmuh loh thla a tam thei ẵn khawp mai. Han hmuh chang pawhin hmuh loh thla kha chu hmuh loh thla a ni ẵwp zel mai bawk a.

Chuvangin kan ei leh in tur kan thawhchhuah ve angai a, lo leh huante ka siam bawk a, ka nupui u leh nau te'n min rawn pui ẵn a vangin kei chu ka zin thei zawk chauh ẵn a ni. Lalpa'n Bangladesh ami Bawm nupuiiah min pe chu ka rilru tak hian ka lawm em em ẵn a, a chhan tamtakte zinga pakhat chu chawhmeh ẵha han hmeh ve tur

in a leina tur pawisa kan neih loh a vangin ramhnuai a hnim hnah; (eng hnah hnahte nge pawh ka hre lo) ka nupui chuan a rawn la a, chung a rawn lâkte chu chawhmeh antuiah a han siam a, tui ti takin kan ei thei zel a, chhuan chhama kan awm leh lek chang lah a tam, mahse ka bulah phun nawi miah lo leh lungawi takin a awm zel thei hi ka nupui chungah leh hetiang nupui tha min petu Lalpa chungah ka lawm em em thin a ni.

Ka zin chhuah loh chang pawhin ka nupui leh fanaute chu ka awp lum hman lo em em mai a, kan ei tur ka thawhchhuah a ngai a, kan khaw thalaite chu hla ka zir tir a, ziak leh chhiar ka zir tir reng thin bawk a, mite zirtir tur atan milem ka ziak in ka Typewriter upa tawh tak chuan Mizo hla Mire tawng a lehlin leh lehkhabu dang dang Mire tawnga buatsaihin hun ka hmang reng thin bawk a, kan in luah lah chu ramhnuai a nih bâkah a chhuat chu lei a ni a, rul leh tit te an rawn lut renga, thosi leh vaihmite a tam bawk si, a chung rangva siling awmlo a nih avangin thalah chuan a lum thei em em mai bawk a, fanu leh fapa kan neih ve diah duah tawh hnu pawh chuan kan ei-in tur inzawn chawp nen, chanchintha hril a vahchhuah reng ngai bawk si.

Chutiang khawp a amah ngaihsak hman lo leh hreawm a ka awmpui chung chuan ka nupui Zopuii chu a vui ngai lo reng reng a, hreawm ti hmel pawh a pu ngai bawk lo. Hreawm atih ber chu kan khuaah hian dawrte a awm ve a, fate chhang leh chhithlum han lei sakna fahran pawh kan nei lo chu hreawm a tih thu a sawi ve thin.

Khaw hrang hrangah kalin Pathian thu ka sawi a, Kristiante an lo awm chuan ziak leh chhiar ka zirtir nghal zel bawk a, a thiam fal deuh bikte chu ka awmloh hlan a zirtirtu a tan ka ruat zel bawk a. Kan khaw nulate chu Action Songs te ka zirtir a, thalai ho nen ahuhovin khaw dangah rawngbawlin kan chhuah chang pawh a awm thin a, bung hmasa lam a kan sawi tawh ang khan, kan khua chu incheina lamah pawh hma kan sawn chak hle a, chu chu khaw dangah pawh a kàngkâi ve zel a ni.

Chu kan awmna Hostel ruak awngrawp tak daipawn a awmah chuan kum thum kan awm hnu chuan Hostel chu chhuahsan a khaw

chhunga awm ve chu Pu Rualthanmawia chu kan dil a, mahse Pu Rualthanmawia chuan, “Nangni in in luah loh chuan a chhe mai anga sin,” atih tlat avang chuan khaw chhuga kan insawn chu a phal lova. Chu Hostel sak dan chu, a ban kha thingtawl a zawm tur a tih a nih lain asatute’n a ban thing vek kha tan in an zawm leh a, chu an zawmna chu lei hrulah a awm si a, a zawmna laiah chuan tlumpiin a ei chhe zo tawh si a, thli a tleh chuan tlu rup mai thei a ni renga.

Pu Rualthanmawia chuan Bandarban-ah Seminer turin min kova, kan khaw pa ho pawh an kal ve nual a, chung kan khaw pa ho chuan khawchhug a in kan sak a kan awm ve theih nan Pu Rualthanmawia hnenah chuan min dil sak chiam avangin khaw chug a in kan sak a kan awm ve chu min phal sak ta hram a. Khaw chhungah chuan in te takte in kawngpui bulah, ka pa Pastor Chownglowk-a te in bulah, maurapin in ka sa ve a, kan in sawn chiaah chu chu Hostel awngrawp tak mai pawh chu a tlu ve nghal ta a ni.

Miria te chu tlawmngaihnhate zirtir in kan thalai bember hlo thlo hlei thei lo, mi hlo thlawh zawh hun a zo ve thei lote chu kan pui bawk thin a, kan pawisa thawh khawmte chu mi harsate leh tanpui ngaite tanpui nante kan hmang bawk thin a ni. Kum 1992 khan kan unau Bawm ECC khawmpui, kan awmna atang a hla angreng tak Ruangsuri Mumthar khuaah kan khaw thalai mi engemaw zat kan kal a, Actionsong’s hmanga rawngbawlina kan neih pawh mite’n an lawm tak meuh a ni.

Miria te hian tawng zahmawh buru tak tak sawi hi ahmei a pain an serh lovin an uar em em a, chumai nilovin an hmingah pawh hmeichhia chu hmeichhe zahmawh hming, mipa chu mipa zahmawh hming leh thil dang pawh hming chhe pui pui hminga in phuah/koh an uar em em a, chungte chu kan innêl a, kan inhmangaih tawh chinah chuan theih tawpin bansan atul ziate ka zirtir thin a. An nula leh tlangval inrim dan khaw danga zan dar sawmpahnih hnu lam a an inrim dan leh an nungchang mawi lo leh inthlahdah em emte chu a that loh ziate leh thil dang tamtak zirtir an ngai a, ka theih ang tawk in ka zirtir thin a, apawn a tang nilova achhung a tanga ka zirtir a vang leh ka hmangaih a, an ni pawhin min hmangaih bawk a vangin ka han hau deuh bawrh bawrh chang pawh chuan ka chungah an

lungawi lo chuang lova, ziaak leh chhiar ka zirtir lai phei chuan ka thin a lo chhe ve bawk nen; tap zawih zawih a ka hau changte pawh a awm thin a ni.

Khawi ram leh khawi hnam zingah pawh chanchintha hrilin zirtir ila chung kan hrilh leh kan zirtir a te hnam chu kan hmangaih em em tur a ni a, enganga hnam mawl pawhin hmangaihna chu an hre thiam in an tan pawh anmahni hmangaihtu lo hmangaih let ve chu thil har a ni lova, awlsam takin an lo hmangaih ve nghal mai thei a ni. Chutiang a inkungkaihna nghet leh tha a kan hrilh a kan zirtir a nih chuan a pawn a tangin kan zirtir a nilova, achhung a tangin kan zirtir tihna ni.

A biktaakin hnam mawlte zingah chuan apawn a tanga zirtir chu an hrehiam har em em in an ti tlat thin a, a chhung a tanga zirtir erawh chuan kan thu hrilh leh zirtirte chu awlsam takin an hrehiam a, harsa ti lo takin an lo pawm mai thei a ni tih keima tawng ngei a tangin ka hre chiang a ni.

#### Church Leader Training ka pe lai

#### **Seminer leh Treining pek :**

Akhat tawkin kan Mission a thawktu leh Kohhran hruaitute chauh nilovin Mire Kristian Kohhran hruaitu zawng zawngte ko khawm in Pathian thu zirna



Seminer ka neihpui thin a, ni khat, ni hnihte hun kan hmang thin a, a nuam kan tiin kan hlawkpui thei thin khawp mai. Keima tan tak pawh a tangkai khawp mai. Hetiang a Subject hrang hrang zirtir tur hian kei pawh lehkha ka chhiar nasa in ka inbuatsaih nasat thin em a vangin.

Hetia Mire tawng vek a Subject hrang hrang zirtir tur a tana ka buatsaih hi Kohhran hrang hrang leh Mire ram a Mire tawng a Lalpa rawngbawltu te'n anmahni Kohhran theuhah an hman tangkai lehzual theih nan a bu pawhin ka siam bawk a ni.

2. **Leterature lam ka hmalakna :** Kan unau Miria te taksa leh thlarau lama hma an lo sawn zel theih nan Literature lama hmalak sak hi a ngai em em a, eng chen nge Lalpa'n Mire ramah min awmtir

dawn ka hre si lova. Chuvangin Lalpa'n Mire ʔawng thiamna min pek hi ka awmlah hnu thleng pawh a Miria te'n an ʔangkai pui zel theih nan Leterature lam a hma lâk hi ʔha in ka hria a. Mire ram a ka awm mek lai pawhin mipakhat ve mai ka nih a vangin khawi kipah ka kalin ka awm thei si lova.

Mire tan lehkhahu ka buatsaih sak theih chuan ka kal theih loh leh ka awm lohna hmun amite hnenah pawh lehkhahu hmang chuan rawng ka bawl zel thei dawn tho a ni tihte ka ngaihtuah a, ʔha dawn hle in ka hria a. Lehkhahu siam tur chuan lehkhah chhutna khaw! leh lehkhahu siamna sum leh paite ka mamawh dawn a ni tih ka hria a, mahse chu chu ka tih theih loh thil a nih a vangin Lalpa mawhphurhah ka dah a.

Miriate chu zia leh chhiar kan zirtir a, achhiar tur lehkhahu kan pek leh si loh chuan kan zirtir hahna chuan awmzia anei tlem dawn a ni tihte ka ngaihtuah bawh a. Chutia ka ngaihtuahna chu Lalpa'n a lo hria a ni ang, a mawhphurhahna chu rang takin a rawn hlen ta mai a. Ka la hmelhriat ngai loh leh min hretu ni pawh a ka hriat loh, Malumghat Baptist Association Mission a an hotupa America sap Herold Abarson chuan lehkhah min rawn thawn a, alekhah thawnah chuan Typewriter min rawn pek thu a lo inziak a, rei rial lovin kan tlangval Mensin chu Malumghat-ah chuan kan tir nghal a Typewriter ʔha tak German siam Pu Herold-a chuan min rawn pe nawlh mai a. Chu chuan ka lo suangtuah ʔhin hna chu ka thawk ʔan thei ta a ni. Lalpa chu fakin awm rawh se.

Herold Abarson leh kei

Pu Herold an Typewriter min pek hian Mire tan lehkhahu engemaw zat ka chhu a, ka hman rim em avangin ka Typewriter pawh chu a tar in a hate (achhutna) a lo bal nual ta a, achhutna bal lai thir phekte a han chhut te chuan kut a na thei hle mai a, chuvangin Lalpa hnenah Computer ka dil ta a,



“Lalpa, ka hnathawhna Typewriter min pek hi a tar tawh lutuk a, a chhutna lai pawh a bal nual tawh mai a, Computer min pe tawh mai teh, i rawng bawl lo tute zawh pawhin an nei a ni a, kei chuan i

rawngbawl nan ka mamawh takmeuh a ni. Mahse, Computer khawih chu ka thiam lova, thiam turin ka zir bawk lo, min pe a nih chuan a thiamna nen min pe nghal dawn nia,” tiin ngenngawl tak in ka dil a.

Kum 2005 chuan kan Field Director Rev Lalmunsanga chu Bangladesh ah a awm theih tak loh a vangin a haw a lo ngai a, a Computer kaw l chu kan hotute’n Pu Sangtea hnenah chuan, “Computer kha chu Lura hman atan hnuchhiah mai rawh,” an ti a, Computer Desktop chu min hnuchhiah sak ta ruau mai a, kan khuaah Carrent a la awm loh a vangin Bandarban a ka Pi Lalzovi w/o Taia chuan, “Kan inah dah la i hnathawhna atan room pakhat ka pe ang che, hna i thawh chhung chu kan ei ang ang i ei in i in ve mai dawn nia,” a ti a.

Bandarban a ka Pi Lalzovi te inah chuan ka Computer chu ka dah a, an inah chuan hna chu ka thawk thin a, a chang chuan kâr khatte, kâr hnihte hnathawkin ka awm thin a, ka awm chhung zawng chuan inthlahrung miah lovin ka Pi Lalzovi te hnenah chuan ka ei in ka in a, ka Pi hian min hmangaih em a vangin a tu leh fate zawng zawng pawhin min hmangaih veka. Hnathawka Bandarban a ka cham chhung chuan thâ ka âm thei em em a, zingah ka thova Breakfats ka ei zawh hnu a tang chuan ka hna chu ka tan nghal char char a, chhunah chaw kan ei a, zan dar kua velah chaw kan ei leh a, zan dar sawmpahnih thleng hna ka thawk leh thin a.

Chutiang a ka thawh rim em avang leh ka Pi te ei in (vai ei ang) chu ka pumin a lo mil vak lo nen; ka hriselna chuan kum khat pawh ka thawh hma chuan a tuar ta tlat mai a. Lalpa hnenah, “Lalpa, Computer Desktop min kaw l tir reng chuan ka dam rei lo tawp ang, hna thawhtur lah ka ngah si a, Laptop min pe zawk mai rawh, Laptop chu kan in a ka Solar in ka hmang thei ang,” ka ti a.

Chumi kum chuan Mizoram ah ka han chho leh a, kan Field Director lo ni tawh, Pu Sangtea chu ka ngaih em avangin Lawngtlai bul Thingkah a a awm chu ka va tlawh a, Pu Sangte a chuan, “Hei, ka Laptop hi Amongphru in Bangkok a tangin Secondhand min rawn lei sak a ni a, Secondhand mah ni se Japan siam a ni a, a tha em em a, mahse a chhiat palh chuan heta siam a buaithlak dawn a vangin i

Dasktop kawl lai kha hotu te hnenah hralh dil la, a daih bâk chu Office ah pawisa dil la ka Laptop hi lei mai rawh,” a lo ti a.

Asawi ang chuan kan hotute chu ka dil a, kan hotute chuan min lo phal sak a, Pu Sangtea Laptop chu Lalpa’n min pe leh ta a ni. Lalpa hi chu a mite tan thil tha hi a ui ngai lo tak tak a ni. Chu laptop chuan hna tam tak kan inchhungkhur a tang ngei-in nuam takin ka thawk thei ta a. Kum 2007 khan Fuarlogth turin Mizoramah kan chhungkua in kan chho dawn a, kan chuan-na Jeep chu mi kan tam em a vangin a chhungah ka leng ve lova, a chungah ka thu a, Bandarban thlen dawn chuan kawng kawiah motor a tlan chak lai takin kan Bag chu a tla dawn a, kan bag dawm ka va tum chu (kawng kawî lai taka lo ni a) motor chung a tang chuan kawngsir lei char laiah motor chuan min paih thla thuai mai a, lei ka thlen lai pawh ka hre hman lo.

Ka nupui leh fanaute chuan motor chhung a tang chuan, “Apa a tla,” an ti a, an râk chul mai a, motor chu a piah deuh daihah chuan a ding ta a. Keichu ka thova ka inbeng thawk thawk a, motor lam pan chuan ka kal ve leh mai a. Engmah nâ ka nei lova, Bandarban a ka Pi Lalzovi te in kan va thlen chuan ka Laptop chu ka han en nâk chuan a lo keh vek mai a. Pawi ka tiin ka ui em em mai a, “Kei chuan engtikahmah Laptop thar chu ka lei leh thei dawn si lova, hotute hnenah pawh dil leh mah ila Laptop thar leina chu min pe leh dawn tawh si lova, hna thawh tur lah chu ka la ngah bawk si a,” ti in ka ngaihtuah a. Ka ngaihtuahna a buai zova, ka â muih hian ka inhria a, chaw ei nachang pawh ka hre lova.

Ka nupui leh ka fate chuan, “Mitam tak motor chung a tanga an tlakin natakin an inhliam a, thenkhat chu an thi a, (kan line ah hian motor chung a tanga tla hi mi pathum lai an thi tawh a) nang chu i engmah hliam lovin Pathian in a veng che a, Laptop chu a pe leh em em ang che,” min han tih chuan ka harh huai hian ka hria a. Chuta tang chuan ka hlim ve leh in ka nunna Lalpa’n min zuahsak a vang chuan lawm nachangte ka hre ve ta chauh a ni.

Mizoram kan thleng a, he ka lehkha bu, ‘Ka Hringnun leh Miria te Khawvel’ bu hi Mualchin Printing Press neitu M.C.Awia’n (Pu Awitea) kei in a chengkhat pawh in sengso lovin ama sumin abu min

chhuah saka, kan Fuarlogth naah kan Relist nghal a, chu ka lehkhabu man pawh chu Pu Awitea chuan, “Chengkhat pawh ka la dawn lo, i mamawh lei nan i hmang dawn nia,” min ti a, chu ka lehkhabu man chuan ka nupui leh fate sawi ang ngei chuan Laptop thar leh Camera thar thatak ka lei thei ta a ni. Lalpa’n Laptop Secondhand hmang lovin Brandnew ngat min hman tir a lo duh a ni tih ka hre chhuak ta a ni. Kan sawi nawn leh teh ang, Lalpa hi amite tan hian a va han tha em, a mite tan chuan thil tha engmah ui pawh a nei lo a ni. Lalpa chu fakin awm kumkhua rawh se.

Tin, Literature hmanga ka thil tum pakhat chu Miriate hi hnam hrang, ṭawng hrang hmang, Miria ni tho si hnam riat; 1. *Anawk*. 2. *Süngmow*, 3. *Tamsa*. 4. *Dopreng*, 5. *Rengmitchowh*. 6. *Rengma*. 7. *Dawmrawng*. 8. *Uise* te an awm a. Chung hnam riat zinga Kristian tam ber leh changkang deuh berte chu Anawk hi an ni a, tin an ṭawng hi a tha in a mawi deuh ber bawk a vangin an hnam International Language a tan hman sak chu ka thil tum ber pakhat a ni.

Anawk ṭawng hi Mire ṭawngpui a an hman theih chuan an tan inpawh a awlin Miria theuh theuh inenhran-na a bo ang a, an lo inpumkhat in kawng tam takin hma an sawn thei dawn a ni. Chuvang in zirlai bu leh lehkhabu zawng zawngah chuan Anawk ṭawng vek ka hmang a, tun hma a ṭawng inpawh lo tak tak kha tunah chuan Anawk ṭawng hmang in an inpawh deuh vek tawh a, Mire zingah Anawk ṭawng hre lo an awm mang tawh lo a ni. Pathian thu hriltute tan pawh a zia tawh khawp mai.

**2.1. Mire A Aw Zirtan bu siam :** Tunhma NEIG hun lai khan Pastor H.Dala te’n Mizo a aw b hmangin Johana bu mal leh Hla 75 chu Mire ṭawngin an lo dah tawh a, mahse Mizo a aw b chuan Mire ṭawng a zia fiah vek theih loh a vangin Pastor Chownglowka siam Mire a aw bu chu CFB Mission in bu tam tak a chhuah a, mahse a hawrawp siam danah duhthu a sam zan loh a vangin chu chu hman loh in hnawl vek a ni a, chumi hnuin keiman ka siam ve ta a, alem te chu keima kut ziaf vek a la ni a (Computer ka la hman ve loh a vang in) Mire zirtan bu ka siam chu Mire Kristiante chuan an pawm



tlangin tha an ti tlang ta a, chu chu CFB Mission chu chhuah turin ka ngen a, CFB Mission chuan Copy 50 chiah min chhuah sak a.

Mire zirtan bu chu kan mamawhna a san em a vangin Mizoramah ka kal a, BCM Head Quarter rem tihpuina in Makedonia Mission Board chuan bu 300-lai min siam sak a, chu chu Mire ramah ka hawn thla vek a, reiloteah a zawh leh vek a vangin Makedonia Mission Board-te tawngkamtha umin Mire zirtan bu min siamsak turin ka dil nawn leh a, Lalpa'n min tanpui a, ka dilna chu tih hlawhtlin in a awm leh ta a, Bu 500 lai min siam sak leh ta a. Makedonia Mission Board chungah leh Makedonia Mission Board hnen ui hauh lova thilpek petu zawng zawngte chungah Lalpa a vangin lawm thu ka sawi mawlh mawlh a ni e.

Chupawh chu azawh leh hnuah Aizawl a Mualchin Printing Press Copy 1000 ka chhu leh a, Mualchin Publication and Paper Works neitu Pu M.C.Awia (Pu Awitea) chuan cheng tam takin min tanpui leh a ni. Chupawh chu Mire ramah ka keng thla leh vek a. Chu pawh chu a zo leh ta a, Mire zirtan bu chu siam leh a ngaih tak a vangin changtlung zawk leh mawi zawkin ka siam leh a, a bu a siamna tur pawisa chu Champhai khua Pu M.C. Sangkhuma leh Aizawl Ramhlun 'N' Kohhran BCM te'n min rawn tum sak leh a, chu chu Bangladesh ah page 45 Copy sanghnih in ka siam leh ta a ni. Lalpa'n a mawhphurhna chu a mite hmangin a hlen chiang khawp mai. Mire Zirtan bu hi kan khua Empu a BCM School ah an zir a, School a zir bakah Mire Kristian tawh phawt chuan eng Mission pawh in an zir vek baw a ni.

**2.2. Kristian Vanram Kawngzawh bu :** Mire Kristian te'n lehkha zir chakna thinlung an neih theih nan leh Pathian an rinna kawnga an lo ngheh lehzual theih nan, Miriate hian milem en an peih baw a; milem awm chi lehkhabu siam sak a tul hle in ka hria a, chutiang a tan chuan Kristian Vanram kawngzawh bu hi a tha in ringtute tan lehkhabu ropui leh chhiar nuam tak a ni tih ka hria a. A thu hi hriat a awl in chhandamna kawng zawh mekte tanpuitu tha tak a nih ngei ka rin a vangin Kristian Vanram Kawngzawh bu chu Mire tawngin ka letling ta char char a.

Ka lehlin zawh hnu chuan ka thian, ka rawngbawlpui nibawk Menlawnga Miria Sakrau khua a awm hnenah chuan ka han kal a, a nin dawhthei tak leh tlawmngai takin min lo endik sak vek a. Menlawnga hi a tette a tanga Mizo hnam sipai MNF te lo awmna hmun Sakrau khua a awm a nih a vangin Mizo tawng pawh a thiam tha hle a. a bula ka awm hi chuan Mizoram a awm emawte ka inti lek lek thin. Alem chu Mizo tawng bu-ah chuan a kim tawh loh avang leh duh ang a fiah tawh loh a vangin Bangla (Bengoli tawng) bu a mi ka hmang zawk a ni.

Mire tawng Kristian Vanram Kawngzawh bu page 252 chu a bu a chhuah theih a ka peih fel hnu chuan BCM Headquar lamah ka chhohpui leh a, kan hotute chu a bu a min chhuah sak turin ka ngen a, chu ka ngenna chu min tih hlawhtlin sak leh a, Mire tawng ngeiin Kristian Vanram Kawngzawh bu chu kum 1998 khan kan lo nei ve ta a ni. Hei hi tun a kan khua Empu a BCM School ah pawl nga (Class V) zirlai buah kan la hmang reng a ni.

Ka beisei ang ngeiin mi tam tak; Kristian ni kher lote pawhin a bu chhung a milem an han en chuan chu milem chuan sawi an nei a ni tih an hria a, mahse chu milem thusawi, a hnuai a inziak chu an chhiar thiam si loh a vangin A Aw zir duhna-ah ahruai lut a, A Aw bu an rawn lei a, thenkhat chu Kristian Vanram kawngzawh bu an chhiar a tanga Kristian a rawn lutte pawh report ka dawng zauh zauh a ni. Kristian Vanram Kawngzawh bu chauh an chhiar thiam a nilova lehkhabu tam tak an lo chhiar thiam phah bawh a, a hlawk khawp mai, bakah chu leh khabu chuan A Aw zir chakna a siam sak bawh.

Mire tawng Kristian Vanram Kawng zawh bu hi ka chhuah hmasa kha a zawh tawh avangin abu chu ka ennawn leh a, a kawm pawh Color in mawi takin ka siam a, Center Church, Ramhlun 'S' leh Salom Kohhran Aizawl te'n abu siamna min pe a, a vawihnihna atan kan siam leh tawh bawh.

**2.3. Mire tawng Grammar bu :** Mire tawng hi anmahni Miria te ngei pawhin (Kei ni Mizo te pawhin kan tawng kan hmang diklo fo ang bawkin) an tawng hi an hmang dik lo ve thei hle thin a. Ziak leh chhiar thiam tawhte pawhin ngaihthlak nuan taka chhiar an harsat

hle thin a, chhiar nuam taka ziaak pawh an harsat hle thin a. Aziak phei chu Grammar an thiam miao loh a vangin lehkha ziaak dan leh chhinchhiahna hman dan (punctuation) an hriat loh a vangin a buai thlak thin hle a, Literature lam a hma han la ve tur phei chuan anmahni Mire tawng Grammar an thiam ngei ngei a ngai a, chuvangin Miria te Literature lam a an than chhoh ve zel theih nan leh an hnam inpumkhatna a lo that zawk theih nan Mire tawng Grammar bu siam chu tihmakmawh ni in ka hria a.

Mire tawng Grammar bu a lo awm chuan Mire hnam zinga hnamdang (Miria ni lo) rawngbawl a awmte tan pawh Mire tawng zirna kawngah nasa takin a pui theih ngei ka ring bawk a ni. Mire tawng Grammar bu ka buatsaih chu kum 2009 khan Page 68 Copy 1000 in ka siam a ni. Tunah chuan a bu ka siam sa a zawh leh tawh a vangin kum 2020 khan Lunglei Ramzotlang BCM Kohhran tanpuina in Copy 2000 ka siam nawn leh tawh a ni.

**2.4. Mire Kristian hla bu :** Kum 1994 MCC khawmpui (MCC Annual Conferenve Galili khua) chuan Miriate hian hman a NEIG Mission in an lo buatsaih sak hla 75 awmna bak kha chu hlabu kan neih loh a vangin Mizo hla a tanga Mire hla a let a Mire Kristian Hlabu changtlung zawka siam turin kan rel a, hla lettua tan Pastor Chownglowk, Evan Singrau, Evan Menlawng leh Rosanglura Fanai (kei) te chu hla let tura tih kan ni a, hla lehlin chung a senso chu Empu Unit CKP in tum turin an in huam bawk a.

Empu khua Biakin-ah hla lehlin hna chu kan han tan a, Evan Singrau chu engemaw harsatna a vangin a rawn tel thei lova, Pastor Chownglowk, Evan Menlawng leh kei kan ni a. Hla kan han lehlin tirh phat a tang chuan buaina kan nei ta tlat mai a, Pastor Chownglowka chuan, Evan Menlawnga chu rawn tel lo turin a ti a, “Kan tam chuan thu leh hla a tam e,” a ti a. Evan Menlawnga chuan mih haw san ta a.

Pastor Chownglowka nen chuan kan han bei dun ta a, hna kan tan dawn chauh tihah chuan buaina kan nei leh ta tlat mai a, hla pakhat, KHB No 493-na, “Aw Lalpa i malsawmna hlu kan engkim chungah a lang,” tih a chang hnihna, a tlar thum na, “Hlobet par thil nung

tinreng in,” tih lai kan thlen chuan keini pahnih pawh chu kan lehlin duh dan a inang ta tlat lo mai a, Pastor Chownglowka chuan, “ ‘Hlobet par’ ti lovin, ‘Pangpar’ ti in dah mai ang, hlobet tih hla a a awm chuan ringlo te’n, ‘An hlaah chuan hlobet tihte a awm,’ an ti anga min nuih dah a nge,” a ti ta tlat mai a.

Mahse, kei chuan, “Nilove ka Pa, he hla phuahtu in ‘Hlobet’ kher a rawn tehkhin na hi a chhan a awm a lawm, hlobet chu pâh ve mahse tumahin, ‘He pangpar hi chu a mawi mang e,’ ti a ngaihsaktu an awm lova, chutia tih a hnêkin khawvel mihring te’n chu pangpar chu chabet chimawm takah an ngai zawk a, mihringte rah mai mai a ni a. Chutiang a mi tlawm leh hnuaihnnung berte pawh chuan Lalpa malsawmna chu an dawng vek a ni tih rawn sawi lan a tum a vanga ‘Hlobet par’ rawn hmang a ni, bâkah ringlo te’n rawn nuihsawh turin athu an rawn ngaithla chiang ve dawn chuang lo” ka ti a.

Mahse, ka thil sawi chu a rilrem zawng a nih loh a vingin, “Nangpawh lo inthiarfihlim mai teh, lu a hai e, ka duh ang chiahin Mizo Tonic Solfa bu a mi chiah hi ka let dawn, hla bu dang a mi hlate chu Pathian Thlarau thianghlim a tanga phuah a ni ve lo,” a ti ta bur mai a. Kei pawh chuan ka kiansan ve leh ta a. Chu chu kan Kohhran leh Thalai pawl te’n an hriat chuan Kohhran pui leh Thalai pawlte chu Join Miting an kova, chutah chuan Mire hla lehlin hna leh hlabu siam hna chu ka kovah an ngat ta a.

Chutia Kohhran leh Thalai te’n hla lehlin hna leh hla bu siam hna ka kova an nghah takah chuan Lalpa’n chu hna chu ka kova a dah a ngaiin tawngtai chungin fimkhur leh uluk takin Mizo Kristian hlabu pui a mi, Lengkhawm zai bu a mi leh hla lâh bu a mite, tha ka tihte lawrkhawmin a lehlin hna chu ka thawk ta a, hla pakhat ringawt pawh vawi tam ka ennawn thin a. Kum thum zet ka bei hnu chuan hla 280 chu a bu a chhuah theihin ka peih fel ta a.

Chumi hla bu chu mawi takin kum 1997 khan CFB Mission in Copy 1000 min chhuah sak ta a. Chu hla bu chu kum engemaw chen kan hman hnu in hla bu thar siam a lo tul leh ta a, hla thar 71 telh belh leh in hla 351 chu mawi takin BCM in kum 2015 khan abu min siam sak leh ta a, chumi hnu chuan kum 2017 khan Mire Christian

Literature Committee (MCLC) chuan Scripture Use Bangladesh (SP Bangla) pawisa pukin abu kan siam leh a, chutah chuan thu inchhangte pawh kan dah belh bawk. Tunah chuan Mire Kristian hla bu-ah hla zali (400) lai ka dah ve ta. Lalpa chu fakín awm rawh se.

Ka hla lehlin lai khan Lalpa'n min pui hle a ni tih ka hiat chian na em em chu Mire ram a ka awm a tanga kum li (4)-na a ka hla lehlin kha kum sawmhni (20) hnu a kan han ennawn leh pawh khan hla thu siamthat ngai a lo tlem em em mai kha kei pawhin a mak ka ti khawp mai. Hla bu pawh a changkang thei ang berin ka siam bawk a ni. Lalpa'n ka tawng lehlin chhung khan Miriate tan a tha taka tawng ka leh theih nan min lo pui hle a ni. Tunah chuan hlabu a kan dah loh ka hla lehlin sa hlabute daih a awm lehtawh a, hlabu kan siam leh hunah chuan hla pawh kan dah belh ve zelin abu pawh kan ti changtlung ve zel dawn a ni.

**2.5. Pathian thu zirna bu :** Kum 2003 chuan keini Mire Kristian-te mamawh em em Mizoram BCM Baptisma thuzir bu chu Mire tawng in ka letling leh a, chupawh chu BCM Headquarter a abu a min siam sak leh tura ka ngen-na min tih hlawhtlin sak leh in Mire tan chuan '**Pathian thu zirna bu**' ti in ka dah a, Page 120 a chhah a ni. Mire Kristian te'n Pathian thu hriatna kawngah an tangkai pui khawp mai.

Hnahthial Bazar Kohhrante tanpuina in a vawihnihna pawh chhuah a ni leh tawh bawk. Abu chhuah a nih theih nan a min tanpuitu te chungah kan lawm takmeuh a ni.

**2.6. Kawng dik:** Kan Kohhran hi hun rei tak lo kal ve tawh mah ila Pathian thu zirna bu siam zung zung kan harsat a vangin Sandei sikul zirlai bu kan nei lova, chuvangin Sandei sikul pawh kan nei thei lova. Kum 2004 khan keini tan a zir tawh lek Pi M.Thanzuali ziaik, Mizoram BCM K.N.P. thuzir, '**Kawngdik**' (page 118) tih chu Mire tawnga ka letlin chu BCM in a bu engemaw zat min siam sak a, chu chu kum hnih chhung Mire ram Kristian te'n kan zir ve a ni. Pathian thu zirna bu tih pawh khi Sande sikul-ah kan zir bawk.

**2.7. Mihring thinlung (Heart of Man) :** He lehkhabu hi Chhandamna kailawn pawimawh tak mai a ni a, mi mawl ber pawhin an hriatthiam theih turin a lem nen, mihring thinlung a sual

bawllhlawh chi hrang hrang awm leh chung sual chi hrang hrangte chhuah tir dan leh rawn luh leh an tum pawh a lo inven dante page 58 chu kum 2010 khan siam a ni.

**2.8. Pastor manual (Inkhawm kaihhruai dan) :** Mire ramah hian Lalpa ram a lo zau zel a, Kristian kan pung ve zela, mahse kan hruaitu neihte hi lohtheihloh a vanga hruaitu hna chelhte kan ni a, ziaak leh chhiar thiam ngawr ngawrte, khaw tam tak leh Mission thenkhatah pheih chuan Kristian ni pawimawh pawh a hun hre lo leh a hman dan pawh hre lo a tam zawk an nih avangte, inkhawm kaihhruai dan takngial pawh hre lo chu atam zawk kan nih a vangin a pawimawh em em a ka hriat a vangin kum 2012 khan page 46 a chhahin ka siam a, kan Mission chauh lo pawh Mire ram a Mission awm zawng zawng te'n an hmang tangkai em em vek a ni.

**2.9. Baptist Church of Maruchah (BCM) Constitution and Rules :** Mire ramah Baptist Church of Maruchah (BCM) Kohhran a lo din tak a vangin Kohhran inrelbawl dan fel zawk leh Kristiante Rinna (Confession and Faith) zirna bu kan mamawh a, kan Field Director Rev Lalhmunsanga nen Mire Kristiante mil turin 2014 kum khan page 73 a bu in kan siam a, kan Mission chauh lo pawh Mission hrang hrangin an hmang ve a, kan tangkaipui khawp mai. Tunah rih chuan Mire ram a Mission hrang hrang awmte hi Doctrine dang la awm lovin Baptist Doctrine vek an la nih a vangin heng ka lehkhabu siamte hi Mission hrang hrang pawhin ngaihngam takin kan hmang tlang vek thei hi a lawmawm khawp mai.

**1.10. Vanram :** Hnam tin hian Vanram kan suangtuah dan leh Vanram thlen theihna tur kawng ni a kan hriat a in ang vek lo a, kan unau Miriate pawh hian Vanram an suangtuah dan a awm ve a, Vanram kailawn leh Vanram awmzia an hriat loh em a vangin tam tak chuan Vanram kal tul tihna leh chakna an nei pha lova, chuvang in Kristiante zingah ngei ngei pawh Pathian/vanram ngaihsak lem lo, sakhuaa zawngah chuan Kristian a ruh ve tak tak si an tam em a vangin he lehkhabu hi Vanram an hriat chianna a tan leh Pathian/vanram an lo ngaihsak zawk nan a an hman beisei-in kum 2015 khan page 131 a chhah Thuhrlitu hmingthang DL. Moody-a

ziak chu ka let a abu copy 2000 ka chhuah a. Mire Kristian te'n an tangkai pui khawp mai.

**1.11. Hremhmun leh Meidil :** Hei pawh hi a chung a kan sawi tawh ang khan, Vanram leh hremhmun chanchin an suangtuah dan a nep em avang leh Miria te hi an pi leh pi a tanga pian nawn (Karma Background) a tanga Kristian a rawn inlet te an nih a vangin an tan Vanram, Hremhmun leh Meidil hian an nunah awmzia a nei tak tak thei thin lova, a chhan chu Vanram, Hremhmun leh Meidil hi a awm tak tak a an rin loh vangte leh Hremhmun leh meidil an hriat chian loh a vanga an suangtuah dan a hlauhawm loh em vangte pawh a nih ka ring a.

chuvangin Dr, PC.Biaksiana diak, 'Mihausa leh Lazara' bu chu Mire tawngin ka letling a, Mire tawng lehkhahu hmingah chuan, 'Hremhmun leh Meidil' (Hremhmun chanchin diakna bu a nih a vangin) ti in ka dah a ni. Hemi lehkhahu pahnihi hi Mire Kristian te'n an chhiar a Vanram, Hremhmun leh Meidil chan chin an hriat chian chuan Pathian lam a hnaih tir ngei ka beisei tlat a ni.

**1.12. Leadership Treining & Seminer Bu :** Mire Kristiante a tul leh mamawh angin ka ko khawm a ka zirtir reng theih loh a vangin mi inzirmi leh lehkhah chhiar peih te'n anmahni awmna hmun a an lo chhiar a an lo zir a tan leh midangte an lo zirtir ve a tan, a bu a siam a, a duh apiang neih theih a buatsaih chu thil tul ni a ka hriat a vangin a bu in ka siam a.

### **Chuta Subject ka dahte chu:**

2.12.1. Kum 1919 – 1944 chhunga Mire ram a North East India General (NEIG) Mission chanchinte, Mire Kristian hmasate chanchin leh 1965 – 1978 chhunga Mizoram leh Bawm ram a tanga Mire ram a Voluntary Missionary te chanchin. Mire Kristiante hian an ram a Missionary hmasate chanchin hi an hriat tul ka ti em em a, an ram a Missionary hmasate chanchin an hriat hian Mire hnam, Lalpa rawngbawltute tan tangkaina tam tak aneih ka ring tlat a ni.

1. 12. 2. Mission
1. 12. 3. Berampu
1. 12. 4. Thuhiril
1. 12. 5. Baptist Church of Maruchah Confession of Faith.

2.12. **Bible lehlín leh chhut** : Bung hmasa lam a ka sawi tawh ang khan Chanchinṭha Johana bu mal chu tunhma NEIG Mission hun lai khan Mizo a aw b hawrawp pangngai hmangin an lo chhu tawh a, mahse Mire ramah Kristian kan lo pun chhoh ve tak zel avangin Bible mamawhna a lo sang chho ve zel a, Pastor Chownglowka leh Pastor Nguntuara te'n Thuthlung thar chu an let a, tlangval Iowngrung-a chu Computer zirtir chawpin alettu te'n an lehlín zawh chuan a ni chuan a chhu nghal a, Mire Bible Thuthlung thar bu siamna sum zawngtu chu CFB President Rev RT Mawia a ni a, a ni hi duh aiin ahman hmawh mah mah a, alettu te chu letling zo thuai thuai turin a nawr sek a, hmanhmawh leh ngawrh tak an lehlín zawh hnu chuan an lehlinah chuan tihsual palh a awm leh awm loh pawh ennawnna nei miah lovin Iowngrung-a chu a chhut tir a.

#### Mire Bible O.T ka Review lai

A ni Iowngrunga pawh chu Computer chhu thiam sawlh sawlh niin hmanhmawh takin a chhut tir leh a, Iowngrung-a'n a han chhut zawh chuan a chhut sual palh a awm leh awm loh ennawn miah lovin Mire Bible Thuthlungthar bu chu kum 2007 khan asiam tawp mai a ni. Mire Bible Thuthlung thar chu Rev, RT Mawia hian a pawngsual hi a ni ringawt mai. Rev RT Mawia hian engvangin nge Pathian lehkhabu thiang hlim hi heti taka hmanhmawh leh phuiluai tak maia a chhuah hi ka hrethiam phak lovin pawl ka ti tak zet a ni.



Tun a Thuthlung hlui kan leh danah chuan bu khat ringawt pawh kan lehlín zawhah aletlingtu te'n ngun takin an ennawn leh vek a, chumi hnu in keini MCLC Review pawlin uluk takin kan ennawn leh hnuah London a t̃angin Consultant in a lo endik leh vek a. Bible hi chu khawvel a Lehkhabu ṭha ber leh ropui ber a nih a vangin a Pathian thu bu, Pathian kan rinna a min kaihruaitu a nih a vangin lehlinah pawh uluk theih tawp a tih ngai a ni si a. Mahse, kha tih lai khan Mire Bible thuthlung thar kan han nei kha chu Mire Kristiante kan lawmna a sang em em a, a bu a min chhuah saktu leh min lehlín saktute chungah pawh kan lawm tak meuh a ni.



Khami kum kha Mire hlabu puitling kan neih hmasak ber kum a lo ni leh zel baw k a, kan lawmna a sang takmeuh a, chuvangin Mire Bible lawmna hla ka phuah a, kan nula te'n Action in mawi takin Mire Bible Thuthlung thar lawm nan an sa in an lam a ni. Chu hla chu chutih lai chuan kan sa ning thei lo a ni ber mai. Tun thleng pawh hian kan thalaite hla duh berte zing a mi a la ni reng a ni. Chu hla chu hei hi a ni (Mizo tawng in):

### **Baibul kan nei ta**

1. Lalpa chanchin ziahna Baibul thianghlim hi,  
A hlu in ava ropui em!  
Pathian thawkkhum a zia k a ni,  
A ropui lehkhahu zawng zingah.  
Keini Maruchah te'n,  
Nun kawng kan hriat theih nan;  
Baibul kan nei ta,  
He Baibul ngei mai hi a lo ni,  
Nun kawng min hrihtu.
2. Min hmangaih vang a ka ta na nun petu,  
Chanchin ziahna a nih vangin;  
Ka chhiar ang Baibul thianghlim hi,  
Tawngtai a Lalpa pawl chungin.
3. Lalpa, i Thlarau thianghlim in min pawl la,  
Midangte i hnen a hruai thei turin;  
Kan theih tawkte tlem hle mahse,  
Kan theih tawkah mal min sawm ang che.
4. Kan lawm e, Aw Lalpa, lawm thu kan hrih che,  
Min hmangaihna thuk leh zau zia;  
Kei ni misual nung tlak lote,  
Nunna min pe leh ta, kan lawm e.

2.13. **Thuthlung hlui lehlin** : Mire tawng thuthlung thar kan neih hnu chuan Thuthlung hlui lehlin hna chu kan tan leh nghal a, Mire tawng ka thiam ve tawh a vangin Pastor Chownglowk chu ka pui ve thin a, mahse Pastor Chownglowk chu a lo hrisel lovin a lo tar ve tawh em a vangin a hna chu ka chhonzawm in amah nen a kan lehlin

sa pawh chu uluk tak a ennawn leh in Computer-ah ka chhu lut zel bawh a. Pastor Chownglowka chuan ni 13 April 2013 chuan ropuina ramah min chawlh san ta a.

Bible lehlin hi mimal a kalpui chi niin ka hre lova, a chhan chu, mimal hming a lan chuan min duhtu tam tak an awm lai in min duh lo a min dodaltu tam tak an awm thei a ni tih chu ka hriat a vangin Mire Christian Litteratur Committee (MCLC) din chu tulin ka hria a, Dt 14 Oct 2009 khan Mire ram a Kristian Mission hrang hrang a mi hruaitute ka Office-ah ka kokhawm a, Bible lehlin chungchang mai bakah Hla bu leh lehkhahu dang dang siam chungchangah pawh Mire Christian Litterature Committee din chu a tul zia ka han sawi chuan an ni pawh chuan tha an ti tlang a, hruaitute pawh kan inthlang nghal a. Chung kan hruaitu thlante chu :

- Chairman** : Pastor Sangchawnh BBC.  
**Secretary** : Pastor Iowngrung BCM.  
**Tresurer** : Meniawng BTABC.  
**Member's**
1. Pastor Rosanglura Fanai Translator BCM.
  2. Menpungh BCM.
  3. Menpawi CFDB.
  4. Menpiaw BBC.
  5. Evan Peklian ECC.
  6. Mentui BBCS.
  7. Pale BBC.
  8. Kua niang MCC.
  9. Evan Tuarthawn ECC.
  10. Langsowm BCM.
  11. Meniawng BCM.

Kan thiltum pawh kan siam fel nghal a, chu kan thiltum chu hei hi a ni:

### **MCLC THILTUM**

1. Mire tawng humhalh.
2. Mire Scrip (a aw b) hman uar zel.
3. Mire Litterature tih changkan zel.
4. Mire Bible chhiar tam tur a mite zirtir.
5. Pathian fak hla mite zirtir.
6. Mire tawng a Pathian thu track/bu a tam thei ang ber siam.

7. Mire Kristian te rinna diklo (Doctrine diklo) lak a ven him.
8. Miriate Kristian dik tak a siam.
9. Kristian te thlarau lam a an puitlin theih nan a hma lâk.
10. Mire ram a Mision hrang hrangte lungual taka an thawh ho zel theih nan a hma lâk.

Mahse, kan Chairman hian min ngaihsak zui theih tak loh a vangin hemi tum a Mire Chiristian Litterature Committee (MCLC) hi a zuzi ral leh ta mai a. Mahse, beidawng mai lovin MCLC chu chutia zuzi mai tur a tan chuan ka phal lova, achhan chu Mire hnam tan nakin zelah an hnam Litterature lam a hma an sawn nan leh kawng engkimah an la tangkaipui dawn a vangin, ni 25 April 2012-ah Malumghat-ah America Baptist Mission BTABC Tribal Office-ah Mire ram a Mission hrang hrangte ka ko khawm leh a, MCLC chu kan in form tha leh ta a, hruaitu pawh kan thlang tha leh a, chuta kan hruaitu leh Committee Member-te chu hengte hi an ni :

**Chairman** : Pastor Iowungrung BCM.  
**Secretary** : Pastor Menlawng BTABC.  
**Tresurer** : Meniawng ERPC

**Committee Member-te :**

1. Rev, Rosanglura Fanai BCM
2. Rengtown BTABC.
3. Singlowk ERPC.
4. Mentang CFDB.
5. Mentui BBCS.
6. Singrau BFC.
7. Mensia ECC.
8. Pastor Rengkri BBF.

MCLC kan din a tang chuan Bible Thuthlung hlui lehlin hna chu keimah in thawk mah ila keima hmingin a ni ta lova, MCLC hming chuan kan ti ta zel a, Pastor Chownglowk lehlin sa Computer a siamtha pah a ka chhut luh chu MCLC chuan kan Review zel a, Review tur chu Committee Member's dahin kan print chhuak a, mahni inah nguntakin an lo endik a, chu chu Review Committee hunah rawn kengin kan Review leh vek thin a.

Hetianga Review Committee kohkhawm hi a hautak ve hle mai a, an ei leh in turte leh Review tur Member's bu khat theuh daih print chhuah a sem leh veka ngaih a vangin Malumghat a America Baptist Association Mission a an hotupa Pu Hearold a chu min pui turin ka ngen a, a ni chuan anmahni hmun a Mire Bible Review kan neih chuan review tura rawn kalte ei in leh kan print chhuahna lehkhapuan man chu min tum sak tur thu min hrilh a, chuta tang chuan Malumghat anmahni hmun a Traibal Office-ah deuh ngawt chuan Bible review chu kan nei ta a ni. Pu Hearold a hian min ngaina in min duhsak em em thin a, a chungah pawh ka lawm takmeuh a ni.

MCLC Member thenkhatte leh min puitu Korian thian thenkhatte nen

Asia khawmual hmun hran hran a Kristian, mahni tang Bible la nei lote Bible lehlina sak thintute chu Bangladesh-ah an rawn lut a, chungmite chu America sap leh Koria mite an ni a. Bangladesh-ah chuan Scripture use Bangla (SP Bangla) an inti a, chumite chuan ka



chanchin an hriatin min rawn pan nal nal a, anmahni nen chuan Mire Bible Thuthlung hlui lehlinah chuan thawk ho turin min rawn ngen a, kei chuan ngun taka ka ngaihtuahin; ahmingin kan Field-ah a mawhphurtu ber Field Incharge ka ni a, Field-ah hna ka ngahin Mire mamawh lehkhahu hrang hrang ka siam a ngai a, Field Meeting in rampawnah ka kal a ngai zauh zauh baw si a, chuvangin Bible lehlina leh chhutah duh angin ka thawk sawt thei lo hle si a, chutia an nin min pui thei a nih chuan Bible lehlina hna pawh a sawt deuhin kema hna (Field a ka hna) pawh ka thawk sawt thei deuh ang tih ka ngaihtuah a.

Chuvang chuan anni nen a thawh ho chu tha ka ti in ka pawm ta a, anni pawh chu atir a Dhaka a awm chu MCLC in Bible kan review-na thin Malumghat ah chuan an rawn insawn ve a, Computer 3/4 rawn chhawpin Mire Bible thuthlung hlui lettur tur leh chhutu tur Mire Kristian Bangla English Mizo tang thiamte kan la a, Bible lehlina dan Trening-te pe in a lehlinna bik Sofwore hman dante chung kan mi lak tharte nen chuan min zirtir a, anni chuan hma an la ta a.

Keini MCLC chuan thla khat danahte a Rewew hna chu kan thawk ta a, bu khat kan rewew zawh chuan London a t̄angin Consultant-te rawn kalin min rawn endik sak leh vek a, tunah chuan kan lehlín a piang chu Moble Android set-ah Mire Bible Sofwore a voice nen kan dah nghal zel thei ta a ni. Abu pawh S.P.Bangla te hian min siam sak dawn a ni. Hna ka ngah leh ka buai theih em a vangin Mire Bible lehlín a min rawn t̄anpui turin Lalpa'n tuipui ral ram hla tak a mite a rawn tir leh ta a ni. Lalpa, ka lawm e.

### 1.13. **Thuthlung thar lehlín :**

Bible Thuthlung thar chu letling t̄at leh a chhu t̄a leh vek turin MCLC chuan a rel a, mahse SP Bangla te chuan, Thuthlung thar chu an buaipui theih tawh dawn loh thu an sawi a vangin MCLC Committee chuan Bible Thuthlung thar lehlín leh chhut hna chu ka kovah an nghat leh ta a, a endik hna chu MCLC Rewew Committee in a en dik leh turin kan rel ta a ni. Mahse, Wycliffe Associations te t̄anpuina in MCYA te'n Mire N.T lehlín hna chu an thawk ta zawk a ni.

Thla thum chhung lekin Mire Bible Thuthlung thar chu Muru Christian Youth Association (MCYA) chuan Wycliffe Associations te t̄anpuina in an zo der mai a, bu pawh an chhuah nghal a, mahse a tir a ka thu an awi loh avangin Mire thalai; Pathian thu hriatna leh Bible thu engmah hre lo te'n an han letling a, hman tlak lohin an chhuah leh ta vek mai a, chu chu MCLC te chuan duh lovin tunah hian Mire Bible thuthlung thar lehlín hna chu MCLC te'n kum thum chhung a zo hman turin bul kan tan leh ta zawk a, Lalpa t̄anpuina a kan zawh theih hunah Thuthlung hlui nen bu khatah kan siam ang. Pathian tanpui<sup>9</sup>na in Mire Holy Bibly chu kum 2028 changtlung leh changkang takin kan nei ve thei tawh dawn a ni.

2.14. **Pathian lehkhabu chanchin thu lehlín :** Kan Field Director Rev Lalmunsanga awm laiin khan Field Director chuan Mizo Kristian te'n Pathian thu hriatna kawnga kan t̄angkaipui em em, Mizo t̄awnga vawi kua (9) lai mai chhut nawn tawh, 'Pathian lehkhabu chanchin thu' a chhiar ngaihnaawm tura thawnthu ang deuh

a ziaik, page 571 lai a chhah chu Miria te'n anmahni tawngin nei ve ngei se tih a duh a vangin Mire tawng a letling turin min ti a.

Chu hna tha chu ka thawk leh ta char char a, kan chhangehhiat lai a nih bawk a vang leh a changa Field fante ka ngaih a vangin kum khat dawn ka bei hnu chuan Mire tawngin ka let zo ve leh ta a. Chutih lai chuan Computer ka la hman loh avangin kut ngawtin ka ziaik a, Computer ka neih hnu hian hna dang ka ngah em a vangin ka chhu lut hman lawk lova, mahse tunah chuan a bu a chhuah turin ka peih diam tawh a.

Mire tawng chuan phek 516 lai a chhah ani a, abu siam nan bu zanga (500) chauh pawh nuai chuang fe anih avangin tumah ka dil ngam lova, mahse Pu Sangtea (Rev Lalmunsanga) nen a kan duh leh kan beisei chu Lalpa'n min remtihpui a ni ngei ang; Mire Holy Bible kan neih hma ngei-in, kan beisei leh kan rin lohna lam atangin bu zanga (500) siamna tur sum BCM Falkland Aizawl in min lo pe hlauh mai a, chu chuan ni 5/7/2025 chuan abu kan siam ta a ni. A vahan lawmawm tehlul em. He lehkhabu Mire tawng kan siam theihna tura sum min thawh saktu BCM Falkland Aizawl-te chungah lawm thu kan sawi takmeuh e.

**2.15. Magazine lam :** Mire Kristian te hian a tam thei ang ber lehkhah an chhiar hi ka duhsak em em thin a, an chhiartur ngaihtuah sak chu ka mawhpurh ni in ka hre bawk a, an chhiar duhzawng awmte ka ngaihtuah a, chutiang tur chuan lehkhah chhutna khawl (Typewriter) chu ka nei tawh a; mahse Cyclostyle ka mamawh a ni tih ka inhria a. Aneih dantur ka ngaihtuah ta a. Mizoramah ka chhova U Zova (U Nuengi pasal) chu thing in Cyclostyle ka siamtir a, chu chu Mire ramah ka hawn thla a.

Cyclostyle a chanchinbu ka her lai

Chu Cyclostyle hman chuan Magazine ang ve deuh hian ka chhuah ve ta a, chuta ka thu chhuah chu; Chanchin thar tlem, Hriselna lam,



Pathian thu tlem leh Bible chang zawnawl na thupui nei in. Ka Magazine hmingah chuan ‘**KRISTIAN NI CHHUAK**’ (**KRISTIAN SAT LAWT**) ka ti a, tlanga nichhuak lai lem Ceel in ka siam a, a chhutna awl ka zuahah chuan chu chu ka chhu kalh zel bawka a.

Ka Cyclostyle chu thing a siam a nih a vangin arei hnu chuan achàng a, a nawr kâi kim hleithe i tawh lova, mahse Lalpa’n mite thinlungah hna a thawka a, Lunglei Chanmari Kohhran BMP-te chuan ka dil ni miah lovin Cyclostyle tha leh man tam tak mai chu a thlawn in min pe leh ta a. Chu chuan ka hna chu ka chhunzawm leh thei ta a ni.

Chu khawl Lalpa’n min pek, ka kuta hlantu Lunglei Chanmari Kohhran BMP-te chuan chutianga khawl lian leh rit tak mai ramdang Bangladesh a ka keng thla tur chu ramriah buaina ka tawh palh min hlauhthawn pui em em mai a. Mahse, kei chuan, Lalpa hruaina in tluang takin Bangladesh Mire ram chu ka phur thleng a ni. Ka khawl thar chu ka hmang tangkai em em mai a. Magazine pawh fel fai leh tha takin ka chhuah thei ta a ni. Weekly, Monthly leh Quarterly pawh ni lem lovin ‘*Hman chang changly*’ in ka chhuah ve thin a. Mire Kristian te’n chhiar nuan an ti ve khawp mai. Chu ka Cyclostyle chu kan khawmpui nikhuate hian kan hmang tangkai thei thin khawp mai.

**2.16. Nitin ka ngai che** (Chhung inkhawm bu) : Mizoram a chhung inkhawm bu hi Mire tawnga lehlin a abu a siam hi ka duhna arei tawh a, Mizo tawnga chuan mi hrang hrang zia k thahnem tak a awm tawh a, chutianga lehkhabu dang dang ka en kual hnuin Rev. Vanlalzuata zia k, ‘Nitin ka ngai che’ (Chhung inkhawm bu) hi Mire Kristian te’n an thlarau chawm nan leh Pathian thu sawi an zir nan an mamawh hle a ni.

Kan rawngbawltu thenkhat hian Pathian thu an sawi in an Bible thu chhiar leh an thuchah sawi intuhâ lo tak takte an awm thin a, chhung inkhawmna a hman bâkah Pathian thu sawi zirna a tan pawh a tangkai hle dawn a ni. Hemi bu Mire tawnga ka lehlin chu Baptist Church of Maruchah (BCM) te’n a bu chu an siam an tum a ni.

2.17. **Lushai zirṭan bu** : Bangladesh-ah hian Mizo (Lushai) khua a awm lova, hnam dang kâra awm mai kan nih a vangin Mizo ṭawng pawh kan tu leh fate chuan thiam an awm meuh lova, Mizo ṭawng ziaik leh chhiar zirna pawh kan neih loh a vangin kan tu leh fate tan chuan Mizo ṭawng leh ziaik leh chhiar zirna tur an neih loh avangin an tan chuan Mizo ṭawng, ziaik leh chhiar thiam chu a har hle a ni.

Mahse, Bangladesh Sorkar a ṭangin Lushai ṭawng Zirṭan bu siam turin ming rawn ngen mial mai a, zirṭan bu siam hi a buaithlakin a hautak ve hle a, chuvangin Mizoramah Mizo ṭawng Zirṭan bu mi siamsa a awm leh awm loh ka zawng kual a, pakhatmah ka hmuh loh a vangin pheik sawmli leh pariat (48) a chhah chu ka siam ta a ni. Chu chu Bangladesh a Mizo hnathlak naupang te'n Mizo ṭawng, ziaik leh chhiar zir nan an lo hmang ve thei ta a ni. Hetiang a Bangladesh a Mizo hnathlak te'n Mizo ṭawng leh ziaik leh chhiar an zir thei tur hi ka lawm takmeuh a, chu bâkah; He lehkhahu pawimawh tak Bangladesh Sorkar in siam tura kei min lo thlang hi vannei ka inti in ka lawm takmeuh a ni.

Abu pawh Sorkar siam a ni bawh a, Color Paper in mawi leh changkang takin an siam bawh a, ka lawm takmeuh a ni.

### 3. **Audio leh Music Vedio hmanga rawngbawlna :**

3.1. **Pathian thu Cassattee hmangin** : Kum 1997 khan Golbal Recordings Network-Bangladesh in Bible thawnthu Thuthlung hlui leh thuthlung thar bu 12 Mire ṭawng letling turin min rawn ngen a, chu lehkhahu bu 12 chu Mire ṭawnga ka lehlin zawh vek hnu chuan chung ka lehlin sa chu Record leh turin Dhaka ah min ko leh a, chutih lai chuan ka fanu Mazuali chu kum thum mi lek a la ni a, H hmeichhe aw nen an duh a vangin kan nu nen Dhaka ah chuan kan Record leh ta ngat ngat a.

Amilem en tur number indawtin, a kârah Music an dah zel bawka, Cassette 12 kan Record zo vek a, chu chu Cassette 12 a siamin Mire khua a Pathian thu sawitu te'n an hman turin Milem nen, a Ply na tur Type Battery tel lo pawh a aher a her a ply theih chi Australia siam nen chuan mi tam takin kan nupa a kan aw hmang chuan Mire ramah



rawngbawl nan an hmang a, Pathian leh Golbal Recordings Network-Bangladesh te zarah kan aw hmangin Pathian thu an ngaithla thei a ni. Tunlaih chuan Taperecord a awm tawh loh avangin Memory a dah theihin Mobile a ngaihthlak theihin an siam leh tawh a ni. Mire hote'n milem en an peih bawk si a, a tangkai khawp mai.

### 3.2. Hla Cassette hmangin :

3.2.1. Lunglei Rahsi Veng Moria Kohhran thalaite Mire hla Cassette siam : Kum 1997 December thla khan Lunglei Rahsi veng Moria Kohhran zaimi te'n hun chep tak karah Mire hla in hla sawmsarih chuang Cassette 5 lai min siam sak a, chu chu Copy tam tak a siamin Mire ram-ah ka hawn thla a, Mire Kristiante an lawm tak meuh a ni. He Cassette siamna a senso zawng zawng hi BCM in min tum sak vek a ni. Pu Chalbuanga AGS lai in a ni. Chuta rimawi min tumsaktute leh min zaisaktu te chu – Lawmkima Kawlni, Lahlmingsangi, Mahlimi, Zothanpuia (Puia), Zaitanmawia (Zaitea), Ramthana (R.T-a) leh Sanga te an ni.

Mahmingi pasal fanaute leh ka fanu Mazuali nen



Anni chu Office kal lai leh zirlaite an nih a vangin hmanrua an hawh khawm a, an Kohhran thil dahkhawmna-ah zan khuain Mire hla Record hna chu kan thawk a ni. Nula Lahlmingsangi (Mahmingi) chuan engemaw changa zai pahin kan eitur a lo buaipui reng bawk. Pathian in zaimite a awmpui a, zan a rei tulh tulh a an aw lah a tha tulh tulh mai bawk.

Chumi zan chuan mawitak leh thatakin Mire hla, lam har tak tak chu Cassette 5 ngawt kan thun khat vek nia! Hla zir chawp kan la ni mah mah. Hla record-ah chuan World Record chu kan khum chiang kher ang. Khami zan kha a tu a te mah khan kan dam chhung hian kan theihnghilh leh theih tawh hi ka ring lo, kan hah viau na khan kan va han hlim si em.

Chuta tang chuan ka thiante ho nen chuan thian ni mai lovin UNAU-ah Lalpa'n min siam a, Lawmkima Kawlni leh a faru fa,

Lalhmingsangi (Mahmingi) te phei chu Lalpa'n chhungkhatah min siam a, tun thleng hian Lungleiah chuan Mahmingite in chu ka inpui berah ka hmang ta hial a ni. Lalhmingsangi (Mahmingi) phei chuan ka fanu Lalhmangaihzuazeli (Mazuali) leh ka fapa Mika Lalmuanawma (Avala) te chu an sikul kal theih tirh a t̃angin a fa ang mai in a enkawlin a buaipui a ni.

Apasal neih hnu pawhin an enkawl chhunzawm zel a, a pasal neih zan chuan ka fanu Mazuali chuan a ni hnen a mut a ngen tlat mai a, a pi te'n a muthilh hnuah an pawm hrang thei hram a, khami zan kha chu buaithlak tak a ni. Mahmingi chu a nulat lai a t̃angin ka fate a vangin chhangchhe nu ang maiin a awm phah a, a pasal neih hnu pawh chuan kan pafa thum chuan min la chhawm ta zel a ni. Apasalte chhung hi miṭha tak chhung an lo ni hlah mai a, keini pafa ho pawh in (Mizoram a ka chhoh changin) kan in ang main ka fate Hostel aṭang a an rawn chhuah chuan kan awm a ni.

Ka fanu Mazuali leh ka fapa Avala chu pawl sawm an nih thleng chu Chawngfianga Memoprial School (CMS) neitu U Hmingtea'n (F.Rohmingliana) an Hostel a dah in Monthly fee min awl vek a, U Hmingtea chungah hian lawm thu sawi dan pawh ka thiam lo a ni. Lalpa'n kawng engkimin kan ṭhatna tur hlirin min kaihruai a, ka fate an t̃et lai a ṭha taka sikul an kal theihna turin hmangaih tak a lo enkawl turte min pe zel hi ka va han lawm ṭhin tak em.

Hmun dang dang a Kristian-te hla ka zirtir hman lohna hmun a mite pawh in he Cassette hmang hian anmahni in hla an lo zir thiam thei a, Kohhran kan phuisui phah hle a ni. Tlaivar thaka hah taka min zai saktute leh sum tam tak min sen saktu BCM chungah Mire Kristiante hmingin lawmthu ka sawi mawlh mawlh e.

**3.2.2. S.Lalmuanpuii (Puitei) Mire hla Cassette siam thu :** Kum 2004 khan nau nei turin Mizoram ah kan rawn chhova, nau kan neih zawh chuan Bangladesh a Mire ramah kan rawn haw thla leh a, Office ah leh Field ka buai theih em a vangin ka nau Lalmuanpuii (Puitei) chu nau min awmpui turin ka hruai thla a, ka nau Puitei hian ka Nu a chhun a, zai amisa riau mai a. Ka Nu hi a vanglai chuan

Fanai tlang dungah nà ná nâ chuan zai thiam leh aw ṭha a hmingthang ve kha a ni a.

Puitei chu nauawm pahin a zai ṭhin a, chutih laia kan in chu kawngpui hnuai chiah a awm hi a ni a, chutia Puitei zai chu kawngpui kalte chuan an hriat in Radio a zai emaw ti in Radio ngaih thlak tum chuan an rawn kal ṭhin a, Puitei nauawm zai mai a lo ni ṭhin si a. Kum tawp lam MCC khawmpui chuan Puitei chu solo turin an ngen nasa ta mai a, a ni lah chuan, “Mire hla ka sa thiam lo, Biakin a zai chu ka duh lo,” a ti bur mai bawk si a. Kan thlem kan thlem fe hnu chuan inkhawmpui tawp lam chuan a Solo ve ta nge nge a, chutia a zai chuan Mire upa ho leh ṭhalai ho chuan, “I Tapy ah khan Puitei zai kha min Record sak rawh,” an ti a, kei chuan, “Hla Record natur Cassette ruak pawh ka nei lo,” ka tih pawh chuan, Battery leina tur pawisa min pe a, min nawr lui ta tlat mai a.

Chutia hnial ngaihna awm lo khawp a min ngen tak a vang chuan kan ṭhenawm pa in sak lai, an la luah hma, in ruakah ka ṭingṭang-te leh kan Keyboard te, tawngkhat pawh tling manglo chuan Mire hla Cassette khat chu kan thun ta a. Kum thar 2005 kumtir lam chuan ka nau Puitei chu a haw a lo hun tawh si a, a haw dawn chuan Empu khua ṭhalaite chuan, “Mizoram inthlen hunah ṭhatakin hla Cassette min siamsak ngei ngei dawn nia,” an ti a.

S.Lalmuanpuii (Puitei)

Kum 2005 January thla chuan Mizoram lam panin Puitei te nen chuan Mizoram-ah kan chhova, Chittagong kan thlen chuan Puitei chu a hritlang hle mai a, Tlabung kan thlen chuan a khua a sik titih deuh tawh a, Lunglei kan thlen



chhoh pheii chuan a khua a sik hluah mai a. Kei chu Mire hla Cassette siamna a sum min thawh sakturin ka ngamtlak Pu R.Thanmawia Venghlun te nupa ka bia a, an nin a sum senso min tum sak thei dawn a, Sound track min siam sak turin Pu C.Lalzarmawia kan be leh a, Pu C.Lalzarmawia chuan Sound track 5 min siam sak hnu chuan Sound track chu ka la a, Clucose te ka lei a,

ka farnu Lalmuanpuii (Puitei) damlo tlun hluah hluah mai chu ka ṭawngṭai a, a khawsik pawh chu chawplehchihin a reh a, “Puite, tho la Clucose kha in la chaw ei bawh la intiharh in hla chu zir rawh le,” ka ti a.

Puitei chuan, “A-u, ka la chak lo in ka tha ala khur a sin, bâkah Mire hla ka sa ngai bawh si lova, an ṭawng a har bawh si” a ti a, kei chuan, “Puite, Lalpa’n Mire hla sa turin a ti dam tawh che a, ṭan lak chu i tih ve tur a ni,” ka ti a, Clucose te a in a chaw a ei zawh chuan hla chu a zir ve ta nghal a. A hla sak ngai loh Mire hla sak chu harsa a ti hle mai a, kei chuan a sak dik loh laite chu ka lo hrlh in a sa ṭha leh zel a, kar khat chhung lek chuan Mire hla 14 lai mai chu kan Record thei ta a, Chu chu Copy tam tak a siamin Mire ramah chuan ka keng thla ta a.

*Empu khua a Puitei Mire Cassatte Relist lai*

Mire ram ka thlen chuan Mire ṭhalaite chu an lawm hle a, ropui takin kan Relist a, chumi Cassatte chu Mizoram a chhohpui leh in Pu R.Thanmawia (Pu Mawia) te nupa



ṭanpuina bawkin Music Vedio kan siam leh ta a, Puitei chu Bualpui ‘H’ ah a awm daih a vangin ka han ko hman tawh si lova Lunglei a Moria ka unau nu Lalhlimpuii (Mahlimi) chu hla sawm lai ka shooting tir a, Lunglei zaithiam; Pency B.Lalthanglia ni, Bethsy Lalrinsangi, K.Lalthangzela, Jenet Remsangpuii leh Pi Mamua ni (Pu C.Lalzarmawia nupui) te’n hla pakhat ṭheuh min sak sak bawh a. Heta an hla sak hi tunlai hla ka thlan khawm a ni.

A hnuah ka nau Lalmuanpuii (Puitei) bawh chu Mire hla Christmas hla leh lengkhawm zai kan Record leh in Music Vedio kan siam leh a, a vaiin Mire hla Music Vedio hla 42 mawi tak takin kan siam a ni. Hetiang a kan unau Miriate’n Pathian fakna hla lam a hma an sawn theih nan a Pathian fak hla Cassatte leh Music Vedio siam nan a an aw mawi tak mai min lo thawh saktu;

S.Lalmuanpuii (Puitei), Pency B.Lalthanglia ni, Bethsy Lalrinsangi, K.Lalthangzela, Jenet Remsangpuii leh Pi Mamua ni (Pu C.Lalzarmawia nupui) Lalhlimpuii (Mahlimi) te leh an sum leh pai thahnem tak min thawh saktu Pu R.Thanmawia te nupa, Lunglei Venghlun, Pu C.Hmingliana Lunglei Bazar Veng leh a thiante leh Pu C.Lalzarmawia leh Pu Saidingliana (Bethsy Lalrinsangi pa) te'n an Recording Stradio ah Lalpa rawngbawlina a ngai a tlawm tak a min Record sak a vangte, (Pu Saidingliana hian athlawn in Bethsy Lalrinsangi zai hi min record sak in Sound Treck min siam sak) Pu, Johana, Pu Lalduhawma Chhakchhuak leh Pu H. Vanlawma (Pu Lawmtea) te'n tlawmngai takin Vedio thla min lak sak baw a, an chungah Miria te aiawh in lawmthu ka sawi tak meuh meuh a ni.

### 3.2.3. Elizabeth Tumpowng

**Music Vedio :** Lalpa'n Mire hnam zinga kan rawngbawlina nasa takin mal a sawm zel a, kan unau Mire Kristian te'n zai lam a hma an lo sawn theih



nan Mizo zaimite mi engemaw zatin ka ngennate Lalpa rawngbawlina a ngaia min tih hlawhtlin sak in Mire hla a Pathian fakna Audio leh Musice Vedio engemawzat kan siam tawh a.

Tunah chuan anmahni Mire thalai a tang ngei a zai thiam Pathian fak hla ngaihnawm leh mawi taka sa thei tur kum tam tak Lalpa ka lo dil tawh thin chu Lalpa'n min tih hlawhtlin sak ta a, Rengru-i-a fanu Elizabeth Tumpowng chu a aw a mawi in zai athiam em em mai a, a zai thiam mai nilovin a zai nung riau zel hian ka hria a. Amah hi mi piangthar tha leh la naupang tak mah ni se a thlarau mi reuh riau va, A ni chu Mizoram a zai zir turin ka theih ang taw a ka sawm bakah anu leh pa ka dil a.

Atawpah chuan a nu leh pate phalna leh amah ngei pawhin a duh tak a vangin kum 2022 khan Mizoramah zai zir a Musice Vedio te siam turin ka hruai a, Lunglei Bazar veng a Pu C. Hminga te inah Pu Nunpuia hnen a zai a zirtir turin ka dah a, mahse Pu Nunpuia hian zai a lo zirtir mumal hman loh a vangin puan thuite a zir pah baw a, keiman zai chu ka zirtir leh ta zawk a ni.

Kum 2023 khan Musice Vedio chu siam tawh tur kan nih lain ka hman lova, kum 2024 January ni 15 chuan Mire hla a Pathian fakna Music Vedio siam turin Mizoramah ka chho ve a. Mizoram a ka chhoh hma ni ni 14 January 2024 chuan ka tunu (ka farnu fa) Mambawih'i'n ka Nu a chauh riau a vangin kan khua Bualpui 'H' a tanga Lunglei a an phurh thlak thu leh Doctor-in ka Nu chu thisen Cancer a nih thu a hrilh thute min rawn hrilh a.

Ka Nu chu a upa ve tawh si a, a dam rei tawh dawn lo a ni tih ka hriat chuan ka rilru a na hle mai a, Mizoram ka va thlen chuan ka Nu chu a lo chau em em mai a, mahse ka Nu'n min han hmuh chuan a harh huai hian ka hria a, Elizabeth Tumpowng-i nen Musice Vedio kan siam chhung thla thum deuh thaw chu a dam tha angrengin chak pawh a chak hle mai a, hmun danga ka tih tur ka tih zawh chuan ka Nu chu ka awmpui tlat thin a. Zan rei tak tak thlengte kan meng a kan hlim thei hle thin a.

Elizabeth Tumpowng-i nen a kan Musice Vedio siam tawp lamah chuan ka Nu chuan zual lam a pan tlat mai a, kan unau ho a kan han inrawn chuan arang lam a kan khaw lam a chhohpui chu tha a kan hriat a vangin ni 11 March 2024 chuan kan khua Bualpui 'H' ah chuan kan inphur chho ta a, khua thlen dawnah ka Nu chuan chatuan ram chu min lo pan san ve ta a ni. Lalpa remruat dan hi a mak ka ti in ka lawm khawp mai. Lalpa hian ka Nu nen hian min hmangaih takmeuh a ni. Kum tam tak kan awm tlang thei lova, mahse a thih dawnah ka Nu nen a thla hnih ai rei mah (thla thum dawn) hlim takin min awm dun tir hi a mak ka ti a ni. Ka Nu hun tawp lamah amah awmpui turin chhuti dil ila ka hmu dawn miah silova.

Kohhran leh mimal thahnemngaihna in Mire tawnga Pathian fakna hla Music Vedio 40 lai kan siam leh ta a ni. Miss Elizabeth Tumpowngi'n Pathian fakna hla 2024 January a tanga March thla chhung a Music Vedio 40 lai kan siam theihna tura sum leh pai leh tha leh zung sengtu zawng zawngte chungah kan lawm takmeuh a ni. Hemi hnu hian Music Video 2 kan siam leh tawh. Lalpa'n rem ati a nga kan la siam belh leh zel bawh ang. Mire ho te'n an hlut em em bawh a, a lawmawm takzet a ni.

3.2.4. **Musice leh Solfa hmangin** : Kum 2012 a Prenchü khua a MCF khawmpui kan neih tum khan Miria te'n Musice leh Solfa thiam chäkna nasa tak an nei a, tunhma angin Mission khat a kan awm vek tawh loh a vang leh keima hna a ka buai ve tak em a vanga duh anga khaw danga hla ka zir tir theih tawh loh a vangin kan unau Mire Kristian te chuan, “Musice leh Solfa min zittirtu tur Mizo min ngaihtuah sak rawh, a hlawh tur pawh kan tum mai ang, Mission hrang hrang a thalaite Hla, Musice leh Solfa min zirtir tur kan duh a ni,” an ti a.

J.Vanlalsanga te chhungkua

Chu tianga Mire Kristian te'n min ngen nasat em a vang chuan Bualpui ‘H’ a ka nau, (ka nu chhang chiah ka Pu Lalduha fapa) zaipawl Coductor ni lai, Tlangval J.Vanlalsanga (Sangtea) chu ka sawm a, a ni chuan Mire ram a Lalpa rawng bawla kal chu a lo



remti a, a pa (ka Pu) pawh chuan a lo remti ve bawk a, a ni ka nau Sangtea chu Mire ramah chuan ka hruai thla a, BCM a tanging a hlawhturte ka siam sak a, ani chuan Mire naupang leh thalaite chu hla, music leh solfa te chu a zirtir a, Bangladesh a Laizo khua a mi Pang nula aw tha tak mai, Duhawmi nupuiah a nei a, Lalpa'n nupui tha tak a pek bakah fanau malsawmna fapa duhawm tak pahnih leh fanu ape tawh bawk.

Ani hi Mistiri a ni bawka, insak, Furniture siam leh kut themthiamna hrang hrang talent tha tak tak a nei bawka. Mire rama kan rawngbawlna kawng engkimah a tangkai takzet a ni. A aw pawh a tha hle bawk a, tunah chuan Mire ramah zaipawlte pawh kan nei thei tawh a, naupangte pawh in Keyboard tum pawh an thiam nual tawh nghe nghe a ni. Kawng engkimah ka nau Sangtea chu kan Field in a phuisui phah hle a ni. Themthiam lamah ka nau Sangtea hian ka Pu kha a chhun khawp mai.

#### 4. School leh Hostel hmangin:

Ramthim rawngbawl naah hian zirna hmang a rawngbawl hi a pawimawh em em mai a, Christian Fellowship of Bangladesh (CFB) pawhin Mire ram a Lalpa rawngbawl na a lo tan tirh atang khan Miria te'n an ngen nasa bawh a, School chu a lo siam sak tawh a, a chawlhsan changte a awm thin a, kum 2000 atang pheikha chuan a chawlhsan hlen ta nghe nghe a, chutia CFB Mission in a chawlhsan pawh chuan Empu khua nu leh pate tangrual chuan kan buh leh buhfai te thawh khawmin harsa tak chungin kan chhonzawm ve hram hram zel a.

Empu khua a BCM School

Mizoram Baptist (BCM) in Mire ram a Lalpa rawngbawl na a lo tan dawn khan Mission Board Committee hmaah, "Mire ram a in rawn thawh dawn



chuan keimah chauh min Suport lovin Field angin la ula, School leh Hostel te kan mamawh a, Clenic te pawh kan mamawh a ni," ti a ka sawi kha kan hotu te'n min ngaihpawimawh sak in a ram mi Evangelist Teacher tam zawk min rawih sak a, School Building chu N.G.O World Vision in min sak sak a, chutah chuan kan School naupangte an len loh a vangin BCM in School sakna tur sum tlem min pek hmangin kan thawktu te'n a sak hna kan thawk a, tunah chuan Sorkarin tha takin min sak sak bawh. Hostel pawh Bangladesh Sorkar in min rawn sak sak leh bawh.

Empu khua a kan Hostel

Kum tin School naupang zahnih dawn kan nei thin a, Hostel naupang pawh za leh sawmnga ai tlem lo kan nei bawh thin. Class V thleng chauh kan la nei thei a, Bangla Medium a ni a, kan Hostel naupangte hi Mizoram a tangin Kohhran, pawl leh mimalte pawh in min rawn chawm sak nual bawh thin a, kan lawm tak meuh a ni.



Khawvel finna lehkha an thiam mai bakah kan naupangte hian Pathian thu, hla leh Music te kan zirtir a, kan School a tanga Primary



zir chhuak Kristian tha tak tak leh rinna a nghet tak tak an awm ve nual tawh hi kan lawmna a ni. Kan School hi Mire hnam hmakhua a ni tak meuh a ni. Tunah kan Hostel Choka pawh thatakin Bangladesh Sorkar in min rawn sak sak leh tawh bawk.

**5. Damdawi hmanga tihtamna rawngbawlina in :** BCM in Mire ram a rawngbawlina hma a rawn lâk hian a chungka ka sawi tawh ang khian Clinic chu kan din a, chuta thawk tur chuan Nurs zir chhuak kan neih loh a vangin kan Evangelist zinga pakhat mi inzirmi tak Evan Kainguai-a chu Mizoram a BCM rawngbawlina peng pakhat R&D ah thisen Exzam-te kan zirtir a, chumi hnu in kan District khawpui Bandarban Civil Hospetalah kum khat leh thla ruk Practical in damlo enkawl leh damdawi kan zirtir leh bawk a.

#### Empu khua a kan Clinic

Amah hi mi inzirmi tak a nih a vangin kan tangkaipui khawp mai, Thanchi Aria-ah pawh Clinic kan mamawh ve leh a vangin kan Thanchi Aria Field Supervisor Pastor Lawmtlinh



nupui Pi Lalnunzir (Tezir) pawh Bandarban Civil Hospetal-ah kum khat leh thla ruk Practical in damlo enkawl leh damdawi kan zirtir leh bawk a, Thanchi Aria a Dingte khua a anmahni awmna ah Village Nurs in a thawk ve mek bawk.

Tin hengmite bâkah hian kan khuia Empu kharbari Menpung fanu Ruipau chu Chittagong ah Certificate in Paramedical Technology (CPMT) kum hnih BCM in a zirna tum sak a, a zir zawh hnuah Lunglei a BCM Hospital Serkawn-ah kum thum Nurs a zir leh bawk a, chu chu tun a Empu khua a kan Clinic-ah hian a thawk mek bawk a ni. Bawm tlang val Omek pawh a thawk bawk.

Pathian leh Kohhran-te thahnemngaihna in Mire ram a tihtamna rawngbawl hna kan thawhna hi a hlawk hle a, a than chhoh zel pawh kan beisei tlat a ni. Abiktakin heta thawktute hian kan Field-ah damdawi hmanga rawngbawl hna mai nilovin thianghlina leh inchhungkhur enkawl dan pawh kan zirtir bawk thin a ni.

6. **An eizawna siamsak (Aconomy) lam :** Kan unau Miria te hi lo nei a eizawng an ni a, eizawna kawng a an lo changkan ve theihna turin ka theih ang angin hma kan la in kan zirtir thin a, mahse a sawt mawh em em mai a, “Kan pi leh pu-te aţang tawh a chempui a eizawng thin kan ni a, tun thlengin chaw kan la nghei bik hlei nem. Thil dang dang kan fa te’n an zir a nih chuan hnathawh an thatchhe mai mai,” an ti tlat zel a.

Tunhma NEIG Mission hun lai tawh aţang khan Mizo Missionary te’n huan thlai neih an lo zirtir tawh a, mahse zir ve chu sawi loh, Pastor Chownglowka min hrilh dan chuan, “Missionary te serthlum, thei hai leh tengtere phunte chu, ‘Hei chu Lusei thing phun,’ an ti a, an sat chum hmiah hmiah zel a, tuna Chimbuk tlang Ngarinchah (Puro Bangla) bul a theihai kung, tengtere leh laui kung tar tawh tak tak te hi Mizo Missionary te thing phun Mire hovin an sahchum bangte a ni,” a ti.

Kan awmna velah chuan Banhla te hi phun nachang chu an hre ve na in a hmuna siam lovin kawng kamah leh an duh duhna laiah an phun ngawt zel a, a tuk hunah a leit   vai an tuk tira, a tuktu vai lah chuan a neitu zawk Banhla man pe lova midang a pek changte a lo awm thin a, banhla bu ru a inpuh reng rengin an buai thin a, a hmun siam tura ka tih lah chuan tumahin min bengkhawn duh bar pawh an awm si lova, keiman a hmun chu ka siam ta a, chuta  ang chuan zawi zawi in a hmun siam nachang an hre tan ve ta a ni.

Mire ramah chuan rawng hi a man a  a em em mai a, 1 KG ah Tk 100 leh a ai tam a nih chang pawh a awm thin a, rawng lah chu a  a duh em em mai a, a kung chu mihring aia sang awrh chauh hi a ni a, a buk laih mai a, kung upa tawhah chuan kung khatah KG 10 lai a thar theih a, chu pawh chu chiseh lam nan in bulah tlem an ching ringawt zel a. Ram a bua tawh em a vangin lo siam a hlawk tawh si lova, rawng chu ching uar turin kan sawi ngial a, mahse min ngaithla lem hlei lova, chu vang chuan keiman tihhmuh nan tiin  in 3 hmun a zauah rawng ka ching leh ta a.

Mahse ka rawng chin kum chuan Bangladesh-ah rawng chu an band ta hlah mai a, achhan chu Vai (Bengali) hovin puan rawng tih sen na chu thingpui rawng tih mawi nante an lo hmang lehpek a, chu chu mihring tan a that loh vanga rawng chu band an ni. Ka rawng chin pawh chuan awmzia a neih leh tak loh avangin ka rawng chinna hmunah chuan Theihai thatchi ka phun ta chiam a, Banhla hmun pawh ahranin anmahni tihhmuh nan ka siam a, tunah chuan thlai huan siam nachang an hre ve tawh khawp mai.

Mire nula-te



Tum khat chu amak khawp mai; Norway ho hi ka hnenah an rawn kal a, “Kan ram atangin i chanchin hi kan lo hria a, tanpui che kan duh, engtin nge tanpui che ila i duh,” min lo tih hlawl mai a, kei chuan, “Min tanpui thei dawn a nih chuan ka mite hian thawmhnaw hâk nachang an hre ve tawh a, an thawmhnaw hâk tur hi vai ho an thui tir thin a, vai ho chuan an duh dan danin an thui sak a, an ni lah chuan lungawi takin vai ho thui ang ang chuan an ha ve zel mai bawk a, bâkah; kum khat chung a an kawr thui man hi vai ho hnenah cheng tam tak tak a lut thin a, anmahni hian puanthui thiam se chuan an duh angin an thui anga, thui man pawisa pawh anmahni hnenah a lut tawh ang a, chuvangin ka mite hi puan thui zirtir ula, an thui thiam chuan puanthui khawl in pe anga, an dawr siamna tura bultanna sum in tum sak bawk dawn nia, chutiang a min tanpui theih chuan ka lawm hle ang,” ka ti a.

Mire nu la her lai leh la rawng sen a a thlak lai

“Mi pali lo thlang la Dhaka-ah kan lo zirtir ange,” an ti a, mi pali ka ka thlang a, chung ka mi thlante chuan Dhaka-ah chuan puan thui chu an zir ta a, an zir zawh chuan an hnen a ka sawi ang ngei chuan min tih sak ta a. Norway sap ho hnenah chuan Mire pawnfen tawi (fenphel) an



siam chhuah dan; lo a an la chin ngei a tanga puan tah an nih ziate, an la tih dum dan leh an tih sen dante leh chung an hmanrua chu anmahni thar chhuah ting ngei atangin a nih ziate leh a zeh nan vawh hmul an hmanga, a chhung lamah chuan a zehna hnuhma engmah a lan loh zia leh an puan chu a Natural ziate ka sawi chuan sap ho chuan an lo ngai hlu phian mai a.

Mire hmeichhiate chuan an fenphel (azung chep chat lohvin an ti pum a, mahse an ven chuan an thlep a, azeh chu an mawng zawnah an dah a, an kawngghrenin an tãiah an hreng bet a, an khel veilam lang rengin an feng thin) chu an tah khawlh teuh thin a, an mahni fen bâkah, pasal an neih hun a an chhawm tur a tan a ni. Mahse tunah chuan mawh ho lawnggi a fual leh Mizo puan te an ven tawh a vangin an pawnfen chhing chu an feng tawh ngai lova, an dah chhe mai mai dawna, chu chu sap ho hnenah chuan a len leh a têt dan a zir in pakhat zali, zanga leh zaruk leh a ai a tam te in ka lei tir a.

Dah mai mai ai chuan an sum hmuhna tha tak a lo ni a, atah thiam leh atah peih tan chuan sum hmuhna tha tak a ni chho ta zel a, sap ho chuan chung Mire pawnfen tawi chu an lo Design a, Camera bag, dawhkan phah leh thil dang tam takah an lo siam leh a, kan puan thui thiamte pawh chu Design an zirtir bawh a. Chung kan puan thui thiamte zinga mi Dawnram-i phei chu a kut themthiam avangin United Nation Development Program (UNDP) a tanging lawmman tam tak a dawng tawh in Japan ram te pawh a han thleng hial tawh nghe nghe a ni.

Heng mite bâkah pawh hian Mizoramah puan thui zir in kan nula pahnih ka tir a, an ni hian Mizoramah kum hnih puan thui an zir a, puan thui thiam tak leh puan thui khawl nen an rawn haw a, tunah chuan heng kan puan thui thiamte hian mi dangte zirtir chhawng ve in dawrte pawh an siam a, chhung kaw eizawn nan an hmangin Mire hnam kawr thuina pawisa tam tak chu anmahni Mire hnenah ngei a lut ta a ni. Kawr pawh Design hrang hrangin an thui thiam in mawi takin an inchei ve thei ta. A hma chuan puan thui khawl ka lei a, keiman an kawr hâk tur ka thui sak mai thin kha (vai pawh an thui tir) tunah chuan ka thui a ngai tawh lo a ni. A lawmawm khawp mai.

7, **Mire hnam ngei hruaitu puitling a chher chhuah** : Mission rawngbawl na chauhah lo pawh, pawl ho leh chhungkua pawh ni se, a kal zel dawn chuan hruaitu inthlak hun a awm ngei ngei thin a, hruaitu ngai in a hruai reng thei lova, a hruai reng pawh a tha kher lo thei bawk. Chuvangin Mire hnam zinga BCM in Lalpa rawngbawl hna kan thawhna pawh hi kum emawmaw zat a lo ni tawh a, ka thawh tan-na atang pheii chuan kum sawmthum panga ral a lo kai ve der tawh mai.

Solomon Chownglowk M.Div



Mire hnam zing a tang ngei a taksa leh thlarau lam a hruaitu tha chher chhuah hi kan tihmakmawh a ni tih hi kan pawm angai ngei ang. Chutia an hnam hruaitu tha kan chher chhuah dawn chuan chung chherchhuah kan tum a chu mi tha leh rinawm, mi dik leh thiamna lamah pawh an hnam pawhin a an chhuan tham, kan thlan chhuah a kan chher chhuah a ngai a, chutiang a hruaitu a tan a tha leh tling ni a ka ngaih, an hnam leh Lalpa tan a inpe mi, an chhungte pawhin a Lalpa tan a an serh hran mi pahnih Da niala leh Solomona te ka thlang chhuak a.

Danial (Danu) B.D

Solomona chu Pastor Chownglowka tupa a ni a, Bangladesh-ah harsa takin Class VII a pass ve hram a, chumi hnuin Mizoram-ah ka hruai a, Class VIII a tangin azir a, tunah chuan Collage a chhuak ve tawh a, Aizawl-ah BCM Sponsor-in AICS-ah M.Div a zir zo tawh a, tunah Mire ramah tangkai takin an hnam zingah Lalpa rawngbawl hna a thawk tawh a ni.

Daniala pawh Bangladesh-ah Class 12 apass hnu in, Mizoram ah Collage chu a zo a, BCM Sponsor in AICS-ah B.D a zir zo ve tawh. Pro Pastor ni tawh in Mire Bible lehlín mekah hotu in a awm mek.



Mire Field chu Field dang nen han khaikhin chi a ni lova, Field dangah chuan thawktu Missionary atul danin a dah theih a, atul danin an inthlak theih bawk a, Mizoram atangin aduhte'n an tlawh thei reng bawk a, Mire Field ah hi chuan chutiang chu a theih ve loh

a ni. Field thenkhatah chuan thlarau lamah kan tanpui an ngaih laiin taksa lamah chuan keini BCM-in kan thawh hma pawh a lo changtlung/changkang tawh sâte an ni a, Mire Field-ah erawh chuan ka awmtirh te kha chuan Kristian pawh sawitham la awm mang lo leh lo awm sate pawh an khawsak danah Kristian lote nen an lo la inang deuh reng mai, thawmhnaw pawh la inbel mumal mang lote an ni a. An Literature pawh keiman buaipui in ka din chhoh sakte an ni a, heng an hnam taksa leh thlarau a hruaitu a tana kan chherte pahnih hi an puitlin lam, zirna atan a hun tam tak an hmanna chu Mizoramah a nih avangin Mire Kristiante, mahni kut leh ke a an din theih hma chu anmahni hringtu Mizo Kristian te, a biktakin BCM min bel tlat lothei dawn lo a ni.

Tuna ka thachhang daltu ber leh kawng engkim a ka rinpui ber chu tuna Baptist Church of Maruchah (BCM) a kan GS Pastor Iowngrung hi a ni a, a ni hi kawng engkimah ka kut leh ke ber a ni bawk a, amah hi mi inngaitlawm leh thin nel tak mai a ni a, Missionary te kan chhiat kan that pawh a min ngaihven bertu a ni bawk. Hetiang a Mire Field a Missionary te'n a ram mi, mi tha kan nei hi kan vannei tak meuh a ni.

***Aw Lalpa, Miria te hi taksa leh thlarauva hruaitu tha, anmahni Mire hman zing ami ngei, an hnam hmangaih tak taktu pe zel ang che aw, Aw Lalpa, chu mawlh chu ka dil leh thin ang che, Amen.***

8. **Anmahni ke a ding thei tura buatsaih :** Ramthim a Lalpa rawng kan bawl na reng rengah hian Mission in a tum ber chu kan thawhna hnamte anmahni ke a ding thei tura buatsaih hi a ni a, amârawh chu an ke a dingthei tura kan beihnaah hian Field a dang ang bawkin an ke a ding thei tur pawhin an mamawh a dang theuh ngei ang. Mahni ke a ding thei tura hun duh rei zawng pawh a inang lo viau ngei ang. Kan enkawl dan azir pawh a ni thei bawk.

Kan unau Miriate hi tunhma a tanga lal nei lova khaw te tak te te a, a hnam hnam a mi tlem te te a lo awm thin an nih a vangin Kristian Vanram Kawngzawh a, “Mitin mahni thu thu a awm tur,” tih ang deuh kha an ni a, mitin mai hian khuahkhirhna hi an ngaithei lo em em mai a, chuvang chuan Kristiante pawh rinna kawnga puitlin lam

pan an harsat phah hle a ni. Chubakah khawsak harsa tak takte an ni a, chumai ala ni lo, changkanna lamah hma an sawn mawh em em mai bawk a, an nunphungah thil tih ho dial dial peih lo mi an ni a, khaw khatah pawh in tam an awm thei lova, khaw te tak te te in an awm thin a, khawkhath hotu Kharbari an nei ve takna in chung an khaw hotu kharbarite pawh chuan khaw chungh enkawl leh rorelnah awmzia an nei em em hran chuang lem lo.

An hnam zingah hian ‘Mithiam’ ti a han sawi tur an awm meuh rih lova, sorkar leh Politic lamah pawh hruaitu fel leh rintlak an la awm meuh lo bawk, Kristian-te zingah lekphei chuan kan Lal Isua’n tehkhin thu a a sawi, Buhchi theh thu ang khan chanchintha a theh a theh phuär a, a to chhunte pawh enkawl zui leh si lova kalsan leh ta te, then khat chu sum siam nan a hmangtu chanchintha hriltu der ho te’n an lo ti khawbaw zo tawh bawk nen, Pathian thu sawi hawt si lova, “Kristian a in awm chuan mi pakhatang cheng sanghni theuh kan pe ang che u/sikul, tuikhur kan pe ang che u,” ti a lo thlem tawh lah bo lo.

An hnam kalphung leh miziaah pawh chanchintha hril a harsat tawh tehlu nen, heng chanchintha hriltu derte avang pawh hian Mire ramah chanchintha hril a hautak takmeuh a ni. Chu bâkah Bangladesh Mosolman rama awm an nih a vangin Mizo Kristian te’n duh angin kan luhchilh tei bawk si lo va, kan unau Mire Kristian-te mahni ke a ding thei tur chuan hun kan la duh rei deuh hmel khawp mai.

Mahse, Lal Isuan Luka 19:40-ah, “A ni erawh chuan, “Ka hrilh a che u, hengte hi an ngawih reng chuan lungte tal an au chhuak tur a ni,” a ti a, eng ang pawhin har mahse, Lalpa rinchan a beidawng mai lova kan beih zel chuan lungte auchhuah hun ngahak kher lova keini hi Mire hnam zinga chanchintha hril a kan au chhuah zel chuan kan thawhrimnate chu Lalpa’n mal a sawm ngei ka beisei tlat a ni. Mire Kristian te mahni ke a ding thei tura buatsaih tur chuan beidawng mai lova kawng thui tak kan kal a la ngai ngei dawn a, kei ni thawktu leh Mission pawh Mire hnam tan hian hma kan lo lâk tawh laklawh a vangin an tan a uikawm viau a rem dawn lo vin anmahni ke a an din theih nan kan inhuam thui viau pawh a ngai ngei dawn a

ni. Hetiang hi an dinhmun a la nih miau avangin anmahni ke a ding thei tura buahsaih tur chuan anmahni hnam zinga mi ngei hruaitu tha chher chhuah sak a ni lothei lo a ni. Field dang angin Mire hnam zingah hian Missionary kan in tir lut zung zung thei lova, achhan chu Bangladesh Muslim County a awm an nih a vangin Missionary a in tirh luh theih loh hrim hrim a ni. A luh dan kawng chu arammii nihna neih leh Bangla (Bengali tawng) thiam a ni.

Heng zawng zawngte avang hian Mire Kristiate hi mahni ke a ding thei turin kan pui thei lo tihna a ni lova, Lalpa rinchhan a Mission in hma kan lak a, an kut leh ke a ding thei tura a tul anga tih sak kan inhuam chuan hun duh rei deuh mahse, engtihah emaw chuan anmahni kut leh ke in an la ding ngei ang. Mahse, kan beidawn san emaw, Mire hnam tan a kan uikawm viau emaw, an hnamah hruaitu chher chhuah kan hlau/duh lo tlat emaw a nih chuan kan unau Mire hnam hi engtikah mah taksa leh thlarauah an ding chhuak ve ngai dawn lo a ni, chuan an thisen mawh kan phur ngei bawk ang.

Tunah hian Baptist Church of Maruchah hian Assembly kan nei tawh a, Centralization System kan hmang ve bawk a, kum 2013 Assembly atang phei kha chuan thilpek lamah kan harh ve hle in ka hria a, kan khua Empu a kan Mission in 32 lek, thingtlang lo nei a eizawng, rethei te te te'n tunhma chuan kum khatah sing ruk/sing sarikh te kan sawma pakhat a tlin chuan kan lawm ve em em thin kha a ni a, kum 2013 hnu lam kha chuan Biakin tha leh keimahni tawh a ropui ve tak kan sak mek lai pawh in kan sawma pakhat tling khawm chu nuai chuang fe a ni ve thei tawh a ni. Baptist Church of Maruchah hmun atan Baptist Church of Mizoram in Dingte khaw bulah ram tha tak mai leh tui pawh thatna Ekar 5-lai a zau kan lei sak tawh bawk a ni.

Kan unau Mire Kristian te hi mahni ke a ding thei tura buatsaih tur chuan keini Mire ram a Lalpa rawngbawla hma la mekte hian kan sawi tak ang khian, Hruaitu tha chher chhuah sakte, Kohhran kalphung mumal taka kaihhruaite, Treining chi hrang hrang pekte, School Upgrade sakte, Clinic tih phusui zelte, Rinna kawng a hma an sawn ve theihna a tan a an mamawh hrang hrang phuhruk sakte, sawi tur a tam mai; kan tihsak an la ngai a ni. Galatia 3:3 ah chuan, "Heti



emin in â maw? Thlarauva tan tawh siin tisain in zo dawn em ni?” a ti a, kei ni pawh Thlaraubin kan tan tawh a, tisa chuan tawpsan mai i tum lo hram ang u aw.



Kum 2024 a Mire Field a BCM Staff-te



BCM Hmun Dingte khaw bul



Kum 2025 a BCM Mire Field Staff-te

## BUNG 14

### KHUANU SAMSUIH

Bangladesh Mire ram a Lalpa'n a rawngbawl tura kan in a tanga min hruai chhuah khan kum 22 mi chauh ka la ni a, nupui ka la neih hma a kal ka ni a. Ka lo suangtuah ve thin dan chuan "Kum 25 ka tlin hma chu nupui ka nei lo ang a, kum 25 pawh tling ila ka nu leh pa te pur ngai lova ka nupui leh fanaute chawm thei dinhmun a ka din hnuah chauh nupui ka nei ang," ka ti thin a.

Ka duh danah chuan Mizo nula ngei; ei leh in inang leh kawng tinrenga ka lungualpui theih tur mi ngei neih chu ka duh dan a ni a. Mahse, ka thatna tura kawng engkim a min thawh saktu ka Lalpa chuan ama duh dan zawkin; ka la hmuh ngai reng reng loh leh Mizo tawng thiam bur lo, thlang tiang a Mizovin "Pamanga bahzar" kan lo tih fo thin, Bawm hovin, "Pamanga Bazar," an tih. Bumang Raja Bazar, Bandarban khawpui bul a Zo hnahtlak (Bawm) lanu nen chuan Biakin pui hawng ngei-in '*Tiam tlat-e*,' kan lo ti thawp sat ta zawk a ni.

Tlangval la naupang tak a nupui nei ka nih a vang leh ram dang daih a nupui nei ka nih a vangin Mizoram a ka chhoh changte hian thenkhat chu ka nupui neih danah an lung a hring deuh ni te hian an thu min han zawh vel danah a hriat a, Chuvangin ka nupui neih dan hi chhuanawm em em lo mah sela han thai lan ve hrim hrim tha a ka hriat a vangin ka han zia lang ve a ni. Ni e, han ziah lan ve tak rau rauah chuan a chepakai a tang law lawin ka han zia a nge.

Kan khua Bualpui 'H' a Christmas hmang turin kum tin Hnahtial a tangin ka chho ziah thin a, Bualpui a ka thian, hmun dang a sikul kalte pawh kan khua a Christmas hmang turin an rawn haw khawm ve thin bawk a, packet money pai tur nei ve lo mah ila chu chuan hlim lohna min thlen hran chuang lova, ka thinte, ka chhungte leh kan khaw dai vel a tlangsam leh tlaizawng par vul chek chuk maite chuan min ti hlim tawk em em a ni. Khawpui a la inti tlangval ngam lo kha thingtlangah chuan 'Mahni tum tawk Vanzema' an tih angin tum tawk te te an lo bo hauh lo mai a, bialnu bialpa kan innei fir fer maite kha kan khaw ti nuamtu pakhat a ni ve tlat.

Nikhat chu kan thian zaho hian chawhnu lamah Jawni (Zonuni) te chhang kan denga, kan ri lai lai mai a. Kan chhang deng hah chu Jawni te thingkhawn bulah chuan kan hahchawl a, hahchawl pah chuan kan ti ti nak nak a, kan nakin hun turte leh kan nupui pasal neih hun turte, kan thian zingah a tu ber hian nge nupui pasal nei hmasa ber ang, eng angmi nge kan neih ang, tih te leh nupui pasal kan neih hunah chuan insawm ngei ngei tur, tihte kan sawi hova. Nupui pasal kan neih hun chuan tun ang hian kan inkawm reng thei tawh dawn loh thute kan han sawi kai chuan kan lung a leng lawk em em mai a, chutianga kan ti ti-na lamah chuan kan chhang den pawh chu kan theihnghilh hman thelh a ni.

Keini thian za ho hi kan awmkhawm tawh chuan kan hlim thei thin em em mai a, tudang lengdang hi kan ngai bik reng reng lo. Nuih kan duh tlangin atu a mah thawm han dim thiam lah kan awm si lo, kei hian ka dim thiam lo zual a, ka nui thawmah Jawni te nau mu pawh a harh fo thin reng a. Kan han awmkhawm tawh hi chu vazar rual thawm ang mai hian kan ri chel chul thin a.

Engmah han lungkham em em lah kan nei bawk si lo. Damchhung khawsak buaina te'n min la chim phak lo miau va. Engemaw changa chung harsatnate chuan min la chim ve ngei dawn thu leh kan thianza ho pawh chu tun ang reng hian kan inkawm thei tawh dawn lo a ni tih thu kan sawi ho lai a kan hmel a ngui nghiai thin tih mai lo chu mite pawn, "Hemite thian zaho tak hi chu an hlim in midang an ngai lo teh e," min ti thin a ni.

Chutia kan chhang den theihnghilh lek lek khawp a kan hma lam a hun khirh tak lo la thleng tur hmachhawn chu kan huphurh tlang a ni tih hriat tak a kan ti ti lai chuan, kei chuan, "Kum 25 ka tlin hma chuan nupui ka nei dawn lo reng reng, kum 25 lo tling ta tehreng pawh ni ila, ka nu leh pate pur ngai lova ka nupui leh fanaute chawm thei leh rualawt lo tura ka nupui leh fanaute siam thei dinhmun a ka din loh chuan nupui ka nei chuang lovang," ti in ka duh thu chu ka han zam thla ve pawp a. Chu ka thu chham chhuah chuan ka nupui neih hma zawng chu min thunun tlat hian ka hria a. Chutia ka tleirawl tantirhte a ka thiante zinga ka sawi chu ka mihthlaah a la

cham rengin nichin lawka sawi ang mai hian ka thinlungah a thar reng thin a ni.

Kan thianzaho a kan sawi leh suangtuah ringawt mai pawh a kan hmel leh kan nun ti ngui rawk thei, kan dam a nih chuan kan la pal ngei ngei ngai baw si chuan lohtheih lohvin tunah chuan phelh leh ngai tawh lo turin zaman hmawngin a bul vel a thingte a man ang mai hian, min lo man ve chu a ni ta reng mai. Ka thiante nen a lungkham neilo leh lungrual taka kan len lai nite kha ka dawn kir changin ka lung a leng thei hle thin a. Tunah chuan hmanlai an chang zo ta, ka thiante leh keimah ngei pawh hraileng awi in tu mawng ben nghakin kan hun chu kan lo hmang ve ta reng mai. Mahriakte a ka dawn kir changa ka lungleng hla phuah hi ka'n dah chhuak ve reng reng teh ang.

### **Mariakte a ka dawn changin**

1. Mahriak te a ka dawn changin,  
Suih lunglengin ka kur diam diam;  
Min hnem thiam reng an awm si lo,  
Nunhlui ngai a tah ruai a awl mange.  
  
Ka lenrual lung duhte leh,  
Rawl lai ka 'd' zawngte khan;  
Min dawn chang ni awm ve tak ang maw,  
Kei zawng ka dawn kir thin, kan hlim lai nite kha.
2. Tunah chuan e, nun hlui zawngte,  
An tham ral zo, romei iangin;  
Ka ngai mange nunhlui chul hnu,  
Dawn lung rukah ai ang an cham reng e.
3. Hmanah chuan e, suihlung rualin,  
Tual kan leng e, eng kan dawn lo;  
Tunah chuan e tuantul vangin,  
Lenna tlangte a lo dang zo ta si.
4. Ai ang tarin chuai mah ila,  
Thinlung erawh chuai ve ngai lo;  
Theih chang ni se, hringmi iangin,  
Koh kir ka nuam, kan nunhlui zawngte kha.

Vengtu chung Pathian zarah thing delh loh lung delh loh na ná nà chu ka punrua chuan puitlin lam a pan ve zel a, mahni phu tawh te te leh engemaw chang phei chuan ka phu loh ni a ka hriatte pawh ‘*d*’ ka tawn changte awm ve thin mahse ka kumtluang Nuthai a tan Ruattu in a la ruat lo a ni chek ang chu; ‘*Tiam tlat e*’ ti a biah thu hlan zai reng ka rel thei lova. Ka tleirawl tirh lai a ka thiante nen Jawni te sumhmun a kan ti ti lai a ka lo chham chhuah tawh thu awmze nei tak mai chu ka thinlungah a la riak reng mai a. Mahse Lalpa’n ahunteah hmelhriat loh kâr hla a mi, ram dang leh tawng dang hmang, Zo hnahthlak lanu, kan seilen-na in ang lo lutuk a vang a duh leh ngainat zawng inang lo tih chiangsa nen chuan min lo tuah rem ta tlat zawk a ni.

A ni chu kan Distrist khawpui Bandarban bul lawk; Bandarban khawpui a tanga kan awmna lam a rawn kal a km 5 vel lek Faruk khua a Rev, Leitling-a fanu tlum Zokungi a ni a. A pa Rev Leitlinga hi NEIG Missionary, Pastor H.Dala School a kal a Mizo ke bula seilian a nih a vangin Mizo tawng pawh a thiam tha hle nghe nghe a. Keipawhin chulai a Mizo tawng a biak theih, Mizo tawng thiam tak awmchhun a nih a vangin ka ngaina hle a, Bandarban a ka kal chang te hian ka tlawh hram hram thin a. Ahnenah chuan kan rawngbawl na chanchinte sawi in Mizo tawngin nuam ti takin kan ti ti dun thin a, fanu pathum leh fapa pakhat a nei a, a fanute chu nula vek an la ni a, mahse Mizo tawng an thiam loh a vang leh keiin Bawm tawng ka thiam bawk siloh a vangin afate nen chuan kan inkawm ve thei lova.

Bangladesh a an tawng pui ber, Bangla ka thiam vet lat loh a vangin nupui nei lova ka awm chu buaina neuh neuh a awm ta fo mai a, chung buaina te chu: Chutih lai chuan Bangladesh chu chakma hel ho Santibahini a vangin rambuai a ni a, check post a tamin in-check a awm reng mai a, Bangla ka thiam loh a vangin man ka tawh lek lek fo mai a. Bâkah ka thawhna Mire upa ho lah chuan, “Tha tak a Lalpa rawngbawl i duh chuan nupui nei vat rawh, chuti lo chu tlangval naupang tak i nih a vangin i thu leh hla tuman thu tak hla takah an ngaih sak lovang che, nupui i neih hunah chiah puitling thu leh hlaah i thu leh hla chu an ngai ang,” min ti a. Kan thalai ho lah chuan,

“Bangladesh a mi nupui nei vat rawh. Chuti lo chu min haw san leh daih palh a nge,” an lo ti ve chhen bawk nen.

Mire ramah chuan nula han ngaihzawn ve deuh hlek pawh ka nei si lova, Mizo ram a mi Mizo nula ka neih a rem bawk silo, lo nei ta pawh ni ila, kei in Bangla ka thiam lo a, ka nupui pawh Bangla thiam lo bawk a nih chuan kan ngaihtuahawm dawn lutuk tlat. Kei in ka la thiam lo a nih pawhin ka nupui tal chuan a thiam a ngai. Bâkah mahni inchawm a, chaw chu nghei lo ṭawk ṭawk ka ni a, Mizo nula te’n ram dangah, hnam dang zingah, thingtlang hnam mawl takte awmnaah chaw chhumtur chu lo nei ta teh reng pawh ni ila eng chawhmeh nge a zawn thiam lêk ang? Zawhna a tam mai. Ka inngaihtuah nasa in nupui neih chu hreh teh mah ila Mire ram a Lalpa rawng ka bawl zel theih nan ka neih ngei a ngai bawk si.

Nupui ka neih dawn chuan ka nupui atan a tling tawk tur chu, pakhatnaah chuan mi piangthar a ni tur a ni. Adang lehah chuan Bangladesh a High School chin rap pha a ni tur a ni. Mizo a aw b a chhiar thiam ngei tur a ni. Ka thawhna Miriate ei ang apiang ei theimi a ni tur a ni. Zaktheilo tak nilovin mi zakzum tak a ni tur a ni lo. Ka hmelṭha tih zawng tak chu ka hmuh dawn loh a vangin hmelchhe lutuk lo, pumraw lian ṭha leh dawlhkai, ngo lam a ni bawk tur a ni a, hmeichhe mawngfual chi a ni tur a ni lo.

Zopuii leh a thian Rualsiami

Athlahtute zingah piangsual leh khawtlang leh hnam ti mualphotu mi hnawksak an awm tur a ni lo. Chutiang a nupui a tan a ka mamawh chu ka ziaak chhuak a, ṭawngṭai in Pathian chu ka dil ta a. Lalpa hnenah, “Hetiang a ka dil ang tak hi min pe a nih chuan tunah hmangaih thei lo mah ila, ka hmangaih chhawm ve mai ang,” ka ti a. Lalpa’n Rev Leitlinga fanu naupangber Class IX zirlai chu a pianah leh a vun rawngahte Lalpa hnen a ka dil ang chiah kha ni in ka hria a, a chanchin midang hnen aṭangin ka zawt a, a mizia



pawh ka duh zawng tak a lo ni leh zel a, a thlahtu pawh Lalpa hnen a ka dil ang aimah a tha zawk a ni a, amah pawhin tawng inpawh lo mah ila a chezia leh a mit meng atang chuan a fate pa a tan min iai bik lo a ni tih ka hre thei mai a. Ka Bawm tawng thumal hriat leh ka vai (Bangla) tawng thiam tlemte belh khawm in a hnenah chuan nupui a tana amah dil tura palai tirh ka duh thu ka hrilh a, a ni pawh chuan ka lo beisei ruk deuh ang ngei chuan phur tak in alo pawm ve hmiah mai a. Kei nge lawm zawk a nga ni tih pawh hriat loh vin kan phur dun khawp mai.

A hming chu Zokungi a ni a, koh duat nan ‘*Zopui*,’ ka ti a. Hemi kum hian an khaw bul lawk Laimi Para an tihah chuan School a kal a, a School kal pah chuan anmahni Kohhran Reform Church of Bangladesh (RCB) hmeichhe pawlah Bial Secretary hna a chelh a, Leadership pawh a nei tha in mipui huhang pawh a zo khawp mai. An khaw nulaah chuan a sangber dawttu a ni a, tawngmawh tak a ni lo bawk.

Ka Pu zawn leh ka Pi zawn

A thlahtute pawh mi chhuanawm takte an ni. A pa Rev, Leitling te hi unau hmaichhia pahnih leh mipa pathum an ni a, a ni hi an unau zinga a naupang ber a ni. Kum 1930 ah apiang a, 1940 ah Pankhiang khua a NEIG Mission sikul ah kal tanin chutah chuan Class I – V thleng a zir a, chumi hnuin Saichal bial a Lunginkharah pawl ruk a zir leh a. Chumi hnu in Manipur State Churachanpur a NEIG Mission sikul-ah pawl sarih leh pawl riat a zir leh a.



Chumi hnu kum 1948 – 1950 chuan Churachanpur ah bawk chuan Bible Diploma azir leh a, Bible Diploma azir zawh kum 1951 chuan an hnam zingah Evangelist hna a thawk a. Ni 02/01/1956-ah Bawm ram Arthah khuaah Pastor a nemngheh a ni a, kum 1999 khan a Pensoin a. A Pension hnu pawh hian a thih thlengin a chipuite zingah Lalpa rawngbawl a ni. Tawngtami a ni bawk a, kum 86 a nih in

natna engmah sawi tur hre miah lovin 10/05/2016 khan a rawng a lo bawl sak thin Lalpa hnenah a chawl ta a ni.

A thih dawn tep thleng khan Chanchintha hril leh chawnghei tawngtai a la thlah ngai lo a, Home Visit nei a, in tin a Pathian thu a sawi leh a tawngtai thin hi chu tha ka ti em em a, mahse chawnghei a a tawngtai ziah hi chu a tar chak lo tawh si a, ka ngaihtuah em a vangin, “Ka Pu, chawnghei hian chuan tawngtai tawh lo hram teh, i taksa in a tuar phah mai ang,” ka tih pawh hian, “Ka chipuite tan hian tih theih ka nei tlem tawh emai a, chawnghei a ka chipuite tan a ka tawngtai thin hi ka tihtheih sang ber a nih tawh a vangin ka thih thlengin ka chipui Bawm hnam tan hian ka tawngtai zel dawn,” a ti bur mai si a, han khap chi zia zang a ni lo.

Achipuite hnen a asawi tam ber chu, “Kristian nih ringawt hi chhandamna emaw in ti palh ange, kan pianthar loh chuan tumah chhandam kan ni dawn lo a nia, kan damlai ngei hian chhandam kan nih hi kan inhriat a ngai a, rinna kawngah hi chuan midang kan rin kèp thei lova ‘Mahni tan a chakai khawrh’ ang kan ni,” a ti fo thin.

Pu Danga fapa Pu Lallianthanga chuan, “I pu hi chu keini Bawm ram Kristiante chuan Vantirhkoh tluk a mithianghlimah kan ngai,” a ti hial a ni. Bawm zirlai pawl chanchinbu ‘Menrihawi’ 1995, page 19-ah Bawmram a tingtang lalut hmasa berte chu Mr Leitling leh Mr Thangliana te an ni a ti. Rev, Leitling hi Bawm hnam tan a mi ropui tak leh ngaihsanawm berte zing a mi a ni.

A nu Parkungi hi nu ngilnei leh zaidam em em mai, taima bawk si a ni a, nu hmeltah tak a ni, a hmel hi hnampui kan tih, sap hmel lam hi a pu a, kum 74 mi ni in 09/01/2015 khan a thi a. Mi hlim thei tak mai a ni a, eng hun lai mai pawh hian han bia ila hlim hmel tak leh nui sang hian min be reng thei a, a thih dawn darkar thleng khan nui sangin min la be thei a ni. A dam loh pawh khan keiman ka enkawl in damdawiinah ka kalpui a, hlim sang a min be chungin mual min liam san ta a ni. Nu mak leh ropui a va ni tehlul em!

Ka pizawn Parkungi pa hi Chalkhup Headman a ni a, a unaute chu Upa Zakhup Hmunnuam Kharbari a ni a, an unau zinga mi Rev S.L



Pardo chu Bawm hnam tan a mi hriat reng tlak, Bawm hnamte zirna lam a kawng buatsaih saktu, mirethei ber pawhin lehkhah an zir theih nan a World Vision leh Christian Commission Development of Bangladesh (CCDB) N.G.O. Bangladesh Bawm ram a la lut tu a ni a. Heng NGO te hian nasa takin Bawm naupang te'n lehkhah an lo zir ve theih nan a Sponsor-tu dapin kawng hrang hrangin a tanpui a ni.

Bawm Holy Bible hmasaber pawh Bawm tawnga letling in German ramah a han chhu vek bawh a, a hun tam zawk chu an hnam tan leh Lalpa tan a hmang zo a ni. Pi Parkungi unaupa Pu Lalnghak hi Bawm hnam zing a B.A pass hmasa ber a ni a, Ruma a High School leh Hmunnuam a High School te hi a ma din a ni a, Ruma Bazar Choduri a ni bawh. Ka nupui thlahtu te hi mi ropui tak tak an lo ni a, ka duh thusam aimah a tha nupui a ka nei hi vannei ka inti tak meuh a ni. Lalpa min pek liau liau a ni a, a ni nen hian khuanu samsuih ngei kan lo ni e.

Bawm nula Zopuii chu neih ka tum thu leh Lalpa'n a rawng ka bawlpui tur nupui dil a ka tawngtaina min chhanna tak tak a ni tawh thu ka nu leh pa te leh kan hotute hrilh turin Mizoram ah ka chho ta nal nal a. Mizoram ka han thlen chuan nupui neih ka ngaih dante leh nupui tur Lalpa ka dil a, ka dil ang ngei min pek dante leh Zopuii chanchinte chu ka han sawi chuan ka chhungte leh kan hotute pawh chuan tha min tihpui ve a. Mahse, kan hotu te leh ka chhungte chuan ka nupui neihna atan a ramdangah lehngal sum ka mamawh dantur chu min hriatthiampui tho mahse min pek tur an neih bik miao si loh a vangin lungawi tak chuan Bangladesh lam pam chuan ka let thla leh ta hnak hnak a, ka nu (ka nu Zawni, ka pa Hminga nupui) chuan kal kawng a ka thingpui in nan cheng zanga lai min pai a, ka lawm khawp mai.

Bangladesh ka zu thlen chuan Bengsuri Munthar khua a ka Pu Lalhmachhuana hnenah ka zu kal a, ka Pu hnenah chuan nupui neih ka tum thu leh nupui tur ka hual tawh thute hrilhin palai min tirh sak turin ka ngen a. Ka Pu Lalhmachhuana chuan, "Min rawn lovin nupui tur i duh zawng i lo thlang ringawt chu a va pawh ve! I nupui tur nula fel tak ka lo hual diam tawh asin mawle," a ti vung vung mai a. A hmelah chuan a lawm lo a ni tih a hriat theih mai a. Mahse kei

chuan, “Ka Pu, tlangval ka ni ve tawh a, tlangval nupui zawn sak ngai nihte chu a luck loh thlak em mai,” ka han tih chuan a lung a awi ve leh mai bawk a.

Ka Pu Lalmachhuana chuan, “Han chho la palai chu keiman ka rawn tir mai ang e,” a ti a, ngaihtha tak chuan ka haw chho leh ta a. Mahse, ka pu palai tirhte chu an lo rem lo zel hi a lo ni a, chuvang chuan Faruk ah ka kal a, ka pazawn (Pa a ka zawn) hnenah palai min tirh sak turin ka ngen leh a, a ni pawh chuan, “Anni nen chuan chhungkhat inhnai tak kan ni a, keini tan an hnen a palai tih a rem lo,” a lo ti leh ta a. “Nupui neihna tur a sum ka neih loh chu thu hran, palai tur lehzel pawh ka hmu zo lo chu a ni a,” ti in keimah leh keimah ka inngaihtuah khawngaihthlak a, ka hnukte a ulh lek lek mai a.

Ka tihngaihna hre lo chu Faruk khaw bul lawk Laimi Para an tihah chuan ka zu kal ringawt a; Chhei le!!! Tawn loh tur ka tawng ta tlat mai. Hman a Bangladesh a ka thiante nen a kan luh hmasak ber tum a Rumana khua a tleitir hmaltha-i kha a rawn inlâr leh ta tlat mai, Mahse, a pawh thui love. Laimi khaw ho inbualna thin, an khaw bul a luite ka zu thleng a, khua a lumin ka thlan ban chulh tawh bawksi nen, midang lo inbual sup sup karah chuan khua pawh hawi lem lo chuan ka inphelh a, ka inbual ve bawrh bawrh mai a, ka ngamtlak deuhte sahbawn chuan ka innuai phuan ve buah mai a.

Ka inbual zo ka inhruak hul hnu chuan hmanhmawh lem lo chuan ka inthlak a, ka inthlak zo ka Pu Leiniara te in a kal tum a ka ke ka pen lai tak chuan ka aw hriat tawh thin niawm tak hian ka hnung lam atang chuan, “U Sanga i ni em?” min rawn ti a, ka phu deuh zawk mai a. Ka han lehhawi nak chuan Bangladesh kan luh hmasak ber tum a kan haw leh tur mittui parawl kiang a ka kut hmer vawng vawng chung a, “U Sang, min hre reng rawh aw, min theihnghgilh suh aw, i rawn kal leh ang tiraw?” ti lawm lawmtu kha ang ka ti hle mai a.

Ka kut veilam a a bahsam ngil siau mai chul heuh heuh pah a ka hnem dante chu nimin lawk a thil thleng ang mai hian ka mitthlâah a rawn lang zut zut mai a. Chutih rual chuan ka thutiamah ding nghet

lovin ka nupui dil tur a vangin ka lo buai em em si te chu hmun dang a tanga rilru hmuhtheihna khawl tha lutuk tak mai hmang a keimah chu inen ang mai hian ka lang tlang vek hian ka inhria a, ka zak ru nghal em em mai a.

Chutia thil kal vel dan ngaihtuah a chhan nachang pawh hre lova ka din reng lai chuan inbual a kal ve midang te'n min lo nghawk chet avang chuan ka harh ta zawk mai a. "E... Kimte, i lo sangin i lo lian tawh lutuk a, ka hai dawn che alawm le. Min hrethiam rawh aw, tirawh, i hman chuan kal ang hmiang," ka ti a. Kan kal tlang ta zel a, ka Pu Leiniar te inah chuan kan lut dun a, ka thlen tumnaah a lo awm lehzel chu mak ka ti hle a.

A ni helai a ka hmuh thut nachhan chu, Army hlauin a biru hi a lo ni a. A hmelthat leh a zaithiam em a vangin an khua Rumana bul a Army Camp a Army Officer chuan nupui a neih luih a tum hi a lo ni a. A ni chuan a duhlovin a hlau si a, Ruma Bethel khua-ah te, Bandarban bul Sarawn khua- a au te inah te a biru a, mahse chung a birukna-ah pawh chuan Army Officer leh ahote chuan an lo zawn zel a vangin Bandarban a Rev Paksim, Pu Leiniar fapa te inah a awm a, Bandarban-ah hun engemaw chen a awm hnu in Laimi khu a a Pu, keima pu ni ve tho Pu Leiniar te inah chuan arawn insawn chho leh hi a lo ni a.

Bandarban a Rev, Paksima te in a a awm lai chuan Bandarban ah ka kal fo thin a ni tih a lo hria a, amah nen a inhmu turin mite a rawn chah thin a, a thu min chah pawh chu achah ate chuan min hrilh thin na in Bangladesh a ka awm theih tawh hnuah an khua a kalna hun ka neih loh a vangin lehkha wawi thum lai ka lo thawn tawh a, vawikhatmah chhan-na ka hmu ngai lo a, Kimtei chu Bawm ramah chuan hmeltha leh zai thiama a hming pawh a lo than ve bawk si a vangin min hre chang tawh lovah ka ngai a, chuvang chuan ka lehkhathawn pawh chu min chhang duh lo niin ka ngai a, bâkah Lalpa'n ka nupui a tan a a ruat ngei nei tur a ka lo inpuahchah lai a nih bawk si a vangin amah hmu turin a awmnaah ka kal duh lo kha a ni a. Ka nupui tur palai tirh tur thu hla a vangin a ni nen chuan kan awmtlan a ngai leh tasi, engchen nge kan la awmtlan dawn lah ka hre bawk si lo.

Ka Pu Leiniar hnenah chuan nupui neih ve ka duh thu leh palai ka hmuh zawh loh thute ka hrilh a, palai ka hmuhzawh loh chuan keiman ka nupui tur chu dil tawp mai ka tum thute ka sawi chuan, ka Pu chuan min khawngaih hle mai a. “Lungngai matache, kei i Pu ka awm a lawm, chutiang a nangma’n i va dil a nih chuan keini Bawm danah chutiang chu dan a nih loh avangin ‘Min hmusit, an lo ti a nga, i chungah an lo thinrim mai ang, palai kal thang ka makpa leh ka fapa i u te an awm a lawm, anni pahnih chu ka tirh sak ang che nga, thu leh hla a fel hma chu kan inah i awm ve reng dawn nia,” a ti a.

Ka palai a tan ka Pu chuan a makpa Pu Chawnkual (L) leh a fapa U Rualchungnung-a te pahnih chu ka nupui dil tur chuan 22 June 1992 zan chuan a vawikhatna a tan a tir ta a. Bawm palai intirh dan in ka palaite chuan thingpui, bawnghnute leh ahmeh tur chhangte an keng a, palai pawh pahnih an ni ngei ngei tur a ni a, a chhan chu pakhat zawk chu palai nù a ni a, pakhat zawk chu palai pà a ni a, palai pà zawk chuan nula nu leh pate a bia ang a, palai nù chuan nula nu leh pate in tur thingpui a chhuang ang.

Nula nu leh pate chuan an fanurawn diltu chu an duh lo a nih chuan palai nù thingpui chhuan chu an in duh lo anga, asual fal deuhte phei chuan thingpui chhuang thei lo turin thuka mei te chu tuiin an leih hlum vek thin. Nula nu leh pa te’n thingpui an in hma chuan palai pà chuan engmah a sawi thianga lo a ni.

Ka palaite chu nula nu leh pa te chuan chutiang em chuan an lo ti lova, palai nù chuan thingpui a chhuang a, a thingpui leh chhangte chu hlim takin an ei in an in hova, ka palai pà chuan athiam ang tawka tawngkam mawi leh zawldawhin ka nupui tur chu a han dil a. Ka palaiterawn haw hun tur chu beiseina sang tak nen kan lo nghak thap mai a.

Ka palaite anrawn haw chuan an va kalna chanchin chu kan lo zawt var a, an ni chuan, “Keini pawh kan lo inrawn ve ang a, kan fanu pawh kan zawh ve te pawh a ngai dawn a, tha tharin inrawn kal leh a ni ang chu,” ti in an lo chhan thu an sawi a. Mizoram a ka awm lai khan ka la naupang deuh bawka nen, hetiang lam hi tawn hriat ka la

nei reng reng bawk si lova, ka lo ngaih ve dan chuan, nula nu leh pa te pawn an mâkpaah min iâi lovin an fanu pawhin a run rempui a tan min duh ve tih ka hriat a vangin sawi rem nghal mai a a man leh mual leh inneih hunte an ruat nghal mai ka lo ring a, mahse ka rin dan ang lo tak a, engmah thuchiang an rawn hawn loh a vang chuan ka ngaihtuahna abuai hle mai a, “Min duh tak tak lo a ni ang, kal nawn kher pawh a ngai tawh lovang,” ka ti a. Ka palaite chuan chu chhanna chu a tha lam a chhan dan phung ve reng a nih thu leh a lungthu kim a wawi thum kal a ngaih thute min hrilh chuan ka thaw huai a.

Laimi Para-ah chuan ka nupui neih tur palai tir thu leh hla a chian hma chu ka la awm ve reng a ngai si a, chhun lamah chuan Kimtei nen chuan ka Pu te huan a lakhuilh kan phur dun thin a, zanah chuan ka Pu te kawt zawla an thing dawhah chuan zan thla eng hnuaiah insi riala thu in zawi sap hian kan ti ti dun malh malh thin a, rilru na angreng tak leh thinlung taka inthlahlel ngawih ngawi si, kan awmdan chu thinlung chhungril chu ruak huai mai, luahlumtu mamawh ngawih ngawih, a luahtu tur takin a luahlum theih tlat si lo hi kan ang berin ka hria.

Chutiang chuan kâr khat zet ka Pu te inah chuan kan awmdun a, thil awmdan sawi fiah a, amah chu ka duh in ka hmangaih a, neih ngei pawh ka duh a, mahse Bangladesh a rawn kal thin lai in an khuaah enthlatu a awm a vanga an khua a ka riah theih ngai loh thute leh Bangladesh a ka awm tan tirh lai lehkha wawi thum lai ka thawn a, mahse chhanna ka hmuh loh thute, Bawm ram a hmeltha leh zai thiam a a lo lâi tak a vanga min theihnghilh ta ni a ka rin thute a han insawi fihlim ka tum ngial pawh chuan alung a dam thei mawlh lova.

Ka lekhathawn chu vawikhat mah a hmuh loh thute min hrilh a. A chang leh kan ngawi dun leh vang vang thin a, kan ngawih chhung pawh chuan kan ngaihtuahna erawh a vak kual nasa thei hle thung. Kan han ti ti leh te chuan meinei tak hian min kheng deuh fak fak reng a, zai a ngaina in a aw a lo tha phian mai lehngal a, Mizo lengzem hla lah chu kei ai daih in a lo thiam tam lehngal a. Hla hmangte chuan a rilru nat zia ahan chhamchhuak thul. Ngaihthlak a hreawm in tuar a har thei thin khawp mai.

Kei lah chu mi azawngah ṭawngkam thiam lo ber ka lo ni bawk si nen, “Khuanu samsuih kan ni lo a ni a nge,” tih bâk han sawi vak ngaihna ka hre der tawh bawk si lo, ka inphatmar tumna te lah chu min phet thla hneh thei hle zel mai bawk si a. Vanneih asiam in Rev Paksima’n Laimi khua a Clinic a sak hawn hun a Kimtei sak atan ka Pu Leiniar chuan, “Gilead-ah thing hnai damdawi a awm lawm ni,” tih hla chu Bawm hla in a letling a. Chu hla zir chu kan hunawl tihkhah nan chuan kan hmang ta a. Zaimi tih takah athiam thuai a, a hun takah mawi takin anmahni Bawm hla ngei in a sa ta a ni.

Nikhat chu Bandarban a kal tur chuan ka chhuak a, lamlian ka thleng chiah chu Kimtei te khua Rumana a ka ṭhian, an khua a kan kal lai a Army Camp a kan in-report lai a ṭawng min leh saktu, chuta ṭanga ka unaupa ni ta Vanrimawia Faruk khua a ṭanga Bandarban lam pan a ke arawn kal ve nen chuan kan intawng hlawl mai a. Bandarban lam pan chuan ke a kalin kan ti ti dun pah zel a.

Ka ṭhian, ka unaupa ni bawk, Mawia chuan, “U Sang, Lai khua a i awmnaah khan Kimtei pawh a awm ve tih ka hria a, nupui a neih ka duh si a, amah leh a chhung te’n Army a ka tan a vangin min duh bawk si lova, min lo sawipui hram teh. Kei chuan tihngaihna ka hre tawh lo,” ti in a mangan thu leh sawipui angaih zia min hrihl mawlh mawlh a. Kei chuan, “Mawia, lungngai mata che, keiman ka neih a rem lova, nangmah talin i nei tur a ni, i tan chuan ka sawi chak zawng tak a lawm, Lalpa’n min ṭanpui ang a i tan ka sawi rem em em ang, lo lungngai reng reng suh. Nupa hlim tak in la ni dawn nia,” ka ti a. Bandarban kan thlen chuan a ni chu Chittagong-ah a kal a, kan inṭhen ta a.

Bandarban a ka tihturte ka tih zawh hnu chuan tlailamah chuan Laimi Para lamah chuan ka haw chho leh ta a. Zannah chuan zan dang ang bawkin zan thla eng hnuaiah ka Pu te kawt thing dawhah chuan insirial in kan ṭhu dun leh a. Ka ṭhian Mawia thu min chah chu ka hre reng a, Kimtei hnenah chuan han sawi ṭan dantur mai ka hre lo va. Sawi ngei chu a ngai bawk si. Ka ṭhian pa Mawia’n a hmangaih zia leh nupui a tan hial a duh ziate, a ni a neih chuan avanneih tur ziate ka han sawi chuan a ṭeu hlar mai a, “Ka duh teuh lo mai, a ni

Army a ni a, khawpuiah a awm a, kei thingtlang nula, vai (bangla) ãawng pawh thiam thathum lo hi vairamah ka awm ve thei dawn si lo. Pasal nei tih ve lemah ka pasal tel lovin a nu leh pa te hnenah ringawt lo awmte chu ka duh hleinem, a nu leh pa ami nei ila min tih,” a ti bak hlak mai a.

Kei chuan, “Aw Kimte, i va han hrethiam lo tak em, i la naupangin heti khawp hian i rulru a chak a; hei tuna reilote ka awm lai ringawt pawh hian Lai khua School a zirtirtu Chakma, Chakma nula Bawm ãawng thiam miah lo tepawh in, in khat a i chenpui pawl sawm zir thleng tawh nula (ahming chu sawi lang lo mai ang) ai chuan nangmah kawm che an duh zawkin khawi khawiah nge i va lenpui? In va len daih laite khan kei chu hetah ka khua alo har hman a sin. Sikul pawh kal mumal mang lovin tunah pawh heti khawp hian rual i pawlin hnam dang pawh i kawm thei a ni a. Mawia nen chuan han innei ula, i tan chuan vai ãawng chu thla khat pawh zir i ngaih ka ring lo, Vai ramah lehngal.

Mawia hi nei la i tisual lo viau ang, a hmangaih em che avangin duat pawh a duat ngawt ang che. A reng reng thua; i pian nalh leh hmelthamna te hi uãawk turvawn an sawi ang a vawn ringawt tur a ni hlei nem. Nakin hun a i tan a ãha tur leh i zâng a damna turin pasal ãha zawn nante hmang tache. A ni i neih chuan hnathawh pawh i awl ang a, a hmangaih bawk si che a, hmeichhe tan chuan nangmahni hmangaihtu te in thlan thiam a ngai a sin.

Chu lo rengah pawh kei chuan ka nei thei tawh lo che a, chuvangin ka ãhian, ka nau nibawk Mawia tal hi i neih ngei a ngai a ni, midang nupui atan chuan ka phal lo che a ni, midang i neih chuan ka lung a dam thei dawn lova, bâkah Mawia nen in inneih chuan kan la inkawm leh thei ãhin dawn a sin. Nangpawh vawi khatmah i inchehir ngai bawk lovang, ka thu hi i zawm lo a nih chuan i tan a pawi viau vang,” ti a ka han sawi chuan ahan inggaihtuah vang vang a. Ka ãhianpa, ka unaupa ni bawk Mawia nuthai atan chuan ainhlan fel thei ta a.

Anni pahnih chu Khuanu samsuih an lo ni ngei mai. Tunah chuan fapa lehkhah thiam thei tak tak pahnih leh fanu hmelthah tak pakhat an nei a Chittagong khawpuiah hlim takin an awm tawh a ni. Anni

pahnih an innei hi ka lawmpui takzet a, hlim tak a an dam chhung hun an hman zel theih nan leh an fanaute pawh in Lalpa malsawmna an chan zel theih nan ka duhsakna ka hlan takmeuh a ni.

Ka palaite chuan ka nupui dil a palai kal dan dik tak a alungthu kim a an kal leh chuan ka nupui neih hun tur leh a man leh mualte pawh chu an rawn ruat fel ta a. Ka nupui neih hun a tan chuan ni 12 December 1992 Inrinni chu an ruat a, ka nupui tur nu leh pate chuan ka nupui man a tan chuan tangkafai Tk 3,000 (Sang thum) leh puanthuihawk pakhat an chhiar a.

Kan inneihna hmunah chuan Faruk khua Reform Church of Bangladesh (RCB) Biakin an ruat a, kut min suihtu a tan Christian Fellowship of Bangladesh (CFB) Pastor, Rev, Thathleizuama an thlang a. Inneihna ruai a senso hautak lo zawngin, a mipa lamin vawk tum sela, a bâk zawng chu hmeichhe lamin tum turin an lo rel fel nghal diam a, Ka palaite chuan, “I nupui tur hi a man atam lu deuh emai, nang chu hetah nu leh pa leh unaute i nei baw si lova, sangkhat tal chuan ti hniam leh turin kan nawr leh ang,” an ti a.

Mahse kei chuan, “Lalpa’n nupui tur mah min pek chuan a man tur pawh min pe leh mai ang, ran man indawn angreng a nupui man ti hniam tura indawn chu ka duh lo,” ka ti a. Mahse ka palaite chuan ka hmâkhawngai in an lo va dawn hniam talh a, sangkhat chuan an lo tawlh hniam a.

Nupui neih ka tum ruk a tângin Bandarban a ka Pi Lalzovi hnenah pawisa, ka nupui neihna tur ka khawl ve thin a, ka nupui neih dawn a ka han lâk chhuah chuan Tk 500 chu ka lo khawl ve hman a. Ka nupui neih nan chuan; ka nupui nam tur pawisa fai Tk 2000 leh puanthui khawl pakhat leina tur Tk 3,000 chuang leh ruai siamna tur leh thil dang tul neuh neuh nen cheng sing chuang chu ka mamawh ngei dawn a. Rev, Rualthanmawia, CFB Mission hotupa chu pawisa pûk ka dil a, mahse ka hlawhtling chuang lem hlei lova. Lalpa’n min rawn tum sak tur chu ka nghak ta ringawt mai a, zamna chhete pawh ka nei chuang lo, “Kei chu Lalpa’n min duat em, tlai ngai lo ka Pathian chuan a hun takah ka mamawh zat chu min pe mai ang,” ka ti a.



Ka hriat loh in Bengsuri Munthar khua a ka Pu Lalmachhuana chu Aiawl-ah a lo han kal a, Lungleiah chuan tihtur nei awm hrimin a va kal a, ka Pu Lalmachhuana chuan Lunglei Bazar veng a Pu Lawmsanga te rawngbawl lai a va nangin a va inkhawm ve a, Ka Pu Hmachhuana hi Bangladesh ah chuan inkhawm lo pawh a tlei thei tak, zu pawh in mai thei, mahse arui hmuh tur awm ngai miah silo, Pathian thu sawi erawh chu amah hmuh loh phei chuan Tirhkoh Pawla emaw tih mai tur a thusawi thiam; Tirhkoh Pawla tawngkam Bible a mi ang deuh ngat hmang thin a ni a. Biakin tlawh lovin tlei thei viau mahse hemi tum hichuan Lalpa'n Lunglei Bazar veng Biakin-ah a hruai lut a ni ngei ang.

Thusawimi tih takah; Pu Lawmsanga te rawngbawl lai chuan ka nupui neih tur leh ka nupui man turte a lo va sawi ni ngei tur a ni, Bangladesh a a rawn haw hnu chuan, “Hei i nupui man tur Lunglei Bazar veng Kohhran in an tum sak che,” tih bâk engmah min hrilh si lova. A kutah chuan ka nupui man tur leh ka nupui neihna a senso tur zawng zawng daih tur Lunglei Bazar veng Kohhran in a min rawn pek chu midang kut atangin min rawn thawh lehchhawng a, amah chu ka nupui neih pawh chuan enge achhan pawh ka hre lo, a lo lang ta chuang lova.

Ka Pathian chu a tlai lo Chiang Khawp mai. Ka nupui man tur leh a senso tur ka Pu Lalmachhuana mi tirh kut a tanga ka lâk chuan lawm takin Chittagong ah ka nupui man tur puanthui khawl lei turin thian pakhat ka sawm a, kan kal nghal ta vang vang a, Puanthui khawl chu cheng sang thum in kan va lei a, ahun takah ka nupui man tura an chhiar puanthui khawl pakhat leh apawisa fai a cheng sanghni chuan kan va hlan ta a ni. Ka Pathian hi chuan min va han ngaihtuah in min va han duat tak em. Lalpa a inngah hi chu a thlamuan thlak in a va hahdam thlak tak em. Lalpa'n ka nupui neih na a ka senso tur sum zawng zawng leh ka nupui man min pekna hmanrua, ka Pu Lalmachhuana chungah leh Lunglei Bazar Kohhran chungah pawh ka lawm takmeuh a ni. Ka palai te'n, “Kan hnam dan in nupui man chu tlem tal bat tur, pek tlak vek tur a ni lo,” an tih pawhin nupui man bat ka duh loh a vangin ka nupui man chu ka pe tlak nghal vek a ni.

Chutia ka nupui man kan pek zawh hnu chuan kan khua Empu-ah chuan ka haw vang vang a, khua ka thlen chuan ka nupui neih tum thute ka han sawi chuan kan khaw thalaite chu ka nupui neihnaah chuan kal ve an lo tum nasa mai a. **“Chung khuanu leng ruatsa in inneihna a lo awm,”** tih hla chu a lâm nen Mizo hla in ka nupui neih hun a rem turin an lo zir nasa mai a, ka nupui neih hun a lo thlen chuan kan khaw thalai mi sawm leh pangate nen chuan Faruk khaw lam pan in ke a mail 19 zet a hla chu phur a vanga zuang leh lâm zawr zawr chungin kan kal ta a.



Ka Nupui Zopuii nen

Ni 12 December 1992 Inrinni chuan ka nupui neihna ruai tur vawk pa sumruk zenzawn chu ka lei a, a bâk zawng chu ka Puzawnte chhung chuan an tum ve thung a. Ka palaite nen a an lo rel tawh angin ruai chu kan inṭawm a. Chhunah a hman apiangin ruai an rawn theh a, tlai thlengin, nilengin ruai kan theh hi a ni ringawt mai. Kutsuih inkhawm chu zanah a nih avangin chhunah chuan hnathawk leh bazaar in an kal deuh vek a, an mahni hman remchan ang theuhin chaw chu an rawn ei a ni, ruaitheh tih hleihtheih pawh a ni lo.

Atir a ṭangin kei chuan kutsuih inkhawm chu zanah ka duh lova, “Min lawmpuitute an tlem pawhin, an tam pawhin chhun en laiin mawi takin kut kan insuih tur a ni, min lawmpui duh lo chuan min lawmpui lo mai rawh se,” ti in ka hel tlat a. Mahse ka palaite leh kut min suihtu Pastor te chuan kutsuih inkhawm lai a mi an tlem lutuk an hlah leh chutih lai a Bawm dan a nih avangin zan a kutsuih inkhawm tura an lo tih tlat tawh si a, lungawi lo tak chuan ka pawm ve ta mai a ni.

Ka nupui tur nen a kan la inneih hma leh kut kan la sui hma hauhin inneihna ruai chu kan theh zo der mai a. Ni **12 December 1992 Inrinni** zan chuan Faruk khua a Reform Church of Bangladesh

(RCB) Biakinah buaina leh harsatna awm lovin Lalpa'n ka kumtluang Nuthai a tan a min pek Zokungi (*Zopuii*) nen chuan Pastor Thathleizuama'n Pathian leh Kohhran te hmaah Kohhran dan thianghlim in kan chhiat kan that pawh a inhmangaih tawn a duat tak leh dawhthei taka inenkawl tawn a, fanau maltluan chawi a dam chhung a pumkhat ni tawh turin "Pathian in a zawm tawh chu mihringin then suh se," ti in kan Van Pa aiawh in min suih zawm ta a ni.

Ka nupui neih ti ropui dangdai leh em emtu chu, khatia kan inkutsuih zo chiah kha Mire thalai te chuan Mizo hla ngei in, '*Chung khuanu leng ruat sa in inneihna a lo awm*,' tih hla chu Action in mawi tak in an lo sa a, ka nupui neih inkhawm ti ropuitu te an ni, an chungah ka lawm tak meuh a ni.

Ka nupui neih hian thian atan a ka hman chu Laimi Para a Pa Rangalha fapa, Zothanpuia a ni a, a fel hle na in Mizo tawng a hre bur lo mai a, kei lah chu a tawng chu ka hre thiam na in Bawm tawngin ka tawng thiam bik bawk silova, thlalâkna (Camera) lah chu amah in a kawb bawk si a, harsa ti ve deuh tak chung a Bawm tawng ka han biak lah chuan Bawm tawng ka thiam lo tih a hriat a vangin ka Bawm tawng ve pawh chu Mizo tawngah ngai ningei tur a ni, min chhan nachang hre lovin a hawi ka ho zel mai bawk si a, harsa tak a Bawm tawng ka han tawng ve pawh chuan awmzia a nei tak tak chuang lova, ka nupui lah chuti bawk, Mizo tawng thiam bik hek suh, nupui neih ni e ti lo chuan athawipik thlak khawp mai. A nuam hahthlak hi a ni ber mai. Mahse, engtin tin emaw chuan kan tlingtla ve ta thova. Ka nupui thian chu Rualsiami Pastor H.Dala fapa Pa Biakliana fanu a ni. Bawm chuan hmeichhe thian hi 'Em phurtu' ti in an sawi bawk a, achhan chu apasal in a alawi luh lai in Mo em chu apasal in thleng a phurh sak thin vang a ni.

Kan inneih inkhawm zo chu Bawm dan in khawlaiah thhutna an lo siam a, chutah chuan keini chu mipui lam hawi zawngin kan thu a, Mo thlahthu leh Mo hmuaktu te'n thingpui leh theitui min intir theuh a, thingpui leh theitui kan in tam lutuk chu zun a chhuak chhen mai leh nghal a, zunin lah an nei der bawk si lova buaithlak thei tak hi a ni ringawt.

Mo hmuaktute chu ka chhungte lam an ni a, Mo thlahtute chu ka nupui chhungte lam a ni a, Lalpa zarah Mizoram a ka chhungte ka nupui neihna-ah pakhatmah rawn kal ve lo mahse Mo hmuaktu lam a ðhu chu an tam takzet a ni. Mo thlahtute ai in an tlem biak chuang lo nia male!!! Lalpa hi chu a thutiamah a dingnghet tak meuh a ni. Bawm dan a Mo ðhutna tura puan thar hlak phah saktu Moneitu farnu phah tur chu Faruk khua a ka farnu Parliami'n Mo chu a lo phah sak a ni. Chutah chuan in lawmna leh inthlahna hun nuam leh hun ropui tak kan hmang a, induhsakna thilpek chi hrang hrang kan dawng bawk a, a pawisa fai pawhin kan dawng nual a ni.

Hetia kawt lai a hun engemaw chen kan hman hnu hian Mo chu a pasal inah a lawi tawh tur a ni a, mahse Faruk khua-ah chuan ka nupui chuan lawina tur nei ve hek lo le, ka Puzawnte inah chuan a lawi ve mai rih a ngai a ni. Ka Puzawnte in a kan lawi luh hnu chuan Mo lawmna hun hlimawm leh nuam tak kan nei leh a, Mo lawm zawh chuan tlaivar thakin an zaikhawm leh nghal bawk a ni. Mo lawi hma zan pawh khan 'Mo thlah zan' an ti a, an lo zaikhawm tlaivar ðhak tawh bawk.

Atuk zing chuan nimin lam a kan ruai chaw leh sa chhumna bel ruak chu insiltir tumin khawlaiah patling an inum ðiang ðiang mai a, a umtu lah beidawn tum bik suh, a umphak na hmun hmunah bel ruak bal zet mai chu a pe a, bel siltu tur chu a umphak lo a nih chuan bel siltu tur hmuh zawhloh thil awm thei tak a ni. Kei pawh chu, "Kan dan in Mo neitu pawhin bel sil ngei ngei a ngai," ti in belpui bal zet mai chu min hlan ve a, kei chuan an hnam dan nge an siamchawp dan pawh ka hre bawk silova, ka kawr ban chu ka hlim chhing sauh sauh a, belpui bal tak mai chu mawng kang dawrh dawrhin ka nawt ve nasa ta mai a, Azialo nge a zia phian pawh ka hre thiam bik lo.

Kan inneih hnu thawhtan chuan kan khua Empu ah chuan kan haw chho dawn ta a. Bawm danah chuan nulain khaw dangah pasal a neih chuan Mo ðhian leh a chhungte mi engngemaw zatin an thlah ðhin a, ka nupui rawn thlah tumtu te chuan, "Keini chu ke in kan kal thei lovang, motor pahnih i hman angai ang," an ti mauh mai a, kei chuan, "Lalpa'n ka nupui neihna a tan a ka mamawh bâk pawisa min

pe lo, motor pakhat chu ka hmang thei a pahnih chu ka hmang thei lovang,” ka ti a. Anni chuan, “Motor pahnihah lo chuan kan leng dawn si lova,” an tih a vangin Mo thlah tur chuan tumah an rawn kal ta lo a ni. Keini chu ka nupui hruai in ke a haw mai kan tum a, Faruk khua a mite nen a kan inthlah a, chibaite kan inbuk zawh chuan ke a haw tur chuan kan han insiam a, chutih lai chuan Truck ruak pakhat hi a lo kal a, kan han phar ding a, a kal tumna lam kan han zawh chuan kan khaw lam a kal tur alo ni a, kan vai chuan kan chuang vek a. Chu Truck Driver chuan Mo hruai a kal kan ni tih ahan hriat chuan chuan man chu a zatve chauh pe turin min ti a, kan khaw dawrah chuan thingpui leh chhang min khilai vek bawk a ni. Lalpa min lainattu a rawn inlâr leh ta, a va lawmawm in a va thlamuan thlak thin tak em.

In kan thlen chuan ar ka talh a, kan khua a upa hote chaw eiah ka sawm a, Pathian hnenah lawm thute kan sawi a, kan khua a mite chuan, a lian a te in ka nupui nei chu min lawmpui ve takmeuh in ka hria. Lalpa’n ka duh leh ka beisei ang ngeiin fanau malsawmna fanu pakhat leh fapa pathum min pe a, chung ka fate chu; Ka fa hming koh a tan Lalpa’n ni 7 April 1994 Ninga ni tlai lam 05:08pm



chuan fanu hmelt̃ha leh duhawm tak min pe a, ahming a tan Hnahthial a a Pi Zawni’n **Lalmangaihzualzeli** tiin a sa a. Kohduat nan **Mazuali** kan ti a. Lalpa’n apahnihna a tan, 12 June 1998 Zirtawpni zinglam 08:35am ah fapa duhawm tak min pe leh a, **Mika Lalmuanawma** ti in ahming ka sa a. Kohduat nan **Avala** kan ti a ni. A pathumna a tan 5 May 2002 Pathian ni tlai lam 02:30pm ah Lalpa’n fapa duhawm tak min pe leh a, Faruk khua a a Pu Rev, Leitlinga’n ahming atan **Lalrinawma** a sa a, Kohduat nan **Amama** kan ti a. Chumi hnu in 28 March 2004 Pathian ni zinglam 07:06am-ah Lalpa’n fapa duhawm tak min pe leh a, Pu R.Vanlaldika Lunglei chuan a hmingah **Lalringgama** ti in a sa a. Kohduat nan **Marina** kan ti a.

Lalpa'n fanu leh fapa tha tak tak mai min pek bâkah malsawmna chhiar sen lohin min vura, a rawng ka bawl na kawng a ka nêp zia leh ka thawh hlawk loh ziate ka ngaihtuah hian heti taka malsawmna min vur hi ka phu mawlh lo a ni. Lalpa min lainattu kan nei hi kan va han vannei tehlul em. Lalpa min pek ka nupui leh ka fate hi ka tan chuan an hlu in an mawi em em a, **ross par ai pawhin an mawi zawk a ni**. Heng ka nupui fanaute leh Lalpa malsawmna ka dawn zawng zawngte a vang hian lawmthu sawi tur ka va han ngah tak em. Lawm thu sawi dan pawh ka thiam lo zawk a ni. Kan nupa hian Lalpa-ah kan lawm em em thin a, "Lalpa hi chu kan chungah ava han tha tak em," pawh ti mai lovin, "**Lalpa hi chuan min va han duat tak em,**" ti in kan chung a Lalpa thatna hi kan sawi dun fo thin.

Lalpa'n ka kawppui awm tak mi, nupui min pe hi ka lawm em em a, ka hmangaih em em bawka, kan nupa kan inhmangaih chuan kan fate'n anmahni kan hmangaihna pawh hi an hmu thiam in hmangaihna awmzia hi an hria anga, an mihringpui, midangte leh thil siam dang thleng pawh an hmangaih ve thei dawn a ni. Chhungkua a naupangin hmangaihna awmzia nu leh pa te a tanga an hmuh lohva an hriat thiam loh chuan an mihringpui leh thil siam dangte pawh an hmangaih thei dawn lo a ni. Mi paw'n an nupui pawh la ni hlei lo, an hmangaih nulate tan hla an phuah kur ngiai nguai a, chu vang chuan kei paw'n ka nupui duhtak tana ka hla phuah hi kan târ lang ve hrim hrim a nge.



1. Ka thai duh lai, ka tan chuan e,  
 Ross par aiin i mawi zawk;  
 Vul reng ang che kan run chhungah,  
 I an ka nem thinlai ti hlimtu.

Dam reng ang che, vul reng ang che,  
 Kan run chhungah;

Ka thai duh lai ka par mawite,  
Ka hmangaih che, ka thlang ber che.

2. Chun leh zua chang tawh mah ila,  
Vawng reng ang aw, Hmangaihna;  
Kan run chhungah hmangaihna par,  
Vul reng se damchhung ni tawi te-ah.
3. Lalpa'n mal min sawma fanau,  
Min pe lawm tiklimtu an;  
Malsawmna min petu chungah,  
Lawm thu sawi in a rawng i bawl ang.



*I nupui chu, i in chhûng rilah chuan, Grêp hrui rah duh mi tak  
angin a awm ang a: I fate chu, i dawhkan vêlah chuan, oliv ãiakte  
angin an awm ang. (Sâm 128:3)*

## BUNG 15

### LALPA'N THIL ROPUI TAK MIN TIHSAK.

Lalpa'n ka tan a thil ropui tak min tih sak zozai hi ziaik vek dawn ila lehkhapuan leh pentui in min daih seng dawn lova, ziaik tam hle in inhre mah ila ziah kim sen rual lah a ni dawn bawk hek lo. Ka nu pum chhung a ka awm lai a tanga tun thleng hian Lalpa'n thil ropui tak min tih sak mawlh mawlh reng hi a ni rawngawt mai.



Lalpa'n thil ropui tak min tih sak zawng zawngah hian lawmthu sawi zel dawn ni ila, thil dang sawina hun awm lek lovin ka damchhung zawng hi Lalpa hnen a lawmthu sawi nan ka hman zawh vek a ngai hial ngei ang. Chuvangin lawmthu pawh ka sawi vek seng lova, ka nun hi Lalpa-ah a lawm em em reng ringawt mai a ni. Hei hi alo nih dawn hi, hla siamtuin, *“Aremruat a in nghat ringtute nun zawngah chuan vuina tur reng hi a lo awm love,”* a lo tih ni. Vuina tur awm chu sawi loh **‘Lawmna tur hliir’** a lo ni zawk a ni. Lalpa'n ka tan a thil ropui tak min tih sak zozait zinga tlemte han tarlan ka duhte chu hengte hi a ni:

1. **Lalpa'n a rawng ka bawl ve min phal sak a, he khawvelah ngei pawh hian min chawi mawi a ni :**

Kei, khawvel thiamna leh zirna lamah chuan chhuan tur pakhatmah nei lo hi, tunlai khawvel thiamna leh finna hmachhuanna khawvelah hian BCM Kohhran dan lo angin (**‘Dan lo ang’** ka tih nachhan chu tunlaiah chuan Missionary tur chuan an thiamna in a tlinte chauh lâk *thin a nih vang a ni a, kei chu ka Academy Certificate in Missionary tur chuan a tlin ve loh hrim hrim vang a ni*) Lalpa zarah Baptist Church Of Mizoram (BCM) Missionary ka ni tlat si. BCM danah tunlai chhanah Pastor (B.D) zir chhuak tawhte tan pawh Pastor nih a har em em lai in kei chu Lalpa zarah BCM hotute hriatpuina thlapin Baptist Church of Maruchah (BCM) Assembly-ah Pastor Ordain ka ni in Rev (Reverence) nihna pek ka ni tlat bawk.



Ni 25 February 2018 khan rin loh leh beisei phak ngai reng reng loh in Carson Theological College & Seminary chuan Bachelor Of Ministry (B.min) Digree Award min hlan ve tehtlat mai a, Lalpa khawngaihna a vang liau liau a ni. High School pawh rap pha ve ngai lo kha ka Graduate ve ta reng mai a lo ni. Lalpa hi chu a mite tan hian a va han thilphal tehlu em.

Ni 18 August 2018 khan ka thawhna hnam ngei, Baptist Church Of Maruchah Thai te chuan ropui takin min chawimawi in, ka phu loh thu zia hlu leh ropui tak mai min hlan baw k a.

Thiamna nei lo leh mi mawl tak mai hi Lalpa'n a rawng ka bawl ve a phal a, a rawng ka bawl na tur a nih a vangin finna, thiamna leh hmanraw hrang hrang, ka mamawh ang zela min pete, ka rawngbawl na a mi leh mi chi hrang hrangte pawh hian min hmangaih a min ngaina em em maite hi ka lawm em em a, Lalpa'n *he leiah hian van nun min tem tir* ni ber in ka hria a, a ropui ka ti in ka hlim em em a ni.

Kei ang duang tan a thil theih loh leh beisei ngam rual loh chu lei leh vana thu neihna zawng zawng neitu, ka Lalpa leh ka Pathian chuan he khawvela chawimawina sang tak mai, Doctor of Ministry (Doctorate Digree) Award chu 25<sup>th</sup> September 2024 khan Dayspring International University U.S.A te kaltlangin min hlan a, 'Ava mak em em ve' tih mai loh chu sawi tur pawh ka hre lo. Ka lawm em em rualin ka hming bul a 'Rev. Dr' tih ahan chuang ve turte chu ka inhmeh lo riau in ka hria a, mahse Lalpa'n kan phu reng vang ni miah lovin chawimawi a duhte chu khawvel hmuhah ropui lo mah ila hetiang hian a chawimawi thin a lo ni. Lalpa'n thil ropui tak min tih sak vang chauh a ni. "Lalpa, hetiang a chawimawina ropui leh sang hi ka phu lo asin," tih bâk sawi ngaihna vak pawh ka hre lo. Ka tan chuan a mak em atin ni. Ka tan Lalpa hi a va tha em.



2. **Lalpa ruahmanna mak** : Kei mi tling lo tak mai Lalpa'n Mire rama a rawngbawl tura min lo thlang hi ngun taka ka ngaihtuah hian Pathian thil ruahman lawkna a lo ni tih ka hriat hian a mak ka ti bâng thei lo. Mire ram rawngbawlna a kei leh ka unaute leh ka Pu (ka Nu nuṭa) min lo hman dan hi a mak ka tih em a vangin ka tar lang ve hrim hrim duh tlat a ni.

Kum 2005, 2006 khan kan unau zinga naupang ber Lalmuanpuii'n (Puitei) Lalpa tan a mi ṭhahnemngai te thilpek hmangin Mire hla Audio leh Music Vedio Casstte thum lai min siam sak a, Lalmuanpuii (Puitei) zai chu Mire ramah Lalpa rawngbawl nan a ṭangkai em em mai a, kan unau Miria te'n an ngaithla duh em em a, an Mobile ah ka thun sak a, Kristiante hunpuiah pheih chuan khaw tin ah Mike (Aurinna) in an zai tir vut vut reng mai a ni. Puitei hla an ngaihlthlak a ṭanga Kristian a rawn inpe tate pawh an awm hial a ni.

Kum 2012 khan Maruchah Christian Fellowship (MCF) Conference-ah Speaker ni tura kan sawm angin Mizoram a Thutak puangtute Team Deputy Spreker J.Lawmsanga (Ka Pu Mama, ka nu te unau zing a mipa a naupang ber) te an rawn kal a, chumi ṭum a ka Pumama te rawngbawlna chuan tun thlengin Miria te'n an la hlawkpui em em a ni.

Chumi ṭum a kan MCF khawmpui a ṭang chuan Mire Kristian te'n Solfa zir duhna thinlung an neih phahin anmahni Solfa, hla leh Musice zirtirtu, ngenngawl takin min ngenna zarah ka nau Sangtea (J.Vanlalsanga) chu Mire ram a rawng bawl tura koh thlak a nih phah a ni. Hemi kum vek hian ka nau (Ka nu chhang chiah ka Pu Lalduha fapa) J.Vanlalsanga (Sangtea) chu Mire ramah a rawn chhuk a, bung hmasa lam a kan sawi tawh ang khan a ni hi zai, Musice leh Solfa te a thiam mai bâkah kutthemthiamna talent hrang hrang a neih ṭhat em a vangin Mire ram rawngbawlna-ah kawng hrang hrangin kan ṭangkaipui takmeuh a ni.

2013 kum chuan Mizoram a Evangelist Thutak puangtute Team Speaker Evan Upa K.Dengdailova (Ka Nu u, ka Nu Kungi fapa) chu kan BCM Assembly-ah Speaker tura kan sawm angin a rawn kal thei a, Hemi ṭum hian Mire ram a thil thleng ngai lo; thlarau lam harhna a

thleng a, a bik takin thalaite zingah a thleng nasa bik. Kan thalaite chu Pathian fakin tap zawih zawihin tlaivar thakin an zain an lam a ni. Kum 2013 a ka unaupa Denga Speaker a kan hmanin a rahchhuahte chu, hemi hma hi chuan Empu khua in kum khat thawhlawm sing ruk, sing sarhi chauh pe thei thin khan, Biakin sak nan a kan hman bakah Budget ah cheng nuai khat chuang fe kan pek theih phah a, Kohhran in thilpek ah hma kan sawn phahin kan than len phah hle a ni tih a chiang em em a ni.

Chu chauh a la ni lo, thalai te thlarau lam a harhna an chan a zarah Mission hrang hrang a mite pawn hlim tak leh venthawn nei miah lova Lalpa an fak ho thin theih nan thalai pual bik a pawl din tul a hriatna ka nei a, kan Assembly rorel zawh chuan All Christian Kurthummi Powchak (ACKP) kan din sak a, chutah chuan Mission hrang hrang a Mire thalai Kristian zawng zawng chu an awm a, kum tin khawmpui an nei ve thin a, an pawl hming pawh hnamdang hriat awlsam zawk nan Mruchow Christian Yuoth Association (MCYA) ti in an thlak leh ta a ni. MCYA chanchin chu bung hmasa lamah kan sawi tawh baw a, sawi tam tawh lo mai ang.

Heng a tangte hian Lalpa'n Mire ram a kei min lo hruai hi Miria te tan kei leh ka Nu lam a ka chhungte hmangin thil tum leh ruahman fel tak a lo nei ngei a ni tih a lang chiang hle in ka hria. Lalpa'n keini angte a ram rawngbawl na a hmanrua a min han hmang ve duh hi kan tan chuan hei ai a chawimawina hlu leh ropui hi a awm leh thei pawh in ka ring tawh lo. ***Lalpa, ka lawm takmeuh a ni, kei leh ka chhungte i rawngbawl na hnamrua a min hmang ve duh hi.***



***Ka Nu leh a unaute*** 1. Zazingi, (L) 2. Lalduha, (L) 3. Selkungi.

3. J. Sanglawma. 5. Vanlalmawii. (R – L) Upat dan indawt nilovin.

Ka Pu Dohranga (L) leh Ka Nu Zapari (L) thlak chu ka dah lang thei ta lo.

#### 4. **Se kawlh ka hau zal :**

Tum khat chu kan khua a tanga chhuah lam Numlai Headman khua-ah Pathian thu hrilin ka kal a, Sêpre lui kam a Singchowng khua ka zu thlen chuan, Singchowng khua a mite chuan, “Lui lamah chuan kal suh, Se pa kawlh a awm a, tumah lui lamah kan kal ngam lo, se kawlh chuan mi a um thin a, hnathawk leh chawhmeh zawng pawhin tumah kan kal ngam tawh lo,” an lo ti a.

Numlai Headman khua a kal tur chuan Sêpre lui dung chu zawh thlak ngei a ngai si a, Kei chuan, “Kei chu ka hlau ve lo, Se kawlh chuan min hlau zawk ang, Chungnung ber a tirhkoh ka ni a lawm,” ka ti a. Ka kal thla ta a, ka kal lam chuan chu se kawlh chu ka hmu lova, tluang takin ka kal a, ka rawn haw lam chuan lui kawr chep lai tak maiah chuan lui kam tuiin a chim loh chinah chuan Se pa lian fu mai, aki kual hmawr lam eng vuh tawh mai hi ka lam hawi zawng hian a lo bawh run mai a.

Ka rilru chuan, “He sial hi a ni ngei ang ka kal lam a Singchowng khua a mi te’n ‘Se pa kawlh’ an tih kha,” ka ti rilru a, ka tiang chuan ka han vai a, ka han hnawt a, a lu alei luk luk a, a tho duh reng reng lo mai a, hêlna awm hek lo, a lam pan pah chuan ka chho zel a, ka tiang a vai pah chuan ka hnawt a, ka hnaih hle tawh chuan a thova, min rawn phin tum niawm tak hian a lu a kun hniam a, a hnar a phit a, a lu ti lei buk buk pah chuan a ke hmalam chuan lei aphiat sawuh sawuh mai a, chutia lei leh van lalber tirhkoh zah lo taka chu Se chal in a min han cho vel chu ka thin a rim ta em em mai a.

“Ehehe....I va han zak lo em em ve, nang ran mai mai in kei Pathian anpui a siam mihring, Chungnung ber a tirhkoh leh nghal hi min cho ngam ve a ni maw, rawn kal teh. I hmuï noah tak khan ka lo fik sak hmawh teh ang che,” ka ti a, ka tiang chu ka paih a, ka chemte pai sei zer zawr chu ka han phawi a. “Nangin a zah lo taka khatia mi tih tur ka ni hleinem, khanglang che hian,” ti a hau bawrh bawrh pah chuan ka han pan hnai a, a bul hnai ka va thlen chuan min en run run a, zawi muang hian a inher a, a kal chho ta hnu hnu a, kei chuan a hnung a zui chho pah chuan zilh ti tih hian ka hau chho pah bawrh bawrh a, a ngaithla peih tawh lo a ni ang, luite-ah min pen san ta a ni.

4. **Ramhuai an tlanchhia :** Kan khua a tanga chhim lama khaw pakhat Uâklu/Chini khua an tihah hian Mire in sawm leh panga vel hi an awm a, chu khuaah chuan Kristian in li vel hi an awm ve a, a khât tawh hian ka va tlawh ve reng thin a, tum khat chu keimahin va tlawh leh ka tum a, mahse ka Pa Mensowm-a hian, “Uâklu khua-ah kan nu nuâte an awm a, tlawh ka duhna a rei tawh a, hun ka neih loh a vangin ka tlawh thei lova, i rualin ka lo kal ve ange,” a ti a, kan pahnih chuan kan kal ta a, Uâklu khua thlen hma lawk a Prangmawm khua-ah chuan reilote kan chawl a, kan kal leh ta a, Prangmawm khua a tang chuan Uâklu khua chu a hla tawh lova.

Uâklu kan zu thlen chuan kan Kristian member pakhat; an khua a ka kal apiang a ka thlenna thin, Pu Patui te inah chuan kan va thleng a, mi an lo tam hle mai a, Pu Patui chu an in kil lamah chuan alo thu kun chal mai a, a ban chu puan var hian an lo tuam bur mai a, an tuamnaah chuan thi a lo la kai nuai mai a, “Engatinge?” ti a kan han zawh chuan, a bul vel a mite chuan, “A kawchhungah ramhuai a lut thin a, a kawchhung a ramhuai a luh a piangin thisen hi a duh thin a, vawk thisente, ar thisente a dawt thin a, tuntum chu kan chelh bet tlat a, mahse a talchhuak thut a, chemte a la a. Vawk leh ar a man mai theih loh a vangin a ban a inzai a, ama thisen a dawt ta a, Prangmawm khua in lo thlen khan, “Khi, Lura a rawn kal, tunah Prangmawm khua a lo thleng tawh, rei lovah a rawn thleng mai ang, tlan chhuah vat a ngai,” an ti a, chuta tang chuan ramhuai hovin an chhuahsan a, in rawn thlen hun kan lo nghak a nih hi, tunah chuan a harh fim leh tawh a ni,” an lo ti a.

Ka bag ka ngihat a, ka tawngtai nghal a, chuta tang chuan ramhuai chuan a rawn ti buai tawh ngai lo. Pu Patuia hi Kristian-ah a awmna chu a rei ve tawh a, mahse mi awmherh mi a ni ve a, thil mawi lo tak tak, Kristian tih a mawi lo tak tak a tih thin a vang hian a buaithlak ve hle thin a, mahse tunah chuan a fel ve tawh khawp mai.

#### 5. **Uaklu khua a tiaui :**

Uaklu khu a ka kal apiang hian Krama leh Budish hote hi ka Pathian thu sawi ngaithla tur hian an rawn kal khawm thin a, ka kezungpui khawihin pathian chibai buk tak hian bungbu kawt kawtin chibai min

buk thin a, “Hetiang hian chibai mi buk suh u,” ka tih pawhin an sim duh chuang lova, Pathian thu erawh an awi duh chuang lem hlei lova, Kristian tlemte awmho lah tawngtai dante, hla te ka zirtir a, “Han tawngtai ve teh u,/han zai ve teh u,” ka tih hian, “Keini chu kan tawngtai/kan zai thiam ve lova,” an ti zel a, an khua ka kal zin leh ka zirtir tam tawh tehlul nen, ka thil zirtirte chu thiam tumna thinlung reng an neih loh a vangin ka thin a rim a, “Hei hi hre rawh u, wawi tam tak ka rawn kal tawh a, min lo lawm em em na in Pathian in ring duh chuang si lova, Kristian ho pawh hmasawn tumna in nei bawk silova, in khua-ah hian vawikhatmah ka rawn kal leh ngai tawh lovang,” ka ti a, an khua chu ka chhuansan ta a. Chumi ta tanga rei lovah chuan an khua chu an intibuai a, an pem darh ta vek mai a, tunah chuan an khua chu a ram ta der mai a ni.

**6. Lalpa’n chhuancham a ka awm aphal lo :** Mire ram ka luh hma, ramri vel a kan la tangkhan lai, kum 1990 khan ka kalpuite’n min kir san vek a, min tirtu kan Mission Board te ngei pawh in min tilh san vek bawk a, Lalpa hruaina in engemaw ti ti in Mire ram chu ka thleng a, Mire ram ka thlen hnuah CFB Mission in thla khatah Tk 1200 in min tanpui ve a, chu pawh chu min pek loh thla a awm nual thin a, min han pek ve pawh hian min pek loh thla kha chu theihnghilh a ni zel bawk si a, chutih lai chuan bufai bag khatah (Kuintal khat) man chu Tk 800 a la ni a.

Rawngbawl a ka zin reng a ngai a, in a ka awm lah in Mire hlabu, Bible leh lehkhabu dang dang Mire tawng lehlin hna leh ziak hna ka thawh reng a ngai bawk si a, sawhthing hmun leh banhla hmunte siam in lo zimte pawh ka siam bawk a, mahse duhangin chutiang hna chu ka thawk tha hman bawk si lova. Ka in tur pawh keima sak a ngai bawk a.

Miriate lah chuan a hminga Mizoram a tanga an hnam zinga Missionary han ni ve tafam chu an dam loh in damdawi min rawn dil ve thin a, chung hun a tan chuan damdawi ka inchhawp a ngai ve reng thin a, “Tukin chhuan tur kan nei lo, za nin chhuan tur kan nei lo,” ti a chhuanchham rawn tlan lut an awm ve zauh zauh thin bawk a, chungte chu kut ruak a han chhuah tir leh chi an ni bik si lova, keini pawh chhuanchham lek lek a kan awm chang a awm thin a.

Chawhmeh leina chu sawi loh fate lawm U Buki leh U Thlangdir-te nupa  
 zawng chhang leh chithlum han leina tur  
 takngial pawh kan nei thin lova. Tum khat chu  
 kan fairel bel a ruak ta der mai a, buhfai han  
 lei mai natur pawisa lah chengkhat pawh kan  
 nei si lo. Ka nupui hnenah chuan, “Ka pa  
 (Pastor Chownglowk) te buhfai 3 kg lo pûk la,  
 buhfai lei turin Bandarban-ah ka zu kal ang e,”  
 ka ti a, Bandarban-ah chuan ka kal a, mail 24, (37 km) chu ke in mail  
 12 ka kal a, mail 12 a tang chuan Trick remchangah chuangin  
 Bandarban ka thlen chuan buhfai zawrhna vai (Bangoli) buhfai  
 dawrah chuan buhfai leina cheng khat pawh nei lo chuan Lalpa min  
 pek hun nghak chuan ka thu ran mai a.



Rei pawh ka thu hman lo, Ruma a kan U Lalbuki pasal U Thlangdira  
 a lo kal a, “E...Lurte, heta ka hmu hlah che chu a va lawmawm em,  
 tuntum kan sawm a pakhat chu i u Buki nen nangmah pek che a lang  
 tlat mai a, nangmah pe tur che in ka lo kal a nih hi, hei cheng zariat  
 hi la rawh,” min ti a, lawm takin ka la a, lawm thute ka sawi luam  
 hnu chuan buhfai ka lei a, ka Puzawnte khua Faruk a hla lo bawk a,  
 Faruk-ah ka riak a, a tukah chuan buhfai tukkhum tawngin ka phur a,  
 hlim takin ka haw leh ta a ni. Ka buhfai leina tur an sawm a pakhat  
 minrawn petu U Thlangdira te chu Bandarban a tangah chhim  
 chhaklam mel 24 vetho Ruma Bazar a awm an ni.

Tum khat pawh chhuan kan chham leh dawn tlat mai a, pawisa  
 chengkhat pawh nei lo bawk chuan buhfai lei turin Bandarban-ah ka  
 kal leh a, Bandarban Bazar thlen hma, Hafesguna vengah hian ka Pi  
 Lalzovi te hi an awm a, ka hah deuh bawk a, ka Pi Lalzovi te inah  
 chuan tui te in a chawlh hahdam tumin ka va kal a, ka Pi Lalzovi  
 chuan min lo hmuh chuan, “E Lura, lo kal teh, enteh hei niminah  
 Kuwait a i u Babyi’n (a fanu) pawisa a rawn thawn che a,” ti in  
 cheng sangkhat min lo pe a, lawm takin ka la a, Pathian hnenah leh  
 ka Pi Lalzovi hnenah chuan lawm thu ka sawi a, chumi pawisa chuan  
 buhfai ka lei a, hlawhtling takin ka haw leh ta a ni.

Ka Pi Lalzovi hi Pu Taia nupui a ni a, Pu Taia chu tunhma  
 Bangladesh ‘E’ Pakistan a nih lai a Police Officer a ni a, Bangladesh

a lo pian hnu a Bangladesh Police Officer lo nita a ni a, a pasal Pu Taia chu a thi tawh a, Bandarban a an inah chuan a nupui leh a fate an la awm a, U Baby-i pawh hi an fanu Kuwait a Nurs hna thawk a awm a ni. Ka Pi Lalzovi hian min duat in min hmangaih em em a vangin a fate pawh hian anmahni unau ang maiin min en ve a ni. Afate chu Bangladesh ah pawh milian Officer an ni deuh vek hlawm a ni. Kan van Pa hi chuan min va thlahthlam ngai lo tak em, amah ring ngam chiah lotu te pawh an mamawh a pe thin a ni a, amah a innghat leh amah ringngamtu te tan lekphei chuan zamna tur reng hi a lo awm lo a ni. (Sâm 121:1,2)

**7. Ka chhuk ka chhohna-ah Lalpa'n min veng :** Ka fanu| Mazuali leh a nau chiah Avala chu an naupan tet a tanging Mizoram a sikul kal an nih a vangin an chhuti rei deuh hi chuan kan awmna Bangladesh Empu khua a an rawn haw zel a ngai a. Thlasik lai leh khaw lum em em laite hian ka fate hruai leh thlahin ka chhuk ka chhoh reng a ngai a, kawng a thui tham em a vangin kan hah thei thin khawp mai. Mahse, Lalpa hruaina leh awmpuina in tunah chuan an nula tlangval ve ta.

Ka fanu Mazuali leh ka fapa Avala te nen zan thimah Leng Leng te-ah

Kum 2000 June thla a tanga kum 2013 thleng khan Mire Field a Staff hlawh zawng zawng leh kan Budget hi thla hnih thla thum danah keimahin Mizoram BCM Office-ah ka la thin a, achang chuan vawikhatah nuai hnih chuangte ka lâk chang a awm a, ka ramri kân dan lah chu dan lo ang ngawtin ka kal a ngai bawh thin si a. Pawisa chu ramriah Chakma ho hnenah Bangla pawisa in ka thleng hmasak vek a ngai bawh a.



Mission pawisa tam tak mai pai chuan Chakma inah te leh vai inahte ka riah angai fo mai bawh a, Chutih lai chuan tunlai angin Internet kan la hmang lovin E-mail pawh kan la hman loh a vangin Headquarter lehkhaw pawh hi a ken in ka keng thin a. Chutiang a Bangladesh leh Mizoram ka kârtawn a ka chhuk ka chhohnaah chuan engemaw chang chuan ramri-ah chuan min check nasa thei hle thin a,



Ramriah Mission lehkha pawimawh emaw, Mission pawisa tam tham tak mai min han man sak maise chuan emaw, Misualin min khawng thlu/chemte emaw silai in emaw min vau in ka pawisa pai min chhuh sak vek mai sela chuan (Chakma ho hnen a pawisa thleng thin ka nih a vangin pawisa tam tak ka pai thin tih Chakma ho thenkhat chuan an hre deuh fur mai si a) ka tan a pawu em em dawn a, ka dam khaw chhuak a nih pawh in Field lam leh Headquarter lamin ka thusawi chu; min rawn hmuh kher dawn loh a vangin an awi kher lo thei baw a, min ring ngam tawh dawn lova, ‘mi rinawm lo’ ka lo ni tawh mai dawn a ni. Chu mai nilovin kum tam tak ka tang thei baw a; a nihloh leh ka thih phah thei baw.

Chutiang chu lo thleng palh tase chuan kan Field tan pawh thil pawu tak a thleng ngei ngei dawn a ni. Engemaw chang a ka bag zawng zawng leh ka file leh lehkhabu karte leh taksa te nen lam a min check changte chuan, “Lalpa, min checktu te mit hi ka thil pawimawh hmu lo turin ti del ang che,” ti a rilru a ka tawngtai chang a awm thin, Lalpa’n ka tawngtaina achhang a, an en reng leh an khawih reng chung pawhin ka thil chu hmu lo turin Lalpa’n an mit a tih del sak in, an hriatna atih chawmawlh sak a, vawikhat mah min man ngai lo a ni. Chutiang chuan kum 13 lai kan Field a Staff hlawh leh Budget la a ka chhuk ka chhohna ah Lalpa’n misual, min suamtu tur lakah leh min checktu sipai lakah min veng tlat reng a ni.

Ka Lalpa leh ka Pathian hian eng tik lai mahin min thlahthlam ngai lova, kawng engkimah min hliahkhuhin min veng reng thin zawk a ni, engemaw chang chuan han zam ve deuh chang pawh ka nei thin a, mahse Lalpa’n ka chak lohna te hriain min thlamuan a, akut chak thiltihei chu min hmuh tir leh thin. Lalpa, nang chu ka phaw leh ka inhumhimna i ni kumkhua ang.

***LALPA chu nangmah vengtu a ni a: LALPA chu i ding lam a hliahtu che a ni. Sâm 121:5***

8. **Thihna kotlang a t̃angin Lalpa'n min chhan chhuak** : Kum 2014 kha nita in kahria, Mizoram a ka fapa School chhuti rawn haw tur hruai turin Mizoram-ah ka kal a, kan chhoh lamah Horina kan thlen chuan Horina a t̃anga Rangamati lam Vai (Bengoli) khua Busawnnchhawra, Horina a t̃anga Rangamati lam hla vak lo ami, vai sangha mantu, mi panga lai mai Chakma hel hovin an that a, chumi chanchin chu kan hre hman a, mahse engmah buaina ala chhuak rih lova, tluang takin Mizoram chu kan thleng a.

Lunglei kan thlen tawh hnu chuan Busawnnchhawra a vai ho thinrim chuan an khua a sangha mantu mi panga Chakma hovin an thah phuba lâk nan tlangmi tawhphawt chu an thah theih theih thah an lo tum a, Horina leh a chhehvel a Chakma leh Mawk ho te chu ramhnuai lamah an lo tlanchhe vek mai a. Keini chu hun engemaw chen Lunglei a kan cham hnuin Bangladesh Laizo khua a kan u, U Laltawna kan zu phone a, a ni chuan, “Lo kal ula keiman ka kalpui ang che u,” a ti a.

Keini chu kan t̃hian, Bawm leh Pang t̃henkhat te nen chuan kan chhuk a, Laizo khuaah chuan kan riak a, Laizo khua a t̃ang chuan kan u Laltawna chuan min hruai a, Horina Bazar-ah kan riak a, zingah Lons in Rangamati lam pan chuan kan chhuak ta a, Horina thlang lawk, Busawnnchhawra khua km khat vel a kan pelh tawh hnu chuan kan chuan-na Lons chu vaukam lama ding turin a chhunga mi t̃henkhat chuan an ti a.

Kan han din chuan vaukamah chuan vai thinrim meng sen rum mai talhtumte, chemte leirawhchante kengin mi tam tak an lo awm t̃euh mai a, Lons chhung a Busawnnchhawra khua lo chuangvete chuan keini tlangmi zawng chu chhuak turin min nawr chhen mai a. Lawng a thawkte leh mi t̃henkhatte chuan, “Chhuak miah suh u, in chhuah chuan in thi vek ang, hmanni a Chakma hovin an khua a sangha mantu mi panga an thahte phuba lâk nan tlangmi an thah theih apiang thah an tum a ni,” an ti a. Lons chhunga Busawnnchhawra khua lo awmte chuan lohtheihloh in min nawr chhuak ta a. Lui kam a mipui thinrim inhrosa kan han hmuh chuan ka t̃hiante chu an hlau em em mai a, ka fapa pawh chuan a hlau ve mai ang tih ka hlauh a vanging, ka fapa hnenah chuan, “Aval, hlau reng reng suh, keini chu

Lalpa rawngbawltu kan ni a, a rawng kan bawlna Field-ah a nih loh chuan mi kut tuarin kan thi lovang, Lalpa ram tan a tangkai tur lo chuan Lalpa'n kan thih a phal lo a nia, heng ho inhrosa hi chu Pathian tan chuan saipui hma a fanghmir inhrosa ang lek an ni, an hlauhawm lo lutuk tlat, bâkah thi hman pawh kan la ni hlei nem,” ti in ka thlamuan mawlh mawlh a. Chu chu ka rilru tak pawh a ni.

Kan chhukna chu thing zaina awmna hmun a ni a, kan chhuak chiah chu chuta thing zai tum Bangladesh Army pahnihi an lo awm a, chumite chuan min vengin Lons a chuan tir leh min tum a, mahse vai mipui thinrim chuan Lons chu a kal lo a nih chuan tihchhiatah an vau a vengin Lons pawh chu duhlo chung chung chuan a her liam ve mai a ngai a. Mahse, Army pahnihi chuan an hnunga dahin an kut an phar ve ve a, pakhat zawk chuan Warless a keng a, Vai ho thinrim chuan min khawih luih talh an tum a vengin Army pakhat zawk chuan an Camp a Army dangte chu a kova, rei lovah Army sawm leh pasarih silai tha pui pui keng chu an lo thleng a, chungte chuan min din hual ta lat a.

Busawnnchhawra khaw lam pan chuan min chhohpui a, an khua a Board gad-ah chuan min din khawm tir a, chhak deuh feah chuan silai nen chuan min veng a, Board remchangah Horina lamah chuan min chhohpui leh ta a, Horina ah chuan Vai Hotel-ah min riah tir a, zankhua in min veng bawka a, a tukah ke a kalna kawngah kan kal a, Chakma khua a kan riah hnu in him takin Rangamati chu kan thleng leh ta a ni.

Busawnnchhawra khua ho chuan an khua a min thah chu an duh loh a vengin an khaw thlang lam, an khua atang a 1 km vel a hlaah Lons chu an lo din tir hi a lo ni a, taltum, chem leh hmanraw chi hrang hrang nen lui kam a awmte chu an lo inhrosa nasa em em tawh a, mahse an rin loh takin chutah chuan Lalpa'n min chhanhim turin Bangladesh Army mi pahnihi a lo dah diam in ralthum tha tak tak keng mi sawm leh pasarih lai a rawn tirh belh leh bawka a vengin Busawnnchhawra khua amite, tlangmite thisen chak a tui hal huam huamte lak a tang chuan Lalpa'n min chhanhim ta a ni. Ka nunna hi tu kutah mah awm lovin ka Lalpa leh ka Pathian, ka Pa van a mi kutah chauh a awm a vengin hlauhna lo thleng thut mahse ka chiaive lo a ni. Lalpa ka Pathian chu fakina awm kumkhua rawh se.

## BUNG 16

### MIRIA-TE KHAWVEL



Tunah chuan Miria-te khawvelah lo lut dawn tawh ila: Kan unau Miria-te hi keini Mizo, Bawm leh Pang-te chuan ‘Miria’ kan ti a, Vai (Bengoli) chuan ‘Murung’ kan ti a, Mawk ho chuan ‘Mrow’ an ti a, Sap chuan ‘Mru’ an ti a, Burma Arakanese chuan ‘Miu’ an ti a, anmahni Mire hnam te chuan hnam dang zing a an hnam hming an ziaak dan chu ‘Mro/Mru’ ti in an ziaak thung.

Anmahni Miria leh Miria-ah chuan Maruchah (Mruchowh ti a ziaak pawh an awm) ti in an insawi thin. “Maruchah” tih awmzia chu ‘Mihring fa’ tihna a ni a, ‘Maru’ tih chu ‘Mihring’ tihna a ni a, ‘Chah’ tih chu ‘Fa/tě’ tihna a ni. Mahse ‘Maruchah’ tih chu, “Mihring fa” tihna ni mai lovin anmahni hnam bik sawina a ni. Entirnan: Mizo hi; Mi = Mihring. Zo = hmun sang/tlangsang hmun vawt sawina a nih lai in tlang ram a cheng hnam dang. Entirnan-Butan, Nepal leh tlangram a mi zawng zawngte hi Mizo kan ti lova, anmahni pawhin Mizo an inti bawh hek lo. Chutiang chiah chuan Mihringfa zang zawng hi Miria an ni lova, Maruchah chu hnam hlawm khat, anmahni hnam bik insawina a ni.

Miria te pawh hi hmanlai chuan Burma-ah an lo awm tawh thin a, tunah pawh Burma Arakan State chhung Akyab District-ah thahnem tak an la awm bawh a ni. Anmahni chuan Burma a an awm hma hian khawi hmunah nge an awm a, khawi hmun atangin nge Burma-ah chuan an lo awm tih an sawi thei tawh lo a ni. Historian thenkhat chuan Miria te hi Mongolian thlah ni in an sawi.

Burma Paltwabial, tunhma a Northern Arakan an tihah chuan kum 1901 vel khan mi 2500 vel an lo awm tawh a ni. Hetih lai hian Kolodine lui fintu Mi lui kam velah an cheng ber a, Bangladesh

Chittagong Hill Tract-ah pawh kum 1901 chhiarpui khan 10,540 lai an lo awm tawh a ni. Hmanlai a Arakan Hill Tract ti a an sawi thin; tun a Paletwa bial velah pawh khian an lo cheng tawh thin a, mahse, chuta tang chuan Khumi hnam te'n an nawr chhuak ni in an sawi.

Mr Hodgson-a chuan Khumi, khiang leh Miria (Miu) te hi Chittagong Hill Tracts luah hmasatu te ni in a ring. Kan unau Miria-te hi keini Mizo-te ai chuan an lo thlangtla hmasa fe zawk ni in a lang; Pu B.Lalthangliana'n India, Burma leh Bangladesh a Mizo-te chanchin a ziakna pheh 214-na a a sawi dan chuan, "Kum 1650 – 1700 vel khan Mizo ho te'n Mizoram hi an rawn luah deuh vek tawh a, tlem a zawng chauh Lusei zing a Hualngo-te chu Chin State-ah an la chambang a ni," a ti. Kan unau Miria te'n Bangladesh Chittagong Hill Tracts an rawn thlen thlak hun Bangladesh Sorkar Magazine Pakhik Palabodol 1997 September ni 7 a chhuak, pheh 29-na in a tarlan dan chuan kum 1418 daih tawh kha a ni.

Mizo upate chuan, "Mizo-te Burma a tang a kan thlang tlak khan tum khatah a ruala kal vek theih a nih loh a vangin chhuak hmasa leh chhuak hnuhnungte kan awm a, chhuak hnuhnung turte chuan chhuak hmasa turte hnenah ti hian thu an chah a, 'Nakin a in hnung zui a thlang kan rawn tlak ve hunah in hnu rawn chhui a awlsam nan in kalna a piangah sulhnu in lo hnuchhiah zel dawn nia,' ti in thu an chah a.

Thlangtla hmasa te chuan an thu inchah ang chuan an kalna a piangah thingpil thelin sulhnu an lo hnuchhiah zel a, chu an thing thelah chuan Muk thing hi an lo thel a, Muk thing chu hnai nei a ni a, thel a tang a rei vak lovah an thelna hnuhma chu rei tak thel tawhna ang maiin a dum vek mai a. Tichuan thlangtla hnuhnung zawkte chuan an unau thlangtla hmasate sulhnu chu chhui zelin thlang an tla ve ta a.

An unau thlangtla hmasate Muk thing thel an han hmuh chuan a lo dum vek tawh si a, an unau thlangtla hmasate chu an thleng hla hle tawh tura an ngaih a vangin an duhna lam lamah an kal ta a. Unau za pawh chu awmtlang thei tawh lovin an inbo zo ta a. Athen Mizoram-

ah, åthen in Mizoram kal pelin India ramah, åthen Burma leh Bangladesh-ah te kan lo awm darh ta a ni,” an ti.

Kan pi pu-te chuan kan unau thlang lo tla hmasa a Muk thing lo theltu te chu aeng hnam ber nge tih an sawi silova, keini thangharte hian, ‘Atu a te hian nge Muk thing chu lo thel ang?’ tih hi kan in rinsiak angai ta a ni. Ka zawh theih chinte ka han zawh kual ngial leh Mizo History bu hrang hrang ka chhiar hnu pawhin kan unau thlang lo tla hmasa a Muk thing lo theltute chu ka hrechhuak thei lova, Pu Malsawma Kawlni in Zofate chenna chin map a siamah chuan, “Kan unau thlangtla hmasa a Muk thing lo theltu te chu Sian ho ni in a lang,” ati a. A ni pawhin, “An ni” a ti chiah bik lo a ni.

Kan unau thlangtla hmasa a Muk thing lo theltu te chu Sian ho chu an ni thei lo, a chhan chu Burma-ah Sian State chu Burma ram chhak lam Chiana nen a an inrina lam a awm a ni a, an State pawh hi a zim chhe lo khawp mai District 52 lai a awm baw. Mire History ka chhuina leh Mire upate ka kawmna a ̊angin kan unau thlangtla hmasa a Muk thing theltu te chu Miriate hi an ni tih ka hre thei a ni.

Bung hmasa lam a kan sawi tawh ang khan, kan unau Miriate zinga rawng ka bawl ̊antirh khan Miria te hi hnam dang nun dan leh tihdan lâk a, zir hi an harsat hle a ni tih ka hriat avangin ka theih ang ang chuan anmahni ang a awm hram hram hi ka tum a, chu bâkah Mizo hnathlak an ni ve a ni tih hi hriat tir ngei ka tum baw a, Mizo te nen kan mizia pawh a inan na lai a tam khawp mai. Mizo nihna åang nilova Maruchah (Miria) nihna åang a an zinga rawngbawl chu ka tih ngei ngei ngai ni in ka hria a ni.

Mizo leh Miria te hi hnam inunau kan nih zia hrilhfiah nan kan mize inan-na laite, kan ̊awng inan na laite, kan khawsak phung inanna lai leh kum tam tak liam ta a Burma åang a thlang kan lo tlak dan te, Chhinlung chhuak an nih ve zia leh an ni Mire hnamah chuan ‘Simlung’ hnam an awm lehngal a, Mizo hlaphuahtu in, “Kawngres PC Unian a lem chuang lo, Chhinlung chhuak Zofate kan ni,” tih hlate sak sak in thlang kan tlak lai a, thlangtla hmasa te’n Muk thing an lo thel a vanga inbo ta kan nih thute ka han sawi chuan ngaihnaawm an ti thei hle ̊hin a.

Pu Malsawma Kawlni in, Mizo fa te chenna chin map asiam chu ka thusawi ti Chiangtu a tan ka entir zel bawk a; a ɽangkai khawp mai. Mahse, kan awmna hi rambuai a nih a vangin ka kawl reng ngam ta lova, ui chung chungin kan kawmthlang kawrah ka paih ta a ni. He map hlu tak mai hi ahunlai a Mizoram a fiamthu thiam hmingthang Lalbiakzuala Hauhnar min pek a ni. Chutia a thu leh hla leh map te nen a Miria te leh Mizo te chu hnam inunau kan nih zia ka han sawi chuan ngaihnawm ti em em hian an lo ngaithla ɽhin a. Chutia kan hnam History leh Zofa te kan thlangtlak dante ka han sawi a Muk thing thel thu ka han sawi chuan ngaihnawm ti tak leh ngawi renga ka thu sawi an ngaihthlak lai chuan ben har zawk ang mai hian an lo inrawlh thuai a, an thlangtlak dan leh Muk thing theltu an nih dante chu phur fahran hian an lo sawi ve var a.

An sawi dan chuan, “Burma a ɽanga kan thlangtlak dawn in (An thlangtlak ɽanna chiah hi an sawi thei tawh lova) keini Mire hnam hi thlangtla hmasa ber kan ni a, kan unau, kan hnunga thlang rawn tla ve turte chuan, ‘In hnu rawn chhui zelin nakinah hmun khatah kan awm ho leh a nga, in kalna kan hriat theih nan in kalna a piangah sulhnu lo hnuchhiah zel ula, ram ɽha, awmna a tana hmun ɽha in thlen hunah kan rawn thlen ve huna in sa a kan buai a ngaih loh nan in min lo sak kep dawn nia,’ an ti a.

Kan unaute thu min chah ang chuan thlang kan tlakna kawngah chuan thing pil te thelin sulhnu kan nei zel a, kan thing thelah chuan Muk thing hi kan lo thel palh a, Muk thing chu thel a ɽanga rei vak lovah a dum nghal vek a vangin kan unau thlangtla hnahnungte chuan kan Muk thing thel, rei tak thelna hnu ang mai a dum vek tawh chu an han hmuh chuan kan thleng hla lutuk tawh tura an ngaih a vangin kawng dang lamah min pen bo san ta vek a ni ang, tun thleng hian min rawn fin thei tawh lo a ni.

Mahse, kan thlahtute a ɽanga thuchah a nih a vangin in erawh chu kan la sak kêp reng a, chu chu ‘In zawm (kim tawm)’ kan ti a, chu in zawm chu kan in nen a inzawm in kan sa a, tap pawh kan siam a, tunhma chuan luah lohvin kan dah renga, tunah erawh chuan kan unau te’n min rawn fin theih tak loh a vangin kan luah ve tawh a, chaw eina hmun, inkawm khawmna hmun leh mikhual riahna

hmunah kan hmanh tawh a ni. Mizo te chu kan unau thlangtla hnunung, Muk thing kan thel a vanga peng bota, in kan lo sak kepte ngei chu in lo nih chu,” an ti a ni.

Mire in

Keini Mizo-te ai chuan kan unau Miria-te hi an haihawt lo zawk a ni maithei, thil chhût ngai chi ni lovin thu inchah hriat reng theihna lamah chuan kan tluk lo ni in a lang, a chhan chu keini Mizo te chuan in min lo sak kêp tura thu kan inchah kan hriat ve tawh loh a vangin. An ni chuan an thlangtlak tirha thlangtla hnunung zawk te’n an tana in lo sak kep tura an thu lo chah chu vawng rengin tun thleng hian in an la sak kêp reng a, chu chu a ni ‘In zawm’ (Kim tawm) an tih chu.



Unau kum rei tak inhmu tawh lo leh inhre tawh lo in Miria leh Lusei te chu kan han inhmu chuan kan lo inhai nasa hle tawh hi a lo ni a, kan khawsakna ram leh tlang a lo dangin kan boruak hip a lo inang lo nasa tawh mai si a, kan tawng pawh a lo dang nual tawh bawknen; mahse unau pianghmun, chhul khat chhuak pawh kan awmna ram leh hmun, kum za tam a lo dang tawh a nih chuan chutiang a khawsak phung, tawng, mizia leh nun phung dan leh hrai nasa taka a lo danglam pawh chu awm lo a ni hran lo reng a ni.

Chutia Miria leh keini Lusei (Mizo) te chu unau, chhul khat chhuak kan ni tih kan han inhriat meuh chuan kan hlim tlangin kan inbiak dante chu a lo danglam in inkungkaihna thuk tak, tuma phelh leh rual loh hmangaihna a phuar belhbawmin kan lo awm ta, a va ropui in a va lawmawm tak em.


Kan unau Miria te hi Bangladesh Chittagong Hill Tracts phai ram hmun tha chin thlengin an lo inzâr pharh a. Mahse, tunah chuan vai hovin tlang ram lamah an nawr chhuak leh deuh vek tawh a ni. Mire rama ka zuk thlen thlak hlim khan Alikodom phai lamah mi engemaw zat chu an lo la awm a, mahse chung an awmna hmun tha te chu tunah chuan vai hovin an luah zo deuhthaw tawh a ni.



## Miria te Mizia leh nunphung

Miria te hi Juda-te ang a dan ngaina tak an ni a, nupui pasal an inneih laite hian a khirh thei ang berin dan an siam emaw tihturin dante hi an tikhirh thei hle mai a. Upate pawh an dan hriat leh an dan hman pawh ainang vek lova, an inneih lai a an dan hman chu hmeichhe lam upate dan hriat hi an hmang tlangpui thin. An lo neih, in sak dan, khaw siam chungchang, inthawina leh ruai buatsaih leh kawng hrawng hrangah dan a tam em em mai a. Mire tlangval sam zial tur

Mahse, Miria te hi dan ngaina viau e tilo chuan zalenna hi an ngaipawimawh leh hle lawi bawk si a. Chaw ei laite hian an kut in mi hma a mi pawh nise an duhzawng sahrang leh chawhmeh chu kuta zena hmeta dapin an duh duh chu la nalh nalh mahse an tan chuan thil mawi lo a ni hran lo. Naupang pawh; ‘mitin mahni thu thu a awm tur,’ ti ang hrim in nu leh pa leh aia upate khuahkhirhna hnuaiah an awm lo ni hian a hriat a, ruai siamna leh huau huaunahte an kal duh leh duh loh chu naupangte pawh ni se anmahni thu thu a ni mai a.



Naupang puaklai te pawh zial an zu khu hlat hlat ka hmu fo thin. Aia upate pawh an hming pumin an ko mai thin a, Pastor Chownglowk kum sawmsarih chuang fe tawh pawh naupang te te pawhin Chownglowk, ti in an ko mai thin. Naupangte, (anmahni fate pawh) tirh an har em em a, han tir ila, “Ka peih lo,” an tih tawh chuan an nu leh pa leh aia upa pawhin tihngaihna vak an hre tawh chuang lo.

Sa hi an ngaina em em mai a, an hnathawk kal tur emaw, an hnathawk lai pawh ni se, sa kâp emaw, awk emaw an awm a nih chuan an hnathawk lai thulh thakin sa chan tur chuan chem. kengin an thawk chhuak chiam mai thin. Sa a nih tawh phawt chuan a te emaw, a lian emaw, sa hrisel emaw, hrisel lo emaw, a ma thi pawh ni se ei loh an nei meuh lo amani tih turin an sa ei loh chu a tlem khawp mai, an hnam bikin an ei serh (ei thiang lo) sa te a nih ngawt loh chuan.

Nula leh tlangvalte hi an zalen hle a, ruai leh huau huau hi an lawm hle bawh kan tih tawh kha. Khaw dangah pawh ni se, eng hunah pawh huau huau awmnaah chuan an kal mai thin. Nu leh pa te pawh in khap an tum chuang lem lo.

Mire naupang mei zu lai

Ṭawng zamawh buru pui pui sawi pawh hi a hmei a pa in an uar em em a, an inkoh dan pawh zahmawh ngialngan tak tak leh hming ni a mawi lo tak taka inkoh an ching khawp mai. Ran êk, entirnan; uiek, sanghar êk, pangang, leh zawng chhu, tite a inkoh pawh an ching hle bawh. An nun danah hian ‘hmasawn tumna an nei miah lo amani chu aw’ tih mai tur hian a tu a te pawh hian hmasawna lam kawng an zawh lo em em a, midang nun changkang zawkte han zir tumna pawh an nei lo amani chu tih mai turin nun dan tha leh changkang an zir duh lo em em a ni. Bawhlhlawh leh ṭawp an ngaithei hle bawh. Inbual erawh an peih khawp mai, an inbual uluk lo mai pawh a.



An nun dan hi kawng engkimah hian an inthlahdah em em vek ni mai hian a hriat a, thianghlimna leh inchhungkhur khawsak vawn fel, khaw chhung leh tuikhur tih thianghlimna lamah pawh zirtir an harsa em em a ni, kan zirtir tam ve tawh viau nain tun thleng hian êkin nei sawi tham an la awm meuh lo. Mire hnam anga inthlahdah leh hmasawn tum lo hnam hi hnam dang zingah hian an awm ve angem aw tih mai a awl thin khawp mai. Hei vang hian Mire hnam zinga Kristiante pawhin taksa leh thglarau lamah hma an sawn theih loh phah in Kristian lo te tan anmahni hnam Kristian te a tanga zir tur an hmuh loh a vangin Kristian pawh kan punchak loh phah ni in ka hre thin. Mahse, tun hnai a tanguin tlem tlemin Kristian te chu Kristian lote ai chuan thianghlina lamah hma an sawn ve deuh tawh.

Mire hnamte hi hnam huaisen tak an nilova, an inhlau tawn thum emaw tih mai tur a ni. An khaw hotu Kharbari te pawh hi khawchhung rorelnaah an tangukai tur angin an tangukai thin lo hle a. An intihthiam lohte pawh hian han inhnial vek emaw, insual emaw ai chuan a ruka indawi emaw, tura inhrai emaw an ching zawk thin a

ni. An lo leh huan thlaite pawh an indawi chhiat sak fo thin bawk. Thil tih tur emaw, thu tha han hrilh hian “aw, ni e,” han tih mai hi chu an awlsam em em a, an tihpuitlin loh pawhin pawl ti awm pawhin an lang lem lo.

Khaw khatah in tlem te te a awm an nih a vang tepawh a ni mahna; inlungual an thiam lo em em mai a, a lian a tanga a te ber thlengin mitin mahni thu thu in an awm theuh emaw tih mai tur an ni. An hnam nunah hian inngaihdamna hi a awm meuh lo, thil an tihsual palh emawte hian pawisa chawi tir emaw vawk chhun (Chawi) tir emaw a ni deuh zel thin. Ramhuai hi an hlau em em bawk.

Kawng hi an ngaipawimawh lo hle mai a, thenkhat chuan vantlang kalkawngah tak thlam te an sa a, chutianga kal tlang tur chuan an thlam luhkapui lawn phawt a, chuta tanga thing pum te tak te a rahbi an tuk ve hlek chu zawh thlak leh a ngai a, a thlanglamah chuan a sang thei si a, buaithlak thei tak a ni. Khawchhungah pawh thenkhat chuan vantlang kalkawngah tak in an sa a, an luhkapui (Luhkapuiah hian zanah chuan an zung mai thin a, naupangte chu an e bawk thin) hnuailahmah te kal a ngai thin. An luhkapui lah chu bawhhlawh tinreng an paihna a ni si a, a kal a hreawm thei thin khawp mai. Khaw kâr kawng pawh an lo neihna a danglam angin kumtin deuhthaw hian khaw karkawng thenkhat chu a danglam thin a, an lo neihna lamah khualzin kawng pawh an siam chawp mai thin. Khaw thenkhat khaw kawng chu, “Nikum/hman kumah ka kal tawh a an khaw kawng chu ka hria a lawm,” tih ngawt theih pawh a ni thin lo.

Mire nu in a fa chaw a fah lai

**Hmeichhia te dinhmun :** An mipate an zalen em em laiin an hmeichhiate thung chu an zalen lo hle mai a, chhuatthlang a mipate thutna a thut ve chu sawi loh; mipa thute hmaah pawh an va kal pawh thianga lo ang hial a ni. Tuikhur a an pawnfen an suk pawhin an pawnfen chu em chhungah an phur ngai lova, an em phurhna hnam leh em karah chuan an zep a, tichuan an phur haw a, an pawnfen suk chu an zâr pawhin



ualau takah an zâr ve tur a nilova, dithlifarfem hulhliapah a zârna an siam a, chutah chuan an zâr mai thin. An pasalte pa leh an pasal te u thutna hma, hnai deuhah an kal tur a nilo.

Mire nu tui chawi lai

Pasal nei tawhte chu zing varțianah an thova, tui an chawi a, tuichawi an rawn haw hnu chuan eirawng an bawl a, eirawngbawl an peih hnu chuan an chhungkua in chaw an ei a, ramțang chin tawh chu an feh leh nghal thin. Miriate hi an feh chhuak hi an zing thei hle a. an feh haw erawh chu an tlai thin hle tung. Nu then khatin min hrih dan chuan, “Kan khawlai a ui êk leh vawk êk te hi kan hmu ngai meuh thin lo,” an ti.



Mire nu in an puanpui athui zawm lai

An lo feh an rawn haw chuan mipate chu an inbual a, chaw an ei a, thiante nen inkawm in in dangahte an leng thin. Hmeichhiate vethung chu an feh haw chu hah hle mahse an êm an nghat a, buh an deng nghal a, chhung rual deuh phei chu an buh den tur a tam si a, an buh den chu bati eng hnuaiah an thlei leh nghal vek bawk a, chutia an buh den an thlei leh vek hnu chuan an inbual a, chaw an ei ve chauh thin. Chaw an ei kham chuan an mut hma chu la an kâi leh thin.



Miria ten ruai an theh lai

Hmeichhiate chu chaw an ei chuan an khup pahnih a thingthi in an kut vei lam chuan in nem khalhin hnungzang zawl dawrhin chaw an ei tlangpui. Naupawmte chu an thuthluang mai thin. Hetiang a hmeichhia in chaw an eichhan chu an pawnfen a tawi em a vangin thutlan palh an hlauh vang ni berin a lang. Mipa te erawh chu thutungin chaw an ei tlangpui. Hnathawh an hah bawk a, a hmei a pa in an chaw lak a tha thei hle a, hmeichhiate chu chaw an kâ a khat tûlh chung a țawng tuam tuam an ching hle bawk. Lalpa'n a venga, an chaw lâk a tha thin bawk a, an taksa a tha in an hrisel viau tho a



ni. In inhnaih te te an ni a, an hmeichhiate chu han inlènna hun pawh a awm lo a ni bawh a, an eirawngbawl lai hian in dang leh in dang a tanga inbiak hi an ching viau bawh. Mire hmeichhia buh deng lai

Miriate hian mikhual chaw ei koh hi an ching hle a, mikhual chaw ei a an sawm hian buh balah malsawm dawnaah an ngai a, chawhmeh nei lo hle mahse hmarhcha rawt nen chauh pawh mikhualte chu chaw ei an sawm tho thin a, rawngbawla kan kal vel changte hian tuk khatah vawi sawm ai tam chaw kan ei chang a awm thin. Chaw hmeh a lo that chang pheih chuan ei tlem a har thin si a, kan puar lutuk hi nileng a, pum zut a mut hle hle mai awl tak a ni. Tin, mikhual chaw ei a an koh hian mikhualte chu an mahni chhungkaw ei hma in an ei hmasak tir thin. Mire rawlthar



Ho viau mahse kan nun dan inan lohna tihlanna pakhat a tan; hmeichhiate chu ding chungin an zung thin a, mipa te erawh thu chungin an zung ve thung tlat. An pianphung, pumrua leh vun rawngah chuan keni Mizo-te nen kan inang hle a, atlangpui in an mitko a chhah deuh in an mit hmul a tam deuh tlangpui. Hnam hmelchhe tak an nilova, tun ai hi chuan han changkang deuh sela chuan hmeltha tak tak pawh an awm ve nual ngei ang.



#### Mire infiamna Taket (Insuk paih)

Infiamna (games) an uar vak lova, an hunpui (Festival) nikhua a Mizo in, “Insuk nawr” kan tih ang deuh khan, “Taket” an ti a, suk in emaw, mau in emaw intihtluk/inthehtluk an tum thin, chuta chakte chu an hming a thang ve hle thin. Hei bâk hi chu infiamna mumal tak an nei meuh lo. Tunlaiah chuan hnam dang a tanga an zir, hmun dang a sikul kal te’n an rawn chin chhuah infiamna an nei ve nual tawh. An se chhun, bawng chhun nikhua hian hla hmanga inhnial/inel an ching hle a, achak zawk chu an hming athang ve hle thin.



## An thil chin ṭha te :

1. **Mikhual chaw ei sawm** : Hei hi chu kan sawi tawh a vingin sawi zau tawh lo mai ila.
2. **Damlo zual menpui** : Miria te pawh hi Mizo te ang bawh a khaw khat a dam lo zual an awm chuan an inngaihsak a ni tihlan nan inlenpui an uar hle a, tlaivar a ngaih chuan an tlaivar pui bawh ṭhin. An titha khawp mai.
3. **Khawhar in riahpui** : Khawhar in riahpui hi an uar ve hle a, mahse Mizo te angin riahpui chin tur bithliah a awm lem lova, nula leh tlangval te'n an riahpui ṭhin.
4. **Tuithawl chhin** : Miriate hian tuikhur a tui an chawiin tuithawlin tui an chawi ṭhin a, an tuithawl kâ chu changel hnah khawrin an chhin thlap ṭhin a, thuithawl a bawlhhlawh tla tur a veng a, a ṭha khawp mai.
5. **An tel inpek** : Mizote ang bawkin ṭhenawm khawvengte chu chawhmeh, antui an insuah in anhnah/chawhmeh an inpe in inngamtlak takin an inban tawn ṭhin.
6. **Chhungkhat inngaihven** : Miria te hi chhungkhat leh chi lehkuang inngaihven kawngah hian an fakawm hle a, khawi lo vah chhuahna-ah te pawh ni se hmelhriat loh an biak dawnin an tu, makpa, mo, fa, unau, ṭhian etc...tur nge an nih an inzawt hmasa in chuta ṭang chuan koh dan tur pawh an inhre mai ṭhin. Chhungkhat an in tlawh ṭhin dan chu bung dangah kan la ziaak leh ang.
7. **Inkungkaihna ngaihpawimawh** : Miriate hian inkungkaihna hi an ngaipawimawh em em a, vawn nun reng an tum ṭhin. An nun aṭang hian keini tunlai chhan a Mizo te hian zir tur kan ngah hle in ka hria. Bung dangah an inkungkaihna nghet turin enge an tih kan la chhiar zel ang.
8. **Ruai siam nikhuaah an tangrual** : Mi in ruai a siam dawn chuan fatu tur leh che vel tur a ruat kher a ngai lova, khaw chhungmi te chuan tuma hrilh ngai miah lovin an tihtur ṭheuh chu tlin takin an ti suau suau mai a, an entawn tlak takzet a ni.
9. **Mo in a pasal nu leh pa te a zah thiam** : Mo in a pasal nu leh pate a zah thiam em a vingin in khatah mo 4/5 te an awm dual



dual a, mo an ngah leh an in chu an sakzawm tam a ni mai a, an pasal nu leh pa te hi thenkhat chuan ahran in chaw ei an siam sakin an kutte hial pawh mo thenkhat chuan an sialsak thin. Mo thenkhat chu pasal nu leh pate tan a tawrhhlelhawm tak takte pawh an awm ve bawk.

10. **Ruk ruk a awm meuh lo** : Mire khuaah chuan thil bo sawi tur a awm ngai meuh lo, rukru te an lo awm a nih chuan khua a tanging an hnawtchhuak hmiah zel thin a, chuvangin Mire khua-ah chuan ruk ruk a awm meuh lo.

11. **Inbual an peih** : Bangladesh hi ram lum a ni bawk a, Miria te hian inbual an peih em em a, thenkhatte chu nikhatah vawi thumte an inbual thin. An inbual hian a hmei a pa in tuikhurah leh hnathawhna hmunah pawh ni se saruak vekin an inbual thin a, sahbawn an hmang ngai meuh lo, an inbual dawn chauh emaw tih lai in an khel an beng thawk a, a inbual zo der thin, inbual an sam khawp mai. Tunlai ah chuan sahbawn an hmang ve tawh.

12. **Pakkitun** : An ruai siam reng rengin ruaitheh hma chiahin khua a upate chu vawk thithun leh zu an pe hmasa ziah thin a, hei hi upate zahna tih lanna a ni. Vawk thithun-ah hian vawk thi bâkah sawhthing, aieng, chi, hmarhcha leh sa thenkhat an thun tel thin a, a tui thei thin khawp mai.

13. **Awî u pa** : Nu leh Pa te chawimawina hi atheite chuan ruai ropui takin an siam thin a, bawng leh vawk leh ran dangte pawh an talh nual thin bawk. Chutih lai chuan an Nu leh Pa te chaw an ei dawn chuan an kut an sil sak a, a nu leh pa chawimawitu chuan a nu leh pa chu an puanpui thar phah chungah an thut tir a, a nu chu puan thar a sin tir ang a, a pa chu diarvar thar tawng sarih a khim tir bawk ang a, “Ka Nu, ka Pa, ka sèn tek atanging min enkawl a, ka dam lohin min enkawlin ka zun ka êk in thian vek a, min enkawl na leh min hmangaihna hi ka rul seng lo che a, hei hi ka lawm thu sawina-ah min pawm sak dawn nia etc...” ti in sa leh buhchangrum in puar tak in a nu leh a pa chu a hrai thin.

Heng ka han tarlan bâkah pawh hian an dan tha leh thil chin dan tha tak tak tam tak a la awm a, kan ziaak lang vek seng lovang a, bung dang kan chhiar zelna atangte pawhin kan hre thei bawk ang.



## Mire hnam a mi lâz zualte leh an lâz chhante :

1. **Menleh** : Menleh hi Mire sakhua ‘Krama’ hmuchhuaktu a ni a, Mire Hawrawp (Alphabet) pawh a siam chhuak baw. Krama sakhaw betu te chuan pathian ang hial in an inah a lem te târin a lem chu pathian biak in an be thin. A chanchin kimchang zawk in Krama sakhaw chanchin ziaakna ah a awm.

2. **Menrüm Deng** : A ni hi unaupa a ka neih a ni a, Computer program lam a mi thiam tak a ni a, a chhe siam pawh a thiam baw. Ka Leptop achhiat leh a buai chang pawhin a ni hian min siamsak ziah thin a, a part thlak angaih changte hian a ma pawisa sengin min thlak sak thin. Krama sakhaw tichhuaktu Menleh-a’n Mire hawrawp (Alphabet) asiam pawh Computer ah fonts pawh a man siam a ni a.



Aram leh a hnam hi a vei em em a, Malumghat America Baptist Mission hnuaiyah Pathian rawngbawlna lam leh Computer chhe siam leh thil dang dang thawkin a awm a, mahse aduh anga sap hovin an hnam zinga rawngbawlna an kalpui theih loh a vangin chu a hna chu a bansan a. Chumi hnu chuan Computer dawr te siamin hun a hmang leh a, “Keini Mire hnam hi heti ringawt a kan awm chuan vai ho in kan hmun leh ramte min lak sak zel si a, bâkah kan hnam nunphung reng reng hi a chhe lutuk a, kan hnam hruaitu (Leader’s) te lah hian mahni tanghma bâk an ngaihtuah baw si lova, Politics hmang pawhin kan hnam hi siamthat theih a ni lo, tharum hmang chauh lo chuan, ka thusawi lah hi kan hnam Leader te, atu a mah hian min bengkhawn duh si lova, kan ram tan ka thih hmasak phawt a ngai a ni,” ti in an hnam a vei zia min hrilh thin a, kei chuan, “I thil tum chu a tha maithei, mahse a la hun rih lo....” Ti a ka hrilhfiyah chiam pawh in an hman chhe lutuk tawh a veina chuan a tur chhuak ta nge nge a.





Kum 2010 chuan mi tlemte nen an ram leh hnam tan an rammu ta nge nge a, Unifrom leh ralthuamte pawh khawi khawi a t̄angin nge an neih ka hriatpui ve lo na in an changtlung chak hle mai a, a pawlte pawh an tam ve zel bawk a. Achang changin phone hmangin min rawn be t̄hin a, min biak loh chuan kei chuan ka be ve thei lo.

Ka unaupa Menr̄um leh a naute ch̄t̄tlatna Thanchhi leh Alikodom lamah chuan heng; ruk ruk, pawisa khelh zu ruih, suamhmang rual ch̄t̄tlat t̄hin leh Opiam ruihte chu an rikrapna a vangin a awmtawh meuh lova, Thanchi lam a kan Evangelist te pawhin an awmna lam a mite an fel tawh zia thute min rawn hrilh fo t̄hin. Engtin tin emaw a an sum hmuh a t̄ang hian mirethei fa School kalna nei lo leh Collage kalna neilo naupangte an t̄anpui t̄hin bawk a, anmahni a vanga School leh Collage kal theih phah naupang engemaw zat an awm phah a ni.

Menr̄um chuan an hnam dana, nupui man sang lutuk leh nupui pasal neih a thil t̄ul lova insenso vak vakte leh dan t̄ha lo tak tak atahtawl a tihban zelte an tum a, ralthuam nen a ti an nih a vangin mipuite pawhin hlauhna a vangin an ban ve thei mai a nga, nakinah chuan an hnam tan a thil t̄ha zawk a nih a vangin chutiang dan t̄ha chu mipui te'n an hman chhonzawm zel theih a beisei a ni.



Mahse, Mire hnam a an Leader te hian an haw em em a, an huat em em theihna tur chhan ni a lang chu Menr̄um hian an hnam t̄hanmawhbawk, Leader mahni hmasial tak takte hi dah̄t̄ha tura a la Target an rin tlat vang a ni thei. Chuvangin a tih boral dan hi an zawng reng a.

Menr̄um chu tih boral tumin an phiarru reng a, tichuan a hmangaih leh a vei em em, a chipui, Miriate ngei chu amah that turin a awmna hmunah chuan an va intir a, a ni chuan rinhlelhna nei miah lovin a lo kawm a, chutia an inkawm lai tak chuan chempui in an sat ta vak mai a, Menr̄um chuan a thi dawn tih a inhriat chuan lei t̄hamin Pathian hnenah a t̄awngt̄ai a, a chipui a hmangaih em em Mire hnam tan a nunna hlanin, a chipuite kut ngeiah Mire hnam pasal̄t̄ha chu

kum 2012 April ni 5 khan a fam ta a ni. A ni hi Mire hman tan a Martar awmchhun a la ni. Achipui Miria te hian engtikah tak ngaihsan leh zah nachang la hria ang maw. Ka unaupa Menrüm hian a nupui leh afanu pakhat leh a fapa pakhat, la naupang tak te a kalsan a ni.

**3. Menlung :** A ni hi Burma a Miria a ni a, Krama sakhaw hmuchhuaktu Menleh-a'n Bangladesh chhuahtsan a Burma a a kal khan Menlung hian a zirtirna hi pawm in Krama sakhua chu a zui ve a. Burma a Mire hnam Krama sakhaw zuitu zingah chuan Menleh chuan sakhaw hruaituah a ruat a, Menleh-a a awm tak loh hnu chuan a ni chu Menleh-a aiawhtu hialah an ngai a ni.

Burma a Miria te chu Krama sakhaw zuitu an ni deuh vek bawk a, Menleh-a'n, “Ka kal bo a tanga kum ngana-ah ka rawn let leh ang,” atih a vangin a rawn let leh hun tur awm a an ngaihah chuan Menlung chuan, “Menleh a rawn kal hunah khawvelah indopui a awm dawn a, chutih hunah chuan tarte chu in tlanche thei ve thei lovang, tuna in lo thih hian Menleh-a hnen in thleng nghal a ni mai,” ti in tar engemawzat a that a, chu vang chuan Mire hnam zingah chuan Menlung-a hming hre lo an awm meuh lo a ni. A chanchin hi Krama sakhaw chanchinah ka ziaak lan tho a vangin kimchang tak chuan ziaak rih lo mai ila.

**4. Menleh Saula :** A ni hi Alikodawm lam a awm a ni a, Miria leh Chakma helho inbei lai khan Chakma helhovin a ke an kah hliam saka, chuta tang chuan a ke a bai a, chuta tang chuan “Menleh kebai-a” ti in an ko ta a ni.

A ni hi Miria leh chakma inkah lai khan a huaisen zia hi mite sawifak a ni a, tin Bangladesh Army pawhin Mire bahini (Mire V.D.P) Comander-ah an dah hial nghe nghe a, a chipui Miria te kawng hrang hrangin rambuai lai in a tanpui nasat em a vangin Mire zingah chuan a lâh hle bawk.

**5. Patui Rekchowh :** A ni hi a hun lai chuan pachak hmingthang a ni a, buh tawng ( tawng 1 chu tin hrut vel a ni ang) 12 hi zo takin a phur thei a, abanruh hi pakhat chauh ni in an sawi.

6. **Lawngngan** : A ni hi a pa lian in a chak em em a, a vanglai chuan taket (Insukpaih siak) ah tumah hnehtu an awm lo ni in an sawi.

7. **Ngau** : A ni hi a hunlai chuan suaksual leh fin vervekah a hming a thang hle bawk.

8. **Zaithiam a hmingthangte** : Mire zinga zaithiam kan tihte hian hla ruahtham loh an sa tlangpui a, an hla kalphung hi tahhlachham ang deuh a nih a vangin tawpintai a nei lo emaw tih mai turin an sak peih chen chen a ni mai a, anphuah chawp zel a. Zaithiam han tih hian hla phuah tiam a ni zawkmah. Zaithiam hi chu an awm nual a. **Parau-a, Nguin-a, Kangking-a leh Chamrung-i** te hi a lâr zualte an ni. An hla chanchin chu ‘Thu leh Hla’ ah Chiang zawk a ziaak lan a ni.

9. **Paurung-i, Preamsang Mala/Awksa Paurung** : A ni hi a hunlaiah chuan Mire hnam zinga nula hmeltha a hmingthang a ni. ‘Awksa’ tih hi ahmelthat em a vanga an sawi/kohna hming a ni.

10. **Ruirau-i** : A ni hi ahmelthat mai bâkah a pian a nalhin a fing em em mai bawk a, a ni pawh hi Preamsang hnam bawk a nih a vangin ‘Preamsang Mala’ (Preamsang lanu) an ti bawk. Avanglai chuan a hmelthatna hian Mire ram dung leh vang a fanchhuak hneh hle a ni an ti.


Miria te hi heti tak mai a an nun a hnufual leh an changkang lo em em chung hian an nunah zir tlak leh entwawn tur tha tak tak engemaw zat chu a inphum ve teuh tho mai a, Lalpa ringtu tha tak chu han ni thei phei sela chuan heng an khawsak phung tha lo leh changkang lo tak tak te hi an kalsan ngei ang.

Mire hnam heti zozaiah hian Mire hnam zing a ramdang a tanga tun Generation a Mizo Missionary awm chu mi 2/3 chauh kan ni a, chupawh chu ram hran, Mosolman ram a awm an nih a vangin zalen takin rawng a la bawl theih loh zui a, Bangladesh a Kristian te lah chuan thapui chhuahin an la bei mang bawk si lova, kan sawi tawh angin Bangladesh chhung a Mission thenkhat te chuan sum siam nan chauh emaw an hman tih mai tur a ni bawk si a. Mahse, Miria te thlarau chhanchhuak tur hian Lalpa chakna ringin hmalam panin kan

la bei zel ang. Lalpa'n min pui a nga mi tam tak chu Lalpa hnen kan hruai thlen ngei hi kan beisei tlat a ni.

### **An hnam leh khawtlang inrelbawl dan :**

Mire khua hi kan sawi tawh ang in, khaw lian tak a awm meuh lova, akhaw lian pawl chu in 50/60 emaw chauh an ni thin a, in hnih in thum leh in li in nga in ruk lek lek te pawh an awm bawk.



Atlangpui in khaw khatah hnam khat chauh an awm tlangpui a, chuang chuan anmahni Mire hnam zingah chuan an khaw hming sawi aiah an hnam hming an sawi mai thin, entir nan, “Fanai khua” tihte, hnam khat khaw hrang hrang a lo awm pawh in, hmun hming emaw lui hming emaw an sawi leh mai thin.

Atlangpui in Mizo te angin tlangah an awm tlangpui a, lui kam a awm te pawh an awm ve bawk. Khaw khatah hian hmun rem lai deuhah hian ‘Daingkhaing’ an sa thin a, Daingkhaing chu in a bang neilovin a kangin an sa a, chutah chuan chhunah pa hovin hngang hlai leh tah nante, chawlh hahdam, ti ti nante an hmgang thin.

Mire hnamah hian Miria ni si; nun phung inanglo leh tawng thleng pawh a dang tak tak hnam 8 lai an awm a, chungte chu : 1. **Anawk.** 2. **Sungmow.** 3. **Dopreng.** 4. **Tamsa.** 5. **Rengmitchowh.** 6. **Rengma.** 7. **Dawmrawng.** 8. **Uise** te an ni a. Heng hnam hrang hrang ho zingah hian Anawk ho hi an tam ber a, an tawng pawh a darh zau ber in mithiam pawh an tam deuh ber bawk. Chanchintha pawh an dawng hmasa in Kristian pawh an tam ber a, chuangin Mire Zirtan bu, Bible Hla bu leh lehkhabu zawng zawngah Anawk tawng hi Mire National Language atan ka hmgang ta a ni.

Anawk ho hi Mire tlangpuiah leh Sangha (Songgo ti a lam tur) lui hnar lamahte leh hmun hran hranah an awm. Sungmow ho hi Sangha lui hnar lamah an awm deuh ber. Dopreng, Tamsa, Rengmitchowh, Rengma, Dawmrawng leh Uise te hi Matamuhuri lui kam vel, Marancha hung leh Alikodom lamah an khawsa deuh ber a, Burma ah pawh an awm nual bawk. Heng ho hi an awmna hmun inang

mahse, an khua erawh an mahni hnam hlang deuh zelin an awm a ni. Ran hi an mamawhna a tam em avangin an vulh tam thei hle a, Mizo te angin chuktuak huan neih an uar vak lo. In ban zawn, In sak tan lai leh in chung chih lai chuan an intanpui thin, an inlawm a ni mah mah zawk, anmahni pawhin an insak hunah midang an la mamawh dawn a vang in.

#### Bumang Raja (Circle Chiff)

Khaw khatah hian khaw hotu, roreltu Kharbari an nei zel a, chung kharbarite chuan an khaw chhung a thu buai hla buai a awm chuan a rel thin. Khaw chhunga mi hnawksak chu hnawhchhuah theihna pawh a nei a ni. Kharbari chungah hian ram



thenkhat a thuneitu Headman a awm a, khawchhunga mi te'n an kharbari hnenah chhiah an pe a, Kharbari chuan Headman hnenah a khua a mite chhiah pek chu a pe ve leh a, Headman chuan a chung a roreltu Bumang Raja (Circle Chiff) hnenah a pe ve leh chhawng a, chutiang bawk chuan rorelna-ah pawh Kharmari chuan akhaw chhunga thubuai a rem theih loh chu Headman hnenah a thlen anga, Headman in a la rem thei lo fo a nih chuan Bumangraja (Circle Chiff) hnenah a thlen leh ang. Hnam thil thubuaiah chuan Bumangraja (Circle Chiff) hi a sang ber a ni.

An Headman/hnam hruaitu te hian kan sawi tawh ang khan hnam hmangaihna an nei lo em em vek amani tih mai turin thing leh maute leh lui a lungte thlengin vai ho hnenah an hralh nasa em em a, Kharbari thenkhatte pawhin chutiang bawkin an khaw reserve a thingte pawh vai ho hnenah an hralh thin a, khua a mi te'n tuman an sawisel ngam bawk si lo. An ram chu a chereuh chak khawp mai.

#### **Nula leh Tlangval inrim dan:**

Khawvelah hian hnam hrang hrang hian hnam dan kan nei hrang thlih thliah a, chutiang a kan hnam dân a dan ang zelin kan nula leh tlangvalte inrim dan pawh a dang thei hle bawk. Kan unau Miria te nula leh tlangval inrim dan pawh hi keini Mizo nula tlangval inrim dan nen chuan a danglam khawp mai.

Miriate hian hnam inthliarna an tina hle mai a, chuvang chuan Miria ni lo hnam dang nupui, pasal a nei pawh an tlem rih khawp mai. Anmahni pawh innei thei lo hnam an tam hle a, athen chu nupuih chauh an neih theih, pasal a an neih theih loh hnamte an awm bawk. Achhan chu **Entirnan**: Fanai nula kha Sailo tlangval hnenah pasal nei tase, Sailo-te chuan Fanaite chu an Pu te an lo nih tawh a, chuvang chuan an makpa te lam hmeichhia chuan an pute lam tlangval chu pasalah an nei thiang tawh lo a ni. Fanai leh Sailo hnam te chu an in pu tawn in an in makpa tawn thei lo a ni.

Hei bâkah hian chhechham a thian insiam hnamte, unau a insiam hnamte, hi nupui pasalah an innei thiang lova, mahse ‘Chia mai lek sawi’ an tih, Bawngmei then hmanga chhechham a thian/unau a insiamte chu chhechham a thian an insiamna chu an sut leh thei a, an sut leh a nih chuan an innei leh thei a ni.

#### Mire tlangval nula rim lai

Chhechham a thian leh unai a an insiam hian thian emaw unau emaw chhechhamtu te chu an chipui zawng zawng nen a huam tel vek zel a ni. Chhechham a unau a an insiam hian chhechham a unau/thian a insiamtute chu an thih hnu a kum rei tak a lo vei chuan a thara chhechham a thian/unau a siam leh loh chuan a hma a an chhechhamna khan awmzia a nei tawh lo a ni an ti.




Kan sawi tawh ang khan Miria te hi khaw khatah hnam khat deuh zel an awm a, chung hnam khatte chu inlaichin hnai tak angin an in en vek a, khaw dangah pawh an nu leh pa, pi leh pu te’n chhecham a thian/unau a an siam nupui pasal a an neih theih loh leh an hnampui/farnu te’n pasal an va neihna khua/hnam nupui a neih chu a thian leh bawk siloh a vangin favang awllen lai hian nupui zawng leh nu la rim satliah pawhin nupui a an neih theihthe hnam/khua-ah chuan nula an va rim thin a.

Mire nula tlangval inrim hun hi favang awllen lai a ni a, zanlai a tanga khawvar thleng khaw danga nula rim thin an nih a vangin an nula rimna tur khua chu a hla deuh a nih chuan an khua a tangu tlangvalte chu mi 2-5 te pawh tlai lamah nula rim turin an chhuak thin a, khaw hnai a nih chuan zanahte pawh an chhuak thin baw (Khaw thenkhat hi chu inhnaih te te a ni). An nula rimna tur khua chu an thleng hma a nih chuan nula an va rimna tur khua, tute inah emaw an mu a, zanlaiah nula rim tur chuan an thawk chhuak chauh thin. Pa, fa 2/1 neite pawh nula rim a awm tho baw.

#### Mire nula in a thi thil sa a keng

Khaw khat a nula thanthi nei chin tawh chu mahni inah an riak ngai lova, an khua a in lian deuhahte an riak khawm thin a, zanriah eikhamah an la kaih tur kengin an riah khawmna inah chuan an kal nghal mai thin a, an mut bu chu zo la kaih hraw angreng tak a tah, rit leh thap angreng tak, sei tak tak a an tah, azung chep chat lova pum hlun mai, pathum thui zawm hi a ni a, pakhat an phah a, pakhat an in vurh a, an lukham atan chuan thing bung emaw, raw pum phel phaw emaw an kham thin a, an puan pakhat zar chu 'Tingtung' an ti a, asir hmawr tawpah pakhat an tawn a, a lehlam sir hmawr tawpah an tawn leh a, an mutna zawn theuh a, Thosilen ang a hman turin an zar fur mai a, nula mu tlar ho mut pindan a ang zawkmah.



#### Mire nula

Chu chu thosi lak a an invenna a an inkhuhna tur a ni a, mahse a chhah em a vangin khaw lum lai chuan puan pawh an sin peih lova, an awmna hi a lum em em thin baw si a vangin inkhuh peih a lawi chu an awm lem lova, an puan zar chu ke hlankai phak lek a hniam a nih a vangin thenkhat mutchhe deuh chuan an ke an hlangkai fur thin a, pawnfen tawi leh khawng angreng tak, zo la kaih a tanga tah chhah leh thap tak, fenphel



lehngal nen a mu mai an nih a vangin nula riak khawm zan mulai chu mipa tan chuan a enchi loh thei thin khawp mai.

Chuta nulate riak khawm chu favang awllên lai hian an tlangval te'n an rawn rim thin a, tlangval nula rimte chuan nula riak khawm zinga an duh duh chu an kaithovin an rim thin. Tlangvalin rim tura an kaihthawh nulate chu tho peih lo viau mahse an khaw tlangvalte hmakhawngai in an tho ngei thin, a chhan chu an tho lo a nih chuan an khaw tlangvalte chu anmahni rawn rimtu te khua a nula an va rim ve hunin an nula kaihthawh tumte chu an thawh duh loh ve dawn a vangin a ni.

Achang chuan mikhual tlangvalte chu khawchhung tlangvalte chuan an khaw nulate chu an rimpui ve thin a, chutia mikhual tlangval an khaw nulate an rimpui chuan nula riah khawmna-ah chuan khawchhung tlangvalte chu an lut hmasa a, meite an chhem eng a, chumi hnuin khawchhung tlangvalte chuan an haw san leh mai thin.

#### Mire nula

Hetia tlangvalin nula an rim hian nula leh tlangval then khatte chu an inkuahin an inpawm chial a, thenkhatte chu tlangval kapkalakah nula chu ahnunglam tlangval chhawnin a thu a, tlangval chuan a kuah a, tlangval pakhat hian Rina Plung (Rawchhem) hi a lo tum a,



tlaivar thakin hla a inchoawn reng chungin thim zingah an inrim tlaivar thak thin a, khua a var hnu chuan tlangval chuan nula tui chawite zui in chumi hnu chuan thing phur emaw, hnah la in emaw an inzui chhuak leh thin. Hmanlai ti ila; Mire ram a ka zuk awm tirh a tanga hun rei fe chhung chu an nulate hian pawnfen tawite, fenphel tih loh chu thawmhnaw an inbel meuh lova, mipate lah hrenpereng an hreng tawp a, kawr ha abar pawh an la awm bawk si lova, chutia saruak deuthaw a nula leh tlangvak inkuah chial a hla thu thlum tak taka zan thim zinga tlaivar thaka an han inlem chuan hmeichhiat mipatna lamah pawh chetsual an awlsam hle reng a, an inrimna hmun a hmeichhiat mipatna an hmang thei lo a nih pawhin atuk zinga an thuichawi, thing phurh leh hnah lakna hmunah thenkhat chuan hmeichhiat mipatna an hmang thin.



Sawnpaite pawh an tam reng a, mahse ramhmul damdawi fa tihthlakna pawh rinâi daihin an lo hria in an lo hmang tam a ni. Nula hmeltha deuhthe chu rimtu an neih reng a vangin an meng rim hle thin a, Tlangvalte pawh nula an rim tlaivar thin a vangin chhun a an hnathawhna-ah te chuan an mut a chhuak thei hle thin a, an lovat, thing thlak muthlu a thing kung a tanga tla thla tawp an sawite pawh ka hre thin.

An hunpui Sechhun leh thildangahte pawh hmeichhiat mipatna hi an ngai thupui viau lo amani chu tih mai tur hian hetih hun, favang awllên a an inrim hun lai hi chuan an hmang nasa bik a, mahse an inrim hun lai nilova tlangvalin nula a va rim chuan nula chuan a rimtu tlangval chu, “Nang chu Hawiraw (Anțam) par hun lai i hre ve lo a ni maw,” an lo tih chuan tlangval chu zak takin a chhuah nal nal a ngai tawh thin a ni. (An inrim hunah lo chuan an inrim ngai lo)

Mire nula lam turte

Tlangvalin hetia nula an va rim hi an ngaihzawngte a ni kher lem lova; tin, Mire nula leh tlangvalte nunah hian keini Mizote anga inngaihzawn a keipui sa hauh taka inhauh hi a awm meuh lo. Nula chuan sawn a lo pai a nih chuan a



fapai chu an nu leh pa te in a hrin chu an duh lo a, an nu leh pa te pawhin an fanu sawn pai chu a rai lai ngei a pasal neih tir a, a pasalte in a fa va hrin tir chu an duhdan a nih a vangin an fanu chu a rai lai a rawn nei duhtu an awm mai loh chuan an fanu, a ni (Nula pa farnu) fapa tlangval a awm chuan an chah ang a, an fanu midang rai chu nei turin an ti a nga, afarnu fapa chuan a pu fanu midangin an rai tawh chu nupui a lo nei mai thin, a nei duh lo tlat a nih chuan Tk 70 leh zu um khat an chawi tir ang. (Miria leh Bawm chu an ni-te fapa nen an inneih thin vang a ni)

Mire mipate hi an tha hle a, anmahni rai nilo mahse, rai a awm tih an hriat chuan nupui atan an iai lo mai nilovin rai thei tih chiangsa a nih a vang leh thenkhat chu an man a lo tlem deuh bawk a vangin nula rai chu an awl rei hman ngai meuh lo, neitu an hmu vat thin. Fa an lo nei a nih pawhin an pasalte chuan anmahni fa ang main an en a, an fa

a ni lo tih a hriat ngai loh a ni. Hmeichhiate erawh chu fahrawn chungah sual tak tak sawi tur an tam mai.

Tlangvalin nupui neih hun tawh ni a a inhria a, nupui neih a duh tawh a nih chuan favang awllên lai chuan khaw hrang hrangah nupui zawngin a vak kual a nga, zan khatah khaw hnih khaw thum pawh a kal thei a ni. Hei hi kan khaw (Tuna ka awmna Empu) tlangvalin a nupui zawn dan min hrilh aṭang a ka hriat a ni.

Thenkhat chu nula nupui a an duh zawng an hmuh chuan nula chu thil (Thi emaw) an pe a nga, nula pawhin a thil a pe ve bawk a nga, anei turin tha tharin, ni/zan dangah tlangval chuan aṭhian mi 5 – 8 hruai in an va kal leh anga nupui tur chu an ru haw nghal tawh mai ang. An inneih dan chu bung dangah kan la sawi leh ang.



Mire nula leh tlangvalte

## BUNG 17

### AN HUN PAWIMAWH LEH AN NI PAWIMAWHTE

Miria te hian hun pawimawh leh ni pawimawh an nei nual a, chung an hun pawimawh zinga a tam zawk chu favang hun lai hian a ni deuh ber a, favang lai chuan ruai theh a zing khawp mai. Kan sawi tawh ang khan Miriate hian huau huau hi an ngaina ve hle mai a, chung an thil tihpùiah chuan khaw khatah mi an tam em em lem lo bawk a, a khua a ruaitheh a ni deuh zel thin.

Chung an ruai siamah pawh chuan dan leh hrai pawh an ngah thei thin khawp mai. An dan leh hrai zawng zawng hi han ziak kim vek sen chi pawh a nih loh avangin a pawimawh zual chauh kan ziak lang dawn a ni.

Ruai an theh hian ruai ei tura an mi sawmte, khua ami, in khat a pa ber emaw, khua a mite zawng zawng emaw chaw ei tura an sawmte an rawn thlen kim vek hma chu tumahin chaw an ei ngai lova, (Khaw dang dang tihdan erawh ain ang vek lem lo) inneih nikhua leh ruai thenkhatah chuan an ruai theh dawn a zu in ho chu an zu in zawhte nghah a ngai thin a, then khat chu chaw ei tur a an mi kohte an rawn tlen har a vanga kan nghah rei tawh a naklaiin zu in ho zu in zawh nghah a ngai leh thin chu ril a lo tam tawh pheih chuan a ninawm duh thin khawp mai. Kan han ei theih meuh chuan kan chaw leh sa te chu a dai vek tawh thin a, bawngsa pheih chu a lo khal hman hial tawh thin.

Chaw ei a an insawm hma hian inchhungah chaw leh sa chu ei mai theih turin an lo peih diam tawh thin a vangin lo kil hmasatu tan chuan riltam tak chung a hma a chaw leh sa inchhawp, ei lawk theih si loh chuan riltam a ti zual in a ninawm duh khawp mai. Chaw kan han ei theih tawh chuan intihsia ang mai hian chaw ei hi an chakin an rang em em thung.

## **An hun pawimawh leh ni pawimawhte chu hengte hi an ni:**

- 1. Nupui pasal neih :**
  - 1.1. Uar mang (Zan lawi).
  - 1.2. Pakla purkung ni mang (Chhun lawi I).
  - 1.3. Pakla purkung ni mang (Chhun lawi II).
  - 1.4. Sutawng (Kutsuih).
  - 1.5. Nupui man pek.
  - 1.6. Numnâp (Nemngheh).
  - 1.7. Nuksak (Sullet)
  - 1.8. Thilchhawm phurh.
- 2. Mithi sawngbawl dan :**
  - 2.1. Awmlai thi.
  - 2.2. Sar thi.
  - 2.3. Raicheh.
  - 2.4. Hlamzuih.
  - 2.5. Ruang lam.
- 3. Sa kah leh awh.**
- 4. Bawng/Sial chhun:**
  - 4.1. Uar iak (Zan riak).
  - 4.2. Linglang (Lehlan).
- 5. Chhechham a thian/unau a insiam:**
- 6. Awi U Pa (Nu leh Pa chawimawina ruai).**
- 7. Chamleng (Chhungkhat inkan).**
  - 7.1. Makpa in a Pu (A nupui pa) a kan na.
  - 7.2. Nuksak (Sullet).
  - 7.3. Taawi (Damlo kan)
- 8. Fate beng verh.**
- 9. Chamung pawk paw (Thlai thar ruai).**
- 10. Cha mawi (Buh thar lawman ruai).**
- 11. Changkran paw (Kum thar ruai).**
- 12. Kua khang (Khaw hung/serh).**

- 12.1. Satma khang (Thal khaw hung/serh).
- 12.2. Siadawng khang (Fur khaw hung/serh).

### 1. **Nupui pasal neih :**

Nupui pasal neih hi an hun pui zingah chuan an ngaih pawimawh pawl a nih a vangin a tlinte chuan an tiropui thei hle thin. Mihausa thenkhat chuan an fapa naupangtë in nupui neih tir tepawh an awm a, chung naupang të a nupui an neih tir thenkhatte chu an nupui te'n an thlim mu thin a (an nupuite chu nula puitling an ni thin). He dan hi a tha lo khawp mai, achhan chu an fapa naupang të chu an lo puitlin chuan an nupui chu hna an thawk hah nen; an lo lan upat tawh tawh thin a vangin anmahni rualpui nupui neihsan ta te pawh an awm thin reng a ni.

Bung hmasa lamah khan an nupui zawn dan chu kan sawi nual tawh a kimchang zawk deuh in sawi leh ta ila.

#### 1.1. **Uar mang (Zan lawi):**

Tlangval in nupui a zawn chuan a thiante a hruai a, a nupui tura a duh a hmuh chuan atam zawk chu an thiante'n an biak sak a, an mahni a biate pawh an awm bawk. Nula thenkhat chuan amah; nupui tura rawn beiseitu ber hmel pawh hmu lo an awm. Nula chuan pasal neih hun a inti ve tawh in pasal neih a lo rilruk ve tawh a nih chuan amah rawn beiseitu chu engang mi nge a nih a, an chhungkaw dinhmunte amah rawn betute hnenah chuan a lo zawt ang.

Chutia nupui a tana amah rawn beiseitu chanchin a hriat a, a ni pawhin pasal a tana lo duh ve a nih chuan, "In la rawn leng leh dawn nia," a ti a, a thi emaw, a ruakawm (kawngghren) emaw puan emaw, a thil roh tak tlangval chu a pe anga, tlangval pawhin nula chu engemaw a pe ve bawk ang. Chutianga an inthlah liam chuan an va kal leh chuan tlangval chuan thian engemaw zat hruaiin zanah an va ru chhuak tawh mai thin a ni. Chu chu an nupui ruk dan a ni.

Tin, tlangval thenkhat chu an nu leh pa te'n nupui an zawn sakte pawh an awm bawk. Chutia nu leh pa te'n an fapa nupui tur an zawn sak chuan, mo tura an duh nu leh pate hnenah chuan zu emaw, thingpui leh chhang emaw kengin an fapa nupui tur chu an va dil

thin. Nula nu leh pa te'n rem an lo tih chuan inhaul nan tlangval nu leh pa te chuan nula nu leh pa te chu bawng pakhat leh Tk 15 – 30 an pe thin. Mahse, chu bawng an pek chu an fanu chu an fapa in nupui a an neih tawh hnuah an la lêt leh thin. Chu chu 'Dawngpün chia' an ti.

Nu leh pa te hriatpui leh inbiak remna a innei nimahse, an chhungkaw khawsak a har sa deuh a, chhun a lawi an tlin lo a nih chuan zanah pawh an lawi mai thin a, chu chu 'Uar mang' an ti. Tlangvalin nu leh pa te hriatpui leh inbiak remna a innei ni mahsela zanah a thian thahnem tak te nena a nupui an va hruai chu, "Cham lo masih" an ti a, nupui ru kan tih ang tho hi a ni.

Tlangvalin chutia nupui a ruk chuan in an thlen veleh a nupui leh a nupui rawn thlahtu nula pathum, pali te'nen chuan an in a kimma an tihah chuan an awmtir nghal a, khua a var ve leh an mo lawmna tur bawng emaw vawh emaw an talh nghal thin. Nu leh pa inberem lova nupui an ruka a nupui lam chhung te'n an fanu/farnu rutu chu an duh loh chuan nula chhungte (thenkhat) chuan an fanu chu an rawn um in an hruai haw leh thin.

Mo neitu lamin mo lawmna ran an lo talh tawh hnu a an mo chu a chhungte lamin kimma (Pindan chhungril) a awm chu an rawn hruai haw leh a nih chuan mo lawm nan a an ran talh man zawng zawng chu hmeichhe chhung te'n an chawi vek tur a ni.

## 1.2. **Pakla purkung ni mang** (Chhun lawi I):

Hetiang a inneihna hi nu leh pa te inbiak remna a nupui pasal neihna ropui ber a ni a, chuvangin chhunah an lawi thin. Hetiang a inneihna hi an ti ropui hle thin. Hetiang a inneihna hi a hautak em a vangin tunlai chuan hetiang a innei hi an awm meuhtawh lo.

Mipa lamte mo hruai tura an kal chuan an inpuahchah nasa hle thin. Anupui turte khua amite ei khawp tur ar tam tak ken a ngaih a vangin mo hruai tura an mi sawmte chuan mo neitute lam tanpui nan ar pakhat tal chu an keng ve thin. Ar tam tak, fei, diar, puanhlap leh zu te kengin a pui a nawi in a khua deuhthaw in mo hruai turin an kal thin.

Mo turte khua an va thlen chuan an mo turte inah chuan an thleng khawm vek a, khaw chhung a nu ho chuan mo hruai tura rawn kalte ei atan chaw leh chawhmeh an thlen naah chuan an va dah thin. Mikhual te'n chaw an ei kham vek tawh chuan an ar rawn ken chu khaw chhunga mite ei atan an puah nghal mawlh mawlh a, mo chhungte pawh chuan mo hruaitu te ei a tan vawk pa sutnghak chu an lo phet thlu ve nghal bawk thin.

Mo hruai turte an thlen ni a tang chuan a khawi lam ve ve pawh ruai eitur siam buaiin an buai nghal mum mum mai a, ei tura an peih fel hnu chuan mo hruai tur, mipa lam chhungte chu chaw an ei hmasak tir thin.

Hetiang a an inneihnaah hian nupa/chhungkhat a insiam tum-e ti lo chuan intih mualpho an tum tawn ngar ngar ni te hian a hriat a. Miria te hian anmahni hnam dan a ruai an theh hian an pute leh an makpate chu sa bel khat a mi an ineitawm thianga lova, an pute lam chuan an makpate rawn ken arsa an ei a nga, an makpate lam chuan an pu te vawksa an ei vethung tur a ni.

An pu/makpate lamin chawhmeh an siam sak chu, “Kan pu/makpate te'n kan ei khawp chawhmeh pawh min hlui thei lo, an nep lutuk, kei ni chuan an ei sen loh kan hlui a nia,” ti a vuivai an duh a vangin chaw ei laite hian chaw ei siamsaktu te hriat tham si loh hian, “Chaw kha ei lovin a sa ringawt kha ei rawh u, chaw ei kham hma a sa ei zawh vek tur,” tiin chaw ei laiin an infuaih nasa thei thin khawp mai. Mo chhungte lam chuan Arsa an ei a vangin a ei tam theih hle a, moneitu lam vethung chuan vawksa an ei a vangin vawk thau tak sa pheih chu ei tam a har khawp mai. Hetiang a, anmahni Mire dan anga ruai an thehna sa hi “Chan ngar” an ti.

Hetiang inneihna ruaiiah hian thenkhat pheih chu indawi an ching a, mo chhungte lamin moneitute lam dawih an ching zawk thin. Chutianga inneihna ruaitheh remchanna a lo hmanga chu ruai theh ve an hmelmate lo dawih ching pawh an awm bawk. Ruaithehna a an indawi chuan an dawih a chuan a sa ei chu a kawchhungah sa hring hlar tak angin a awm anga, chu chu engtin emaw an luak chhuak lo a nih chuan a lo tang lian zel anga, mihring kawchhungah chuan zungte a kaih a nga, a hmulte a lo awm a nga, chu mihring chu a thi

mai tawh dawn a ni. Chutiang a kawchhung a lo awm chu “Chapang” an ti.

Tum khat pawh kan khaw nula khaw danga pasal nei kan thlah tumin kan haw hnu chuan nula pasal nei a pa chu a pum a na vak mai a, vanneih a siamin mi in an dawina sa hrang hlar tak mai chu a luak chhuak hlah mai a, luak chhuak lo se chuan a ni pawh chu a thi maithei a ni.

Mo hruai tura va kalte chuan mo pu (a nu pa/nuṭa ‘tutma’ an ti) ei a tan a hran in ar an talh sak a, an puahin an chhum sak vek a nga, chu chu mo pu chuan a mahin a ei zo vek tur a ni. Chu ar puah dan leh chum dan chuan awmzia a nei em em a, a puahtu leh a chhumtu te chuan an puah dan leh chum danah an tihsual a a ei tu turin a hriat chuan chu an arsa chhum chu an paih vek a nga, adang a tharin an chum tha leh tur a ni. Sawiselna tur engmah a awm tur a ni lo.

Miria nupui hruai haw lam vawk zawn

Hetia an makpa in a pu arsa ei tur a chhum lai hian ven ngun a ngai hle thin a, mo chhungte lam chuan an makpa chu an tih mualpho theihna turin a rukin arsa belah chuan arhmul emaw lo thlak an tum talh thin a ni. Achang chuan mo neitu te lamin chaw an ei lai in mo



chhungte lam chuan thukah hmarhcha ro an lo rawh a nga, mo hruaitute lam chu hahchhiau chuah chuah chungin hnap tawlh pur leh mittui tla pur chungin chaw an ei a ngai thin a ni. Hetih lai hian an fiamthu a sang thei khawp mai. Mo hruaitu te’n mo hruai a an haw dawn chuan mo nu leh pa te chuan an vawkpa sutnghak puah sa, an makpate lamin a pum a an zawn haw tur an buatsaih a nga, chubakah vawk dang arpai a an pai haw tur an buatsaih leh baw k a nga, chu an vawk pa lian tak tual a an talh chu mo neitu te lamin mo in luhkapui a chan turin an luhkapui sang angreng tak, thing pum reh leihlawnah chuan tlangval chakin a pu chho ngei tur a ni. Tlangval chak mang lo chuan chutiang vawk lian chu put tum ve ngawt chi a ni lo.



Vawk a pum a zawn haw tur chu an puah zawh hnu in a pum chhungah chuan an khua an thlen hun a an channa tur chemte, chemte a bil hun a an tah hriam leh na tur lungtât lian tawk leh ațâm turte nen an dah a nga, a pum chu an țhui ping leh bawk ang. A zawnna tur raw pum lian el awl chu a putna lai chu an tichik hrup a nga, chu an tih chik hrupah chuan hmarhcha dendip tihhuh an chulh leh vek a nga, vawk puahsa chu azawnna a țanga chung lam a ke akhup a țanga chung lam lawr chho vawuhin an țawn anga, chumi a ke lawrah chuan maupum, vawk hnung lam leh hma lam ke lawr chho-ah chuan an țawn lawr vawoh bawk ang.

An vawk zawn chu kal zawnga inthen nawlh nawlh thei turin an siam a nga, chu an vawk zawn chu phuai-in an chei buai bawk țhin. Vawk dang an talh pawh chu lian tak takin an chan a nga, arpaiah an dah a, chu arpâi pàina hrui chu tetakte fip deuhin hrui an hrual anga, chu an hrui hrualah leh vawksa pàina arpâi pang zawng zawngah chuan hmarhcha dendip an tih huh chu an tât leh vek bawk.

Chu vawk pum zawn tura an buatsaih chu mo neitu lam tlangval chak, ‘kei’ inti chin mi pahnihin luhkapui ațang chuan inchhungah an zawn lut anga, zawn pahin chhuat lai a zupui hlum bel a an dah chu an khàwn a nga, chutih lai chuan țhenkhat chuan an vawk zawn ke chung lam a maupum tawng khat vel an tihlawrah chuan an vawk zawn chu inthên turin an lo kawih her sak a, (chutih hun lai chuan atu a te mah chu kawr ha awm hek suh) chutia an vawk zawn a in thên chuan an vawk zawnna maupum an koki zawna an ti chik hrup chuan an koki a ti pilh phung mai a, chu mi pilhah chuan an hmarhcha dendip tih huh an tah chu a lut a, tawrhchhel a ngai țhin khawp ang.

Chutia vawk zawntu te’n zupui an khàwn hnu chuan in a țang chuan vawk zawn chung a mo hrui a an haw dawn chuan an kaiten/sumhmun a țanga chhukna leihlawn sang angreng tak thingpum reh, an leihlawn dawh chu vawk pum puahsa zawn chung chuan harsa ti takin an zawh thla a, tual an thlen chuan mo chhungte lam; mo thlahtu te chuan, “Ka ke a na, ka kal thei lo,” ti in an lo tlu der țhin a, mo neitute lamin zu an pek hma chu an tho duh țhin lo va, chutiang chuan khaw chhung an kal pelh hma chu mo chhungte lam

chuan zu an ngen reng ̣thin a, chutia an din laite chuan an vawkzawn inthên tur chuan mau lawrah chuan an lo kuai thên leh lawp ̣thin a. chutia an vawk zawn a thên chuan azawmna mau hriamin an koki a ti pilh a, chumi pilh a hmarhcha thak lut chu azawntu te chuan na an ti thei em em mai a. Khaw pelh hma zawng chu vawk zawntute chu inchhawk theih a ni bawk si lova, an na ti lutuk chu an ̣then tlawk tlawk ̣thin a ni.

Vawksa arpâi a pàite pawh kha an vawksa pài a rih nen; apâina hrui chu te tak te a hrual fip tlat a ni bawk si a, bâkah apâina hrui leh arpâi pangah chuan hmarhcha tòi rawt dip tih huh chu an tât vek bawk nen, an ni pawh an nuamsa chuang lo. Khaw hran a mi deuh vek nupui pasal a innei an ni in an khaw kâr kawng a chhia in a chhuk chho thei bawk si nen, kawr ha bawk si lova ni sensa hnuaiah thil rit tak pai leh zawn chungin hmarhcha thak nen a inchiahpiah reng chung a chu tianga han kal nilen chu rapthlak tak hi a ni ringawt mai. Lamhla tak a mo hrui chu thi lova ruangin in an thleng hi a ni ringawt ̣thin. Hetih lai hian an fiamthu a sang mah mah a ni. Fiam thu nge intih hreawm duh vang hrim hrim thih pawh hriat a har khawp mai.

In an thlen chuan an vawksa hawn chu an chan a, maipawl nen an chhum a, mo rawn thlahtu te ei tur ar an talh ve bawk a, hlim takin khua a mi zawng zawngte nen Mo lawmna ruai chu an ei ho leh ̣thin. Mo thlahtute an haw dawn chuan Mo leh Moneitu chu chhuat laiah an ̣thut tir a, mo thlahtu te zinga upate chuan an fanu mi in a mo tur chu thu ̣tha tinreng an hrilh a; chutianga thu ̣tha hrilh tur chuan upa, ̣tawngkam thiam deuh te an hrui ̣thin. Hetiang hian an fate chu thu an hrilh ̣thin, “Hei, tunah chuan pasal i nei tawh a, i pasal nu leh pa te chu i nu leh pa an ni tawh a, kawng engkimah i zahin an thu i zawm ̣thin tur a ni.

I pasal a khawi lo vakchhuak a lo haw in tlaiah pawh a ni thei, zanlai leh khaw var lam pawh a ni thei, ̣tha tak leh hlim takin i lo be ̣thin tur a ni. A ̣thiante pawh a rawn hrui thei a, a ̣thiante chu ̣tha takin ei in i lo buatsaih sak in an mutna i lo siam sak ̣thin tur a ni,” tih te leh thu ̣tha dang tam tak an hrilh bawk a ni. Mo neitu nu leh pa te hnenah pawh, “Hei, tunah chuan in fa a ni tawh a, hau a ngaih chuan lo hau

in zilh angai chuan in lo zilh thin dawn nia,” ti in an chah thlap bawk thin. Mo thlahtu tam zawkte an haw hnu chuan mo thin, nulate chu ni thum, ni li vel an la cham hnufual thin. Chutia mo thiante an cham chhung zawng chuan mo neitu (Nupui neitu ber) chu in dangah a riak daih thin a, khaw chhung tlangval leh khaw thenawm (an khaw hnai deuh a mite) tlangvalte chuan chutia mo leh athiante pindan chhungril a inkhung tlatte chu a chhun azan in an rim thin a, chutia an rim lai chuan an mutpui theih theih mutpui chu an hnial lo bawk. (Hei hi anmahni tawngka ngei atang a ka hriat a ni)

Mire hmeichhiate hi an mo thar lai chuan an zakzum em em thin a, hun rei tak chhung chu chaw kawpuar pawh in an ei ngam thin lo. Miria te hian ‘Nupa’ tih hi ‘Ta far’ (Nuta leh Farnu) ti pawh in an sawi bawk thin. Miria te hi atlangpuiin inngaizawng a innei ai chuan nupui pasal neih hun intih tawh a vang leh nupui pasal neih duh tawh a vanga innei an ni tlangpui a, chuvangin zan a inhruaite thenkhat phei chuan anmahni thlahtu an hawn vek tawh hnuah an pasalte hmel hre chiang ve chauhte pawh an awm thin. Miriate hian inneih an awlsam ang bawk hian thenkhat chuan inthen pawh an awlsam leh hle bawk.

### 1.3. **Pakla purkung ni mang** (Chhun lawi II):

Hei pawh hi a asawngbawl dan chu a chung a mi nen khian a inang renga, a danglamna chu vawk puahsa an zawn hi vawk pahni a ni tur a ni. He inneih dan hi chu mi neinung tak takte chauh in an ti thei a ni, hetianga inneihna-ah hi chuan zu leh sa chu duhthusam in a tam a ni. Tunlaiah chuan mi an lo changkan deuh tawh a vangin chhun lawi pawh ni se hmarhcha thak a intih hreawm leh vawk puahsa zawn chu an ti tawh meuh lo.

### 1.4. **Sutawng** (Kutsuih):

Miria te’n nupui pasal an inneih a kut an insuih dan chu mo neitu leh a chhungte zawng zawng ban ding lamah la dum emaw, la sen emaw, la var emaw an hreng vek anga, chu an la hrenah chuan an inneih lai a ramhuai hnena an inthawina vawk



beng dinglam them an ɬawn tel vek tur a ni. Inneih tirtu hi an puithiam a ni a, puithiam a awm remchan loh chuan an khua a upate pawhin an inneih tir thei a ni.

Nupa tuak tharte an ban a la an hren lai hian buhfai, aieng nen a rawt dip an chalah an hnawih vek bawk tur a ni. Puithiam chuan zu hmuam chungin sawhthing a seh a nga, an sama dawm in tlem tlem in a zu hmuam chu a phuh zel anga, “Sawksawrawk, a ngho thla de ang, a ngal hmul rawpui hung ang,” a ti bawk ang. Chutia a tih chhan chu ramhuai in an ni(nupa thar) chu hlau rawhse a tih vang a ni.

### 1.5. **Man hlan.**

Miria te nupui man hi a tam hle a, abehbawm insensona tur pawh a tam hle a ni. An inneih hian nupui man hi an pe nghal tlangpui a, mahse an man hi a tam tham deuh a vangin ɬenkhath chuan an pe tlak nghal mai lova, ɬenkhath phei chu rei tak man pe lote pawh an awm bawk. Mahse, nupui man hi a bat ral theih lova, a nupui a thihni thlenga a nupui man a pe tlak lo a nih chuan a nupui ruang awmlai ngei in a nupui nu leh pa emaw, a nupui nuɬa te'n emaw anupui man chu an rawn la anga, pek tur a nei lo a nih chuan a chipui te'n a nupui man an pek sak ɬhin a ni.

An nupui man a tan chuan hmanlai British hun lai a India pawisa Silver ngei kha an la hmang a, chu an nupui man sawi nan chuan, ‘Buksung’ an ti a, (nupui man tihna a ni) Buk sungah chuan Silver tangka 100 a ni a, heibakah hian ‘Chumüa’ Silver tangka 5 leh fei, a pu, (mo nu pa/nuɬa) an pe ang a, a pu chuan a makpa chu diar var tawng sawm a sei a khim tir ve ang. Tunlaiah chuan ‘Chumüa’ hi Silver pawisa sawm là te pawh an awm. Mo chu a bengverh a peh, Panchhia a nei, nau a lo chhiat tawh emaw chuan ‘Chumüa’ chu an la thianga lo a ni.

Nu hnute tui man, mo nu chu Silver tangka sawm an pe leh tur a ni. Hei bâkah pawh hian an puan leh thil dang an chhawmte chu a man hu tawk Silver tangka in an pe leh deuh vek bawk a ni. Silver Tangka khat hi tunlai a Bangladesh Taka a an thleng dan chuan Silver tangka khatah tunlai Bawngladesh Tangka 1100 te in an thleng ɬhin a ni. Hmanlai Silver tangka man hi angai reng lo a, a man hi a hniam lam ai chuan a sang lam deuh zel a ni.

Chutiang a nih chuan Manpuiah Tk 110,000. Chumüa Tk 5,500. Nu man 11000. Avai in Tk 1,26,500 a ni a, an thil chhawm an lo tlanna mante nen chuan nuai chuang fe, an nupui man leh a behbawmah an insèn a ngai a, chubâkah fei engemawzat, chem., diar tam tak, puan hlap, hmeichhe upa ho an pek leh ran an talh a ruai an siamna leh zu bel engemaw zat nen, an inneih hautak zia chu kan hrethiam mai awm e.

Man an inhlan hian mo thlahtu mipate hnenah fei pakhat theuh an pe bawk thin. Fei chu mo nu leh pa te'n an ngen zat mo neitu te chuan an pe tur a ni. Fei an ngen zat chu 11, 13, 17, 21, 31, 77 te a ni tlangpui, a kawpkim lo in an ni tur a ni. Fei petu te chu mo nu leh pa te'n diar var tawng nga a sei an khim tir vek tur a ni. Sungmow te chuan mo hruai tura kal ar pai zawng zawngte'n mo neitu tanpui nan fei an pe theuh thin. Mo hruai tura kal nu te chu puan hlap sen emaw apawl leh a hring emaw. an koki a an suih thin ang chi, a pakhat leh chempui pakhat theuh mo nu leh pa te'n an pe bawk tur a ni. An puan pek chu tawng nga a tling ngei tur a ni bawk.

Hmanlai chuan mo hruaitu zinga hmeichhia upa ber chu puan a sen, a dum leh a eng a tial mo nu leh pa te'n an pe ngei thin. Tunlaiah chuan chutiang puan chu an pe tawh meuh lo. Mizo te ang bawkin man an inhlan hian thlangraah an inhlan a, a dawngtute lam chuan ngun takin an lo en in an chhiar thin. Pawisa leh fei an han inhlan tur chu a dawngtute lam chuan an thlang rei thei em em mai a, zu an lo rui tawh bawk nen; man inhlan zawh ve leh a mo hruaitu te lamin an ei mai theih in chaw ei lah chu an lo siam diam tawh thin bawk si a, an han ei hman meuh chuan chaw leh chawhmeh zawng zawng a dai hman vek thin a ni. An man inhlan hun hi zana a ni.

Thenkhat chuan nupui man pek tlak nghal tur an neih loh a vangin an nupui man chu hun rei tak an ba thin a, an neih remchan dan angin tlem te te a pe te pawh an awm bawk. Nupui man an pek apiangin tlemte pawh pe se ar an ken a ngai a, an pu-te lam chuan vawh pahnih, an makpa cham chhunga ei tur leh a hawn tur an talh a ngai ziah tho a ni. Thenkhat chu nupui man an pek theih loh a vanga an fanu/farnu hruai kir leh te pawh sawi tur tam tak an awm bawk a ni.

1.6. **Numnap** (Nemnheh):

Thenkhat chu an fanu in pasal a neih chuan Apasal neih lai in, a pasal in a an fanu a lawi tawh hnuah a pasal hnen a nemnghehna hun an hmang nghal thin a, thenkhatte vethung erawh chuan an fanu in pasal a neih a tanga hung rei tak, an fate pawh an len vek tawh hnuin an fanu/farnu chu a pasal hnen a nemnghet ve chauhte pawh an awm bawk.

An fanu/farnu a pasal hnen a an nemngheh lai hian nupui pasal inneih lai a an ruai siam ang tho khan an khua mite, mi tam tak an sawm a, a kal zawng zawngte chuan an makpa lam ei tur vawksa ar paiah an pai vek a, diar var pawh tam tak an keng bawk. An ruai sawngbawl dan chu inneih lai a an ruai buatsaih dan nen a inang tho a ni. An nemngheh dan pawh an fanu/farnu pasal nei thlahtu te'n an hawsan dawn a an thu chham nen khan a in ang reng a ni.

1.7. **Nuksak** (Sullet) :

Miria te hian nupui an neih ni atang a ni 7-ah sul an let ngei tur a ni.

1.8. **Thuam chhawm phurh** :

Mire hmeichhia te hian pasal an neih hian an thil chhawm tur hi an pasal neih hun lai hian an keng nghal lova, thenkhat te pheih chuan fa an neih duah tawh hnuahte an thuam chhawm chu an phur/la chauh thin. An thuam chhawm phurh chu, “Thul phurh” ti in an sawi mai thin. Hetia thuamchhawm phurh lai hian an ruai siam dan chu an nupui pasal neih lai a an ruai siam dan ang deuh bawk khan an siam leh a ni.

Miria te hian ruai pui tham deuh an siam apiangin Upate chawimawina hun an hmang thin a, chu chu “Rowsi kantawp” an ti. Chutia upate chawimawina rowsi kantawp an siam dan chu; an vawksa kawchhung sa hrang hrang chu chip takin an chan a, sawhthing, aieng, hmarhcha leh chi te nen a thithunah an telh a, buhban vawk thau telh mau chawngin an hem hmin bawk a. Buhban mau chawng a hemhmin leh vawk thithun nen dawhkan hniamte-ah changel hnah in an hlui a, zu an chhawp tel ngei bawk. Mipui in ruai an theh hma in chutiang chuan upate zahna an ti lang hmasa thin a ni.

An thil chhawmte chu : Thul pahnih. A puanpui (Mizo puanpui anga hmul lo, lum lo leh khawng deuh, rit bawk si) engemawzat. Ruakawm (an kawng/mawng bawr a an hren). Harkawi (kiu chung chiah a hmeichhe hren Silver pheik ze nei) pahnih. Ramseng (Bengbeh silver a siam). Tangkaleng (Silver tangka a thilna an siam a tam tak an thil mihausa deuh fanute incheina). Uanklaitawng (Pawngfen tawi) engemawzat. Heng hian man a nei vek. Naupuakpuan engemawzat. Heng bakah pawh hian an kawnga an hren neuh neuh leh an sam a an tawn neuh neuh an chhawm tel nual bawk a, mahse chungte chuan man anei ve hran lova, thul pahnih a pakhat zawk pawhin man a nei lo, achhan chu; achhawmtu a thih hnu a a thlarau awmna tur ni a an ngaih vang a ni.

Heng an thil chhawmte hi mo neitu te'n a man an pe deuh vek a, aman atan pawh hmanlai Silver tangka deuh vek pek a ngai tlangpui bawk a, Silver tangka chuan tamin lang lo mahse tunlai Bangla Tangka chuan an thlengna asan em a vangin ahautak hma khawp mai.

## 2. **Mithi sawngbawl dan :**

Miria te hi tun hma chuan Budish an nih a vangin an thih hian an inhal thin a, tun hnu a Kristian leh Krama sakhua a awmte chu an inphum ve thin a ni. Miria te hian thenkhat chuan mithi hi an hlau em em thin. Atlangpuiin hmeichhiate chu mithi inah an chuangkai ngai meuh lo, a kalte pawh kawngka bul a tanging an thliir a, an kir leh ringawt thin. Mithi an neihte hian chuti takin an intuarpuir em em pawhin an lang lo. An khua a mithi an awm pawhin tam zawk chuan an hnathawh an thulh phah chuang lem lo.

An inlenpui ve takna in hmun thenkhatah chuan khawhar in a leng an tlem thei hle. Khawhar in riak hi chu an awm thin a, atlangpuiin nula leh tlangvalte khawhar inah an riak thin. Mithi lumen naah Kristiante chu kan zai ve thin a, hlasak tur erawh an thlang uluk lo in khaw thenkhatah chuan hla an lo thiam tlem nen Krismas hla leh hla an hriat apiang an sa mai thin.

Kristian lote erawh chu zu te in in playing card te khelin zan an tumtawi ve mai thin. Mithi chu kuang an siam hma chuan puan a tuamin chhuatlaiah an zalh mai thin, khuang an siam zawh chuan

mithi chu kuang chhungah dahin chhuat laiah an dah mai thin. Mithi in a kalte chuan mithi tan pawisa an pe thin a, chu chu mithi thlarau a chhuah hun a lui a kan dawn a a lawng chuan man atan a an tih a ni.

Mithi chu an hal hnu in inthen nan vawk leh ar in an inthawih thin. Chutiang a inthawi chu ‘*Siriowng*’ an ti. Ar in buhzem bulah an inthawih a, vawk chuan an sumhmun lawn chhohna bul tualah an inthawih thin. An hnathawhna bungrua zawng zawng hian thlarau an nei veka an rin a vangin an inthawina sa chu an hnathawhna bungraw bulah chuan hnah in tlem te tein an dah vek thin. Kawt a an inthawina vawk leh ar an puahna pawh chuan huai a nei in an ring a, chutah pawh chuan an inthawina sa chu hnahin tlemte an dah thin. Chutianga an hnathawhna bungruate tan a an inthawina chu ‘*Kawmpowt*’ an ti.

#### Mithi in

An mithi halna hmunah chuan in tek tak te an sa a, chu an in sak te tak te chhungah chuan mithi an hal a kang bang a ruh thenkhat leh a vapte chu puan varin an tuam a an dah thin. Chu an inte sak chu mau an tih zum in an hung leh vek bawk thin. Mau châng kâr khat hi an la a, vawk kuang ang deuh hian an siam a chutah chuan mithi thlarau ei leh in a tan tui leh chaw-hlawm an dah bawk thin. Chutah chuan mithi luruh kang bang pawh chu an dah tel bawk thin, a chhan chu mithi thlarau chu a lu a nat loh nan an ti a ni. He an in te sak hi ‘*Tur kim*’ an ti. Hmun dangah mi a thih a, mi khua kal tlang ngai a nih chuan mithi ruang hi khaw chhungah zawn tlang athian loh a vangin khaw chhung lut lovin kawdai a tangin khua chu an helh mai thin.



#### **2.1. Awm lai thi :**

Mahni inchhungkhur a hrisel lohna a vanga thi te chu an bual fai a, akut zungpui pahnih chu a pum chungah dahin zo lazai-in an tawn belhbawm a, a ke zungpui ve ve pawh chutiang bawk chuan lazai-in an tawn belhbawm thin. Chu an tawnna lazai chu; mithi chu hmeichhia a nih chuan la zai ruvin an tawn a, mipa chu lazai ngain



an ɬawn ɬin. Hmeichhia an ɬawnna lazai khat a an ɬawnna a tamna chhan chu hmeichhia chu la dektu an nih vang a ni.

Ruang chu an puanpui tharin an tuam a, chu an tuamna puanpui chu a lu lamah leh a ke lamah khâp khat zenzawnin an ti chuang tur a ni. Mi ruang an tuamna chu pinin emaw, hmawlh zumin emaw an chilh ɬin. Mipa ruang tuamna chu hmun ngaah an chilh ang a, hmeichhe ruang an tuamna chu hmun rukah an chilh vethung.

Kuang chu hnangin, ze nei in an tah a, kuang an tah dan pawh hi hmeichhia leh mipa kuangah chuan awmzia a nei a, kuang an

Lumsi

Kankawk

Rake



tahna zia chu, Rake, Lumsi leh Kankawk te an ni. Mipa kuang lu lamah chuan Rake zia in tah tur a ni a, a ke lamah chuan Lumsi zia in tah tur a ni. Hmeichhe kuangah chuan a lu lamah Lumsi zia a tah tur a ni a, a ke lamah chuan Kankawk zia in tah tur a ni. Hemi zia hi an pawnfen tawiah pawh an zep a ni.

Kuang lu lamah chuan meichher te tak te an ɬawn bet a, chu meichherte chu an chhi ang a, mithi hnenah chuan, “Hei i kalna a i meichher tur,” an ti a, an ti mit leh mai ɬin. Mithi thlarau chuan a kal kawnga meichher a mamawh dawn a an rin vang a ni. Mithi hi an dah rei thei hle a, rimchhe tak thlengin an dah ɬin.

## 2.2. Sâr thi :

Miria te hian sârthi an sawngbawl dan a dang a, Sâr thi chu a thi a ni tih an hriat ve leh vawk an chhun hlum nghal a, chu an vawk chhunhlum chu ei lovin an paih nghal tur a ni. Mithi kuang chu thumbawhin an tah a, sâr thi chu an hal emaw, an phum emaw hma chu an inah chuan an chipuite chu atu a te mahin thil an ei in an in thiang lo. Ruang an hal emaw phum emaw hnu chuan vawk thisen a inthen thianghlumna neiin an inthawi leh ɬin. Vawk a an inthawi hnu chuan sâr thi chhungte inah chuan tupawh in an ei in an in thiang tawh a ni. Dopreng leh Tamsa hnamte chuan sâr thi ruang chu an pindan ‘Kimma’ an tih bang namthla in chuta ɬang chuan an zawn chhuak ɬin. Dopreng ho phei chuan an in luah lai chu an chhuahsan in an hluihlawn tawp ɬin. Inchung bungrua erawh chu an la chhuak vek ɬin.

### 2.3. **Ruitha** (Raicheh) :

Raicheh a thite chu an hal ve ngai lova, a phum in an phum thin. Athih thlaah chuan an chipui nilo hnam dang reng rengte chuan raicheh a thi te inah chuan engmah an ei in en in thiàng lo a ni. An khua a an chipuite leh khaw dang a an chipui leh khaw danga mithi chhungte zinga pasal nei a awm emaw pawh ni se, an chhung/chipui zinga mi raicheh a thi a awm a ni tih an hriat chuan raicheh a thi chu an vui hma chu chaw chauh tihloh chu engmah an in in an ei thiàng lo a ni.

Mithi chu vui tura an zawn chhuah chuan kawngkapuiah an zawn chhuak thiàng lova, sâr thi angin an Kimma hnung lam bang satthla in chuta tang chuan ruang chu an zawn chhuak tur a ni. Mithi chu an vui hnu chuan vawkin an inthawi leh tur a ni.

### 2.4. **Hlamzuih** :

Hlamzuih-ah chuan dan leh hrai a awm vak lo. A duhin an phum a, a duhin an hal mai thin. Naute rual a a nu a thi ve a nih chuan naute chu a nu rualin an hal ve mai thin. Thla thum tlin hma a naute thi chu hlamzuih a ngaih a ni.

### 2.5. **Samkam** :

An ni (pa farnu) hmun dang a pasal nei a thih chuan a vah te'n an ni pasal chhungte hnen atângin Silver tangka 5 an la a nga, chutianga an ni Samkam an lak tawh chuan an ni te chhungte nen chuan inkungkaihna an nei tawh lova, an chhiat an thatah pawh an inhre tawh ngai lo a ni.

Chutianga a nite samkam Silver tangka 5 latute chu an ni nuṭa, a farnu man an ei tir a fa te'n an la tur a ni. Chutianga tangka la tu chuan a ni samkam silver tangka alâk laiin vawk talh in ruai a siam ang a diar var tawng nga leh fei pakhat theuh a ni fapa te chu a pe bawh tur a ni. An ni chu tlai lam a a thi a nih chuan khawvar hma ngei-in an ni ruang chu kuangah an dah hman tur a ni a, a tuk khaw var hma a an ni kuang chu an peih fel hman lo a nih chuan a vahte chuan an ni pasal/fa te chu ruang ngaihsak loh man (Uakpawng sung) Silver tangka 30 an chawi tir thei a ni.

## 2.6. **Rawmuak** (Ruang lam) :

Hmanlai chuan Miriate hian ruang an lam hual thin a, chu chu 'Rawmuak' an ti. Ruang an lam hual hun chhung hi zan hnih emaw, zan thum emaw a ni thin. Ruang chu ding lam zawngin an lam hual a, hetia ruang an lam hual lai hian kawngka bul atangin mi pakhat in khuang a lo beng thin.

Ruang lam hualtu te chuan lam kual pah chuan thil tum rik an nei a, chung an rimawi tumte chu Khuang, Darmang, Tu (tuithawl hmanga siam), te a ni. Ruang chu kuanga an dah hma in kuang chu an inthawihna vawk thisen an thlawr a, atah pawh an tat bawk thin, chumi hnu in kuangah an dah a, kuang chu chhuatlaiah an dah a chu chu an lam hual thin a ni.

Arpa an talh a, engmah pawlh lovin an chhum a, a sa tlemte chu mithi chu an pe thin. Mithi chaw an pek chu mithi lu zawnah an dah thin. Mithi tan vawk an talh a, chumi an vawk tal hrang khat chu sumhmunah an paih a, mithi chu nithum chhung nitin chaw vawi thum an pe thin. Mithi chu chaw an pek a piangin vawk pakhat leh arpa pakhat an talh ziah thin. Mahse, thenkhat chuan mithi chaw an pek a piangin vawk leh arpa chu an talh zel thei lova, chuvangin an chhumsa chu mithi chaw an pek dawn a piangin an lum mai thin. Mithi chu chaw an pek dawn a piangin an lam hual hmasa thin.

## 3. **Ramsa kah leh awh lai in :**

Miria te hi ramsa pel leh ramvah hi Mizo te ang a nuam ti tak an ni ve a. thang kam erawh Mizo te ang chuan an uar lutuk lo. Kar kam erawh an uar khawp mai. Mi in ramsa zawn tham an kah emaw, an awh emaw chuan, a kah/awhna hmunah chuan chhawl in emaw, ama kawrin emaw a khuh ang a, khua a mite sa zawn turin a va pun a nga, khua a mi te'n sa an zawn chuan an haw kawngah chuan mau thei an plung ri ang chiaah chuan an in thleng in an ham ri a, an hlim thei hle thin. He an thil tum rik hi 'Hut tum' an ti.



Chu a sa kah/awh chu a khua in an ei a, puitling ho chuan zanah sa lu an lawm a, sa lu lawm a rawn kalte chuan zu um khat rawn kengin sa

kap/awktu chu anrawn pe liam liam ðin. An sa kah/awh an haw pui chuan khaw thlen dawnah hlado an chham ve ðin. Mahse tunah chuan an hlado chu chham thiam an awm tawh lo. Upa ho ka zawh ðin pawhin hman lai chuan hlado an chham ðin thu an sawi bâk chu anmahni in an thiam tawh loh thu in min chhang ðin.

An sa kah/awh chu a lian a nih chuan a khua in an ei a, a te deuh a nih chuan chhung tin a pa ber chauhin an ei ðin a, an eibang a ruhkawlte chu bel lianah an dah a, changel hnahin an chhin phui vek a rappuichungsangah an dah a, nithum leh zan thum hnuah pa ho chuan an ei leh ðin.

#### 4. **Bawng/Sial chhun :**

Bawng/sial chhun hi Miriate ruaiah chuan a ropui ber a ni a, a hautak hle bawk. Bawng an chhun nachhan hi an kût atan ni lovin damlo ramhuai in a tih dam a tan a ramhuai hnen a an inthawihna a ni.

An dam loh chuan ramhuai puithian emaw, aien thiam emaw hnenah an kal a, puithiam/aientu chuan an dam theih naturin bawng/sial//lawi etc... a inthawih tura a lo tih a vanga hetiang a inthawih hi an ni. Tumkhatah bawng pahni an chhun chang pawh a awm ðin. An puithiam in ai a lo en dan chu chi hnih a awm a, pakhat chu ‘Hawra’ an ti a, pakhat chu, ‘Howngpui’ an ti.

Miriate ramhuai hnen a an inthawi lai

Hawra a ai an en dan chu; Darmang a an vuakna lai, a tle lai takah hian puithiam chuan tel a hnawih a, chumi a tel hnawih a en tur chuan midangin an lo hmuhpui theih loh nan puan in a inkhuh tlat ðin a ni. A en dan dang leh chu aien thiam chuan aklutzungpui tinah tel a hnawih a, chumi a kutzungpui a tel a hnawihah chuan ai chu a en ðin a ni. “Midang chuan lo en ve reng mahse an hmu ve thei lo a ni,” an ti. Ai entu chuan a duh duh sawi mahse midangin an hmuhpui vet lat si loh a vangin aientu sawi ang a piang chu an ring em em zel mai a ni.



Howngpui hmang a ai en dan chu lasai ngul hmangin a ni a. Aientu chuan lasai ngul chu a chelh a, ahan chhamphual a, eng ran hmangin

nge an inthawina tur, ran hming ahan chham fuh chuan lasai ngul chu a lo inthên vak mai a, achang pheï chuan aientu ban pawh chu a khur dur dur hial òin.

Hetiang a bawng, sial leh lawite an chhun hi an inthawina a nih rualin an hausdakna lan tirna pawh a ni tel bawk. Hetih hun lai hian ran lian bawnga an inthawi bâkah ran te vawk, ui leh ar te pawh inthawina tesepah an hmang tam khawp mai. Bawng chhunah hian ahautak leh awlsam chi a awm a, chungte chu; Uariak (Zanriak) leh Linglang (Lehlan) te a ni.

#### 4.1. **Uariak** (Zanriak):

Aientu in bawng puitlin pakhat emaw, pahnih emaw a inthawi tura aien tirtu, damlo chhungte chu a lo hrilh chuan chu inthawina hautak tak mai a inthawih thei tur chuan an inbuatsaih nghal ang a, a hautak deuh a vangin òhenkhat chuan bawng chu an chhun nghal mai thei lova, mahse ramhuai hnenah puithiam kaltlanga bawng chhun tura an lo intiam tawh a vangin damlo chu a dam daih tawh hnuah pawh bawng chu an chhun ngei òin.

Bawng an chhun dawn chuan hmun dang danga awm an chhungte pawh an inchah khawm vek òin. Chung; hmun dang ațang arawn kal, an chhungte chuan an inkungkaih dan a zirin; athen in vawksa an rawn keng a, a òhen in ar an rawn pai far bawk òin. Chung an mikhualte chu an haw lamah pawh an inkungkaih dan a zirin athen in bawngsa, vawksa leh ar te bawng chhuntu te chuan an pai haw tir leh vek òin. Bawng an chhun hma chuan an bawng chhun tur dahna ‘*Riiawng krowng*’ an tih chu an siam a, bawng leng tawk chiah in thing leh mau in an hung a, bawng chu bawk thei lo turin an siam bawk a. Chutah chuan bawng thlunna tur thing mal tiat vel an phun a, bawng pakhatat thing pakhat zel an phun a, chutiang thing an phun chu ‘*Limpu*’ an ti a, ‘*Turtut*’ ti pawhin an sawi bawk. ‘*Turtut*’ tih chu, “Abul tihngheh” tihna a ni.



Limpu bulah chuan lung an phun a, chu an lungphun chu ‘*Huaâi*’ an ti. Chu lung an phun chu an bawngchhun hriat rengna lung phun a ni. An lungphun hi a lian hran lova, engmah an ziaak hran lo bawk. An bawng thlunna chung chu an dawh duai a, thenkhat chuan achhawngin an dawh bawk. Chumi an dawh chu kurkum leh ziahphuai rawng hnawihin achung lamah thing suih zum rawng sen leh a pawl a hnawih an ti lawr fur bawk. An thil dawh chu an chei nasa thei hle thin. Chu an thil dawh chu ‘*Riang krowng*’ an ti. Chutiang a an bawng chhunna tur an siam hna chu, ‘*Sawtna pumpau sip*’ an ti.

Zu bel leh nula in zu a khawn lai

An bawng chhun tur an lam hualna tur sir velah chuan zupui bel (hlum bel) hunna tur an siam thluah a, an zupui bel hunna tur



pawh chu an thiam ang tawkin mau, changel leh thangtung hnah leh ziahphuai rawng hnawih in an chei bawk. Zu bel khat zel chu a viltu an awm zel a, chuta zu chu nula leh tlangvalin an khàwn deuh ber a, upa-te leh a duh apiangin an khàwn thei tho bawk a ni.

Mire Bawng chhun tupa in

An bawng chhun tur chu a chhuntu te in lam hawi zawngin an thlung thin. An bawng chhun tur chu chutia mi zawng zawng hmuh theih a khawlai a an hung chhung a an thlung chu a zak ang tih an hlauh a vangin, “A zah loh nan,” ti in puanpui tharin an khuh thin. Bawng



chhuntu te sumhmun zawn dithlifarfem tlakna-ah chuan rawpui sei tak a ler kuai thla nguiah tham hi an phun a, a ler uai thla-ah chuan vapual bu lem hnanga an siam chu an khai a, a kul laiah takah chuan vapual thlawklai lem hnanga an siam chu an dah bawk a, chu rua chu ziahphuai rawng chuan an chei buai bawk a ni.

Bawng an chhun lai a hetiang a rua sang tak a an phun, an chei buai mai bawk hi ‘*Dawnglu kauma*’ an ti. Hetiang a Miria te’n bawng an

chhun a pianga Dawnglu kauma an siam ziah na chhan chu an thawnthuah; Hmanlai hian pa pakhat hian fapa pahnih a nei a, a nupui chu a thi a, a nupui thih hnu chuan nupui dang a nei leh a, chu a nupui thar chuan a pasal fate pahnih chu a tiduhdah thei em em mai a. Apasal chu a fate pahnih that turin a ti a, mahse an pa chuan afate thah mai chu tha a tih loh a vangin ramhnuai hmun hla takah a kalpui a.

Chutah chuan hnuchhiah in a hawn san tadaih mai a, Afate pahnih chu ramhnuaiyah chuan rilṭam in an vak an vak ta mai a. Nakinah chuan thing kung a vapual bu hi an hmu a, a u zawk chu vapual tui chu lak tumin thingkungah chuan a lawn a, vapual tui chu a la a, pakhat chu a ei a, pakhat chu a nau tan ken thlak sak a tum a, mahse a kut pahnih chu thingkung aṭang a chhuk nan chuan a hman a ngaih a vangin vapual tui chu a hmuam a.

Thingkung aṭang a chhuk tum a a ṭanna lamah a vapual tui hmuam chu a dawlh palh ta daih mai a, chutia vapual tui a dawlh chuan a u chu vapualah a chang dawn ta mai a. Vapual a achan dawn chuan a nau hnenah chuan tihian thu a chah a, “Ka nau, vapual tui kha ka dawlh palh hlahu mai a, chuvang chuan vapualah ka chang dawn tlat mai, vapual a ka chan chuan ka thlawhna apiangah min zui zel la khaw chhungah ka hruai lut ang che.

Nakinah i lo hausa hle ang a, chutih hunah chuan bawng te i la chhun a nga, bawng i chhun hunah chuan sumhmun lam dithlifarfem bulah rua sang tak i phun a nga, hnangin vapual lem i siam a nga, a bu lem nen, min hriat reng nan raw lerah chuan i lo dah ṭhin dawn nia,” ti a a lo chah a vangin a u hriat reng nan a u in a chah chu a dah ta zel a, chu chu tun thleng hian an la ching chhunzawm ta zel a ni.

Bawng chhuntu te hian an bawng chhun ruaiah chuan anmahni leh ramhuai inkar a palai, bawng pakhat a mi pahnih zel an nei tur a ni a. Inthawitu puithiam hran a awm bawk ṭhin. Chutiang a palai chu ‘*Riamang*’ an ti a. Puithiam chu ‘*Uamow*’ an ti. Palaite chuan puithiamte chu an pui ṭhin. Chung an palaite chuan bawng chhunna a lo kal mikhualte chu an lo chiauu in zu a awm leh awm loh te an ngaihven reng tur a ni. Bawng chhuntu te chu an buai em ṭhin a

vangin chung palai ho te chuan a ʈul ang angin bawng chhuntu te chhung chu an lo pui ʈhin, an ʈangkai thei khawp mai.

Bawng chhuntu te chhung leh ramhuai inkar a palaite chuan bawng chhuntu te in an lo thlen aʈangin bawng chhuntu te chhungkaw zing a mi, mi pahnih nen chawhmeh, antui, hrui chi reng reng, entirnan, mai, behlawi etc chu an ei thiang lova, rakzu pawh an in ve tur a ni lo. Inthawina sa pawh an ei ve tur a ni lo bawk. Kuva pawh an ei thiang lo.(panhnah hi hrui nei chi a nih vang a ni). Athur chi reng reng an ei tur a ni lo bawk. Chutiang chuan ni sarih an in serh tur a ni.

#### An zu khawn lai

Bawng chhuntu te in chhuat laiah chuan zupui bel hnih an hung reng a, a viltu chuan a ʈut chilh chawt mai ʈhin. Chu an zu chu ‘*Pawitang iu*’ an ti. Tar leh upate chuan dawhkan hniamte “*Pawitang*” an tihah chuan ti ti pah in zu an in reng ʈhin a.



#### Nula te lâm tura an inbuatsaih lai



Zan dar kua velah chuan puithiamte leh upate chu an bawng chhun tur chu an lam hual ʈhin a. Lam tura in a ʈanga an chhuah hma chuan zupui an khàwn phawt a, chu chu “*Tarowng iu*” an ti. Chumi hnu chuan Puithiam leh upate lam hun a an tum bik ʈhin; an rimawi tum chung chuan tual zawl a bawng an chhun tur an thlunna lam chu an pan ʈhin.

An lam ʈan dawn chuan pawn a zupui an dah chu bawng chhun tute chhungkua a ʈangin an dâwt a, lem lovin an hmuam a, chumi bul a



hnah a an dah, buhfai leh aiduchhe zailep chu la in an sumhmun dithlifarfem bul a raw sang tak an phunna Dawnglu kauma-ah chuan an zu hmuam chu phuh in an thil lak chu an va dah hmasa te te a, chumi hnu chuan chutiang bawk chuan an bawng chhun tur chu an zu hmuam chu phuh in buhfai leh aiduchhe zailep chu bawng bulah chuan an va dah leh a, chumi hnu chuan an bawng chhun tur chu an lam hual thin.


Tar leh upate'n an bawng chhun tur an lam hual

Hetia tar leh upa leh pavalai te'n an bawng chhun tur an lam hual hian pitarte tihloh chuan an tumphung chu an keng deuh vek thin. Thenkhat chuan zu um te pawh an keng bawk. Nau paw pah a lam lawp lawp tawkte pawh an awm bawk. An lam dan chu a sawtin an sawt deuh awoh awoh a.



Lam pah chuan an tum phung chu an tum thin. Hetia upa te'n bawng an lam hual lai a an hla sak hi tunlaiah chuan upate pawh thiam an awm tawh loh a vangin a thluk ringawtin an sa mai thin.

Athluk a an sak dan chu “*Haw he ü, haw ü, haw he haw ü haw ü,*” ti in an sa mai a, a hla thu hi bung dangah kan tar lang ang. An puithiam chuan a han sa hmasa a, a sak ang chiah a sak tur a ni a, an lo rui tawh bawk nen, puithiam duhtusam chuan an ti rual thei lo hle thin a, an tan tha zingin mi an ti hlim thei khawp mai. Anmahni pawhin nuam an ti thei thin khawp mai, an ke per tan tan pah in, “Anuam lutuk, lei pawhin min dawl dawn hleinem le,” te an ti vel thin. Hetia upate an lam lai hian a khat tawkin darkhuang an lo tum ri hluah hluah thin. Upate chuan an bawng chhun tur chu vawi riat an hel tur a ni.



An bawng chhun lam lai


**Up ate lam lai a an tumphungte chu hengte hi a ni:**

1. Darkhuang. 2. Darbenthek. 3. Darmang.
2. 4. Ner (chawthleng tlangparh lo chi)

5. Tu (tuithawl apang a a dawt ngil tak a lawr ve ve)
6. Uasa Plung (tunah chuan Rina Plung pawh an hmang bawh)
7. Kichowh Plung(buh seng lai a an Plung tum chi)
8. Khuang te a ni.

An bawng chhun lam lai

Hetia tar leh upate an lam hnu hian zanlai pelh tawh lamah thalaite chu an lamna rimawi chi kim nen, a siruk la in a tuk zing a bawng chhun tur chu an lo lam hual ve leh a. Hetia thalaite an lam hian mipa te'n rimawi (Plung) an tum a, hmalam pan a sawt ouh ouh pah in an lam a, hmeichhiate chu mipate hmachhawn zawng in Themthainu ang a hnungtawlh pah zelin an lam a, Mizo buhchil ang deuh a sawt chungin an hnungtawlh thin.



An rimawi (Plung) zing a ate ber “*Plungkechowh*” an tih chuan lam a rel a, an lam dan bi thlak hun pawh Plungkechowh ri-ah a in ngat a ni. An rimawi famkim a rual khat an han lam ri vut vut mai chu a ngaihnawn in a ropui khawp mai. An plung ri chu mawi tak a ni. An nula lam erawh han en mai chuan lam dan chi dang em em hmuh tur a awm hran in a lang lo.



An bawng chhun lamna a an Rimawi tum

Hetia an lam hian thalai rawn lamte chu khaw khat mai nilovin khaw dang dangte pawh an rawn lam ve thin a, khaw neitu te an lam hmasa ber a chumi hnu chuan khaw dang atang a rawn kalte chu an lam chhuak ve thin. Pawl khat an lam chuan an rimawi chu a ri a mawi in a ropui em em mai a, mahse khaw dang dang an rawn lam tawh chuan an rimawi (Plung) ri chuan mumal pawh anei thei tawh lova, a ri nuak nuak tawh mai thin.

An Rimawi (Plung/Rawchhem chhia lo siamthatu in a siamtha lai

An Plung hi tuithawl leh mau a siam, a ti ritu ber a kharkhep chu khuaihna a char mai a nih a vangin ham nat leh ham rei chuan a chhiat zung zung thin a vangin an plung chhe siamtu (*Plung sara*) in an vil reng a, a chhia a piang an lo siam thin a. Lam rei thei a in el an nih bawk avangin an rimawi



(Plung) an ham chu an tang thei hle thin a, chu vangin a chhe zung zung a, an Plung sara in an Plung chhia a siam hneh tawh loh chuan an lam chu an chawlh mai a ngai tawh thin a ni. A lam rei berte chu pakhatna an ni thin a, Lawmman erawh a awm hran chuang lo, mahse hmingthat erawh an hlawh chhuak thung.

Khaw dang atang a se chhung a lam tur a rawn kal te chu a ruk thei ang ber in an rawn kal a, lam hun hma a an va thlen pawhin an rimawi Plung chu khawiah emaw an thukru thin. An rimawi Plung hi a kawpkim tur a ni lova, pawl khatah 9/11/17/21/25 emaw tur a ni. Plung lian lam chu a lian in a sei thei hle a, an lam lai chuan puan in a paina an siam a an pai thin, (nau hmathlak ang hian) a ri pawh a thum tha hle bawk. An Plung chu a ri tih thum nan adawt chu raw thel pan an vuah vek thin.

Nula in phenglawng a tum lai

**Thalaite lam lai a an Plung hmante chu:**

1. Plung kechowh (Ate ber).
2. Plung kema.
3. Plungklangchah.
4. Tingteng Plung.
5. Tingteng Plung lau.
6. Tingteng Plung chah.
7. Plung kakma.

Khuang leh darkhuang te pawh an lo vaw ri reng bawk.



Miriate rimawi khawvel a sawi hmaih hauh loh tur, an bawng chhun lam lai a an hman ve lem loh, an nula rim lai leh an lunglen khaw har

lai a an tum thin engemaw zat a la awm bawk a, chungte chu hengte hi an ni :

1. Taraw (Hmawlh a an nawh rik thin, Violin ang).
2. Mau tingtang, hrui nga nei.
3. Prui (Phenglawng).
4. Rinna Plung.
5. Hnah ham rik.

Thalaite an lam dawn hian; an lam dawn ni, zanriah chum hun vela an lo siam, ramhuai in lamte chu a tihbuai lohna damdawi an siam mau thei a an dah, ui thi, vawk thi leh bachhia (Bal ang tak, luikam a awm thin, bal nei lo) chu lam turte chalah an hnawih hmasa vek thin. Zanlai pelhah ramhuai hnenah an inthawih leh thin. Ui thi hi ramhuai in te'n riau tura an ngaih a vangin chung lânte chu ramhuai in a tihbuai lohna tura damdawi an siamah chuan ui thi chu an telh a ni.



Nula in thil leitir tur a tlangval a pawt lai

Hetiang a bawng an chhunna-ah hian hmun hrang hrang a tângin mite an lo fuan khawm chiam thin a, bazar hmunpui ang mai in nepnawi dawrte pawh an siam bawk thin. Nula leh tlangvalte an lam zawh hnu chuan chung an dawr siam (lawilo dawrpui ka ti mai) ah chuan an bazar nghal sup sup thin a. Chu Lawilo dawrpui a an bazar dan chu; nula te'n tlangval an duh a piang an bânah emaw an kawrah emaw an man a, dawr a an thil zawrh, chhang, sabawn sahriak leh thil dangte an lei tir a, thenkhat chuan an duh duh an la a, chumi man chu tlangvalin an pek a ngai thin a ni. Tlangval thenkhat te chuan an leisak mai duh thin loh a vangin nula in a thil duh leitir tura an inphihna lamah mipa thenkhat chu nulain an pawh avangin an kawrkilhte a tla phung a, an kawr ipte te a peh phung thin. Hetih hun



lai hian nu leh pa te pawh an bang bik chuang lo. Tlangval hmeltha deuhte phei chuan mantu an ngah thei hle thin.

Tlangvalte chuan hetih hun lai a nulate'n an man hun a an thil ngen leisak theihloh hlau in hun engemaw ti a tang khan pawisa an lo khawl ve thin a ni. Anmahni sawi danin nulate tan a an insen-na chu a thlawn a ni vek bik lo va, a hmunah bill an la thei thin a, bill an la mai thei lo a nih pawh in, chung an bill lak loh a te hnenah chuan, “*Chawfun kan indah lawk a ni mai,*” an ti a, chu vangin chutih hun lai a hmeichhe lak a sum sen chu an ui bik lo a ni. Hetiang a hmeichhia in mipa thil a lei tir hi hetiang ruaiah chauh nilovin ruai puitham deuh leh sakhaw thil a an puipunna-ah pawh an ching tho a ni. Kristiante hunpuiah erawh chuan chutiang chu khap tlat a ni thung.

Upa hoin zu an khawn lai

Hetianga an hunpuiah hian aurinna (Mike) a lo zai ngar ngartu an awm thin a, an zai hian bul an tan tawh chuan hla tawp hun bithliah a awm ve lova, hlasatu in a zai peih chhung chu chum lo chat loin a zai reng mai thin a.



Achang chuan zai lam a ‘kei’ inti deuhte chu hla thu hmangin an inhnial thin a, a hnial hnehtu zawk chu ‘hla thiam’ ti in an hming a than phah hle thin. Chutiang a hla a an inhnial chu, “*Meng kheng*” an ti. Zaitu te chu tlaivar thak a an zai chang pawh an awm thin.

Khua a var velekhawvar lawmna zupui “*Uarngeng iu*” an tih chu bawng chhunna a kal zawng zawng te'n an khawn theuh thin. Zing karah bawng chu an chhun a. Bawng an chhun lai chuan bawng chhuntu te chhung chuan nupui pasal an inneih lai a ‘Kawmbawng’ an tih ang khan an chhungkua ate ber a tanga a lian ber thlengin an ban ding lamah la dum emaw, la sen emaw, la var emaw an hreng vek thin. An luah buhfai leh aieng rawt dip an tat leh vek bawk thin. Chutia an tih nachhan chu ramhuai in a khawih loh nan leh dam reina ni a an ngaih vang a ni.

Khawvar zu an in zawh hnu chuan zan a upa hovin an bawng chhun tur an lam hual ang khan an bawng chhung tur chu upa hovin wawi

riat an lamhual leh a, chumi hnu in nula leh tlangval te'n an rimawi nen chuan an lam hual leh thin. Chutia nula leh tlangvalin an bawng chhuntur an lam hual lai chuan bawng chhuntupa chuan bawng chu lam pah in a chhun a, a chhun thi nghal mai duh si lova, rei tak hreawm tak a fei nen a lam pah a a chhun hnu chuan a zakdawh a a chhun a, bawng chu a thih hma in alei an pawt chhuak a, an help a, bawng lei chu bawng an thlunna a an thing phun “*Limpu*” an tihah chuan hmawlh zum in an khengbet thin.

Bawng chhun tupa in a lam pah a an bawng chhun an hnuk lut lai

Hetia an bawng chhun a la thih hma a alei an hleh sak a limpu a an khenbeh na chhan chu; “Hmanlai in pathian in hnam hrang hrangte hawrawp a sem theuh a, chutih lai chuan keini chu kan awm ve lova, kan hawrawp chu changel hnah a ziaak in minrawn pe turin pathian in bawng arawn tir a, mahse bawng chuan kalkawngah kan hawrawp ziaakna changel hnah chu a ei daih vanga hetiang a bawng hi chhun kan ni,” an ti.



An bawng chhun chu a thih chuan an hungna atang chuan an lachhuak a, bawng chhuntu in lamah chuan an hnuk a, chutia bawng thisa an hnuk lai pawh chuan nula leh tlangvalte chuan an rimawi chikim nen chuan an lo lam hual reng bawk. An bawng chhun chu a chhuntu in an hnuk thlen chuan bawng chungah chuan a chhuntu makpa te chu an thu a, chung anmakpa bawng chung a thute chu an pute'n diar thar an khim tir a, zu an pek hma chuan an tho duh thin lo a ni.

**Chia tan :** Hei hi an bawng chhun ruai tawp zan a an inthawina a ni a. Ramhuai in a tihbuai loh nan leh thil thalo tak tak lak a invent nan a inthawihna a ni. Chu an inthawina sa chu tum khatah an ei zo ngei ngei tur a ni, an ei zawh loh chuan an paih tur a ni, dahthat a thianga lo.

**Chaknga lawng :** Hei hi bawng an chhun lai a luikam a an inthawina bik a ni. Heta an inthawihna sa hi chu vawi khat a an eizawh vawk theih loh pawhin a rep theih a, he inthawina sa an

chhum, an ei bang pawh a la ei theih zel bawk. Bawngchhun program tawp zan dar sawm velah bawng chhuntu te leh bawngchhun a palaite, bawng chhuntute chhungkua leh puithiamte chuan zu an hmuam ang a, an zu hmuam chu an luhkapuiah an phuh tur a ni. Bawng chhuntute chhungkua in an phuh hmasa a nga chumi hnuah palai te'n an phuh ve ang, ahnuhnung berah puithiam in a phuh ve ang. Chutia an tih a tang chuan an bawng chhun ruai zualpui chu a zo tawh ang.

**Chia tim :** Bawng chhun ruai an ei bang nawi leh a ruhkawlte chu an chhum leh a nga, engmah an thlak tawh tur a ni lo. An sa chhum chu tawk an tih hunah suan thla in an sa channa '*Khàm*' an tihah chuan an bun chhuak a nga, a daih hnuah chi an al ang. Chu chu hlum belah an dah leh a, aphui theiang berin hlum bel chu an chhin in an char a nga, chu chu thatak in an dah a, bawng chhun ni a tang chhiar a a ni ngana-ah an hawng a, chu chu buhfai dendip leh maipawl emaw, bal emaw nen an chhum leh ang a, chu chu a khua in an ei leh thin. Bawng an chhun hun ni lova an ruai pangngai a chutiang a an sa eibang ruh um chu '*Chia su nau*,' an ti. Chumi an ei zawh a tang chuan bawng chhuntute chhungkaw zing a mi, mi pahnih leh an palaite thil nghei chu a tawp tawh ang. An bawng chhun ruai pawh chu a tawp fel tawh ang.

a. **Linglang** (Lehlan).

Hei hi chu Bawng chhun ngai si, mahse dan ang tak a bawng chhun tlin si lote bawng chhun dan a ni. Bawng an chhun dawn chuan a hming in an lamhual ve a, hetiang a an bawng chhun hi chu a lian ngai meuh lo. A awlsam thei angber in an sawngbawl a, khaw èn lai in an tih tur chu an ti zo hman vek thin.

**An lànte :**

1. **Chaklu plai** (Salu lam) : Sa lu an lamna a ni.
2. **Likep plai** (Cheraw kan) : Hmanlai chuan mipawimawh deuh an thih hian Cheraw kan in an lam thin thu an sawi a, mahse upa ho ka zawh pawh in "Hmanlai chuan mi pawimawhte thih in cheraw kan in an lam thin," an tih bâk chu hmutu an awm tawh lo. An lam nan hian mau hmang lovin suk an hmang thin a, khup/tai thleng velah suk chu an khawn thin thu min hrilh.



3. **Tangsak plai** : Kawchhung a ramhuai lut an hnawhchhuahna lam a ni. Akawchhung a ramhuai lut ni a an ngaih chu ui ril, a pumpui nen an pai tir a, ramhuai awmna ni a an ngaih hmawng thing bulah chuan an awm tir a, hmawng thing nen chuan an lam hual thin.

b. **Bawng chhunna a lam** : Bawng chhunna a an lam hian an lam chawl chuang silovin kechheh ti dang lam deuh hlek leh an kut vai dan chihrang hrang a awm a, chung chu a hming hran an phuah ve thlih thliah a chungte chu :

- i. Sawt sawt plai (Khup suk lam).
- ii. Pak khawk chu chi plai (Vawk ke thai lam).
- iii. Tem krawt plai (Chengkawl tawlh lam).
- iv. Pang iowng plai (Hlothlawh a hma bun lam).
- v. Rua taplan plai (Rul in di lam)
- vi. Mawuih uat plai (Alu chawh lam).
- vii. Mang chup uan plai (Lal chibaibuk lam).
- viii. Luluk plai (Kutdawh lam).
- ix. Sawng sut plai (Kaikuang tawlh lam).
- x. Chetkrang plai (Sipai lam).
- xi. Changtawng plai (Indo a hnehna lam) :

Changtawng plai hi hmanlai in indo a hnenna ni lawmna lam a ni,” ti a an sawi bâk chu hmuh tur leh hmu ni a insawi pawh an awm tawh lo.

6. **Chhechham a thian/unau insiam** : Miria te hi chhungkhat, thian, unau leh chipuite an ngaihsak in an ngaipawimawh thei em em mai a. Mizo te’n hmelhriat loh te chu kan hming leh khaw hming kan inzawt thin a, Miriate erawh chuan an khaw hming zawt hmasa lovin an hnam hming leh an pa te hming an zawt hmasa zel thung. Miriate chu a tlangpui in khaw khatah hnam khat an awm thin a vangin an khaw hmingah an hnam hming an hmang tlangpui, Sorkarah erawh chuan an khaw Kharbari hming emaw a ni thung.

Mizo te’n, “Thian sauitan” kan tih ang deuhin nghet tak a thian leh unau insiam dan an nei a, an ni chu chhechham in thian/unau-ah an insiam thin. Hetiang a thian/unau a insiamte chu an inthian/unau dan a nghet em em thin a ni. Thian/unau a insiamte chauh nilovin an chipuite ve ve thleng pawhin nupui pasalaha an innei thianga tawh lo a



ni. Innei lo awm pawh ni se an pawt then leh ngei nghei thin, inneih luih chu thihna emaw, chhungkaw din a tluan lohna ah an ngai a ni.

Chhehham a thian/unau a an insiam dan chu he tiang hian a ni: Thian/unau a siamtu zawk chuan bawng a talh a, bawng käl, apumpui, arilpui leh arilfang, achuap, athin leh a sa tlem chu thil dang engmah telh lovin a chhum a, thian/unau a siam leh ruai theh tura a in a awm zawng zawngte nen chuan zupui bel khat a mi an khawn turin zupui bel chu chhuat laiah a dah ang a. Chumi hnu chuan thian/unau a a siam chu a ko a nga, a hnenah chuan, “He zupui hi thian/unau a kan insiamna zupui a ni a, nang han khawn hmasa rawh le,” a ti a nga, a thian/unau a a siam chu a khawn hmasak tir ang.

Chutia a thian/unai in zupui a khawn chhung chuan chu a sa chhum chu chaw nen a hlawm ang a, athian/unau in zupui chu a khawn zawh chuan chaw leh sa a hlawm chu a thian/unau chu a barh ang a, barh pah in, “Hei thian/unauah ka siam ta che a, thing a ka tlak chuan ka tlakna thing chu i kit a nga, tui a ka tlak chuan ka tlakna tui chu i theh kang vek tur a ni. Mei a ka kan chuan ka kanna mei chu i leih mit a nga, ka chanchin a chhia a tha, mi in an sawi i hriat chuan min hrilh nghal zel tur a ni. Chutia i tih loh chuan he ka chaw barh che hi i tan thihna tûrah chang rawh se,” a ti thin. Chutia a tih zawh chuan a thian/unau a siam chuan chutiang bawk chuan a ti ve leh tur a ni.

Thian/unau a siamtu chuan a thian/unau a siam nen a an inhriat reng nan Silver tangka 30 a thian/unau a a siam chu a pe ang a, a bawng talh sa chu hmun thum a then a hmun hnih a pe bawk tur a ni. Chu a sa pek chu, angumruh, amei tel in, a bawp pahnih leh a dar pakhat, a ir leh a vun thenkhat a pe tel bawk tur a ni.

Thian/unau a siam chuan thian/unau a siamtu chu abawp pakhat chu a pe let ve leh tur a ni. Thian/unau a siamtu chuan ar pakhat a talh leh a nga thian/unau a siam nen chuan hmun khatah chawhlui an kil dun tur a ni. Chuta tang chuan thian/unau an nih tawh a vangin an chipuite ve ve chu nupui pasalaha an innei thei tawh lovang.

Ṭhian/unau a asiàm chuan engtik hunah emaw ṭhian/unau a siamtu in a tih ang chiah chuan a ti ve leh ngei tur a ni. Mahse, ṭhian/unau a siam hmasatu ai in silveer tangka khat in a ṭhian/unau chu a pe tam zawk tur a ni. Chutiang a a tih ve hma a a lo thi a nih pawh in a fapa talin chutiang chuan a ti ve tur a ni.

**7. Awi U Pa** (Nu leh Pa chawimawina).

Miriate hian an nu leh pa te dam lai ngei in anmahni hring a an lo enkawl puitlin a vanga lawmthu sawina leh an nu leh pa te chawimawina; nu leh pa hmangaihna hria leh a tlinte chuan sial pahnih leh bawng leh vawkte talhin ruai ropui tak an buatsaih ṭhin.

Chutah chuan hmun danga an chhung khat leh unaute leh an ṭhian ṭhate an chah khawm chiam ṭhin. Chung an michahte chuan achahtu te pek tur ar leh fei an keng vek a, an va kalna tur kawtchhuah a an thleng tawh a ni tih hriat nan halpuah hal tur an keng tel bawk ṭhin. Chumi ruai a an mi sawmte chuan khua an rawn thlen dawn in kawtchhuah an rawn thleng tawh a ni tih hriat nan an halpuah rawn ken chu an hal a, ṭhenkhat chuan silaite pawh an kap ri dum dum bawk ṭhin.

Kawtchhuahah chuan an ar rawn ken hmul te chu an pawt thla nuai a nga, a sawmtu te lam chuan an mi sawmte an rawn thleng tawh tih an hriat chuan a hmuak turin zu um leh diar var tawng nga ai tawi lo nen an lo hmuak a nga, kawtchhuah an thlen chuan halpuah an hal a nga, mikhualte chu zu an in tir a, an diar ken chu an khim tir bawk ṭhin.

Nu leh pa chawimawitu chuan dawhkan hniamte ‘pawitang’ an tihah a nu leh pa chu chawhlui a buatsaih sak ang a, a nu leh pa te ṭhutna turah chuan an puanpui thar hlak a phah sak bawk ang. A nu leh pa te ei tur chuan sa chi hrang hrang a hlui a nga, a nu leh pa chu puan thar leh pawisa te a pe a nga, a pa chu diarvar a khim tir bawk ang.

A nu leh pa in chaw an ei dawn chuan an kut a sil sak bawk ang. A nu leh pa te chu zu no hnih, no thum in a thlit sak bawk ang. Zu no a nu leh pa te pek pah chuan, “Ka Nu, ka Pa, ka sèn têt lai aṭangin min enkawl a, ka zun, ka êk zawng zawng thianfai in min enkawl a, ka dam lohin ka damna turin theihtawp inchhuah a, tunah chuan hei, ka

lo puitling ve ta a, hetiang a ka lo puitlin theihna chhan chu nangmahni vang liau liau a ni. In thin ka lo tihrim leh in pawl ka lo sawi te min ngaidam ula, in damchhung chuan ka theih ang angin ka tanpui reng ang che u,” an ti thin. Hetiang a an nu leh pa te an ti lai han hmuh hian keini Mizo te hian kan unau Miriate hi hemi kawngah hi chuan kan tluk lo hle in ka hria, a ropui in hnuk a ulh hial zawk thin a ni.

Chutia a nu leh pa te chaw ei tura an thutna a an thut lai chuan midang chuan nu leh pa te chu zu tlem te te in an thlit sak in an lo pe theuh bawk a, chung lai vel a awmte pawh chuan zu an inthlit in induhsak nan zu an in intir liam liam thin.

A nu leh pa chawimawitu chuan a mikhual sawm te chu a ran talh sa chu thahnem tak a hawn tir thin. Chhechham kher lovin chung a ran talh sa te hmang chuan thin te pawh a siam bawk thin. Chu ruaiah chuan sial sa, bawng sa an ei nasat theih em a vangin “Bawng sa ei ruai ‘*Chia nga chak pawl*’ ” an ti bawk.

## 8. Chamleng.

8.1. **Chhungkhat inkan** : “Chamleng” an tih hi ahuhova sa nen a chhungkhat inkan a ni a, Hetiang hi tunhma chuan Mizo zingah pawh a awm thu Mizo upa pakhat in min hrilh a, mahse ka phak tawh a Mizo History ka zirna leh lehkhaw hrang hrang ka chhiar tawhah chuan hetiang inziakna engmah ka la hmu lo a ni.

Miria te’n hetiang a ruai nen meuh va chhungkhat an inkan thin hi an makpa te’n an puzawn (nupui pa) te lam an kan na a ni tlangpui. An nuta te’n an farnu hetiang a an kan chang leh an farnu te’n an nutate hetiang a an kan chang pawh a awm ve bawh. Hetiang a chhungkhat an inkan hun hi favang awllen lai a ni tlangpui. Ahautak thin em a vangin an chhunge an va kan turte chu thawtlawh hmasa lo chuan hetiang hian an kan mai mai ngai lo.

An va kan turte an va thawtlawh a, anni lam pawh an lo inpeih tawh a nih chuan a puzawnte kan tur chuan an khua a mi (achipuite) atam theiang ber; a puzawnte a kan na a kalpui turin a sawm a nga, ava kan tur a puzawnte khaw ei khawp tur ar, arpai in an pai a nga, a puzawnte khaw lamah chuan apui a nawi in an va kal a.

A puzawnte khua an va thlen chuan an ar ken chu a puzawnte khaw ei turin an puah nghal char char a, apuzawnte lam pawh chuan an makpate, anmahni rawn tlawh a rawn kalte zawng zawng ei tur vawk an talh ve nghal a nga, ei theih turin a chhum ve nghal char char baw a, mahse an thlen hlim chuan khua a nu ho chuan an mikhualte ei tur chu mikhual thlen khawmna-ah chuan an neih ang ang chaw leh chawhmeh an va dah khawm thin.

Hetia an chhungkhatte tlawh (Cham leng) a an ruai buatsaih dan chu nupui pasal an inneih lai a an ruai siam dan nen a inang deuh a, mahse hetih hunlai hi chuan an nupui pasal neih lai ang chuan dan a tam lo vethung, hetia an mâkpa te leh an puzawnte an ruai sa ei a inang lo hi chhungkhat inkungkaih dan hriatna-ah an ngai a, an ni chuan “*Chàn ngar*” an ti. Heta an len hian an puzawnte khuaah chuan nikhat an cham a, chutia an cham chhung chuan hlim takin zu te in hovin upa hote chu zan rei tak tak thleng an ti ti ho thin.

An mâkpa te an haw dawn chuan an mâkpa chuan a puzawn chu ar a talh leh ang a, chu a arsa chhumah chuan engmah a telh tur a ni lo. An haw dawn zan chuan an puzawnte leh an mâkpa te chu hmunkhatah an thu hova hlim takin zu an in ho thin. A puzawn chuan an mâkpa leh an mâkpa lam a upa rawn kalte chu diar var an khim tir thin a, an mâkpa te haw dawn tukah chuan an puzawnte lam chuan an mâkpa te hawn tur vawk an talh a, vawksa chu lian pui puiin an chan a, arpai in an pai haw tir thin, khua an thlen hun a a khua a ei khawp tura an hawn tir a ni.

Keini Mizo te pawh hian kan unau Miriate ang em hian chuan ti ve lem lo mah ila an tih dan hi entawn ve atan a tha khawp mai. Vawikhat chu ka pate unau zing a upa ber, Ka Pa Hluna chuan, “Kan tu leh fate pawh an inhre lo mai dawn, hmun hran hranah kan awm a, keini upahote pawhin kan tu leh fate pawh kan hre tawh lova, chhungkhat chaw ei hova inhriat tawn kan ngai e,” ti in Aizawl a tanging an chhungkua in Hnahthialah an rawn kal a.

Vawksa, Bawngsa leh sa dang pawh an lei teuh a, Hnahthial veng hrang hrang a kan chhungte inko khawm in kan inah chawhlui kan kil hova, chutia kan chhungkhatte kan han in hmu khawm chuan hmun hrang hrang a kan chhungkhatte, keini naupangte lam chu kan

lo inhre lo hle mai a, upa ho lahin keini naupangte chu tu fate nge kan nih lah min hre bawh hek lo.

Chutia chaw kan ei ho aṭang chuan chhungkhat kan ni tih pawh lo inhre miah lo chu chhung khat kan ni tih leh kan inkungkaih dante kan han inhria chu nuam kan ti in kan hlim tlang khawp mai. khatiang khan a khattawkin ti thei ṭhin ila chuan chhungkhat kan inkungkaih dan a ṭha reng thei dawn a ni.

Kha mi tum a chhungkhat kan inhriat bâk kha chu chaw kan ei ho leh theih tawh loh a vang leh kan hnathawhte a dan vangin hmun hran hranah kan lo awm darh bawh nen, kan tu leh fate chu an inhlat tulh tulh tawh a, chhung khat kan nih pawh kan inhre tawh lo mai dawn ni in a lang a, a thei chuan hetiang a, chhung lehkhate chaw ei ho hi nei thei ṭhin ila a va ṭha dawn em. Tunlaiah chhungkaw khawsakte a lo in ang lovin rethei leh hausa inkar a hla tulh tulh a, chhungkhat khawsak harsa zawk leh khawsa thei zawkte inkâr a zau tulh tulh mai thei dawn a ni.

Kan unau Miriate ang hian chhungkhat inkan ve ṭhin ila, chawhluite kil ho ṭhin ila chhungkhat kan inkungkaihna a lo nget zel a nga, chhungkhat a khawsa thei leh khawsak harsa zawkte pawh kan inkungkaihna a lo ṭha in atheite'n kan chhungkhat ṭanpui ngai zawkte pawh hmangaihna nen kan inṭanpui thei tawh in chhungkhat chu hmangaihna in kan insuih zawm reng thei dawn a ni.

8.2. **Damlo kan** : Hei hi chu in dang, khaw dang a an nu leh pa emaw, an pi leh pu te damlo na zual deuh emaw, na rei takte emaw an inkanna a ni. Damlo kan nan chuan ar an keng ṭhin a, ar keng kher lo pawh a inkân pawh an awm bawh. Damlo zual, dam chhuak tura an rin lohte an kan chuan ar an keng ngei ṭhin. An damlo kan chu na zual hle pawh ni se, an ngaihsak a, an hmangaih a ni tih lantir nan an ar ken chu talh in damlo chu tlem tal an ei tir ṭhin. A haw dawn in damlo kantu chu engmah hawn tir kher a ngai lo. Nu leh pa emaw Pi leh pute emaw damlo zual tak, dam chhuak tawh lo tura an ngaih ar keng a an kan chu “*Taawi*” an ti.

9. **Beng verh** : Mipa emaw hmeichhia emaw pawh ni se an fate beng verh hi an hnam kalphung a nih avangin an ngaipawimawh em

em mai a. An fapa upa ber beng verh lai phei chuan ran an talh ngei ngei thin. An fanute leh an fapa naupang lamte chu an beng verh na ran talh tur an neih loh chuan mifate bengverh ran talh denchhenin an beng an lo verh ve mai thin.

Fate beng verh hun hi kum bithliah hun a awm hran lova, duhtawk a an kal theih tawh a t̄angin a remchan hunah an beng chu an verh mai thin. An beng verhna hmanrua chu; hmawlh an suih zum a, chu an hmawlh suih zum chuan beng chu an verh a, chu an beng verhna hmawlh chu beh nghal mai theih turin an ulhtliah na tur an rek nghal thlap thin. Beng an verhna lai turah chuan bal zailep leh buhfai an bel hmasa a, a verhtu chuan eng eng emaw a han chhamphual a, chumi hnu chuan beng chu an verh thin a ni.

10. **Chamung pawk pawī** (Buh thar hlan kūt): Hei hi an buh thar ranhuai hnen a an hlanna kūt a ni. An lo ātangin buhvui pakhat emaw, pahnih, pathum emaw an rawn hawn a, chu chu an kang rova, chumi an kan ro sa chu an inthawina sa nen tualah an theh darh a, zu pawh tualah chuan an theh bawk thin. Chutia an tih chuan ramhuai, lei chung a thuneitu (Krawngma namma nam) peah an inngai a ni. Chutiang bawk chuan an inthawina sa leh an buh kan ro chu van lamah an vawrh leh a, chu chu boruak chung a thuneitu ramhuai (Malimala nam) an tih chu peah an inngai a ni.

Miriate hian van boruak leh ruahte hian huai neiah an ngai a, chungte pual chuan inthawihna an hlan thin. Tin, lei lam malsawmna pe theitu ramhuai pawh awmah an ngai a, tuifinriat leh lungpuite, thing lian pui puite pawh hian huai an nei vekah an ngai bawk. Chungte tan pawh chuan inthawina an hlan vek thin. An nun hi ramhuai hlauhna leh hlauh tlawinna hian a khat a ni ber mai.

11. **Chamawī** (Buh thar lawmna kūt) : He kūt hi buh an chil zawh a an inthawihna a ni a, lo lam a an thil serh tawpna a ni bawk. An lo a buh in a an phurh thlen zawh vek hnuah ahuhovin inah an inthawih thin. An inthawih ni chu Pathian ni emaw, nilai ni emaw a ni thin. Miriate hian an hnathawhna hmanrua zawng zawng hian huai neiah an ngaih vek a vangin an hnathawhna hmanraw hming kimin inthawina an hlan vek thin. He an kūt hi an tan chuan ni hlimawm

tak a ni a, chhung tinte chu vawk leh ar te talh in chaw eiah te an insawm thin a, hlim takin hun an hmang thin.

Changkran kût hmang tur a nula leh tlangval kalte

12. **Changkran pawî** (Kum thar lawm kût) : Changkran pawî hi an kût zinga pawimawh tak a ni a, Budish sakhaw kum thar a ni a, anni pawh hian kum tharah an pawm ve a ni. Miriate pawh hi ramhuai be mai nimahse, Mawk ho nen a inawmpawlh an nih vangte pawh a ni mai thei, “Budish kan ni,” an ti ve a, he an kumthar pawh hi an ngaipawimawh khawp mai. Mire khua-ah hian Budish milem pathian biakna in a awm ve nual a, chung an milem pathian biak in enkawltu zingah chuan anmahni Miria pawh an awm ve nual a ni. An kumthar niah chuan Krama sakhaw hruaitu te pawh Budhis milem pathian biakinah chuan a phusa pawl tak te an ni bawk.



Hemi ni hian hmun hla tak tak a tângin an milem pathian biakin awmna-ah apui a nawi in an kal khawm chiam thin a, Budish sakhaw zuitu tak nilo mahse Miriate hian huau huau an ngainat em a vangin kal khawm an tam hle thin a ni. Hemi hun hi Miria te chuan nikhat chiah an hmang thin a, Mawk Budish te chuan ni sarihte an hmang thin. Hemi ni pawh hian an tihpui dang ang bawkin nula te'n tlangvalte chu thil leitir turin an pawt a, nu te pawh an bang bik chuang lo.

Nula in thil lei tir turin tlangval a pawt lai

Pawisa kheltute chu a hma ni a tângin an lo kal khawm a, pawisa khelhna chi hrang hrang leh zu zuartute an fuan khawm a, lawilo dawrpui hi a ni ringawt mai thin. An mire infiamna sukpaiah (Taket) an tih pawh hemi niah hian hmuh tur a awm bawk thin.



Kum khat chhunga an pathian lim an dah chu hemi hunah hian an bual thin a, a bualna tui chu tinreng damdawiah tha in an ngai a, chuang chuan an dam nan an in thin a, inahte pawh an hawn bawh thin. Mi thenkhat chuan hetih hun hian an milem pathian inah chuan chaw leh chawhmeh fun an dah thin a, chung an chaw leh chawhmeh fun atang chuan an milem pathian chu tlem tlem in an pe thin a, abak chu a duh a piang ei tur a an tih a ni.

Coconut rahah hian hmawh an vit phun teuh a, chutah chuan pawisa leh lehkhawmaw an tar teuh a, chu chu an milem pathian hnenah an va hlan thin. Mi engemawzat chuan an milem pathian hmaah chuan agarbati chhi in bungbu kawt kawt in chibai an buk thin. Chung an milem pathian chibai lo buktute chu an milem pathian enkawltute chuan mal an lo sawm sak thin.

13. **Kua khang** (Khaw serh/hung) : Khaw serh hi an kut zingah chuan pawimawh pawl tak a ni. Hemi tum hian chhangte deng in vawh leh arte talh in chhungkhat leh thenawm khawvengte chaw eiah te an insawm thin a, an hlim thei thin khawp mai.

Khua an hung dan chu an la kai, lazai in an khua chu an zam hual chhuak vek a, ramhuai hnenah an inthawih thin. Hetih hunlai hian an khua atangin tumah an chhuak tur a ni lova, tumah anrawn lut tur a ni bawh hek lo. Tumphung tumin emaw bengchheng an siam tur pawh a ni hek lo. An chhuak lui emaw, an lo lut lui emaw, tumphung hmang a bengchheng siam an awm a nih chuan an inthawina chu ramhuai in a pawm lova, a bul atang a inthawih that leh a ngai a, chu an inthawihna a an ran talh man chu an dan bawhchhetu chuan a chawh vek tur a ni.

Hetia khua an hung hi Pathian ni emaw Nilai ni emaw a ni thin. Hetia khua an serh a an hung hi ni khat chauh a ni a, hemi nikhat chhung chu khua a mite pawh tuikhur thlang bak tumah an chhuak tur a ni lo. Chu hun chu, “*Uangdir*” an ti. Atukah pawh chawhma chu khua a mite chu khawiah mah an la chhuak tur a ni lo. Atuk chawhma an la serh chu, “*Uang uow*” an ti. Tlai lamah chuan an duhna hmun apiangah an chhuakvak thei tawh a ni.



Hetiang a khaw serh/hung hi kum khatah vawi hnih an nei thin a, mahse an khuaah natna leh thihna a tam lutuk a nih a aien thiam in natna leh thihna ata an him theihna tur atan a an khua chu hung/serh tura atih chuan kum laklawhah pawh khua chu an serh/hung bawh thin. Kum khat chung a an khaw serh/hung pangngai vawi hnih chu ‘*Satma khang*’ (Thal khaw serh/hung) leh ‘*Siadawng khang*’ (Fur khaw serh/hung) te an ni.

13.1. **Satma khang** (Thal khaw serh/hung) : Hei hi thal lai a khaw serh/hung a ni a, ahun hi an lo vah hma deuh January/February thla ah a ni. An lo vahna a tawhsual tawh lo leh an inhliam loh nan a ramhuai hnen a an inthawihna a ni.

13.2. **Siadawng khang** (Fur khaw serh/hung) : Ahun lai chu fur June/July thlaah a ni thin. Buh leh bal a malsawmna an dawn theih nan a ramhuai hnen a an inthawihna a ni.

## BUNG 18

### AN LO NEIH DAN

Miriate hi lo nei a eizawng an ni a, leilet nei sawi tham an awm meuh lo. Kan sawi tawh ang khan tunhma chuan hmun tha lai, leilet neih theihna hmunah an awm nual a, leilet nei pawh an tam, mahse tunah chuan vai



(benggoli) hovin an nek chhuak deuh vek tawh a, tunah chuan tlangramah an cheng deuh ber a, lui kam a awm, leilet siamna rem a awm thenkhat te chuan leilet an la siam a ni. Atlangpuiin lo nei a eizawng an nih a vangin an lo neih dan kan târ lang dawn a ni.

1. **Lo thlan :** Tunhma chuan lo an thlan dawn chuan upa hote thukhawm in an sawi hova, an lo duh nalaite an sawi hova, Mizo te ang a number pawt lem lovin an lo duhna lai an nei mai thin. Atlangpui in mahni lo chul an vat leh tlangpui thin. Hmanlai chuan Mizo in, “Ram theh” kan tih angin bawh bik ram an nei thin a, tunlai chuan chutiang chu a awm tawh meuh lo. Tunlaiah chuan upa ho han thut khawm a ro han rel a awm tawh lova, an duhna lai apiang an vat mai thin a, chuvang chuan lo vah dawn a lo inchhuh buai an awm fo thin reng a ni.

2. **Lo en :** An lo vah tur hi mang an chhal hmasa ve thin a, an mangchhalah chuan perh an zep a, an haw san a, zanah an lu-ah sahriak thihin pial takin an sam an khuih a, mang tha man tum ran in an mu thin a, an mumang a sangha an lo hmuh leh mithi in ‘Tür kim’ an hmuh chuan mang tha mangah an inngai a, buh leh bal a nei turah an inngai thin.

An mumang a bawng leh vawk te an lo talh chuan chumi lo an neih chuan thihna turah an ngai a, an lo en chu an chhuahsan a, lo dang an en leh mai thin. Lo chu an vah tawh hnuah pawh ramhuai awmna ni a an ngaih a lo awm a nih chuan an lo vah tawh pawh chu an chhuahsan leh mai thin.

3. **Lo vah** : Theihai a lo par a, phunchawng a lo parvul chuk tawh chuan lo vah hunah an ngai a, lo vah an tan nghal tawh mai thin. Lo vah hi February thlaah an tan tlangpui a, January thla a lo vat tan pawh an awm bawk.

Lo vah lai hian hmeichhiate pawh an awl chuang lova, a hmei a pa in lo an vat thin. Lo vah chu chetsual palh leh thih palh mai theih a nih a vangin upa in, “*Dawila pang lawng pang*,” an ti a, chumi awmzia chu, ‘Lo vah chu mahni kuang kuah ang kan ni,’ an tihna a ni.

4. **Lo hal** : Phunchawng par a lo chul tawh chuan lo hal hunah an ngai a, lo hal turin an inpuahchah tawh mai thin. Meilam phiah an uluk loh vang leh mei ven an fimkhur tawk thin loh a vangin an lo hal hian ram kang a tam thei hle thin.



An lo hal ram kang in khaw ram (khaw hmun hlui) a ti kang palh a nih chuan a tikangtu chuan vawk a chawi ngei tur a ni.

An lo halin khua emaw, huan emaw a tikang dawn a nih chuan a kang chu an thelh thin a, mahni duhna hmun hmun a hmun hran hran a lo nei an nih a vangin ram an ti kang nasa thei hle a, khua emaw huan emaw kang thei dinhmun a a ding a nih loh chuan kang thelh sen pawh a ni thin loh avangin ram kang chu an thlir ngawt mai thin. Ram an ti kang chhe thei thin khawp mai.

5. **Mangkhawh** : An lo chu a kan that chuan thlai thlak turin tha tam tak sen a ngai lova, a kan that loh erawh chuan mangkhawh nan tha sen nasat a ngai thei hle thin. An lo-ah hian atlangpuiin Mizo te angin thlam an sa nghal mai ngai lova, buh seng dawnah thlam an sa chauh thin. Fur lai a hlo an thlawh pawh in a sur a sa hnuaiah siksil khumin chaw an fak mai thin.

6. **Thlai thlak** : Mang an khawh zawh a thlai an thlak dawn in an lo khawi laiah emaw ramhuai (lo huai) awmna tur “*Turtut*” an tih chu an siam hmasa thin a, chu chu lo a an inthawi hun a piang a an inthawihna tur a ni.

Chu turtut-ah chuan khuar an siam a, chu khuarah chuan an inthawina vawk ril an phum thin. Lo a an thlai thlak tur zawng zawng chu chutah chuan tlem te te in an tuh hmasa vek thin. Chumi hmun chu perngo in an hual vek bawk thin. An lo a ramhuai tan a an hmun serh zau zawng hi tap tiat vel a zau a ni. Turtur chu thingbul awmnaah an siam kher tur a ni. Thingbul awmna a rem lo a nih chuan thingbul aiah mau pawh an phun mai thin. Chutia an lo a ramhuai hnen a inthawina hmun serh an siam zawh chuan thlai an thlak in buh an tuh thei chauh thin.

7. **Buh tuh** : An buh tuhna hmanrua chu chem. Chhia hi a hmawr lam an tât hriam a, afawng lian leh sei takin an siam a, avawna lai an ti te deuh a, chu chuan buh an tuh in thlai an thlak thin.

Buh tuh leh hlo thlawh lai hian Mizote angin hma an then ve ngai lova, an hma tawh tur hma an la a, mahni hma theuhah an thawk chho mawp mawp tawh mai a ni. Hma an chuah chuan an chawl zel a, tui te in in an chawlh chhung chuan mei te an zu thin. Hetia hma an chhuah a an chawlh chhung hian hmeichhiate chuan tuithawl teah thlai chi an pai a, mipa te chawlh chhungin thlai an lo thlak zel thin. Hmeichhia te chu an chawl ve ngai lo a nih chu. An hmanrua in a zir lo a ni bawh a, buhtuhah chuan Mizo te angin an rang ve lo.



8. **Hlo thlawh** : Hlo an thlawh hian thenkhat chu an inlawm ve thin a, mahse Mizo te ang chuan nula leh tlangval te an inlawm ve ngai meuh lo. An inlawm a nih pawh in mipa leh mipa, hmeichhia leh hmei chia an inlawm thin a, Mizovin, “Ngalchak thapei,” kan tih ang hi a awm ve ngai meuh lo.

### **An hlo thlawh hmingte chu**

1. Bawrrama = Hnuhpui.
2. Bawtuai = Hnuhhram.
3. Bawtiang = Athual.
4. Tatruai = Pawhchhiat te an ni.

Hnuhpui an kawih zawh hnu hian an lova ramhuai awmna a an siam ‘Turtut’ ah chuan an inthawih thin a, hetia an inthawih hian hnangin sei takin an tah a, chumi chungah chuan hnang bawh a siam vañhu lem chu an dah a, chutiang a vañhu lem hnang a an tah chu an lo-ah sih a awm a nih chuan siha te an dah a, an in chungah pawh an vit bur bawh. Hetiang a an inthawih tum hian in a tangin darbenthek leh tumphung dangte tum in lo thleng an kal thin.

Lo a inthawi tur an kal lai

Hemi tum hian inthawihna a an hman tur bawng emaw chu lo thleng an kalpui a, mahse lo a talh lovin inah an rawn hawpui leh a, inah inthawih nan an talh thin. Lova an thlai chin chi hrang hrang hnah chu tlemte te in sawhthing hnah nen inah an rawn hawn a, buh chu a bul chawpin bul khat emaw bul hnih emaw nen an rawn hawn tur a ni. In an rawn thlen chuan an inthawina tur lo a an va ken bawng chu ramhuai hnen a inthawih nan in a an luhkapuia an talh tawh ang. Chumi a tang chuan an chhungkaw zing a mipakhat in Phungchengkaw, Aifiar, Nghavawh leh ramsa seh hlum sa reng reng buhseng hma chu an ei thiang tawh lo a ni. Heng bakah hian sakhi sa leh saza sa pawh an ei thiang lo bawh.



Mizo te angin hlo thlawh lai hian tanpui ngaite inpuih hi a awm ve ngai meuh lova, chuvangin hlo thlo thei lo chuan a lo chu athlawh theih loh nalai chu a mak a ngai mai thin. Thenkhat chu a vah lai a an duham ang hui a thlawh lamah an thlo leh thei thin si lova chuvangin thenkhat chuan an lo chu an mak duai phah fo thin a ni. An ei leh in haichhuahna ber ram ren nachang an la hre lo hle a ni.

9. **Buh seng :** Sawitawh angin a tam zawh chuan buh seng dawnah thlam an sa chauh thin a, thlam an sa zova buh seng an han tan dawn chuan an inthawih leh rih phawt a, chumi



hnuah buh chu an seng a, an buhseng chu chil mai lovin thlamah an dah khawl t̃euh phawt t̃hin. An buh seng hun hian ruahtui a la kang loh a vangin t̃henkhat chuan an buh chu an ti uk a, kum tluan in buhuk remchhe tak an ei phah fo t̃hin. Buh an seng dawn a an inthawih dan chu; Thlamah chuan buhvui leh thlai chi hrang hrang an rawn la khawm a, chung an buhvui leh thlai rawn lak khawmte chu an inthawihna vawk thi chuan an thlawr vek a, chumi hnu chuan buh an seng thei chauh t̃hin a ni. Chutiang a buh seng hma a an inthawina chu, “*Chachawm ri*” an ti.


10. **Buh chil** : An buh seng chu chil nghal mai lovin thlamah an dah khawm a, chutia an dah chu a lo tam viau tawh chuan a ni hran in an chil t̃hin. An buh chil hma chuan an inthawih leh phawt a, ramhuai hnen a an inthawina ar emaw, thi chu an buhvui dah khawmah chuan an thlawr t̃hin.



Buh an seng zawh a an chil zawh vek chuan an lova ramhuai hmun atan a an serh hranah chuan an inthawih leh phawt t̃hin. Chuta an inthawih dan chu; an hmun serh hran a an buh tuh vui chu an la a, an deng a, chu buhfai chu tuiah an chiah a, chhang dip ang main dip takin an deng leh a, chakai leh ar sa ahran ve ve in an chum a, chakai leh arsa an chhumna ah chuan buhden dip chu an thlak ve ve a, chu chu an chhungkua in an ei t̃hin.



11. **Buh chhek** : Miriate hian buh an seng zawh hian inah an phur haw nghal mai lova, hun engemaw chen chu thlamah an dah a, an lo-ah chuan thlai dang, la leh hmarhcha te a la awm a vangin chung thlai hmun chu an sam fai leh t̃hin a, chu chu “*Kruk*



la” an ti. Hetia lo a thlai hmun an samfai hian buh chu an phova nitin an buh pho ro sa chu an phur haw thin.

12. **Üa plai** : Lo thlai an seng khawm zawh vek a, an buh pawh an phurh zawh vek hnu chuan lo a ramhuai tan a an hmun serh ‘turtut’ ah khan vawk pakhat emaw, ar pakhat in emaw an inthawi leh a nga, chu chu ramhuai hnen a an lo neih man chhiah an pekna ang a ni. Vawk pahnh a an inthawi chuan “*Cham plai*” an ti.

Hetia lo lam a tih tur zawng zawng an tih zawh hnu hian vawk pa lian ber an talh a nga, awmni kham in hlim takin hun an hman thin. He an vawk talh hi chu inthawina a ni lova, kum khat chhung a an hnathawh zawng zawng tluang tak a an zawh fel theih a vang leh buh bal pawh tha tak a an lo aṭang a an thar chhuah theih a vanga an lawmna ruai a ni.

Lo a an inthawi lai

Hemi tum hian hun dang a an lam ngai loh, lam dan dangdai tak in mipa ho te chu an lam thin a, an lam dan chu hmanlai ral in run hun lai a ral an run dan leh an indo thin dan chu an tu leh fa te’n hre ve se tih an duh a vangin awmphaw, chem leh fei te nen an lam thin a, chu an lam hming chu, “*Chang tawng plai*,” an ti. Kei chuan ‘Sarlamkai’ ka ti mai. Kum khat chhung in hetiang lam hun hi vawi khat chiah an nei a. Hetih hun lai hian ‘Likep plai’ an tih pawh in an lam bawh thin. Hetiang lam hi tunlai chuan hmuh tur a awm tawh lova, thiam pawh an awm tawh lo, ‘Hmanlai chuan an lam thin’ ti a an sawi bak chu tunlai mite zingah chuan a hmutu pawh an awm tawh lo.



## BUNG 19

### RAMHUI NI A AN NGAIH LEH AN NIHNATE

Kan unau Miriate hian ramhuai hi an hlau em em mai a, an nun hi ramhuai hlauhna chhum thim chhah takin a khuh lúk hi a ni ber e. An khawngaihthlak in chhanchhuah thuai thuai an ngai tak zet a ni. Ramhuai ni a an ngaih leh huai nei ni a an ngaih pawh a tam hle a. Hlauh tur an ngah em a vangin an nun a zalen lo em em a. Ramhuai ni a an ngaih hming nei bikte kan han tar lang a nga, a hming an phuah sen loh, “Chumi huai, khami huai,” an tih chu kan ziaak lang vek seng dawn lo a ni.

1. **Chowngchawi** : Mizo-in ‘Lasi’ kan tih ang deuh hi a ni a, mihringte a zawl thin a, hmeichhiat mipatnarte pawh hmanpui thin ni in an sawi. A mi zawlte chuan a lung an tihawi loh chuan tihhlum mai pawh a hmang ni in an sawi. Chu a zawlte chuan an Chowngchawi zawl tan chuan kum khatah vawikhat bawng chhun in Chowngchawi hnen a inthawihna an hlan thin tur a ni.

Ramhuai dangte angin thiltihtheihna a nei lo a ni ang, chuvangin a zawl a te awlsam tak a malsawm theihna a neih loh a vangin mi hmuh loh lai in a zawl a te ri a mi buh a ruk sak in a zawl a te buh dahnaah a dah thin a vangin Chowngchawi zawlte nen a inri emaw, an lo ep a lo neih chu tumah in an duh thin lo.

A pian hmang ni a an sawi dan chu, mihring hmel ang tho an pu a, khamachte an cheng thin ni in an sawi. Achang chuan an bawng chhunnaah te pawh an lo tel ve thin a, an bawng chhunna a an lo tel ve chuan an kham tur a an ngaih a ruai sa chu a zo duak duak a, an kham ta thin lo a ni. Chowngchawi zawltu in a zawl Chowngchawi tan a bawng a chhun chuan Chowngchawi chu ti hian hla in a ko thin:

Uadi ü, ua da òw,  
Uadi saiche rawng phuaw towm ü, towm ü,  
Uadi saiche rawng phuaw towm ü, towm ü, ti in.



2. **Uimukmama** : Hei hi Mizo in Phung kan tih kha a ni a, Apianhmang chu hmeichhia ang, hmui zum rut leh lian tak a ni. Mit lian tak a ni baw k a, a ni hian mihringte a tih buai dan chu, Mi mut lai in a lo hmet thin a, chung a mi hmeh a te chu “Maimi zial” kan tih ang hian an awm thin a, engemaw chang phei chuan mi kawchhungah te pawh lut thin ni in an ngai.

3. **Chungkruh** : Khawhring kan tih ang hi a ni a, “Langke chungkru” an ti deuh kher thin, chu chu “Bawm Khawhring” tihna a ni. Bawm ho zingah khawhring hi atam bik an ti a. Khawhring nei a an ngaihte chu an haw em em a, tihhlum ngei an duh a, an tihhlum tak sawi tur pawh an awm nual reng a ni.

4. **Saingphak** : He ramhuai hi mi seh thin a an ngaih a ni a, mi tihthaih pawh a ching niin an ngai. Dawithiam te’n daw i in an ko chhuak thin a, an mi huat zawngte an seh hlum tir thin.

5. **Sitsi** : Hei hi mi in a huat zawng nghaisa tur leh ti hlum tura ramhuai an khawi thin a ni a. Dawi lehkhah hmangin hetiang ramhuai hi an khawi thin. Mi daw i nan hian hawrawp hman bik an nei a, chu an hawrawp hman thin chu Kawl hawrawp hi a ni. He ramhuai hi daw i lehkhah kawltu hnen apiangah a awm thin. He ramhuai khawitu ni a an hriat pawh hi an haw em em a, tih hlum ngei an duh thin.

6. **Māt** : Hei pawh hi Lasi kan tih nen a inang deuh a, ramsa zawng zawng enkawltuah an ngai. An pianhmang chu mihring ang tho a ni a, mahse mihring ai chuan a te zawk daih a ni. Ramsa lian deuh te chu a zui thin a, engemaw chang phei chuan sapeltu te’n a kehniak an hmuh thin thu an sawi. Engemaw chang phei chuan thangawkte a lo ru thin a, achang chuan ram kalte hi a hruaibo thin nite in an sawi.

7. **Mururowng** : Heng ramhuaite hi mihring angin khua te an nei ve a, achang chuan bawngte pawh an chhun ve ni in an sawi. Mihring mithmuhah an inlar ngai vak lova, an bawng chhun a an lam leh an hlim thawmte, an naupang rak ri chel chulte chu hriat tur a awm thin.

Miria, bawng chhun a lam tur te'n an tumphung an indaih lo a nih chuan Mururowng ho hnenah inthawihna hlan in chung an thil mamawh chu Mururowngte hnenah an hawh thei nite pawh in an sawi. Mihring an tibuai ve ngai lova, achang chuan an bawng chhunna a puithiam hna thawk turin mihring puithiamte an rawn sawm chang a awm e an ti. Achang chuan bazarahte pawh an kal ve nite pawh in an sawi.

8. **Philu** : Hei hi chu ramhuai lian leh koham tak, mihringte pawh ei thin ni in an ngai a, tuifinriatah a cheng deuh ber in an ngai.

9. **Barua** : Hei pawh hi dawih leh dawih lehkhah hmang a mihringin an khawih chi ni in an ngai a, dawih hmang a ramhuai khawih chi-ah chuan a chak ber ni in an ngai.

10. **Malimala** : Hei hi boruak huai a ni a, thli leh, khawchhiat, khawthat leh khawkhenah thu nei in an ngai a, a hnenah an inthawih thin.

11. **Krawngma namma nam** : Hei hi lei lam malsawmna pe thin tuah leh anchhia pawh lawh theituah an ngai a, a hnenah inthawihna an hlan thin.

12. **Taping kuila** : Hei hi tap huai ni in an ngai a, a lan dan chu uipa ang hi a ni. Nau then bawm a nau inthente hi a lo tihthaih thin ni in an ngai. Naupang kaihte hi a tihah an ngai a ni.

13. **Dawngtua namma** : An in kailawn hi thing pum rek dawh a ni thin a, chu an in a kailawn pawh chuan huai neiah an ngai a, hei hi chu leihlawn huai chu a ni. Mi a tibuai hran lova, achang chuan a inlar thin a, a lan dan chu pitar sam tuak var vek tawh ang hi a ni.

14. **Pungdaka** : Hei hi ramhuai zawng zawng a chak berah an ngai.

15. **Phuk** : Mizovin "Tulum" kan tih ang hi a ni a, mithi tawh kawchhung a lut in mithi tawh chu a thawh tir leh a, engemaw chang pheih chuan mithi tawh ruang hmang chuan mihring la damlaite a ei

thin ni in an ngai. Mihring dam laite chu chakna pawh a pe thei ni in an ngai bawh.

16. **Mihring a ramhuai pasarihte** : Mihring pakhat zelah hian ramhuai pasarih zel awmah an ngai a, chung ramhuai te chuan mihringte chu karkhat zel an inven chhawk ni in an ngai a. Chung ramhuai pasarih-te zing a pakhat “Ruhu” an tih chuan ni a chang ve lova, chutia a chuan tak a vang chuan mihring vengtu a piang hnenah chuan a lo tel ve zel thin a, chung ramhuai zingah chuan aṭha pakhat chiah a awm a, chu chu “Lümsawilami” an ti. Adang zawng chu thlarau sual vek an ni.

## BUNG 20

### RAMHUI AWMNA NI A AN NGAIH LEH AN HLAUHTE

Miriate hian ramhuai ni a an ngaihte a tam ang baw k a, ramhuai awmna ni a an ngaih pawh a tam hle mai a, chuvang chuan hlah apui pawh an ngah em em reng a ni. Chung ramhuai awmna ni a an ngaih leh an hlahuhte chu hengte hi an ni :

1. Sih.
2. Hmawng kung.
3. Lung lian, mum mam pelpul, “Nat hua” an ti.
4. Kham.
5. Vapual ruang tawih awmna.
6. Zawng ruang tawih awmna.
7. Mau phir.
8. Bal kuang phir.
9. Thil kaw lian deuh, a kiang a bel hun chuan.
10. Kawr a lei ang a indawh kai.
11. Lui infinna lai.
12. Lo inzawn.
13. Lo pahnih neih a chu mi lo inkar a mithi halna a awm chuan.
14. Mi hawi loh zawng a in sak.
15. Zawng lamna. Ramhnuai a hmun bel hluau a lo awm chuan.
16. Leiruangtuam.

Heng bâkah pawh hian thil dang hlah an la ngah em em mai a. Hlahna bawihah an la tan miao a vangin an hlah zawng chu zia k vek sen pawh a ni lo. Hmelma pa Diabawla bumna a vangin an rilru, an taksa chu hlahna in a fan chhuak hneh em em mai a.

Kan hmelma pa Setana chuan nawmsip bawl na chithlum an hmuiah a tah sak leh zeuh thin baw k si nen. Anni lahin Setana’n a salah a man a ni tih reng reng hre lovin anmahni ai a fîng em em zawk; anmahni bum a a thang a awh tirtu ramhuai, Setana chu “Ka bum e,” ti in, vawktê leh artê a an inthawih te chuan, “Hei vawkpa sum ruk in karawn inthawih e, a sa tha tha ka pe che a nih hi,” an ti a. A sa chhia chhia tlemte an pe a, a bâk zawng chu anmahni in an ei vek thin a. Kan unau Miria te hi an tanna Setana bawih a tang hian chhanchhuah an va ngai tak em.

## BUNG 21

### DAN BAWHCHHIAT A VANGA CHAWI THEIHNATE

Bung hmasa lamah khan Miria te hian inngaihdamna an tlakchham thu kan sawi tawh a, thil an tihsual palh pawh in a phu tawh hremna emaw, chawi tir an ni deuh zel thin a ni. Tanpui ngaite an tanpui pawh hian thabat ang deuh a ni zawkmah a, entirnan; Damlo zawn emaw, inkang thelhpuir leh thil dangah pawh tanpuina dawngtu chuan amah tanpuitu te chu ruai a buatsaih sak ngei a ngai thin.

Mire ram a kal emaw, awm emaw chuan hetiang hi hriat ngei a ngai a ni. Athuhrimah mi an lo changkang zel a, keini Mizote pawh ram dangah, hnam dang zing a khawsa kan tam ve tulh tulh a, hnamdang zing a kan awm hian kan awmna hnamte kan zir chiang in fimkhur thiam hi a ngai hle a ni. Heng dan bawhchhiat a vanga chawi theihnate phei hi chu kan hriat ngei ngei a ngai a, kan awmna hnamte azir in an hnam dan erawh chu a dang ngei ang. An hnam dan pawh kan zah sak thiam angaihna tam tak a awm thin bawh a ni.

Mire hnam zinga dan bawhchhiat a vanga chawi theihnate chu hengte hi an ni:

1. Nula leh tlangval chesual lai an hmuh a thubuai an siam chuan tlangval chu vawh an chhun (chawi) tir thin. Chu chu “*Iang pak*” an ti. Nula chu a lo rai chuan a raitu chuan Tk 5 a chawi tur a ni a, chu chu, “*Kan khang dawng*” (Hmeichhia in nau a neih hun a chawhmeh a nghei lai a a hman tur a ni).

2. Mi nu leh pa hmeichhiat mipatna kawng a an chesual lai mi in an hmu a thubuai an siam a nih chuan mipa chu vawh an chhun (Chawi) tir thin. Hei pawh hi “*Iang pak*” an ti tho. Hmeichhia chu a pasal in a nei duh tawh lo a nih chuan a nupui man chu hmeichhe nu leh pa te’n an pe let leh vek tur a ni.

Mipa chuan a nupui a uire san manah a puzawn chu Tk 70 leh Silver tangka 3 ape a nga, chubakah a puzawn chu ar a talh sak a nga, a pizawn leh a puzawnte ke a dawm in ngaihdam a dil ngei tur a ni.

3. An pindan, “*Kimma*” an tihah a neitu phalna la hmasa lova mi a luh chuan pawisa emaw, vawk emaw chawi tir theih a ni. An pindan a aneitu planna lova mi a luh a vawk an chhun tir chuan vawk lung leh a käl chu mautheiah aiduchhe bal eichi nen an chhum a nga, chu chuan an inthawih tur a ni.

A tisualtu chuan, “Ka lo tisual a, he inah hian natna emaw, thil thalo emaw thleng lo turin ka inthawih e,” a ti tur a ni. A vawksa chhumna mau chawng chu a chhumna hmunah nikhat a dah a nga, Tk 70 a chawi bawk tur a ni.

4. Midang hliam palh in a hliam dan a zirin a hliamtu chuan pawisa a chawi tur a ni.

5. Hmeichhe phalna lova mipa in a hnute a khawih a hmeichhia chu a thinrim chuan a hnute khawihtu mipa chuan hmeichhia in a phut zat zat pawisa a chawi tur a ni.

6. Meichher chhi a mi thlam lam a kal a, mi thlam chu a kang a nih chuan meichher chhitu chuan a hal lai hmu ker lo mahse meichher kengtupa chuan vawk emaw, pawisa emaw a chawi tur a ni.

7. Lo hal vang emaw a khawram (khaw hmun hlui) a kan chuan a ti kangtu chuan vawk a chawi tur a ni.

8. Lo thlai sengkhawm zawh hma a nula leh tlangval inru mi thlam a an riak, thlam neitu in a hriat chuan nula leh tlangval inru te chuan vawk an chawi tur a ni.

9. Mi nu, nula ang a chhaih emaw, an lungawi loh zawnga khawih palh emaw chuan a khawih/chhaihtu mipa chuan zu a chawi tur a ni a, chu chu “*Pri*” an ti. A tisualtu chuan akhawih/chhaih chu a pute lam a nih chuan fei a chawi tel tur a ni a, a tute lam a nih erawh chuan zu bakah diar var tawng nga ai a tawi lo leh silver tangka 15 – 17 a chawi tur a ni.

10. Mi in nupui a neih lai in a puzawn tan ar a chum sak a nga, a puzawn tan a a ar talh danah emaw, a chum danah emaw a puzawn a lungawi lo a nih chuan a arsa chhum chu a paih vek a nga, a dang a

chhum sak leh a nga, a mâkpa chuan a tihsual manah fei pakhat leh zu um khat a chawi bawk tur a ni.

11. Mi in lo a thlai ramhuai hnen a hlan hma a a lo ei palh emaw, a tihchhiat palh chuan lo neitu in a phut zat ang a piang a chawi tur a ni.

12. An khaw hung/serh lai a lut emaw, chhuak emaw, bengchheng lo siam emaw chuan khaw hung inthawihna an ran senso, ar emaw vawk emaw a chawi tur a ni.

13. Kharbari te pindanah an monu lo mutpui emaw sual emaw chuan Silver tangka (lukawlh chuang ngei) a chawi a nga, kharbari chu ar a talh sak a nga, ngaihdam a dil bawk tur a ni.

14. Mi fanu tlangval in a ru a, nula chhungte chuan an um a, a rutu te'n mo lawmna ran an lo talh tawh a, an fanu chu mo lawmna ran an talh hma a an lak kir leh tur thu sawi lawk si lova an va hruai chhuak leh a nih chuan an fanu rutu te mo lawmna ran talh man chu nula chhungte chuan an chawi vek tur a ni.

15. Mi in nupui a neih lain a puzawnte lam chuan achipuite leh a mâkpate chipui lam chu tunhma in emaw intihthiamlohna an neih tawh leh neih loh an chhui a nga, anmahni in an hriat mai loh pawh in midang an zawt a nga, engemaw thu hlaah an mâkpate hnam leh anmahni hnam chu intihthiamlohna a lo awm tawh ni a an hriat chuan a mâkpa chu Silver tangka 5 emaw a chawi tir thin. Thenkhat chuan chutiang a ti kher lote pawh an awm bawk.

Hnam dan hi a hmun leh a hun a zir in a danglam ve thei a, hei hi hemi lehkhabu ka ziak lai a Mire hnam zing a an dan bawhchhiat a vanga chawi theihna thenkhat a ni a, ka ziak kim vek lovang tih erawh ka ring a ni.

## AN SILHFEN LEH AN INCHEINATE

Miriate hi hnam chapo ve tak, hnam dang tih dan a ̣ha zawk a ni tih pawh hria se la duh mang miah lo hnam an ni a, chuvang chuan an chhehvel a hnam dangte ngaihtuah chuan an la hniam em em a ni. Mahse Mire ram a Kristian na a lo chak deuh tak hnu hi chuan kawng tam takin hma an sawn tawh a, mahse heta kan sawi tur hi chu Mire ram a ka awmtirh lai leh Mire hnam zinga Kristian na in hmun a la chan loh lai a an silhfen leh an incheinate a ni ka rawn tarlang dawn a ni.

An mutbu leh an thuamhnaw hi anmahni la thàr chhuah a ̣anga an kaih a an tah a ni tlangpui a, hmeichhiate chuan hmanlai Mizo hmeichhiate ang bawkin la deh hi an peih em em mai a, hmeichhia ni si la deh thiam lo chu mi ngaihsan an hlawh lo a ni. Nula te pawhin an mut hma chu la an kai ̣hin a, lo a an fehnaah pawh la kaih tur an keng a, an chhun chawlh laite pawhin thenkhat chuan la an kai ̣hin. ̣Thalaite an han inchei tak tak chu thawmhnaw an mamawh vak lo na in thil dang mamawh leh inbel neuh neuh an ngah ve hle thung.

### An incheinate chu hengte hi a ni :

#### 1. Lu-ah :

##### 1.1. Samzial : Hmeichhi

leh mipa te'n an sam an zial a, hmeichhia chuan an tukkhumah an sam an zial a, mipa chuan an chhipah emaw, an bek ding lam deuhah emaw an sam an zial ̣hin.



##### 1.2. Kâp : Hriaupui hi a mawng

lamah tlêp in an ̣awn a la mawi in an chei leh a, chu chu nula te'n an samzialah an vit lut ̣hin.

1.3. Nabek surut : Mau, rua, Alluminium in emaw, samkhuhih lianpui kual vùn mai hian an siam a, nula leh tlangval te'n an samzialah inchei nan an hmanng ̣hin.



1.4. **Surut :**

Samkhuhi hi an ngina em em a, ahnung lam tlang hi an chei a, chu chu khaw hmunah pawh kal se an samzialah a hmei a pa in an tawn reng thin.



1.5. **Hnah leh pangpar :** Nula te chuan hnah leh pangpar hi an samzialah hian an tawn deuh reng thin a, an hunpui lai chuan lehkhawmaw leh pawisa te, darthlang te pawh an samzialah an tawn bawh thin.

1.6. **Taibawia :** Thi chikhat a ni a, arawng sen emaw a hring emaw tam tak an thil teuh a, an lu-ah an khim thin.



1.7. **Kapsaw :** Hei pawh hi an thi ang chi a an siam a ni a, a mum hring fim te tak te te , khap khat zen zawn a sei in an thil teuh a, a bul lamah an tawn khawm a, an sam zial a vih luh turin dawhkih ang in an siam a, chu chu an samzial a vit lut in hnung lamah a uai hnuang thin.

1.8. **Kowlüchowh :** Silver tangka khat hi a laiah an dah a, asirah a hual chhuakin pawisa 25/50 thir an char (welding) vek a, chu chu nula leh tlangval te'n an samzialah an tawn thin.



1.9. **Tangka dân :** Silver tangka khat hi a laiah an samzial a vih luhna tur a kuang an welding a, chu chu nula leh tlangval te'n an samzialah an tawn thin.

1.10. **Vakul chang :** Nula thenkhat chuan an hunpui a an inchei chuan an samzialah vakul chang an tawn thin.

1.11. **Maipau :** Bawng/sial an chhun a an lam lai te hian tlangval te'n halzit an hal a, a tek mawi lai takin nula lam lai samzialah an va tawn thin.

1.12. **Si lumem** : Pawisa thir hi a thilna an siam a, an lu vet chhuak thei turin an thil teuh a, chu chu nulate'n an luah khim in inchei nan an hmang thin.



1.13. **Keng ring lumem** : Thi chikhat rawng sen tam tak an thil teuh a, nula te'n an lu-ah khim in inchei nan an hmang thin.


1.14. **Derkeng** : Thi amum eng an thil chu Keng ring lumem sir tuak veve ah an khim thin.

1.15. **Napawng (Diar)** : Hna an thawhna leh khual an zinnaah chuan an khim ngei ngei thin. Diar var hi an inchawimawi nan leh an induhsakna tih lan nan an hmang bawk thin, tawng nga ai a tawi lo a ni tlangpui.

1.16. **Chemte** : Mipate chuan Mizo angin chemte hi an ngaina hle a, khual an zin chuan an samzialah emaw, an diarah emaw a kawm an siam a, an vit lut thin.


## 2. **Bengah** :

2.1. **Ramseng** : Bengbeh Silver a siam, Mizo paikawng ang deuh a arh, a mawng lam pawh beng a tãn theih nan a arh hlek, hmeichhia te'n an beh thin. Thenkhat chuan an bengbeh chhungah chuan an vaihlo thial tur emaw, pawisa emaw an dah thin.



2.2. **Tai ramseng** : Silver emaw, dar emaw a siam kual pan thler mai hi mipa in an beh thin.

2.3. **Napung ramseng** : Hei pawh hi a bial, pan thler, rangkachak a siam mipa beh chi a ni. Mihausa deuh chauh in an beh thin.



2.4. **Powtu** : La hmul sen chi, an ti dip a, abawk rual takin an siam a, alaiah a hring leh a eng sen an dah a, abehna tur a kũang an siam a, hmeichhia leh mipa in an beh thin.

2.5. **Ramseng saw** : Mipa te'n thir bial pante an beh a an khai chhawn leh thin a ni.

2.6. **Pin** : Putar bengbeh nei ve lo te'n pin hi an beh ve mai thin.

3. **Hmaiah** : Nula leh tlangval an han inchei tak tak chu an hmaiah Powder paw taw tak mai in an inhnawih a. Tunhma chuan an ha hi an ti dum vek a, an tihdumna hmanrua chu mau no ro an phel phawk a, chu chu an hal a, a alh lai chuan chem chhia phekah an khup thawk a, chumi khu ur chu inting dum khâk tlat ang mai hian a awm a, chumi chuan an ha chu an ti dum thin a, an damchhungin a lo dum tawh mai thin a ni.



An ha an tih dumna chhan chu ha var ai chuan ha dum hi mawi an tih vang zawk a ni. Ha var an hmuh chuan, “Ui ha ang mai a var thuh,” an ti thin a ni. Ha tih dum an bansan hnu hian ha leh hmui mai duh taw lovin lei leh ka chung thleng in an ti sen ve thung a, chutia an tihsen na hmanruai chu puan tih senna rawng hi a ni. Chumai chu la duhtaw lovin an khabe, hmui hnuai lamahte an ti sen leh thin, thenkhat chuan an biangahte leh an chalahte pawh an ti sen baw. An hmui hnuai chiah-ah + tiang hian a sen in an nulate chuan an thai thin.

4. **Nghawngah** :

4.1. Kengrawt (Thi sen).

4.2. Keng buk (Thi phiar mum).

4.3. Langke chah (Thi phiar pheh).

4.4. Mangku keng (Sarzuk mu thi).Hei hi nau chhartu te'n an nau char hlauh a an lak thin a ni. An thiah chuan an ngaihsan ber pawl a ni a, mahse a awrh nuamlo ber a ni ang. Nula te chuan an hunawl ah chuan thi hi an thil deuh reng thin.

5. **Bân-ah** :

5.1. **Kuarma kuaise** (Vainu banbun/ngun) :

5.2. **Tai kuaise** : Silver a siam, lian deuh, akualah a thlur ang deuh a awm.

- 5.3. **Bawtraw kuaise** : Apawn lam a mum a, a mum laiah a rek deuhin a awm leh.
- 5.4. **Kuaise** : Banbun pangngai, Alluminium a an chhun chawp a ni.
- 5.5. **Harkawi** : Hmeichhia in an kiu chung chiah a an bun a ni a, Silver hman a siam a ni a, an bun tirh chuan an ban puam lai tawt angreng takin thir inchi khat vel a hlaiin a hren tlat a vangin chaw bâr tura kut han tawm pawh an harsat phah thin a ni.
- 5.6. **Langpat** : An thi ang chi, aphek a phiar tlangval in an banpuam laiah an bun thin.
- 5.7. **Rutbüt** : Zungbun Silver tangka 25 a siam. An thi ang chi pawh zungbun a tan mawi takin an phiar a, an bun bawk thin.
6. **Taksa-ah** :
- 6.1. **Kowrma** : Thenkhat chuan an hnathawh lai in anmahni la kaih a tanga tah an ha thin a, a hmei a pa in kawr hak ai chuan hak loh hi nuam ti zawk an tam hle.
- 6.2. **Tawnzau** : Tawnzau, ahring emaw, a sen emaw, apawl emaw, lai pawh khuh tha mang lovin tawt tingteng in an ha thin.
- 6.3. **Uancha-khup** : Hmeichhia te'n a chang chuan puanhlap, asen emaw, a hring emaw, a pawl emaw an kokiah suih in an archang pai mai thin.
- 6.4. **Tangka leng** : Silver tangka khat leh darkhuang lem te tak te, ke a an bun ri chheng chheng theih chi 'Tengeng' sei deuh angte pawh chu a thilna kua an siam a, chu chu fual angreng takin an siam a, nula te'n incheina hlu leh ngaihsan awm takah an ngai thin. Atlangpuiin mihausa fanu te deuh chauh in an pai thei thin a ni.
7. **Kawnggh/mawng bawrah** :
- 7.1. **Tapung dawng** : Hei hi naupuakpuan hrenpereng a ni a, anmahni lakaih a tanga an tah a ni. An nau puakpuan nen a inang a, mahse hrenpereng hi chu a sei fe zawk a ni. Tunlaiah chuan vai puan pan an hman tawh a, a zangkhai fe tawh a ni. Mipa in an hren thin a ni.

**Uanklai towng** (Fèn phel) : Mizo hmarâm ai hi chuan a chhing zawk a, hnung lamah mawng zawnah tak hian a zia a awm a, an zeh lai hian vawk hmul an zep tel a, mahse an tah zawhah vawk hmul chu an pawt phawi leh vek a, chhung lamah chuan a zehna a lang miah lo a ni.

Mire nu nau pawm lai

Hmeichhe pawnfen hi a chhin em a vangin thut fimkhur reng a ngai a, thut lan an hlauh a an fimkhur a vangin an thut dawn leh an din dawnin an thingthit thin a vangin an hmeichhiate khup chu a khak deuh tlul thin a ni. A rawng chu a dum a ni.



A pum a, mahse an ven chuan athuah in an veng a, an mal veilam chu a lang deuh vek thin, An hrenna laiah pin in emaw an chilh a, a nihloh chuan an kawnghren in an hreng bet mai thin.

7.2. **Lawnggi** : Mipa thenkhat chuan vai in an ven thin Lawnggi an veng ve thin.

7.3. **Ruakawm** : Silver zâi phiar mum, 2 -10 thleng hmeichhe kawnghren a ni a, aman pawh a to khawp mai.

7.4. **Si kekawm** : Pawisa thir, pawisa 25 a thilna an siam a, tam tak an thil a, chu chu an kawngah an hreng thin.

7.5. **Taiuih** : Silver thir kil nei a siâm, lian vak lo chu hmeichhia te'n an mawng bawrah an hreng thin.

7.6. **Langke** : An thi ang chi phiar phekk chu nula leh tlangvalin an kawngah an hreng thin.

7.7. **Langke buk** : An thi ang chi phiar mum chu nula leh tlangval te'n an kawngah an hreng thin.



7.8. **Chiakaidawng** (Kekawrtlawn) : Kekawrtlawn an hak tirh hian an sawisel nasa em em a, kekawrtlawn hate diariam nan kekawrtlawn chu, “Bawng chhu hrenpereng” an ti a, chumi hming chu a pu hlen ta a ni.

8. **Ke-ah :**

8.1. **Ro :** Naupang in an bun țin Tengeng.

8.2. **Khawkkhen :** Nula in an lamna leh an incheina a an ngalrek a an bun țin a, silver a siam te a ni a a kawrawng a, a kawrawngah chuan pên zawng a ri chhawng chhawng thei turin a chhungah thir mum dah a ni.



8.3. **Khawk ro :** Hei pawh hi nula in a lam dawna a bun țin bawh a ni a, Khawkkhen ai chuan a lian deuh a, khawkkhen nen hian an bun tlang țin.

Miriate hian an fate hi an tet lai ațangin an nghawngah leh an kawngah la hrual emaw tal chu an awrh tir in an hren tir țin a ni. Mipa te chuan an ram kal in an hrenperengah an chempui hriam tak chu an pai țin a, engemaw chang a kawng nal a an tluk palh chang in an chempui pai chuan an khel a âț duai chang pawh a awm țin a, mahse chutiang a mipa khel a chempui in a ahna ser lianpui pui awm te chu mipa diktak nihna ni in an ngai.

## BUNG 23

### THU LEH HLA

#### 1. Thu lam :

Kan unau Miriate hi thu leh hla an thiam in thiante nen a han inkawm a ti ti hi an peih in an thian em em mai a, Field fang a ka kal chang leh patling hote nena kan inkawm changte hian kan ti ti tlaivar chang leh kan tlaivar thelh changte a awm fo thin reng a ni. An khua a mikhual lo kalte hi khual tha tih an hriat chuan an khaw pa ho chu mikhual thlennaah chuan leng khawm in hlim takin an ti ti ho thin.

Mire ho hian thil han sawi fiah dan leh remchang tak a tehkhin thu han hman mai turte hi an hre thei em em mai a, upa ho han ti ti hi chu a ngaihnaawm thei thin khawp mai. Amaherawh chu tawngkam an thiam in tawng bumngrua an ngah kan tih lai hian anmahni Mire tawng ngau ngau hi chu tawng hausa tak a ni hran lo.

Anni hi a lunung chuan thahnem viau mahse Bangladesh a tlangmite zingah hnam hnufual ber an nih miao a vingin anmahni ai a hnam fing zawk leh hnam tam zawkte tawng chu an awmna hmun a zirin an hman a ngai thin a, chuvangin an chhehvel hnamte tawng pawh an hmang tam khawp mai.

Tin, Mire hnamah pawh hian; bung hmasa lam a kan sawi tawh ang khan hnam hlawm hrang hrang, tawng hrang hmang an la awm lehzel a, then khat chu inzul deuh viau mahse thenkhat erawh chu anmahni pawh an inpawh hleithe i lova. Chuvangin kan unau Miria te hi anmahni Mire hnam zingah tal chuan tawngpui (National language) a hman bik an neih tulin ka hria a, chu an tawngpui (National language)-ah chuan Anawk tawng chu ka hmang ta a.

Anawk zingah hian Kristian pawh an tam in an tawng hi Mire tawng hrang hrang zingah chuan a tha ber a ka hriat vanga hmang ka ni a, Literature zawng zawngah hian Anawk tawng vek kan hman tak a vingin tunah chuan Lalpa tanpuina zarah Anawk tawng chu Mire hnam tawngpui (National language) a ni deuhthaw hial tawh a ni.

Kan unau Miria te hi thlang tla hmasa a muk thing lo theltu te kha an nihna chu lo dahtha ta ila, an tawng a tang ringawt pawh hian Mizo hnahthlak anni tih chiang riau in ka hrai a, an mizia leh dan leh hraite heti em em a Mizo te nen kan danglam nachhan chu kum za engemaw zat chhung chu kan khawsakna (Environment) a danglam em em vangte pawh a ni thei a ni. Mizo tawng leh Mire tawng thumal leh a awmzia inang chiah leh inang thuak a lo tam em em mai hi kum tam tak kalta khan eng tik hun laiah emaw kha chuan hmun khatah kan lo awmin thlahtu bul hmun khat kan ni tih a chiang hle in ka hrai a ni.

Ka hringnun leh Miriate khawvel bu chhuak hmasa-ah kha chuan Mire tawng leh Mizo tawng inan chiahna leh inan thuakna tam tak ka dah a, mahse tunah chuan a tul lutuk a ka hriat loh a vangin ka dah ta lo a ni.

## 2. **Hla lam :**

Mire pa in Rina plung a tum lai

Miria te hian hla hi an ngaina ve hle mai a, ram a an kal laite, khaw danga nula rima an kal kawngah te hian an zai veng veng thin. Nula leh tlangval inrimte hi hla hmangin an in kawm thin a, achang chuan hla thu hmangte pawhin an inhnial bawk thin. Achang chuan thawnthute pawh hi hla angmai in a sakin an sa bawk thin.



An hla hi Bawm leh Pangte mithi tah ang mai hi a ni a, a chham in an chham zuah zuah a, an chham tawp lamah chuan a hniam in, “ow” tlawk angreng tak mai hian an ti help help thin, chutia an tih tlawk lai chuan an khabe te hi an ti sawi kual vel thin bawk. An zai laite hian an aw an thian sek a, an han zai tui tak tak chuan an mit te an chhing diar diar thin.

An hla thu hi ziak a dah hleihtheih a ni meuh lova, a chhan chu atlangpui in an phuah chawp zel a, an hla chuan tawp hun a nei hran lova, an sak peih chhung a ni mai a, an zai chu lo record in lo ziak ta ila, kan hla ziak chu a satu chu ahma a a sak ang chiah a sa leh turin



ti ıla, a sak hmasak ang chiah chuan a sa leh thei kher tawh lovang, achhan chu an phuahchawp zel a nih a vang a ni.

Nula Chamle zai lai

An zaithiamte chu an bawng chhun nikhua leh an ruai nikhuate hian an zai tir thin a, tape in an lo recoad a, chu chu upa lam leh nula tlangval te'n an tleipui thei khawp mai. An zaithiam a zai lai hian an rimawi, Rina plung leh Tingte'ng te an lo tum rem thin. An hla thu kalphung hi tehkhin thu deuh vek a ni in Mawk tawng an hmang tam hle a, chuvangin anmahni Miria te ngei pawhin an hla thu chu an hre thiam vek lo, an hla thu hre tur chuan hla lam a tui mi nih a ngai a ni.



Hla phuah thiam leh zaimi aw tha te chu, “*Meng sara*” an ti a. Chung an meng sara a Mire ram dung leh vanga lar zual deuh te chu mipaah chuan – Parau a ni a, hmeichhia ah chuan Chamrung te an ni. Hemite pahnih lo pawh hi lar ve tak tak chu an awm tho bawk.

An hla thu hi nula leh tlangvalte inlemnna leh an vanduai zia an chham chhuahna a ni tlangpui a, Hla thu hmang hian an infakin an insawichhe bawk thin. Hla thu hmang hian an bialnu, bialpa te'n neih an intiam a an neih leh si lohte hian hla thu hmang in anchhiate an inlawh chiam bawk thin. An hlaah hian an bialnu, bialpa te fakna lam aimah in an vanduai zia an chham chhuahna hi a tam mah zawk a ni.

Mire hnam in hla an neih hmasak ber chu doral hma a zam lo tur leh huaisen tak a hmelmate lu la a an hmelma nghawng fik hmawk hmawk tura an infuihna hla a ni a, chu chu Burma a an awm lai a ral run hun lai a an phuah a ni. Kei ni Mizo hla hmasa ber ni a an sawi chu, “Heta tawngin khatami kha a lang. Khata tawngin hetami hi a lang,” tih mai a ni a, hla hmasa ber rau rauah chuan keini ai chuan an hla hmasa ber chu a zia fe zawk ni in a lang.

### **Mire hla hmasa ber chu hei hi a ni:**

Sampik tun en üah,  
Ang tum en sam pik üah.  
Paw pe mi lawtla iang,  
Sarra sawi lu sawi len;  
Sawi nawk kham pren,  
Tungping tauing.

‘üah’ tih hi tunlai a ‘u-owa’ (Bawihte) tihna a ni.

Miriate hian khawvel siamtu chu Phivawk leh Thloh (Sava) hi ni in an ngai a, phai ram hi Phivawk siam a ni a, tlang ram hi Thloh siam ni in an ngai a ni. Phivawk leh Thloh chuan khawvel an siam dawn in Pathian hnenah lei chi an dil a, Pathian chuan lei chi chu a lo pe a, chumi lei chi-ah chuan uirena chi leh sualna chi hrang hrang a lo tel a vangin nula leh tlangval inngaihna sual leh uirena sualte lo awmah an ngai a ni. Chu chu hla in heti hian an phuah a.

Rum Paksarua, nawn bawn sown iowm,  
Reng mau uala, chowrum dowi kowi;  
Tawi ku tawi piang, tawng krawng bawn liu,  
Ka la krawng bawn liu khe dow,  
Sata krow leng tum dawng kowi,  
Re la pangkhung mang kuan kai iang leng,  
Chang tui prang io, praing tiak khiam lawm,  
Thup pe i krawng bawn liu.  
Putma liu tawng krawng bawn liu,  
Rai lawng bawn liu tawi, akrawng bawn kung;  
Iawtma liu tawi, krawng bawn kung,  
Iang liu tawi, krawng bawn kung;  
Kang lawng ow, chi chang lawng,  
Chowng lawng ow,chi chawng lawng lai dow,  
Hang kow bu maw mang,  
Alai tama mrikrowng chowng kown kowh,  
I chimp u tang, i chimp u tang,  
Ari tantaw, chakramang pren lai mowr tasow, a u ow.

Mizo tawng a he hlathu awmzia tlangpui chu : “*Phivawk in lei a siam dawn in lei chi Pathian hnenah a dil a, Pathian in Phivawk*

*hnenah chuan lei chi a pe ta a; a lei chi pekah chuan thing leh mau leh thlai chi tinreng a tel bakah sualna chi tinreng pawh a tel bawh a, chuvang in pi leh pute chhan a tang tawhin he khawvelah hian sualna chitin reng a lo awm tawh a ni. Chu vang in ka 'd' Bawihthe, i rilru ti hreawm ma tache, khawvel pian tirh ata tawh sualte chu a lo awm tawh a, mi tih loh soal ti kan a ni bik hleinem. Kan pi leh pute lo tih thin ang kha kan ti ve a ni mai a lawm," ti a tlangvalin a nula chetsualpui a hnemna hla a ni.*

Nula leh tlangval inhmangaihna hla pakhat lo tarlang leh ila, he hla thu atang hian nula leh tlangval te'n inhmangaihna an lâk lungrun ve zia kan hre thei awm e.

Sing khung tara naiawh paing pau,  
Nang ampen pawr pen sin khaw lak,  
Dawng dang rinit tuk chin ngawi kle dowi,  
Powng sai a u powng pat tut kowi.

Mizo tawnga a hla thu awmzia chu : *"Maipawl chhungah nauban par a chuai thei lo angin ka thinlung chhungah hian chuai ni reng i nei ngai lo,"* an tihna a ni.

Nu in a fa a hmanghah zia hla an a phuah hian nu hmangaihna a ti Chiang riau in ka hria a, tehkhin thu an hman thiam zia leh an hla thu hi tekkhin thu deuh vek a ni tih pawh a lang Chiang hle bawh a ni.

Powngtai dow be howng dawnia dow luk kowi,  
Howi lek lu lowh, simlung muirau;  
Klai sakkhawt bow, ngechowh ow,  
Pe ram sang kungh klik di sang lai.  
Kuiai chowh lai bow owi,  
Be le lak kowi phung lah chawi pawr lowk rüa.  
Aia kow cham rap kir sang tui,  
Kir iowm dowi lowi khe kowh,  
Rüm dawng kua roh thap hapma rau,  
Rüm dawng kuaima thawr thap leng leng hawm;  
Paw a lawngta powng chawi pawr plawng rau,  
Nawng nau nip sak u, plawng kaw rau dowi tak,  
Pe bow nge chawi iow,  
Hang kow plawng rau bow.

Mizo ṭawng a ahla thu tlangpui chu, “Ramhnuai ngaw dur khupah hian khuabel in bu a siam a, khuai pakhat chuan an no chawm nan lui a mi tui a zu chawi a, chutia a tui chawi an bu lam a akir leh tur chiah chu vakul hian a lo man hlah mai a. Chu khuabel chu vakul lak a ṭanga chhuah tum chuan a tal ve nasa mai a. Atal nasat em a vang chuan a thla te a ṭet pheng phung mai a.

Chu khuabel chuan vakulin a chukna aimah chuan a note tuihal dang ro, dang chara an awm tur chuan ati na zawk a, chuvang chuan na pawh hre chang lovin a theih tawkin chhuah tum chuan a tal fat fat reng a. Chutiang bawk chuan ka hrai bungdawntuaite, lungphang reng reng suh, kei pawhin khawibel in a note a hmangaih angin ka hmangaih che a sin,” ti a chhuat a an chhemthei hrut ri kawrh kawrh chung chuan thenbawm a a nau then mek chu a awi ṭhin a ni.

Tin, mi zaidam, thinnel leh thilphalte hian Pathian malsawmna an dawng a, an dam chhungin ei leh bâr an nghei ngai lo, tih hla ṭha tak mai tehkhin thu hmang a an phuah hi han tarlang leh ila.

Kun kaw te'ng thum rum dawng uahar,  
Achap suthawng mowik sadaua nowngia uowi,  
Plap iua nowngia dow klap thgum,  
Kun kaw te'ng thum rum dawng uahar,  
Iaw reng dow, piaw mang piaw rui dow,  
Thum chak, asang singram, plawng lowng tow,  
Plau tawi chowng, kun kaw chak,  
Uasaing dow, pro cho rum dawng kua ro,  
Sing dawng dow luk hown ta mü dow,  
Owi li asung sing ram plowng lawng.  
Ow plan uang tawi khun kun kaw chak khai,  
Niiawng chepaw rum dawng dow uahar,  
Tow tawl lawr nu la lawklek bowr bow,  
Lawklek lai khai chahra daka preingma.  
Taing bow kla kun kaw rau dowi,  
Aluk phung luk kowi klen rui sak chowng.

Mizo ṭawng a ahla thu awmzia tlangpui chu : Vazar rual zingah chuan sava chi hrang hrang leh sakei te pawh an tel ṭhin a, Vazar ho chu an rilru a ṭhat em a vangin chung hote chuan nuam an ti thei hle

thin a. Vazar ho chaw thai chhuah sa chu chung lam aţangin vakulte chuan an lo laksak leh daih thin a, mahse vazar ho chuan thinrim miah lovin, “In hlei teh tak e,” ti in an nui mai mai thin a. Mahse, vazar ho chu Pathian in chawm in mal a sawm a, an dam chhungin chaw an nghei ngai chuang reng reng lo.

“Hei hi hla a ang hleinem,” kan ti pawh a ni mai thei a, ahla thua hian an tawng tual leng atel meuh lova, Miriate tan ngei pawh zaimi nive lo tan chuan hriat thiam mai mai chi a nilova, mahse an zaimite chuan tui takin an sa ve thin a ni. Hla hlun ve deuhte pawh an nei ve nual bawk.

Hmanlai chuan bawng an chhunte hian bawng chhun a sak chi hrim hrim hla an nei a, chu chu an bawng chhun hun chauh an sa thin a, athen chu zing lam a sak chi te, tlai lam a sak chite a ni a, mahse tunlai mite chuan a hla hi an thiam tawh lo a ni. Chuvangin an bawng chhunnaah pawh a thluk ringawt in an sa tawh mai a ni ka tih tawh kha. Chu chu han tarlang leh ila :

### **Zan a sak chi :**

Krawng sa ri ü, ri ü. Uai tam ba ü, ba ü.  
(Lei hi a nung reng a, a awm reng bawk a ni)

Nam sa ri ü, ri ü, lawng tam ba ü, ba ü.  
(Kan damna turin inthawina kan hlan, kan ranin kan nunna kan hum)

Sangku бүр hown pe, Chim ü, chim ü.  
(An tumphung rimawi Plung fakna a ni)

Tür ram talek ü, Ram ta lek ü.  
(Thangtung kau thle nghial nghial angin thle nghial nghial ru)

Kimma rui sing kawng ü, kawng ü, Kawng sing iang ü, iang ü.  
(Ramhnuai a hrui chikhat, “Kimma ruising” an tih chuan bawng kai ru)

Awma dam ti kown na ü, Pa rowpsowi lowi, rowp sowi lowi.  
(Lui sangha an leng dun rial rial angin kan bawng chhun tur an ding din rial e)

Krawng bawm sai ü, Sai rit ret ü, ret ü,

Ua di sai ü, Rawng phua tawm ü, tawm ü.  
(Nula leh tlangval lamte fakna leh fuihna)

**Zing lam a sak chi :**

Ua di ü, ua da òw,  
Ua di sai che rawng phua tawm ü, tawm ü,  
Ua da sai che rawng phua tawm ü, tawm ü.  
(Hei hi Phung nupa an bawng chhunna a rawn tel tura sawmna hla)

Aw kaw rum rum, pau lang ü,  
Aw kaw rum rum pau lang ü, pau ü,  
Ning ria chen lang pau ü, pau ü.  
(Kumpui sul lo vei in lui kam pangparte pawh a hun teah an lo pârl leh ta)

Ning khum iua pau lang ü,  
Ning khum iua ri pau lang pau ü.  
(Iumiaa thing chu khel lovin a pârl thin ang hian kum pawh a ngai in a lo her leh thin).

Aw kaw chin che hai mün ü,  
Aw kaw chin che hai bai iow,  
Aw kaw chin che hai mün ü,  
Aw kaw chin che hai mün òw ü.  
(Lui kam karah kum tin Chinrangin bu a chhep thin a, no a nei thin. Chutiangin kum chu a ngai in a lo inher leh thin).

Kim rengia ma, kim rengia ma,  
Pa chowng plawng via sang ü,  
Kim rengia ma, kim rengia ma,  
Pa chowng singku hua mang ow ü.  
(In neitu {Bawng chhuntu} chu dam reng sela, thing buk lian tak angin awm sela, thing lian leh lungpui ang mai a nghetin lo awm rawh se).

Chiama kowng ü, ba ting tũa ü, tũa ü,  
Nama kowng ü, ba ting tũa ü, tũa ü.  
(Thal a bawng/sial an chhun hlumna hla).

AN SAKHUATE

1. **Budhist sakhua :**

Kan unai Miria te hi keini Mizo te ang bawka ramhuai hlahv vanga thing bul, lung bul leh ramhuai awmna ni a an hriat a pianga inthawina hlan chawt mai thin an ni a. Mahse, an thlang tlak lai in Budhist sakhaw betu Mawk ho nen khawimaw lai laiah an lo inawmpawlh tawh a vangte pawh a ni maithei, Budhist sakhaw zuituah an inchhal ve tlat mai a ni. Miria ten milen pathian an be lai

Mahse Miria Budhist a inchhal atamzawkte hi chuan Budhist sakhua hi hriat chian em em pawh an tum chuang lova, chuti vakin an ngaihsak em em hek lo. Ramhuai biak hi an dah pawimawh em em ber mai hian a lang. Budhist sakhaw hunpui “Changkran



pawi” an tih pawh Mawk ho in ni 7 lai an hman lai in Miria te chuan ni khat chauh an hmang a, a tamzawk chu chawhnu lamah chuan an haw duak thin a, mi tam zawk phei chuan sakhaw kûtpui an hmang a ni tih pawh an inhre hran chuang lova, nawmsip bawl na leh huau huau satliah-ah an ngai ni in a lang mah zawk.

Mithi thlarau an ngaihdanah chuan Budhist rin dan ‘Pian nawn’ na hi an ring em em mai a. Thenkhat phei chuan an ring Advance leh lutuk a, tar tawh tak, thenkhatte chu an thih hma hma in an faahrawn piang nawn lehah an ngai hial a ni. Hei hi kan khua a putar, Pu Klanguai a a thih hma in kan khaw bul Kurang khua a naupiang pakhat chu kan khua a Pu Klanguaia a rawn piang a ngai in an fahmingah chuan an Pu Klanguaia hming chu an lo phuah hmanhmawh a ni.

An fa rawn piangte hi engemaw a vanga an tah vak chuan “*Awn ming*” an ti a, hming a ngen ni in an ngaih a vangin ramhuai puithiam hnenah an va kal a, ramhuai puithiam chuan ai a lo en sak a, ai a en na hming chu “*Howngpui*” an ti. A ai en dan chu, ramhuai

puithiam chuan lasai ngul hi ahruiah a chelh a, tichuan mithi tawh hming a sawi dun dun a, a hming tur tak a rawn sawi a nih chuan lasai ngul chu a rawn inthên dawrh dawrh a, lasai ngul vauntu pawh chu a khur thei hial thin. Chu hming chu naute hminga an han phuah chuan naute tap pawh chu a bang nghal hmiah zel e an ti.

#### Milem pathian an be lai

Mi an thih hian an hmaiah emaw, an chalah emaw belmang an tât thin a, chu chu chhinchhiahna “*Mâtlawi*” an ti a, naute a lo piang a, kutchuk a lo awm hian athih lai a an chhinchhiahna ‘*Mâtlawi*’ a rawn pu niah an ngai. Mithi chu a dam lai a miṭha chu miṭha leh hausa-ah rawn pianga, mi sual chu misualah emaw, ramsa emaw ranah emaw rawn piang nawn leh turah an ngai. Thenkhat chuan mithite thlarau hi khawiah emaw awmkhawmah an ngai a, thenkhat chuan khawvelah hian vak vel mai mai a ngaite pawh an awm bawk.



#### Budish puithiam (miria)

Hnam tin mai hian Pathian hi engemaw ti hriat hriat hi chuan kan hre vek mai a, a zawn pawh kan zawng theuh bawk. Miria te pawh hian Pathian hi chu an hre em em a, Pathian hming pawh an lam zing hle thin. Mahse Pathian hnen a kalna kawng an hriat loh a vangin an hriatna kawng kawngah an kal ve mai ni in ka hria. Pathian hnen thlen theihna kawng dik an hriat loh a vangin kal ngaihna an hre lo a, chuvangin setana (ramhuai) hi an tlawn ringawt ni ber in a lang.



Mire hnam zingah hian Buddhist bante (Puithiam) pa hnih khat chu an awm ve tawh. Kan sawi tawh ang khan Miria te hian ramhuai hi an hlau em em mai a, chuvangin ramhuai awmna ni a an ngaih a piangah chuan inthawina an hlan chawt zel mai thin. Mithi an hlauh thin em a vangin an chhungkaw zinga mi pawh thi se thenkhat chuan an hlau tho thin.



Hetia ramhuai an hlah em vangte pawh a ni mahna, ramhuai thawm sawi tur leh thlahrang sawi tur an hre thei khawp mai. Ramhuai pawh hian a hnen a an inthawi dan a dik loh chuan zahngaihna leh khawngaihna nei miah lovin chawplehchihin a tisualtu chu a tihlum mai ni in thenkhat chuan an sawi.

## 2. **Krama sakhua**

## *Krama sakhaw tihchhuaktu Menleh*

Krama sakhua hi anmahni Mire tlangval Menleh tihchhuah a ni a. Menleh hi kum 1965 khan a piang a, a pa chu Mensing a ni a, a nu chu Tumte a ni. A ni hi an unau zinga a upa ber a ni a, a unaute chu Kirown leh Menia te an ni. Menleh hi khawlai fa a ni a, Menleh nu hian raipuar chungin pasal a nei a, a pasal Mensing inah Menleh hi a piang a ni.



Bung hmasa lamah kan sawi tawh ang khan Miria te hian sawn an pâi chuan an fapai chu an nu leh pa te in a hrin ai chuan pasal neih thuai a, an pasalte in a hrin chu an tih dan phung a ni a, mipate pawhin anmahni fa ni kher lo pawh hmeichhia rai thei tih chiangsa neih chu an hnualsuat miah lo mai ni lovin nau nei thei tih a a chian sa a vangin an duh zawk emaw tih mai tur a ni tih kan sawi tawh kha.

Menleh-a hi kum 13 mi a nih in Bandarban khawpui bul lawk Sualok a Murung Complex-ah chuan aþhianta chu sikul an kal a, a ni pawh chuan aþhianta nen a sikul kal chu a châk ve thei em em thin a, mahse a nu leh pa te chuan a sikul kal chu an phal tlat lo mai a. Atawpah chuan a nu leh pa te phal lo chung chu sikul-ah chuan a kal ve ta a, an khua aþangin Sualok a an sikul kalna chu a hla vak lova.

Apa phal lo chung sikul a kal luih a vang chuan a pa chu Menleh chungah chuan a thintim em em mai a, a tuitthlar hial nghe nghe a. Mahse Menleh chuan lehkhah chu a zir lui zel thova. A sikul kalnaah te chuan naupang tha tak a ni a, midang tanpuite chu nuam a ti hle thin a, thil lem han ziaik neuhe neuhte hi nuam a ti hle bawh, keimah

ngei pawhin a sava lem ziahte pawh, aṭhianpa kan khua Empu a mi Ruiianga hnen a ṭangin ka hmu ve a ni.

Pawl ruk a nih chuan a mizia chu a lo dang ta a, amah chauhva thil ziah neuh neuh chu a ching ta em em mai a, chung a thil ziate chu Mire hawrawp a lo ni a, achang leh a ṭhian te'n an en dik pui a, tun a kan Pastor nita Iowngrung-a phei chuan a hawrawp siamah hian a pui nasa hle ni in Iowngrung chuan a sawi.

Kum 1985 chuan aṭhianta rin phak bâk in a lo danglam a, sakhua hial a lo siamchhuak a, chu a sakhaw siamchhuah chu, 'Krama di' ti in a vuah a ni. Hetia a sikul kal lai a sakhaw thar a siamchhuah thu leh Mire hawrawp a siamchhuah thu a sawi hian ṭhenkhat in an ngaih thutak em em lai in ṭhenkhat chuan an ngai thutak em em lem lova.

Kum 1986 aṭang chuan a sakhaw thar siamchhuah leh Mire hawrawp a siamchhuah chu mite zirtir turin an sikul a ṭang chuan a chhuak a, "Keini Miria te hi Kristian-ah pawh kan awm tak tak thei lova, Budhist tak tak lah kan ni thei hek lo. Eng sakhua mah bulfuk taka biak leh zui kan neih loh a vangin kan tan chuan chhandamna hmuh a har em em a, chuvang chuan kan hnam chhandam turin Pathian in kei hi minrawn tir a ni. Hman a Pathian in hnam tinte tan a hawrawp a sem lai a kan hawrawp bawng in min ei sak kha ka hnenah Pathian in min pe let leh a, chuvangin bawng chhun a ngai tawh lovang.....," ti in a sakhaw hmuhchhuah thar chu a chipui Miriate hnenah chuan a han zir tir ṭan ta a.

Mi tam tak chuan an lo la thutak em em mai a, chutiangte a nih tak a vangin a apa chuan Menleh chu a fa ang a a lâk luh leh theih nan an hnam dan in vawk a chhun a, tichuan Menleh chu an inah a pa fapa angin a haw leh thei ta a. (Mire danah tuithlar tawh fa a la lut leh tur chuan vawk chhun a ngai a) Mite chuan chu sakhaw thar chu an bawh ruih ruih ta mai a, Pathian in a pek, an hawrawp bawng in a ei tak; Menleh hmanga Pathian in arawn pe leh ni a an hriatna chuan chu sakhaw thar 'Krama di' sakhua leh Menleh chhandamtu a an rinna chu a tih ngheh phah hle mai a. Kar loah chu sakhaw thar chuan Miriate awmna tawh phawt chu a fan chhuak ta mai a, a zuitute pawh an pung chak em em a ni.

Hemi kum 1986 hian a sakhaw siamchhuah thar chu zirtir in a zin kual a, Burma ah a chho nghal a, Burma a achhoh hma in, “Ni chhuahna lamah ka kal dawn a, kumnga hnuah ka lo kir leh a nga, keimah min ringtute chu ka rawn chhandam vek ang,” a ti a. Tichuan Burma ah chuan a chho ta a, tun thleng hian a lo let leh tawh lo a ni.

Menleh akalbo hnu hian a sakhaw thar siam Krama sakhaw hruaitute chuan Menleh sawi angin thu tam tak an phuah belh a, kan Bible a thu tha tak tak; Isua sawite, Pawla sawi te hi an copy a Menleh sawi ang mai in an sakhaw bu-ah te an ziaa a, tin sakhaw chitin mai hi an ringin an la kual a, chung an lak zingah chuan Hindu Sakhaw thawnthu Rama leh Sita thawntu phei chu an sakhua emaw tih mai turin an sakhaw kûtpui leh hun pawimawhahte chuan an sakhaw hruaitu te’n tlaivar thak thakin an sawi in a ngaithlatu te pawhin an ngaithla peih a, a film pawh an chhuah nasa thei khawp mai.

Budhist sakhua lah ni se, Changkran, a Budhist ho in an pathian lim chibai bukna-ah lah, milem pathian chibai buk chu a phur phur an ni in an sakhaw hruaitu te lah Budhist bante (puithiam) ang hrim in an milem pathian bulah an tâp chawt a, milem pathian chibai buktute malsawmna lo pek chu a phur phurah an la tang zui lehngal.

Inthawihna lah ni se, Budhist a an awm lai a an inthawihna chu “*Changnat*” an ti a, mahse Krama sakhua a an awm chuan ramhuai hnen a inthawihna tho ni si in a hming an thlak a, “*Baingnia*” an ti thung a, ‘baingnia’ tih hi kan awmna lam vai tang a ni a, ‘changnat’ tih nen thuhmun tho a ni. Ramhuai hnen a inthawina tho a ni. A hming an ti danglam ringawt a ni.

Kristian tihdan lâk lamah ni se, kan sawi tawh ang khan kan Bible a mi thu tha tak tak la in an sakhaw buah Menleh ziaa angin an ziaa a, Johan 3:19 “...eng khawvelah a lo kal a,, nimahsela mi te’n eng aiin thim an duh zawk....” tih te leh Johana 1:11 “Amite hnenah a lo kal a, ama mi te’n an lo lawm si lo.” tih te leh a dangte pawh an sakhaw bu-ah an ziaa nual a ni. Menleh ama mite chhandam turin pathian in a rawn tir a, mahse tam tak in an rin ve loh a vangin he thu hi Menleh-a’n ama chungchang asawina angin an ziaa a ni. Pathian ni

an serh ve a, nilai zan leh inrin ni zan pawh an inkhawm ve a, nilai zan phei chuan nupa pawh nupa nun hman thianga loah an ngai a ni.

Tum khat chu an sakhaw hruaitu pakhat in Bible chhiar a chak thu sawi in Bible min dil a, pek ngei tha ka ti in a remchan hun a ka pek tur thu ka sawi a, kan Evangelist pakhat chuan, “Pe reng reng suh, an ni hi chu Baibul pek a tha miah lo a nia, a chhung thu tha tha hi an ru chhuak a, an Krama sakhaw hmuchhuaktu Menleh sawi angin an ziak zel a,” a ti a, ka pe duh ta lo a ni.

Menleh-a hawrawp siam chu anmahni Krama sakhaw hawrawp bikah an ngai a, han tlangzarh vak pawh an phal lo a, mahse Mire hawrsawp siam chhuah a nih a vangin Mire hnam zinga lehkhia thiam deuh leh Mire hnam Leader te chuan ‘Mire hawrawp’ ti a Miria zawnz zawnz zir theih a siam an duh hle a, Sorkar leh N.G.O. hrang hrang pawhin an tanpui viau na in Krama sakhua a chhuah tantirh a an zir uar viau ang kha chuan mi te’n an ngaihsak lutuk vak tawh lo.

Thenkhat in min hrilh dan chuan, “Menleh awm lai kha chuan Krama hawrawp hi kan zir rei ngai lova, reilote kan zir chuan kan thiam zung zung zel mai a ni,” an ti. Menleh chungchangah hian a mah ringtute chuan achanchin mak tak tak sawi tur an hre tam khawp mai. Krama sakhaw zuitu a an hruaitute chuan an chhandamtu in, “Kum nga hnua ka rawn let leh a nga, min ringtute chu ka rawn chhandam vek ang,” a ti a.

Mahse tun thleng a a lo la rawn lan si loh a vangin a awmna tur ni a an ngaihte leh thil dang tam tak pawh an zeldin na leh an rindante chu an mi leh sate hnem nan an thutak sawi hmiah hmiah mai a, an mi leh sa te lah chuan thil nithei a nih leh nihloh lam ngaihtuah miah lovin an sakhaw hruaitute sawi a nih chuan dawt ngialngan tak tak pawh an awih em em zel mai lehngal a. Hmelma pa setana hian chuan kan unau Miriate hi chu a vahan bum kowi nasa tehlu em!!

An sakhaw hruaitute chuan an mite hnenah chuan hetiang te hian an sawi a, “Tunah hian Menleh chu khawvel a tlang sang berah pathian hnen a chakna dil a tawngtai in a awm a, a tawngtaina tlang san zawnz chu ni nen a inchen a, chutah chuan pangpar a vul chuk a,” ti

te in an mite an hrilh in an mitthla dante chu a lem mawi fahran lem lo hian an ziaak kur ngiai nguai a ni.

Menleh-a chu khawchhak lam atangin sakawr var chung a chuangin arawn kal a nga, a rualin mi pahnih sakawr chung a chuang bawkin anrawn kal ve a nga, mahse, amah chu hriat theihna riau awm turin an sawi. Arawn kal hun chuan khawvelah indopui a lo thleng a nga, Menleh chuan khawvel a hnam zawng zawng chu a hneh vek a nga, khawvelah hian mi tlemte an dam ang.

Menleh arawn kal hun chuan hmanlai a mithi tawh, thingah leh lung a chang tawhte chu mihringah an chang leh vak a nga, chungte chu anmahni lam tang vek turin an sawi. Chuvang chuan lui a an kalte hian lung chung a thut emaw, thawmhnaw dah emaw an duh lo, mihring a lo chang leh tura an ngaih vang a ni.

Menleha'n a sakhaw zuitute a zirtir dan chu; Ramhuai hnenah inthawih loh tur. Inthawihna sa ei loh tur. Pathian ni serh tur. Pathian niah chuan ran pawh thah emaw hralh loh tur. Pathian ni zan, Nilai zan leh Inrinni zanahte chuan nupa pawh nupa nun hman loh tur. Zu in loh tur. Thawmhnaw inbel lova awm loh tur. Hmeichhia pawh pawnfen fual fen a mipa pawh lawnggi var veng a puan var bah tawh tur. Mipa chuan sam chhipah zial vek tur.

Heng lo pawh hi thil tam tak a zirtir a, a awm tawh loh hnuin an sakhaw hruaitute chuan an sakhaw dan leh dunte chu an tidang lam zing thei hle mai a. Menleh chu a awm tawh bawk si lova, an sakhaw hruaitute chuan an dan sawi leh an rin dan pawh a dang nuk hlawm mai. He sakhua-ah hian Miria nilo Khumi hnamte pawh an awm ve bawk.

Hetia Mire sakhaw thar a lo chhuah lai hian Kristian Missionary te'n Mire ram an chhuahsan duak lai tak a ni a. Krama sakhua a lo chhuah hma hi chuan NEIG Missionary te leh Voluntary Missionary te an lo awm tawh thin a. Miria te chuan Kristian chu an lo hmelhriat ve nial nual tawh a. Hetia Krama sakhua a lo chhuah hian Mire ram-ah chanchintha hriltu hun rei tak an awm tawh loh a vangin an nun chu a ruakin an khawhar lai tak a ni a.

Ramhuai hnen a inthawih an lo ning em em tawh bawk si a, an nun in Pathian an zawn a an nun ruah lai tak chuan hmelmapa Setana chuan Miria te thinlung ruakah chuan dik awm tak a lang, mahse a tawp thihna nisi in a bum thlu ta a ni. Hmelmapa Setana chuan Mire ho te awlsam tak a a bumna thang a an awh theih nan Mire hawrawp, hnam dang tawng ziah fiah chu sawi loh, an tawng pawh zia fiah vek hleihtheih loh a pe tel ngei bawk a.

Chu sakhaw rin dan leh inzirtir dante, sakhua a lo chhuah dante, eng thlarau berin nge thawk tih pawh hre lo leh ngaihtuah thiam lote pawhin Menleha'n hawrawp a han siam chhuak hrim hrim mai pawh chu mak an ti in chu sakhua chu an rin phah em em a ni. Menleh chanchin te chu "An ti" tih ringawt hian mak tak takin an sawi thin a. "Mire sakhua a ni," an han tih ringawt pawh chuan an bawr nasa in sakhaw thar leh hawrawp an nei chu an lawm mai nilovin an inchhuang zawk emaw tih mai tur a ni.

Chu sakhaw thar chu Kristian zirtirna zulzui a nih a vingin an hnen a Pathian thu sawi pawh a har em em mai a, han sawi pawh ni ila, "Krama leh Kristian te chu kan inang reng a lawm, Menleh pawh Isua ang tho a lawm," an ti a. Krama sakhaw hruaitu te an tawngtai chuan rulpui tar dakamang (Dragon) hming lam lo chuan an tawngtai an tawp thei lo a ni.

An sakhaw hunpui te lah chu lawilo dawrpui ang mai in pawisa khelh, zu zawrh leh nula leh tlangvalte nuam tawlina hmun hi a ni hawt mai a. An pathian thu sawi leh an khawmpui han hmuh chuan an lainat awmin hmelmapa setana sual zia leh fin vervek zia hi a lang Chiang hle a ni. Hetiang tak a Setana'n a abum tawhte Krista hnen a hruai chhuak turin Lalpa'n mi ti mauh si a. A va han harsa thin tak em.

Menleh hian a sakhaw thar chanchin mite hnen a sawi tura a zin chhuak chu Burma a Mire ho awmna te a thlang a, Burma a Mire ho te pawh chuan an lo lawm em em a, sakhaw thar an nei te, hawrawp thar an neite chu an lawm em em a. Menleh chuan Burma a amah ringtu, a sakhua zuitute zingah chuan hruaitute a ruat a, chu a hruaitu

ruat chu Menlung a ni a. Menleh chu chumi hmun aṭang pawh chuan a chhuak leh a.

Kum nga hnuah amah ringtute chhandam turin a rawn kir leh tur thu leh a rawn kal dawn chuan khawvelah indona a thlen dawn thu te, chu indonaah chuan mitam tak an thih dawn thute a sawi a vangin Burma a Krama sakhaw hruaitu atan a a ruat Menlung chuan, “Menleh a rawn kal dawn hnai tawh a, khawvel a buai dawn a, chuvang chuan tar ho chu in dam reng chuan a buai thlak,” ti in tar 13 lai mai chu a that a, chung a tar thahna hmun chu, Burma Rakhaing (Mawk) State a Mire khua Ramdawng khua ah tar 2. Plaksai khua ah tar 4, Naingsik khuaah tar 5, Tawngsawng kriaah tar 2 a that a ni. Amah Menlung pawh chu tar a thah chiam a vang chuan Lawnghina’n a kap hlum ve nghal a ni.

Menlunga’n tar athah chiam a vangin chung a tar thah chhungte leh mi engemaw zat chu Bangladesh ah an rawn tlanchhia a, chung rawn tlanchhia te nen chuan Bangladesh Burma ram dep lam Bawrawbiti lam a Pathian thu sawi a kan kal lai in kan in hmu a, an ni chuan Menlung chan chin leh Menleh thih dante hetiang hian min hrilh a, “Krama sakhaw tichhuaktu Menleh kan khua a a rawn kal lai in a thu sawi chu kan awih em em a, keini Miria te chu Krama sakhua ah chuan kan awm a, Menlunga chu Krama sakhua a hruaituah a dah a Menleh chu hmun dangah a kal leh a, chuta a kalna ah chuan Burma sipai te’n zin theihna tur phalna lehkha (Permission) an lo dil a.

A ni chuan, ‘Pathian ka ni a, ka mi te zawng zawng chhandamtu tur ka ni a, ka kal zel a ngai,’ a ti a, Burma sipaite chuan, ‘Phalna lehkha tel lova kal luih i tum a nih chuan kan kap mai ang che, a kal theih loh,’ an ti a. A ni chuan, ‘pathian ka ni a, min kap mah ula nithum hnuah ka lo tho leh thovang,’ a ti a. Menleh chu Burma sipai chuan an kap a, a thi a, an camp thlangah an phum a, chuta ṭang chuan a tho leh tawh lo a ni ang, khawiah mah amah hmu an awm tawh lo a ni,” ti in min hrilh. Chutiang a min hrilhtu thenkhat chu Kristianah rawn inpe te pawh an awm a ni. Krama sakhaw hmuchhuaktu Menleh a thih dan min hrilhtu zing a a hming ka la hriat chu Kawngbawr Taisang hnam, Hungkut khua a mi a ni. A ni hian Menlunga’n hian tar 13 laia athah bākah piangsual te pawh a thah thu min hrilh bawh.

Krama sakhaw zuitu zingah hian Menlung bâkah eng thlarau emaw chang a chanchin maksak leh nuihzat thlak tak tak sawi tur nei an awm nual bawk a. Chung an chanchinah chuan thil mak angreng tak tak leh nuihzat thlak tak tak pawh a awm nual bawk. Chungte chu a ruh lang rawt a sawi dawn chuan sakhuana lam thilte a nih a vangin sawi vek kher chu a tha lo zawk a ka rin avangin ka sawi vek loh a pawl lo zawk ang.

**Krama sakhaw zuitu zinga chanchin neitham leh maksak zualte:**

1. **Sowidowi Lawngmadi :** A ni hi Krama sakhaw ti chhuaktu Menleh tih lohah chuan pathian ang hial a an biak leh chibai an buk thin a ni a. Hetia Krama sakhaw zuitu te'n pathian ang hial a an ngaih a an hmuhna a pianga thingthi a, bungbu kawt kawt a chibai an buk thin a vang hian amah pawh hi pathian ang hialin a inngai tawh ni in a lang. A ni pawh hian a mah chibai buktute chu a kut pakhat emaw, pahnih emaw phar chhuakin mal a lo sawm zel thin. Ram hnim te hi mal a sawm chuan damdawiah chang vek thei-in an ngai a ni.

A awmna hi ka awmna Empu a tanga hla vak lo Hawntcha khua a ni a, an khu a Pathian thu sawi a ka kal hi chuan an sakhaw chanchin zir chian ka duh a vangin ka va tlawh ve thin a, “Unaupa,” ti in kan inko thin a. Vawikhat chu Sowidowia hian, “Unaupa, India Thailand ah min hruai teh, kei chu motor ka chuang ve ngai lova, thlawhna in min hruai a ngai ang, min hruai a nih chuan mal ka sawm ang che nga, mal ka sawm che chuan ram khat lal i ni dawn a ni,” min ti a. kei chuan, “Unaupa, Eng vangin nge Thailand-ah chuan kal i duh a?” ka ti a.

A ni chuan, “India Thailand-ah chuan Miria in za an awm a, Dhaka thlang lamah pawh Miria in za aitam an awm, India Thailand a Mire awmte chu tlawh chhuah ka du a ni,” a ti a, kei chuan, Engtingnge Thailand-ah chuan Miria an awm tih i hriat?” ka ti a. A ni chuan, “Dangpuithu an ei a lawm,” a ti a. India ah Thailand a awm loh thu ka sawi chiam pawh chuan, “A awm a lawm,” ti in a tang tlat mai a, Kei chuan, “Thai land a kal i duh chuan ka hruai thei lovang che, nang chu ke ngawt in i kal thin bawk si a, ke in Burma atangin kal la



Burma i kal pelh chuan Thailand chu i thleng mai ang, bâkah ram awptu lal nih chu ka duh hran lo, ram zawng zawngin lal an nei vek tawh a,...” ka ti a.

Ka sawi tawh ang khan Sowidowi a chanchin hi maksak pui pui leh nuihzatthlak tak tak dawt ngialngan tak tak a sawi ka hre nual a, mahse han sawi vek kher chu Krama sakhaw hruaitu te a nih si a vangin sawi vek loh chu a thazawk a ka rin a vangin ka sawi vek lo mai ange. Chung a thil tih leh a thil sawi maksak leh nuihzat thlak tak takte chu a mi leh sa te’n pathian biak tak a an biak avangin a mah pawh pathian ah a in ngaih a vang a ti leh sawi niin a lang.

## 2. **Paubawng mala** (Nula Chamleh)

Kum 1998 Changkran (an kum thar lawm ni) ah a thiante nen Rumthu khua a tangin Changkran kûtpui an hman thinna Ngarinchah khua ah chuan an kal ve a, an haw lam a an khua an thlen dawn chuan a ni chu ramhnuai-ah a kal a, a thiante chuan an hawsan a. A ni chu amahin ramhnuai-ah zan khat a riak a. Atuk a khua a rawn haw chuan thlarau pawlna a chang a, pawisa puk a hmuh thute a sawi a.



Chuta tang chuan a khattawk in nikhaw hre lovin a awm thin a. Chutia nikhaw hre lova a awm a lo harh chuan a thlarau chu vanah a han chho thin a, Menleh a hmuh thute a sawi thin a, chutiang a a awm chuan arsi nula hovin lâm an lo zirtir thin a, chu lâm chu Krama sakhua hian lam an neih loh a vanga an sakhaw lâm a nih thute a sawi a. Chuvangin Krama sakhaw zuitu nula leh tlangval te chu lam a zirtir thin a. Krama sakhaw zuitute chuan an ngaisang em em mai a.

Krama sakhaw hmuchhuaktu Menleh farnu angin a tir chuan a insawi a, Menleh-a nu leh pa awmna Krukna khua-ah chuan a zu kal a, Menleh-a nu leh pa hnenah chuan Menleh farnu a nih thu leh Menleh awm lai a zawhte dum an neih tawh thute a sawi a, Menleh-a nu leh pa chu, “Ka nu, ka pa,” ti in a kova. Menleh a nu leh pa te

hnen a a awm lai khan zawhte dum an neih thute a sawi a, a sawi ang chuan Menleh-a, a nu leh pa te hnen a a awm lai chuan zawhte dum chu an lo nei tak tak a ni awm e. Chuta t̃ang pheĩ chuan mite chuan Chamleh thu sawi apiang chu an ring em em vek tawh mai a. Menleh-a nu leh pa te pawh chuan an fanu angin an lo pawm a. Ahming thar a tan, “Paubawng Mala” ti in hming thar mawi tak an lo phuah sak a, chu hming awmzia chu, “Pangpar zeh mawi lanu” tihna a ni.

Chuta t̃ang chuan khaw tinah a lamin, l̃amte a zirtir t̃hin a. (kei pawh in a lam lai chu ka va en ve nghe nghe a) Alam dan chuan mu leh mal a neih loh em a vangin mite chuan han zir ve t̃hin mahse an lam rual thei ngai reng reng lo mai a, lam zirtute chu a lam ang a an lam thiam loh a vangin t̃awng zahmawh pui pui in a hrawk hrep t̃hin a, mahse tumah an thinrim ngam ngai lo.

Paubawng Mala chu a hmelth̃a in apian a nalh a, t̃awngkam athiam em em bawk a, zai pawh athiam in a aw pawh a th̃a phian a, changkran pawĩ (Kum thar k̃ut) te hian a zai nilen thak changte a awm thin, mipui tam takin a zai an ngaithla t̃huap t̃hin. Mi hip theihna riau pawh a nei emaw tih tur hial a ni. Chutia a rawn lar chhuah chuan Krama zuitu pawh an pun phah in an sakhaw thar chuan a t̃handuan phah hle mai a.

Akalna apiangah apui a nawi in an zui duah duah reng mai a, kawng a a kalte hian a hnungah chiah chuan an sakhaw hruaitu te’n an zui a, chumi hnuah midangin an rawn zui leh a, a kal kawĩ leh an kawĩ ve zel a, an inzui kawĩ nguah nguah a, Paubawng Mala zuitute chu an intlar thui thei t̃hin khawp mai. An sakhaw biakin thar hawnna apiangahte chuan lam turin an sawm t̃hin.

A awmna turin “In thianghlim” (Kimsai) an tih chu an sak sak a, a ni chuan, “Hmeichhe eirawngbawl ka ei thei lova, hmeichhe thawmhnaw suk ka ha thei lo,” atih a vangin an sakhaw hruaitu mipa te chuan eirawng an bawl sakin a thawmhnawte pawh an suk sak a. Mi thianghlim ang mai in an cheibawl a.

Vawikhat chu an khua Rumthu-ah buhseng lai in, “Menleh a rawn kal dawn a, kan lo hmuah a ngai,” ati a, in lianpui an sa a, chutah chuan Menleh-a hawrawp siamchhuahte chu an zir a, lam an zir bawk a, achhun a za nin an ɽawngɽai reng bawk a, tumah in buhseng nachang pawh an hre lova, chumi kum chuan an buh chu seng loh in a riral vek a, Menleh pawh chu a rawn kal si lova, an khua chu an pem chhuahsan (rauh san) vek phah ta a ni. Paubawng Mala hi a huntawp lamah chuan hmeichhiat mipatna lamah a tlan nasa hle a, Krama sakhaw zuitute pawh in a tir a an ngaihsan ang chuan an ngaisang thei lo a ni.

Krama biak in

3. **Pasing-a** : Hetiang a Chamleh (Paubawng Mala) nikhaw hre lova a awm lai a van a thlarau achho ɽhin ni a a insawi ɽhin hnu hian Krama sakhaw zuitute'n an ngaihsan theih em avangin midang pawh chutiang chuan nikhaw hre lovin an lo awm ve ta sup sup mai a, chungte pawh chu an bawr nasa thei leh ɽhin khawp mai, an vai chuan sawi sen chi pawh an nih loh a vangin chutiang a awm zing a pakhat han sawi ila, chumi kan sawi tur hming chu Pasing a ni.



A ni hi ramhnuaiah chawnghei a ɽawngɽai in hun rei tak a awm ɽhin a, a chang chuan nikhaw hre lovin hun rei tak tak a awm ɽhin a. Chutiang a nikhaw hre lova a awm lai chuan Paubawng Mala ang mai in athalarau chu vanah han chhova pathian in thal kah a zirtir ni in a sawi a, ɽawng lovin rei tak tak thal kah zir niawm tak hian a awm ɽhin a, “Enge a thil zaizir chu a awmzia?” ti a an zawh chuan, “Indo ka zir a ni, Menleh a rawn kal hunah khawvelah hian indopui a lo thleng dawn a, chutih hun a Rama (Hindu pathian) thal ka kah theih nan ka lo zir lawk a ni,” a ti a. Chupawh chu Krama sakhaw zuitute chuan chawtak khukin an khukupi leh a.

In thinganghlim (Kimsai) sa in chutah chuan an awm tir leh a, Paubawng Mala angin mipa in a ei tur eirawng an bawl sak in a thawmhna pawh chu mipa in an suk sak leh a, mithianghlim ang hial in an ngai leh a ni. A hma a Paubawng Mala an ngaihsan em em leh an buaipui em em mai chu mipat hmeichhiat na lamah a lo

hmingchhiat tawh em avangin Paubawng Mala vul lai ang em em chuan mi in an bawr tawh hran lem lo.

4. **Kasim-a** : A ni hi damdawi lam thiamna thlarau chang ni in an sawi a, a ni pawh hi engemaw chang chuan a hma a mi pahnihte ang bawkin nikhaw hre lovin a awm ve thin a. In thianghlim pawh an sak sak ve a, mithianghlim ang mai in an ngai ve leh a ni. A ni hi nupui nei lai a ni a, atir chuan a nupui pawh a then phah nghe nghe a, mahse a hnuah chuan a nupui a then tak bawk chu a nei leh a ni.

Nikhaw hre lo va a awm a, a thlarau van a a lawn dawn ni chuan a khua in awmni kham in hun an hmang thin a, mahse a ni pawh hi hmeichhiat mipatna lamah a hming chhiat leh tak a vangin mithianghlim a an pawmna pawh chu sut leh in in thianghlim a a awm pawh an phal leh ta lo a ni.

5. **Menlung-a** : A ni hi Burma a Miria, Mire sakhaw tichhuaktu Menleha'n Burma a Krama sakhaw hruaitu a a ruat a ni a, achanchin kan sawi nual tawh a, khang a chanchin kan sai tawh kha chu kan sawi tawh lovang.

A ni hi mi maksak ve tak chu ni in a lang. A awmna ah chuan in lianpui a sa a, chutah chuan nula engemaw zat an awm a, thenkhat chuan chung nulate chu a nupui vek an ni tite pawh an awm. Tlangval pawh thahnem tham tak sipai rual a nei ni in an sawi bawk. Tar leh piangsualte a thah chiam tum pawh in a sipai hote nen chung tar leh piangsualte chu an that ni in an sawi.

Krama sakhaw zuitu te hian inserh hran an uar hle mai a. Thenkhat chu ramhnuaiah hun rei tak tak chawnghei a tawngtai in an inserhhrang thin a. Chu chu “Chang tawp” an ti. Heng ho hian sakhua a vangin an intihreawm thin a ni. Chutia ramhnuai a hun rei tak an inserhhran hun an paltlang thei a nih chuan mithianghlim ang hial leh thilmak pawh tithei turah an inngai a ni. Chumite chu an zah in pathian ang hial in an be thin a ni.

Hetih hun lai hian hmun hran hranah hetiang a nikhaw hre lova an thlarau van a han kal ni a an sawi hi an awm nual a, anni chuan “*Alawng pawk*” an ti a, Alawng tih chu “Chhandamtu (Hindu in

‘Sadu’ an tih ang deuh hi), mithianghlim” tihna tluk a ni a, “Pawk” tih chu “Chhuak” “Chhandamtu, mithianghlim a rawn chhuak” an tihna a ni.

Kan hmelma Setana hian kan unau Miria te thlarau hruai bo mai duhtawk lovin chu ami hruai bote chu an bopil thuk deuh deuh theih nan, khing a chung a an chanchin kan sawi takte leh mi tam tak hmanruah a hmang in athlarau in a pawl thin a, chung a hmanruate chu a ven sen bik loh vang nge, a hnathawh leh a hna thawktute rahchhuah dan ve reng tur a nih vang zawk? Nge Mire hnam zinga a rawngbawltute hmang hian a hnathawhah a hlawhtling em a, a lawm a vingin arawngbawltute chu an hmuiah chithlum a tah sak hlek pawh a ni mahna, sum leh pai leh hmaichhiat mipatna lamah mualpho tangrangin a siam leh si thin a, thenkhat te lah rawva, raphlak takin a tawpah chuan ramhuai ang main a chhuah tirta pawh an awm bawh.

Kan unau Miriate lah hi tunlai khawvel changkang tawh tak Civilization sang tak hun a awm si hian tuma tlawhpawh loh ram pilril a awm, hnam mawl ho ang mai hian an la awm tlat mai bawh si a, an sakhaw hruaitute thusawi chu a kawi a ngilin an awih em em mai bawh si.

Vawikhat chu kan khua Empu a tang a hla vak lo Krama sakhaw zuitu khua Dawla khua-ah Pathian thu hril in ka tingtang te kengin ka kal a, zanah ka thlenna in a tangin Pathian thu sawi turin Kharbari inah ka kal a, chutah chuan mi an lo awm nual mai a, chungmite chuan an kharbari Mensin, an sakhaw hruaitu Kharbari ni bawh thusawi chu ngaihnaawm ti tak hian an lo ngaithla thuap mai a, kei pawh chuan hun engemaw chen chu ka ngaithla ve a.

Chuta a thusai chu Hindu sakhaw thawnthu, Rama leh Sita thawnthu a zawng lian chanchin kha a sawi a, “Zawng lian chuan thufinriat lehlamah a ke ngghatin aral lehlamah a ke lahlam a ngghat leh a, tuifinriatah chuan a e a, a êk chu tuifinriatah chuan a khat vek a,” a ti a, kei chuan a thu sawi chu a rin leh rin loh ka zawt a, an ni chuan, “Pathian thu a ni tlat a, chuvang in kan awih a lawm,” a ti a.

Krama sakhaw hruaitu Lawngmadi an tih Sowidowi-a pawh in, “Menleh chu pathian hnenah a tawngtai mek a, a tawngtaina tlang chu khawvel a tlangsang ber Hungmarüano tlangah a ni a, chu tlangah chuan pangpar a tam em em mai a, a vawt em em mai baw a, a vawh em a vangin thir pawh a tui vek thei a ni,” a ti a, Krama sakhaw zuitute chuan an awih em em mai a ni. Heng ka han tarlante hi ka bula an sawi leh ka beng ngei a ka hriatte an ni a, a dang pawh sawi tur tam tak a la awm a mahse ka sawi vek lo mai ang.

Krama sakhua hi a mak ve na tak mai chu tawng chungchangah hian a ni a, Mire tawng hmang tho si hian an pathian thu an han sawi te hian an tawngkam hman hi a dang riau bik mai a, an han tawngtai te hian bahlah awm miah lovin kel bang liak an sawi ang par par hian a rik hian an ri par par mai a, an tawngtai a an thu chham deuh ber chu an lo pian nawn leh hun a sakawr chung a chuan theih nante, thlawhna a an chuan theih nante, bawm tha leh ngunhnam tha an neih nante, mihausa a an lo pian nante rang fahran mai hian an sawi par par thin a, kan sawi tawh ang khan an tawngtai tawpna chu Diabawla Dragon (daka mang, praingma mang) rulpui tar hming lam lo chuan an tawngtai an ti tawp ngai lo.

An sakhaw hruaitu tur pawh thuneihna hrang hrang an invuahin an inruat ve thlap a, chungmite chu an zah thiam thin khawp mai.

### **Krama sakhaw hruaitu a an invuah dan chu hetiang hi a ni:**

1. **Rimidi** : Menleh-a kut ding lam leh Bangladesh a Krama sakua a hotu lu ber. Ahming chu Parau a ni a, a ni hi sum leh hmeichhiat mipat a vangin a tla tawh.
2. **Laksawng** : Rimidi Parau-a thachhangdaltute, Singlo leh Lengiang te an ni.
3. **Nat hawkia** : Malsawmna diltu (Nat tih hi Kawltawng ‘Nait’ tih a tawng a lak a ni a, ‘ramhuai’ tihna a ni. ‘Hawkia’ tih chu ‘Kotu’ tihna a ni a, a awmzia tak chu “Ramhuai kotu” tihna a ni. Mase, a mawi zawngin (Setana bumna) “Malsawmna diltu” an ti.
4. **Tara up** : An sakhaw dan a thuneitu.

5. **Ri up** : An sakhaw dan siamtu. (Akhattawk in an sakhaw dan hi an siam danglam fo thin)
6. **Chakhang up** : Damdawi chung a thuneitu. Ramhmul engkim mai hi a ni hian mal a sawm chuan damdawi tha takah lo chang mai turin an ngai thin.
7. **Rip up** : Zilh ngaite zilhtu.
8. **Cha up** : An kekhha enkawltu leh an pathian thute ziaktu.
9. **Sangmadi** : Lekhha zirtirtu.
10. **Lawngmadi** : Mithianghlim a an ngai.

Hengte hi an sakhaw tichhuaktu Menleha'n reng (an lal dan) ruk theuh a pe ni in an sawi a, a mah Menleh-a chu reng riat ni in an sawi. Reng chu Krama sakhaw tawng chuan "*Phung*" an ti. Heng an sakhaw hruaitute hian sa thisen nei chi reng reng an ei tur a nilova, an lo ei a nih chuan ramhuai rilru an pu hlen dawn ni in an ngai.

Krama sakhaw hruaitu te hian an awmna khuaah chuan biakin an nei deuh zel a, chu an biakin bulah chuan Kimsai (In thianghlim) an nei deuh zel bawk. Chu an inthianghlim chu an sakhaw hotu hmun dang a mi anrawn zin chang a an awmna tur a ni. Chu in thianghlim an tihah chuan an sakhaw kût pawimawhah ni sarih lei rap miah lova inserhna hmunah an hman bawk. Chu an inthianghlim a an inserhhran lai chuan midangin chaw anrawn pe thin. Chutiang a inserh hrang thin chu an sakhaw hruaitu mipa puitling an ni thin.

Krama sakhuah chuan hmeichhia hi an dah hniam em em a, an thawmhnaw thleng in, a bik takin an pawnsen phe chu an te'n leh zual. An inkhawm dawn in dar an vua a, inkhawm laiah an vaw leh a, inkhawm ban dawnah an vaw leh bawk. An biakinah naupang an inkhawn ve tur a nilova, puitling inkhawm turte chu biakin a an luh dawn in Mosolman angin an ke an sil hmasa thin. Biakin a an inkhawm hian ngaihdam dil in an tawngtai hmasa phawt a, chumi hnu in malsawmna dil in an tawngtai leh thin.

Thenkhat chu an sakhaw hruaitu "*Lawngmadi*" an tih te'n an tawngtai sak thin a. An sakhaw hruaitu te hian an mipuite chu

malsawmna an pe thin bawk. An sakhua a rawn lute chu an lu a tui thlawr in baptisma an chantir ve thin a, chu chu an tawng chuan ‘*Tângphung*’ an ti. An kalphung hi Kristiante tihdan entawn (Copy) hian Kristian zulzui deuh in an kal thin a, Pathian thu hrilh pawh an harsa em em bik a ni, “Menleh chu Isua ang a chhandamtu a ni a, kan dan leh Kristian dan pawh a inang deuh reng alawm,” an tih tlat zel a vangin kawng dik a hruai an harsa hle a ni.

**Krama sakhaw hunpuite chung hengte hi an ni :**

1. **Ning âk pawl** : Kum inthen kû (April).
2. **Ningsar kiow ri pawl** : Kum thar lawm kû (May).
3. **Taw thuak pawl** : An sakhaw hmuchhuaktu Menleh tawngtai tur a a chhuah kû (August).
4. **Ning chur Pawl** : Kum tawp kû (April).
5. **Pren kawmma miting** : Ram pum khawmpui.
6. **Menleh piancham** : Menleh piancham hi a ma sawi dan leh a nu sawi dan a danga, a nu sawi dan chuan Pathianni (Sunday) a piang ni in a sawi a, amah Menleh chuan Ninga ni apiang angin a in sawi vethung a, chuangin rin zawk tur an hre lova, a nu chu amah Menleh hringtu a nih miao si avangin an awih lo ngam si lova, Menleh a sawi lah chu, pathian ang a an biak a nih a vangin an hnawng ngam baw silova, a ni hnih hian an serh ve ve ringawt mai a ni.

“Menleh hian ‘Khawvel awm hma pawh khan ka awm tawh a, Isua rawm sipaiin an man pawh khan keiman ka chhanchhuak a ni,’ a ti e an ti. Thil mak leh awihawm lo tak tak an sawi pawh hian kan sawi tawh ang khan an mipuite chuan an awih zel thin. Hla pawh an nei a, athluk erawh chu anmahni Mire khawvel hla thluk tho an hmang. An hla chu Menleh-a chu lal a nih zia leh amah an fakna a ni tlangpui. Chung Menleh-a fakna hla chu an tumphung Rina plung nen sa in an Record a, an sakhaw hunpuiah ring tak takin an ply in an ngaithla thin.

Chung an hla thenkhatte chu han târ lang ila :

Chakra lawngia di,

A ni powng hownia leba meng ow;

Lai lawt lai sar le ru, mi sang ri lai bow,



Pawingia sang krang.  
Hawi rip sang krang, laiman le tang,  
Krawngmadi karma lawng ri tara,  
Saikcha laiman, aw chakra taing tih.  
Taing balai le, tai kawm nau leng,  
Lawng di uowlow, owm piati lai,  
Owm kawngmu lai.

He hla thu in a sawi chu, Menleh-a chu lalpa leh chhandamtu a nih ziate, he sakhu an zui a tanga tawng thar an lo neih ziate, an sakhua chu hawihhawmna leh finna a nih ziate, mite siamthatu a nih ziate, Menleh chu roreltu a nih zia leh sawisel kai lo a nih ziate. Mithenkhat in sawichhe thin mahse chu sakhua chu an zui tho dawn thute a ni.

Hei lo pawh hi Menleha'n amah a infakna hla pawh a awm a, chu chauh chu an tarlang leh ila:

Ang chakra Menleh ramsa krama,  
Mang lawng chekhai, mang lawng chekhai.  
Mang che rui lawng hung row luk hown,  
Chang rui tawp leng lusu sang ram,  
Su leng lai chum pat bow,  
Krawngma cher pau di iow,  
I maw basa chin kawm le tang,  
U saik sati mang lawng chekhai, mang lawng chekhai.

He hla hi chuan amah Menleh chu lalpa pathian a nih zia ahan insawi phawt a, chumi hnu in a thunawn ang deuh in lal a nih zia a rawn sawi nawn leh a. Chumi hnuin tlang sang tak, a san zawng chu ni chen lai a sang, "Hung maruano" ah a mite tan a tawngtai thu in a zawm leh a. Chumi hnu in a ni chu lei lalpa a nih zia leh a hming mawi tak thinlung ril tak a tanga mawi tak a lo par chhuak angin amah leh a mah a han inko a. Chumi hnu in a mah chu Mire hnam mawl leh khawngaihthlak tak chhandam turin a nu in a lo hring a ni tih a sawi na a ni.

Menleh-a hawrawp siam hian an tawng pawh a ziaak fiah kim vek theih loh thu; Menleh hawrawp zirtan bu siamtu Iamtui Headman

makpa, Sorkar Primari Teacher Menianga'n a sawi a. Chubakah Z. J. V. T te a awm loh a vangin hnam dang tawng phe chu zia theih loh a awm nual dawn a ni. He hawrawp hi Miria te'n lo hmang dawn tak tak se hawrawp a kim loh a vang hian thil hming leh thu tam tak, a biktakin Bible a mite hi zia theih loh a awm nual dawn a ni.

Chuvangin Miriate hian an nakin hun zelah Roman Script hmang a an a aw ka siam hi an tan a tha zawk dawn a ka hriat a vangin Mire Kristian tawh phawt chuan Roman Script a an a aw ka siam hi an hman zel theih nan ka theih tawkin hma ka la zel dawn a ni.

Tunah chuan Krama sakhua pawhin rawih lam a pan in Krama sakhaw zuitute atang pawhin mi engemaw zat chu Kristian-ah an rawn lut tawh a, abik takin thalaite zingah Kristian a rawn lut an tam tawh hle a ni. Thenkhat chu an hnu ngai, a angial angan a ramhuai biakna lamah an kir leh nual tawh bawk a ni. An sakhua hian inngahna bulfuk tak nei lovin sakhaw hrang hrang an pawt lawr a, bakah an sakhaw hruaitu then khatte sumah leh hmeichhiat mipatna lamah an hmingchhiat thin a vangte in tam tak chu he sakhaw zuitute hi an beidawng tawh a ni.

Heng kan unau hmelmapa Setana bum mek, hmelmapa Setana'n kawng dik zawh ni ang a a inngaih tir a, a zial at tlat te hi Lalpa'n chhanchhuah a duh a, an ni chhanchhuak tur hian kei ni Zofate hi Lalpa'n min duh a ni. An hnena kal in emaw, tawngtai na in emaw, thilpek emaw talin kan unau Miriate saltan na a ta hruaichhuak turin tan kan lak theuh hi a va han tul tak em. Kan unau Miria te'n, "Mire ramah lo kai la minpui rawh," ti in an au mek che a ni. Engtinng e i chhan dawn?

He lehkhabu chhunga thu awmte hi ngaihna in ropui viau lo mah se engemaw ti zawng tal chuan hlutna a neih ve ngei ka beisei tlat a ni. He lehkhabu chhiar tur a lo awmna chhan leh kan unau Miria te'n taksa leh thlarau a heti tak a hma an lo sawnna chhan bulpui ber chu Lalpa tanpuina vangte, Baptist Church of Mizoram (BCM) thahnemngaihna avangte leh Upa K. Lawmsanga'n Mire ram avei tlatna rahchhuah avangte leh Mire hnam vei a tawngtai leh thilpek a tan lo la tlattute avang a ni tih hi phat rual a ni lo.

Mire ram a Missionary intir tura Pu Lawmsanga'n Ambassador For Christ (AFC) Team a tanga AFC Mission Board a din a, AFC Mission Board te'n kum 3 lai an Missionary tirhte'n Mire ram kan luh theih loh bâkah an Missionary tirhte mi panga zing a mi pali lai an ban vek hnu leh AFC Mission Board an bei dawng a an tih vek hnu pawh a Mire ram a Missionary tirh ala beidawn sanduh miah loh na rah chu he lehkha bu hi a ni ka ti lothei lo a ni.

Pu Lawmsanga hi ka ngaisangin ka ngaina em em a, ka Pa ang hial a ka ngaih a ni a, thil tul a vanga Mizoram kan chhoh changte hian Mizoram chhoh phurna minpetu lian tak a ni a, Pu Lawmsanga hmuh thuai thuai ka nghakhlel em em thin a. April ni 5. 2022 Thawhlele ni ka zing tho, ka Mobile a WhatsApp ka han en a, ka fapa Amama'n (Lalrinawma) tukin zing 3:30am ah Pu Lawmsanga a thi tih minrawn hrilh a, Ambassador For Christ Team Group ka en vat a, Pu Lawmsanga chuan he khawvel alo chhuah san tak tak a ni tih ka han hriat chuan ka ui lutuk hi a tliah hian ka tliak hnawp hi a ni ber mai.

Amah Pu Lawmsanga hi he khawvelah awm tawh lo mah se, he ka lehkhahu tlang kawm nan hian he lehkhahu zia thei dinhmun a min dintirtu Pathian hmanraw ropui tak Upa K. Lawmsanga, Ambassador For Christ Team Speaker chungah leh khawngaihna rawngbawl hna min thawh tirtu ka Pa Vana mi chungah lawm thu thinlung leh tih tak zet in ka sawi e.

**Ka lehkhabu rawnte:**

1. *India, Burma leh Bangladesh a Mizo chanchin.*  
By B.Lalthangliana.
2. *Mru Hill Peple on the Border of Bangladesh.* By, Claus  
Dieter Brauns Lorenz Gloffler.
3. *Pakhik palabodol Magagin 16<sup>th</sup> September 1997.*
4. *Peace Agreement Chittagong Hill District.*
5. *Krama sakhaw bu.*
6. *Kohhran beng, March 2003 Special Issue, B.M.S In Mizoram  
Cente'nary.*
7. *Pastor Chownglowk leh Mire Upa leh mi hrang hrangte hnen  
a tang in.*
8. *Recort from Ambassador for Christ Team.*
9. *Fanai thlahtute, Mamte lal fapa Director F.Lallura ziaak a  
tang in.*
10. *Zoram in zalenna a sual Vol 5.*
11. *Miriate nun leh hnam dan. Mr Singiawng Mro ziaak a tang in.*
12. *Upa T.Lalzara Tlabung*
13. *Bualpui 'H' chanchin, Upa S.Thangbila ziaak*